

THOMÆ
CORNELII
CONSENTINI
PROGYMNASMATA
PHYSICA.



Amat

VENETIIS, M.DC.LXXXIII.

Sumptibus Bartholomæi Nicola Moreschi.

Superiorum Permissu, & Privilegio.

THE
CORNELLI
CONSENTINI
PROGYMNASTATA
PHYSICA



VENETIIS, MDCLXXXIII

Sumptibus Bartholomaei Nicolai Morichini

apud Joannem & Franciscum



LEONARDVS A CAPVA L E C T O R I.



*Um Complures hoc saculo in Physiologia illustranda feliciter e-
laborauerint, seu veterem Democriti Physicen instaurare, siue
nouam condere sunt aggressi: tum nonnulli ad inuestigandam
hominis naturam peculiari quodam studio incensi, nouas, at-
que inauditas rationes obseruationesque proferre cœperunt: ex
quibus non mediocrem profectio laudem sibi compararunt A-
sellius, Harueius, Vallæus, Cartesius, Cornelius ab Hogelande, Bacchius, Bar-
tholinus, Pecquetus, & alij. Eiusmodi quoque studio incitatus Thomas Corneli-
us vir plane eruditus, nec vulgaribus tantum, sed interioribus, & reconditis
litteris perpolitus, multa tum obseruando, tum meditando percepit, quæ ad co-
gnoscendam perspicendamque naturam hominis valde videntur conducere. Ea
verò cum aliquando amicorum consilio, atque hortatu litteris mandare instituisset,
cœpit dialogum conscribere, in quo Academicorum more disputans nihil affir-
mat, sed in vtramque partem disserendo, de omnibus quærit; nihil certò decer-
nit: hæc enim ratio philosophandi (vt Cicero monet) minimè arrogans maximè-
que & constans, & elegans est. Sed cum in eo scriptionis genere tempus o-
ciumque contereret, accidit interea, vt amici aliquot consilio inter nos inito, con-
stitueremus certis quibusdam diebus vnà congregi, vt integrum nobis esset philo-
sophicas commentationes inter nos conferre, voluptatemque, & vtilitatis aliquem
fructum ex nostris colloquijs percipere. Erat autem institutum eiusmodi, vt vnus-
quisque vicissim de re quapiam meditata oratione disserteret, & ea, quæ à confesso-
ribus contra dicerentur, refelleret. Hac igitur occasione Cornelius intermisso dia-
logo, Physica Progymnasmata, quæ in conuentu recitarentur, orsus est scribere.
Porro autem cum videret lucubrationes illas nobis mirificè arridere, & magno cun-
cti confensus plausu excipi, cœpit animum inducere easdem maiori cura perpolire,
recensere, & aliquando tandem diuulgare. Deinde posteaquam prolusiones diges-
sit, & in ordinem qualicunque is est, redegit, id mihi oneris imposuit, vt lectores
opportuna aliqua præfatione alloquerer. Ego verò ea huic operi præponenda cen-
sui, quæ ipsemet Author in dialogo exarauerat: itaque eius dialogi initium paucis*

mutatis

mutatis in vestibulo huius libri describendum curavi. Interim mihi velim adscribi si quid peccati hac in re videor admisisse. Cæterum quandoquidem hoc ego munus suscepi; meas partes esse arbitror, ut librum hunc aliqua commendatione cohonestem. Vulgare quidem est speciosis inscriptionibus insignire volumina, ac eorundem utilitatem necessitatemque in ipso statim limine prædicare. Verumtamen opus hoc (dicam enim ut res est) nihil prorsus præse ferre videtur, quod ad bene beatèque viuendum vel utile sit, vel necessarium. Sed quoniam ipsa sæpè incunditas expetitur, ac interdum nouitas, quanquam sine fructu delectat, non despero fore aliquem, qui malit hasce lucubrationes, quàm Trusiani plusquam commentum perlegere. Et verò si quisquam est hodie, cui Galileus Cartesius, & Harueius minime sordeant, haud equidem ad huius libri lectionem inuitatum peruelim: multa enim in eo, ut opinor, notabit, quæ Authoris ingenium industriamque commendare videantur. Nam ut nihil de ipsa rerum varietate non illepida memorem, certè obseruationum, ac inuentionum nouitas, & copia omnino laudem meretur. Quot enim, aut quanta profert inuenta Progymnasma illud (ut cætera sileam) quod est de Nutritione: Scilicet in primis docet cibos in ventriculo non calore confici, nec acrioribus dumtaxat succis dissolutos exteri, sed alia quadam ratione concoqui. Chylum item non per lacteas Asellij venas ad iecur permanare, neo omne alimentum per ductus Pecqueti ad cor delabi. Præterea sanguinem non in iecinore fieri, nec in corde, atque liene, nec ullam extare in animalium Corporibus peculiarem sanguinis officinam: neque porro sanguine partes auferescere, atque nutriri. Ad hæc fellis vsum obscurum sanè, & ignotum aperit. Tum vias indicat per quas humores e Corpore per aluum expurgantur. Rursus vasorum, quæ Bartholinus à se primum obseruata lymphatica nuncupauit, originem vsumque patefacit. Et tandem veram germanamque glandularum naturam, & utilitatem ostendit; ac plurimas interea nouas inauditasque obseruationes describit. Sed quid ego te Lector pluribus verbis detineam. Perlege Progymnasmata, teque Cornelij nostri cogitatis oblecta, qui illud abs te etiam, atque etiam petit, atque contendit,

Ne sua dona tibi studio disposita fideli,
Intellecta prius quàm sint, contenta relinquas.

INDEX EORVM.

Quæ in hoc Volumine continentur.



- Er ex Aquâ, ac Terræ expirationibus ætheri permixtis constituitur.* 63. & 179
- Aer ob usum respirationis recentari debet.* 134
- Aer præter modum distractus, aut compressus vitæ animalium, & ignis conservationi inutilis.* 135
- Aer nisi vaporibus aqueis permixtus respirationi inutilis.* 154. & 180
- Aer infra aquam demersus à superstantis aquâ pondere comprimitur.* 158
- Aeris in respiratione quis usus.* 134
- Aeris per necessitas tum ad vitam animalium, tum ad ignem conservandum.* 134
- Aeris gravitas.* 153
- Aeris color caeruleus unde.* 154
- Aeris, & Aquarum pondus sub eisdem demersi cur non sentiamus.* 157
- Aeris compressio, & distractio nisi æthere admissio nequit explicari.* 171
- Aeris ex aqua generatio.* 182
- Ætheris substantia omnino admittenda.* 148. & 176
- Alibilis succus ad cor confluit.* 117
- Animalia amphibia cur sub aquis diutule sine spiritu viuant.* 133
- Animalia pulmonibus prædita cur nisi respirauerint citissime moriuntur.* 132
- Animalia, quæ intercluso spiritu suffocantur dexterum cordis ventriculum, & pulmones habent multo sanguine refertos.* 132
- Animalium conformatio ex inspectione ouorum percipi facile potest.* 86
- Animalium ex semine conformatio describitur.* 86
- Animalium pars primigenia non iecur, neque Cor, neque sanguis.* 118
- Animantes exfectis testibus quandoque filios generant.* 78
- Antiquorum variæ de rerum initijs opinioniones.* 40
- Apoplecticorum, & strangulatorum similis est exitus.* 133
- Aqua frigore concreta rarescit, & in maiorem molem ampliatur.* 70. & 178
- Aqua quomodo in vapores solvatur, & in glaciem concresecat.* 178 & seq.
- Aqua sensu iudice neque contrahi, neque distrahi potest.* 171. & 180
- Aqua triformis.* 177
- Aquis inesse non potest notabilis quantitas aeris.* 179
- Archimedes ingenij doctrinaque princeps.* 30
- Aristoteles animaduertit in generatione viuiparorum fieri conceptus ouiformes.* 75
- Aristoteles ab Attico platonico philosopho notatus.* 51
- Aristoteles cur priuationem inter principia numerauerit.* 42
- Aristotelis de loco sententia improbat.* 46
- Aristotelis principia dissentanea.* 51
- Aristotelis quàm Galeni doctrina de generatione animalium sanior.* 73

Arteriæ in uteros pregnantium pertinentes frequentiores, & ampliores fiunt. 76. & seq.

Arteriæ non moventur à vi pulsifica eisdem à corde communicata, sed ab impulsu sanguinis. 128

Arteriæ omnes eodem temporis puncto ab impulsu sanguinis moventur, tam quæ cordis proximæ sunt, quam quæ à corde longissimè absunt. 129

Arteriarum venarumque plexus, atque implicatio ibi esse solet ubi fit aliqua secretio. 77

Astrologiæ coniecturalis vanitas. 200. & seq.

Attractioni vulgo tributi motus re vera pendent à circumpulsione. 142. & seq.

Auctificus succus per membranas, & nervos in partes diffunditur. 121

Auctificus succus ab Arabibus observatus, sed perperam indicatus. 122

B

Bilis à sanguine in iecinore secernitur. 115

Bilis nō est sanguinis excrementum. 114

Bilis nutritium succum diluit, & fluxum reddit. 114

Bilis utilitas. 114

Brahæus illustris Astronomus à prædictionibus astrologicis abstinuit. 202

Bruni de mundanorum innumerabilitate sententia refellitur. 57

Brunus voluminibus suis nugæ inseruit. 192

C

*Calidorum halituum magna vis in exte-
rendis duris corporibus.* 103

Calor cælestis est eiusdem naturæ, atque elemenearis. 65. & 67

Calor innatus est medicorum inane com-

mentum.

129

Calor omnis animalium est à sanguine.

130

Calor nonnunquam dissimilis naturæ corpora congregat. 65

Calore corpora non semper rarefiunt. 67

Calore tur omnia dissoluantur, atque liquescant. 69

Caloris naturæ a Platone explicatur. 69

Cavernæ in quibus homines suffocantur, & ignis exstinguitur. 134

Chyli in sanguinem mutatio quomodo fiat. 117. & seq.

Chylus ad intestina de apsis duobus liquoribus permiscetur. 103

Chylum omnem per lacteas venas transire falso prodiderunt iuniores. 108

Chymicæ cognitio ad Physiologiam illustrandam perutilis. 35

Chymici magnam cladem galenicæ factioni attulere. 25

Cibaria non eo quo ingeruntur ordine permanent in ventriculo. 101

Cibi pars e ventriculo statim elabitur antequam integra massa confecta fuerit. 104. & seq.

Ciborum concoctionem auctores diversa ratione explicant. 97. & seq.

Cibus in ventriculo quomodo conficitur. 99

Cibus non à solo calore conficitur. 99

Cibus in ventriculo fermentatur. 101

Cibus in ventriculo coctus non semper albicat. 103

Cibus non detinetur in ventriculo donec totus fuerit confectus. 104. & 107

Cola piscis cur amphibiorum more diutule sub aquis vivere potuerit. 133

Conceptus omnes viniparorum uniformes sunt. 79

Condensatio, & rarefactio sine tenuissima
ætheris substantia explicari non po-
test. 177

Copernicus ab Italis mundani Systematis
notitiam arripuit. 59

Copernicus maximus astronomus prædi-
ctiones astrologicas improbauit. 202

Cor motum non habet à cerebro, sed in se-
ipso cietur, & palpitat. 126

Cordis motus fit ab halitibus in eiusdem
fibras influentibus. 128

Cordis motus nō excitatur à feruore san-
guinis, vt Aristoteli, & Cartesio pla-
cuit. 127

Corpora se inuicem propellere possunt,
non autem attrahere. 165

D

Differentia inter conceptus oniparos,
& viuiparos. 84. & 94

Donij Volumen de Natura Hominis. 53.
& 191.

E

Ectrum quomodo festucas atrahat.
163

Experimenta ludica quatuor. Primum
orbiculorum in aqua alternatim a-
scendentium, & descendentium. 166

Secundum Orbiculorum in tubo aquæ
pleno sursum deorsumque recurren-
tium ad nutum eius, qui tubi ostium
digito obturat. ibid.

Tertium orbiculorum in tubo retorto
ascendentium, & descendentium pro
varia tubi inclinatione. 167

Quartum orbiculorum ex imo sursum
ascendentium propter distractionem
aeris in eisdem conclusi. 169

Experimentum quo Verulamius probat
aquam comprimi posse est fallax. 181

Experimentum Torricellij de Spatio,

quod ob defluxum hydrargyri inane
videtur. 144. & seq.

F

Felle nullam animal caret. 111

Fellens, & aqueus humor, quibus
chylus diluitur, iterato sæpius circuitu
ad intestina reuoluuntur. 114

Fermentatio quid sit ex Platone. 102

Fermenti vis à calore excitatur. ibid.

Firmitas reprehenditur. 198

Flamma cur sine pastu permanere ne-
queat. 66

Flamma cur fastigietur in conum. ibid.

Fœmina subministrat materiam omnem
ex qua fœtus corporatur. 81

Fœminæ genitura non carent. 81

Fœminarum genitura an aliquid conferat
ad generationem. ibid.

Fœtus vita non pendet à vita matris. 91

Fœtus cum propria, tum parentis vi ab
vtero excluditur. 92

Frigore nonnunquam dissimilis naturæ
corpora segregantur. 68

G

Galenus ab Aristotele maximis de
rebus dissentit. 13

Galenus Platonis sententiam de circum-
pulsione non est assecutus. 142

Galenus experimentum de fistula in arte-
riam inmissa ostendit arterias ab im-
pulsu sanguinis moueri. 128

Galenus Secta cœpit deficere. 23

Galenicæ factioni magna clades à chy-
micis est illata. 25

Galenicæ Medicinæ Summa. 209

Galilæus de atomis, & inani aliter vide-
tur decernere, ac Democritus, & Epi-
curus. 60

Galilæus omnium primus Physiologiam
cum Geometria iungit. 192

Galilæus astronomicarum rerum peritissimus improbauit astrologicas prædictiones. 202

Galilæi Cartesij aliorumque iuniorum doctrina physica præstantior, quam antiquorum. 192

Genitura quid, & vnde prodeat? 75

Genitura non fit in testibus. 78

Genitura in procreatione animalium efficiens tantum causæ vim habet. 82

Genitura non est pars, seu materia constitutiendi conceptus. 84

Genituræ crassamentum ova, & conceptus minimè ingreditur. 81

Genituræ pars, quæ efficiendi vim habet, oculorum fugit aciem. 78. & 83

Genituræ vis per occultum agit, & corpora quantumvis densa penetrat. 81

Geometriæ Paradoxa non semper physicis disquisitionibus aptantur. 50

Glandulæ cur maiores, & frequentiores in tenellis, & pinguibus animalibus, quam in senioribus, & macilentis. 116. & seq.

Glandulæ secernunt auctificum succum à reliquo sanguine. 121

Glandularum vtilitas. ibid.

Græci cur doctrinæ studijs cæteris nationibus præcelluerint? 7

Graviores corpora etiam à leuioribus superstantibus premuntur. 156

Gravitas quid? 155. & seq.

H

Haruei observationes de generatione animalium accuratissimæ. 73

Harueius in observando diligetior, quam in iudicando. 74

Hippocratis de calore Paradoxum. 68

Hippocrates animadvertit fetum in matris utero alimentum exsugere. 89

Hippocrati multa tribuuntur, quæ commentitia sunt. 205

Hobbes sententia de substantia inter aerem, & aquam media. 154. & seq.

Homo à teneris annis ita potest educari, ut amphibiorum more sub aquis diutius vivat. 133. & seq.

Homo incerto gignitur spatio. 91

Homini genitura non est eiusdem rationis cum semine stirpium. 75

Homunculorum generatio à Paracelso proposita commentitia est. 84

Humanus fœtus recens formatus masculæ formicæ magnitudinem vix superat. 88

I

Iecinoris præcipuum munus est bilem à sanguine secernere. 114

Inane nihil est. 56

Ingenia ad philosophandum idonea quænam sint. 36

Initia rerum naturalium abstrusa. 37

In omni motu fit reciproca corporum translatio. 149

Iuniores multa felicius inuenere quam Prisci. 4

K

Kepplerus insignis Astronomus improbauit astrologicas prædictiones. 102

L

Lac quibus vijs feratur ad mammæ. 94

Lac ex vberibus virorum, & virginum frequenti succu prolucitur. 95

Lac e papillis recens natorum extillans. 96

Lac in ventriculo pueri coagulatur. 97

Lacte columbæ nutriunt pullos suos primis diebus. 97

Lutetearum venarum nonnullæ cum me-
saraicis coniunguntur . 113

Lamina complanata mutuo contactu co-
hærentes cur nisi magno conatu diuelli
nequeant . 152

Lansbergius excellens Astronomus à
prædictionibus astrologicis abstinuit .

202

Lien per flexuosam arteriam crassiorem
sanguinem excipit . 106

Lien crassior, & impuriorem succum ex
cibi reliquijs secretum suscipit . 107

Lienis utilitas, & structura. 106. & seq.

Lumen non est in rebus, sed fit in ipso vi-
dentis oculo . 71

Luminis natura explicatur . 70

M

Magnética vis dissimilis electricæ .
164

Massarias iuniorum gloriæ insensu . 12

Materia ex qua fœtus corporatur est al-
bugineus lentor similis ouorum albu-
mini . 84

Mathematicæ disciplinæ summam inge-
nij aciem desiderant . 29

Mathematicarum disciplinarum notabile
incrementum . 29

Medici latina verba importunè effutiant,
ut imperitorum plausum aucupen-
tur . 16

Medici periculosas, & ancipites morbo-
rum curationes instituunt . 21

Medici perperam diuidunt partes in sper-
maticas, atque sanguineas . 82

Medici rationales quam profitentur,
scientiam omnino ignorant . 211

Medicis familiare est mutua inter se in-
terfære conuicia . 214

Medicorum improbitas . 213

Medicorum inscitia reprehenditur . 20.

& 211.

Medicina praua quadam consuetudine
hominibus infimæ sortis tractanda re-
linquitur . 18

Medicina rationalis super falsis hypothe-
sibus hætenus fuit superstructa . 25

Medicina Græcorum continet inanes
coniecturas, & fallaces præceptiones.

212

Medicina inconstantia, & Sectarum va-
rietas . 22

Medicinam paucissimi Romanorum sa-
ctitarunt . 18

Membrarum utilitas . 121

Motus ad fugam vacui vulgo relati pen-
dent à circumpulsione superstantis æ-
ris . 153

Mundi corporum triplex differentia . 60

Mundi forma ignoratur . 56

Mundi magnitudo incomprehensa . ibid.

N

Natura ratio ex ipsa potius rerum
observatione, quàm ex libris com-
paranda . 8

Naturalis historiæ cognitio ad Physiolo-
giam valde necessaria . 35

O

Observatio noua de foraminibus in
interiorem ventriculi tunicam
hiantibus . 100

Observatio noua de pennatorum ventri-
culis . 100

Observatio noua lenti humoris in ventri-
culo existentis . 103

Observatio viarum, quæ nouum alimentum
ex ventriculi fundo excipiunt . 104

Octimestris partus non minus vitalis,
quàm septimestris . 91

Quiformis conceptus in viuiparis habet
veram seminis rationem . 76. & 85

Quum

Quum fecundum habet rationem seminis in ouiparis.

P

75

P Ancreatis ductus utilitas. 112. & seq.

Paracelsus à plerisque propter obscuritatem desertus.

44

Paracelsus de natura seminis opinio.

80

Pecquetus nouis obseruationibus fretus hæmatosin tribuit cordi, non iecinori.

108

Pestilentie consideratio.

214

Philosophandi ratio instituta à nostri sæculi auctoribus laudatur.

1

Philosophia nostris temporibus in libertatem vindicata est.

43

Philosophia Cartesij qualis.

44. & seq.

Philosophia studium à plerisque perueritur.

34

Philosophorum in definiendis rerum initis consensus.

45

Physiologia parum hæcenus adoleuit.

28

Physiologia plurimarum rerum cognitionem, & experientiam requirit.

33

Physiologia vnde ordiend.

35

Physiologia potest ex falsis hypothesebus veras naturalium rerum affectiones concludere.

37

Physiologie obscuritas vnde proficiscatur.

30

Physiologie perfecta cognitio cur desperanda.

33

Physiologiam nostra ætatis scriptores præclaris inuentis illustrarunt.

26

Physiologiam nemo Geometria ignarus assequitur.

35

Planetarum corpora ad ætheris liquidissimi motum circumferri possunt.

62

Plato materiam vult esse locum.

45.

& 149.

Ptolemæi Copernici, & Braheii mundani Systematis positiones manca, & imperfectæ.

60

Pueri cur facilius mathematici esse possunt, quàm physici, aut politici.

36

Pulli ex ouo generatio describitur.

87

R

R Erum natura vix alibi, quàm in libris aristoteleis quari solita.

42

Respiratione cordis æstura temperari falso creditum est.

132

S

Sanguis non est succus simplex, nec tamen continet quatuor decantatos humores.

118

Sanguis in omne corpus per arterias diffunditur.

119

Sanguis per arterias in membra influens vitalitatem magis, quàm nutrimentum insert.

119

Sanguis non calore, motu liquefcit, sed permissione tenuissimi halitus.

124

& seq.

Sanguis non si apte natura calidus est, nec calorem accipit à corde, sed motu, atque agitatione incalescit.

131

Sanguis non in iecinore, nec in corde, vel alio certo viscere conficitur.

117

Sanguinis duæ partes altera vniifica, altera auctifica.

118. & seq.

Sanguinis natura admirabilis.

124. Eius potior pars aciem fugit.

ibid.

Sanguinis motus à corde.

125. & seq.

Sanguinis circulationem ab Harueio descriptam indicauerant ante Paulus Sarpa, & Andreas Cæsalpinus.

Sanguinem sal coire, & densere non patitur.

125

Sapientia illa quam in ætatibus habet senectus nostræ potius ætati, quàm prius

scis

scis temporibus debetur. 11
Semen animalium quidnam sit ex Aristotele. 75
Sensus non ea omnia percipit, quæ in natura existunt. 32
Sensu quæcumque percipiuntur falsò talia iudicantur qualia videntur. ibid.
Soli nihil similis quam flamma. 65
Solem igneum esse tactus, & oculorum testimonio probat Cleanthes. 65
Stelliole Encyclopædia. 192
Stelliole nouitate verborum abstrusè doctrinæ caliginem offudit. 193
Stirpium ex semine propagatio comprehendendi facile potest. 74
Stoicis materia corpus esse videtur. 45
Sympathiæ, Antipathiæ, & Antiperistasis inania commenta. 161

T

Talesius putauit posse spatium magna vi conatuque vacuum fieri.

144

Telestius veteres philosophos, & præcipuè Aristotelem exercuit. 43

Testes vniuerso corpori robur conferunt.

78

Theologi Aegyptij Deos omnes ex ouo prognatos esse tradiderunt. 84

Tyndaridæ ex ouo editi. 84

Torricellij Paradoxum geometricum. 50

V

Vacuum experimento Torricellij non concluditur. 147

Vacuum neque mouere corpora potest, neque ne moueantur inhibere. 161

Vacui propugnatores corporis naturam à tactu determinant. 48. & 62

Venæ lacteæ non deferunt omnem succum alibilem. 108

Venis lacteis animantes quædam carere videntur. 108

Venarum lymphaticarum progressus, & vsus. 115. & seq.

Venæ mesaraicæ succum nutritium ex intestinis ad iecur. 109

Venæ mesaraicæ non sunt destinatæ nutritioni intestinorum, & alui. 109

Venæ vmbilicales maiores amplioresque sunt coniugibus arterijs. 88

Ventriculi, & intestinorum motus. 101

Vermes in iecinore, liene, corde, pulmonibus, & cerebro animalium. 111. & seq.

Verulamius opes ætatemque inter experimenta consumpsit. 193

Vix quibus humores à corpore per aluum expurgantur. 116

Vita hominis in continuata sanguinis motione consistit. 132

Vitalis halitus in sanguine existens quomodo percipitur. 125

Vitri densitatem penetrat hydrargyrus. 148

Vniuersum vnum indiuiduum, atque immobile. 55

Vrina per quas vias in renes, & vesicam profunditur. 115

Virsungiani ductus utilitas. 112. & seq.

Z

Zenonis de natura genituræ sententia.

79

F I N I S.

ELENCVS LVCVBRATIONVM.

Dialogus in Procemij locum suffectus.

Pag. I.

Progymnasma I. De Ratione Philosophandi. 28

Prog. II. De Rerum Initijs. 40

Prog. III. De Vniuersitate. 55

Prog. IV. De Sole. 65

Prog. V. De Generatione Hominis. 73

Prog. VI. De Nutricatione. 94

Prog. VII. De Vita. 124

Epistola De Platonica Circumpulsione.

Pag. 138.

Epistola De Cognatione Aeris, & Aquæ.

Pag. 175

Epistola M. Aurelij Seuerini nomine conscripta. 186

Stelliola . Trusianus.
Brunus.

BENE habet. Præclara quotidie hominumque generi maximè salutaria proferuntur inuenta: nouæ ac præstantiores in dies comparantur artes, nouisque disciplinis excoluntur ingenia. Quamobrem quisquis sua bona norit, gratulari plurimum debet sæculo nostro, quòd tales habeat viros, qui industria, virtute, & felicitate maioribus nostris longè multumque præcellere videantur. Equidem ingenti voluptate perfundor, lætitiaque gestio, quotiescumque mecum ipse reputo optimam nunc demum initam esse philosophandi rationem. Quandoquidem veritas in ipsa potius rerum natura, quàm in monumentis Scriptorum perquiritur. Hinc enim obscuræ plurimarum rerum intelligentiæ passim enodantur, nouique recluduntur obseruationum thesauri. Et nisi me animus fallit, haud longè tempus aberit, quo discussa errorum caligine firmiora Philosophiæ fundamenta locabuntur. Tum verò feliciori conatu commentabimur præcepta ad perficiendam, consummandamque medendi artem, quæ tristissimis hætenus constitit experimentis, & omni æuo

Πολλὰς ἰσθίμυς ψυχὰς αἰὶ δι' προίαν ψν.
Quod utique nobis ex sententia obtinget, si nec industriæ laborique parcamus, nec nostra mancipantes ingenia maiorum placitis temerè assentiamur: quin potius vndique circumspiciamus, libremus singula, nihilque non examinemus; & seu intelligentiæ viribus, seu obseruatione rationeque, si liceat, sensibus capta, pensemus. Tua hæc Trusiane opus est opera:
A quip-

quippe cum Medicinam in celeberrimo gymnasio magna auditorum frequentia magnoque plausu profitearis, merito de illius instauratione debes esse sollicitus: Nam vires tibi opesque suppetunt, otium quoque abundè sufficit; nec deest studiorum iuuenum cœtus, qui vel stimulos addat, vel etiam suam locando operam, laborem leuet. Porro magnum artium disciplinarumque incrementum expectari potest à plurium conspiratione, atque consensu; si nimirum omnes omnia sua consilia, & cogitationes conferat, vnàque communent.

TR. Me miserum quid audio? Tunc etiam Stelliola teterissima huius sæculi labe pollutus, nouum doctrinæ genus aduersus venerandæ antiquitatis placita meditaris? Ego sanè consilium hoc tuum à me prorsus amotum esse volo, vtpotè qui stultum putem neglectis messibus in spicilegio occupari. Equis verò ignorat ita omnem disciplinarum frugem in veterum commentarijs esse congestam, vt nihil ferme vltro supersit præter quisquilias? Cum igitur optima quæque inuenta iam sint, quid noua quærimus, & deteriora? De nuperis experimentis nouisque obseruationibus, quas prædicari audio, vix dum quicquam exploratum habeo; tot enim occupationibus medendo docendoque distineor, vt nihil planè temporis ad res alias agendas mihi sit reliquum. Atqui certò scio in ijs fucum esse: Noui enim quæ sibi somnia fingat hæc ætas. Scilicet dum inuentores haberi volunt, dum plausum consecretantur, vel inania commenta iactitant, vel pro nouis vetera nobis obtrudunt. Sed breui tandem hæc exolescunt, technis que detectis, veritas triumphabit.

ST. Næ tu nimium Trusiane morosus es, qui vt vetera extollas, vt sepultis ingenijs plaudas, præsentia deprimis, & amico immerenter irasceris. Numquid hoc tibi negotium legauit antiquitas, vt sui esses propugnator? At verò laudari vetera satis dignè possunt, etiam si noua minimè despiciantur. Ego sanè is sum, qui pauca ex ætate, multa verò ex vltu, atque præstantia, æstimare soleo; at nihil interea authoritari gloriæque veterum

veterum dettaho : quippè illorum monumenta libenter perlego, laudo, immo etiam sæpissimè admiror. Atqui non sum antiquitatis vsque adeo venerator, vt aliquid iunioribus acceptum referre erubescam: sunt enim complura recens inuenta, qua mihi mirificè arrident. Quoniam verò ex meo aliorum ingenia plerumque metior, te quoque in hac ipsa arbitrabar esse sententia; ac proinde tecum paulò inconsultius egi, ea tibi etiam, atque etiam commendans, quæ tu plurimùm fastidis. Caterum vehementer doleo quòd illa tibi nequaquam probentur, quæ ab omnibus ferè doctissimis viris summopere laudantur: quamquam non est certè cur doleam quòd ea tibi minimè placeant, quæ necdum perspecta habuisti. Irascar potius occupationibus, quæ tibi impedimento fuere, quominus in his rebus operam studiumque collocares.

TR. Dispeream ni sermo iste tuus me cogat ineptire; quippè ne vestra isthæc inuenta in contemptum veteris sapientiæ, atque adeò in perniciem mortalium vberius succrescant, enitar propediem horas aliquot, vttilioribus ereptas functionibus, in eorum considerationem, atque examen impendere.

BR. Age sis Trusiane onus hoc laboris pro veritate suscipito; quod si feceris summam profectò cum literatis omnibus inibis gratiam. Verum nisi molestum est, dic obsecro, an iuniorum ingenia vsque adeo ieiuna tibi videntur, vt nihil ab ijs laude dignum inueniri excogitariue posse existimes?

TR. Quorsum tandem aut cur ista Brune quæris? Mirum ni tu atque Stelliola vnà coniurastis, vt ambo aduersus me hodie velitaremini.

BR. Non, ita me Deus amet, id mihi vnquam consilium fuit: semper enim grauiter, ac molestè ruli cum doctis viris altercari, & ab honestis disceptionibus ad verborum contumelias descendere. Verum quoniam meum iudicium semper fuit, multa iuniores inuenisse per se feliciùs, & magnificentiùs, quàm priscos; idcirco mirari satis non possum quid cauæ sit, quare tu sæculo nostro tantopere inuideas, vt Stelliolæ quòd eidem plauderet, acriter succensueris. Quòd si noua om-

nia Trufiane tibi fordent, libenter audirem quid habeas argumenti, aut rationis, quamobrem ita sentias. Proinde optarem vt quæftionem hanc, de qua tanta eft inter nos diffenfio, perpensis hinc, & illinc rationum momentis ad liquidum perduceremus. Quocirca, fi vobis licet, refideamus; & omiffis contentiofis altercationibus ad diflerendum leni pacatoque animo aggrediamur: id enim potiffimum habent difputationes, vt in vtramque partem dicendo, & audiendo, veritatem eliciant, & tanquam exprimant. Porro quod rem cauffamque noftram maximè continet, eft vtrum ad difciplinās ingenuafque artes veterum diligentia conquisitas, aliqua iuniorum ftudio, atque induftria facta fit accelfio. Ait Stelliola nofter, tu Trufiane negas. Age nunc vtriufque argumenta audiamus.

TR. Me Brune, quoniam in hanc difputationem vocas, quocumque voles modo paratum habebis. Nam etfi maximis occupationibus impeditus vis fatis otium difputationibus fupeditare poffum, quia tamen ijs de rebus agimus, quas etiam negotijs libenter præfero, confidam vobiscum, dum veftræ opinionis leuitatem confutauero, & vos à tanto errore folutos ad rem veritatemque traduxero. Ego igitur fic ftatuo, priſcos illos Sapientiæ principes in excolendis difciplinīs eò proceſſiſſe, vt nihil planè, quod ad earumdem abſolutionem amplificationemque fit conducibile, poſteris excogitandum reliquerint. Nec verò defunt argumenta, quibus id probem. Primùm enim promptum fuerat antiquitati, cum cuncta etiam tum forent intentata, ampliffimam inuentionum ſegetem plena manu demerere, & omnem ſpem comparandæ laudis, ex nouis rebus nobis præcidere. Deinde omnia penè artium incrementa Græcis debentur; hi enim ingenij viribus mentifque acie longè cæteris gentibus antecelluerunt: ſiue id patrij ſoli proprietās, ſiue certa cœli ſiderumque poſitio tulerit. Atqui nihil ſemper florret: iam enim eruditiffima illa Græcorum natio, à qua Medicinam bonafque artes habuimus, à barbaris deuicta, & innumeris vexata cladibus penè periit, & cum ea difciplinæ pariter omnes extabuerunt. Demum habuit vetuſtas eminentiſſima

ingenia,

5

ingenia , qualia nunc minimè fert nostra ætas : quippè con-
fuit iam mundus , torpentque in eo effætæ vires , & folùm ni-
mia prioris æui vbertate defatigatum, nequit priftina benigni-
tate præbere mortalibus alimenta . Hinc breuiora viuendi cur-
ricula , infirmiora corpora , & hebetiora etiam nos , quàm pri-
fci fortiti fumus ingenia . Vtinam verò tunc nobis obtigiffet
viuere , cùm vigeabant præftantiffimi illi fapientiæ proceres ,
quorum veram folidamque doctrinam fufpicere potiùs ac ve-
nerari , quàm æmulari datum eft nobis . Nunc autem plerique
omnes in fumma inanitate verfantur , & conquifitas ab anti-
quitate difciplinâs non modò cognofcere negligunt , fed im-
probant quoque , immo etiam , fi Dijs placet , deftruere co-
nantur .

BR.

Prifca inuent altos ; ego nunc me denique natum

Gratulor : hæc ætas moribus apta meis .

At verò illuc adduci Trufiane nullo modo poffum , vt credam
te malle cum Pythagora olim vixiffe , quàm ætatem hanc no-
bifcum degere . Ego fanè minimè doleo quòd Platone , Ari-
ftotele , immo Græcia vniuerfa defuncta , fuperftes tecum vi-
uam : malo enim cum viuis infipientibus , quàm cum fapien-
tibus mortuis adnumerari . Sed hæc iocatus reuertor ad Ieria .
Quid tu virtutem æftimas annis , quid ingeniorum præftan-
tiam vetuftate metiris ? An verò Trufiane non intelligis om-
nia , quæ nunc antiquiffima habentur , noua olim fuiſſe , & no-
ftra hæc aliquando etiam vetera fore ? Profecto fi in exquiren-
dis his quæ vbique terrarum geruntur paulò ftudiofior eſſes , fi
celeberrimas Europæ Academias animo , & ratione luſtrares ,
agnofceres vtique nihil eſſe cur antiquis inuideas . Vigent enim
etiamnum florentiffima ingenia , quorum induſtria effectum
eſt ne priſcorum ſcientia vinceremur .

TR. Hem quàm magnificè de ſeipſis ſentiunt noſtri homi-
nes : vt ſibi placent , vt ſe doctrinam veterum non attigiffe mo-
dò , ſed ſuperaffe etiam glorianur . Scilicet ipſa ſibi imbecilli-
tas indulget , & in altum prouehitur imprudentia . Sed non
erat id Brune diſputationis noſtræ conſilium , vt argumentis ,

& ra-

& rationibus posthabitis, ioco, ac importuna dicacitate rem ageres. Quid? quod suscepti muneris oblitus tuo quasi iure arripis idiplum, quod in disceptatione verlatur. At nihil interea ad rationes à me productas, quas sanè perpendere debuisti, ut illas, si fuites tibi viderentur, refelleres; secus verò resipisceres, ac sententiæ meæ veritatem fatereris.

BR. Rectè loqueris Trusiane, & uti decet acerrimum disputatorem: atqui ego qui disciplinas leuiter tantum attigi, temeritatis meritò arguerer, si cum sapientiæ consultissimo qualis es tu, congredi auderem. Ita verò ad hanc disputationem accessi, ut mihi non tam dicendi ratio habenda foret, quàm audiendi. Quapropter Stelliolam rogatum volo, ut si ipsi commodum est, causam meam, atque adeò suam defendat. At enim cum is fuerit disputationis nostræ author, quid est cur modo conticescat, perinde ac si sua hìc res minimè ageretur?

ST. Molestam inter nos hodie comparatam video certationem, quæ, quantum coniectura auguror, maius nobis facesset negotium, quàm ferat pretium operæ: quippè ad pacem inter discrepantia hominum iudicia conciliandam, altero foret opus Prometheo, qui de integro ipsorum præcordia ex consimili luto fingeret, parilemque omnibus mentem inspiraret. Sed enim id vitium ex ipsa mortalitate contrahitur: nimirum quoniam animus naturæ temperatione viget, sentit, & ratiocinatur, vnusquilibet suo quodam peculiari iudicio, ac sententia pro corporis constitutione, & habitudine ducitur, atque adeo

Mille hominum species, & rerum discolor usus:

Nelle suum cuique est, nec voto vivitur vno.

Ita mehercule non semper meliora quæ sunt, sed quæ sibi magis consentanea censet, quisque consecratur, aliorumque ingenia, mores, doctrinam suo metitur modulo: Trusianus veteribus tantum delectatur, hæc amat, in his delicias facit, noua omnia despicit, immo causæ etiam incognita condemnat. Per me fruatur licet sententia sua: ecquis enim hominum libidini modum ponere ausit? Verumtamen si mihi detur libertas dicendi, ostendam Trusiane rationes à te propositas non esse

tam

tam exploratas ad id quod vis confirmandum, quàm tibi vi-
 dentur. Nam confer quæso humanæ intelligentiæ tenuitatem
 cum incomprehenſa rerum vniuerſitate, tecumque reputa-
 quàm magnum, & arduum opus ſit ea omnia complecti ani-
 mo, quæ in ſuis penetralibus natura recondidit, vltro enim fa-
 teberis pleraque abſtruſa omninò eſſe altiorisque indaginis,
 quàm vt ab acie humani ingenij percipi queant; at eorum, quæ
 in noſtram intelligentiam cadere poſſunt, vix aut ne vix qui-
 dem milleſimam partem adhuc exploratam haberi. *Sed enim*
multum egerunt, vt ait Seneca, qui ante nos fuerunt, ſed non peregerunt.
Multum adhuc reſtat operæ, multumque reſtabit: neque vlli nato poſt mille ſæ-
cula præcideretur occaſio aliquid aliud adiſcendi. Ad ſummam cogita-
 naturam arcana ſua non ſimul edocere, ſed ſeruare ſemper
 quod oſtendat exquirentibus: inexhaustos eſſe illius theſau-
 ros, nec vnquam fore, vt eiſdem myſteria penitus recludan-
 tur; etſi complura ex interiore deprompta ſacrario in lucem
 dies extrahat, & longioris æui diligentia. De ſapientia Græco-
 rum multa iactaſti magnificentius fortasſe, quàm veriùs. Plu-
 riſimùm illos doctrina diſciplinæque cognitione cæteris
 gentibus præſtitiffe conſiteor: id verò non tam ex regionis ſi-
 tu, & qualitate, quàm ex patrijs legibus, & inſtitutis eueniſſe
 putandum. Nam honos alit artes, atque æmulatio exacuit in-
 genia, & nunc inuidia, nunc emolumentum incitationem ac-
 cendit: idcirco vbi Principes viri philoſophabantur, & Sapien-
 tibus præmia deferebantur, ibi plurima ingenia in ſapientiæ
 ſtudio congregauit tum laudis gloriæque libido, tum etiam
 lucri, atque opum cupiditas. Adde quod diſcipuli à ſapientiſ-
 ſimis præceptoribus optimè inſtituti pari ſtudio, atque conatu
 in exornandis, & collocupletandis diſciplinis elaborabant.
 Quòd ſi regionis proprietates, & ſoli conditio ad ingeniorum
 magnitudinem conferat, nobis quoque licet in hoc gloriari
 quodammodo, qui norimus Pythagoræos municipes noſtros
 principem in philoſophia ingenuiſque artibus locum tenuiſſe,
 tum cum erat in hac gente magna illa Græcia noſtra parens, &
 altrix. Tameſi verò cenſeam ad ingeniorum præſtantiam
 non

non parum conducere regionis cœliue naturam ; tamen persuasum habeo munus hoc procreandi ingenia ad comparandas disciplinas idonea , haudquaquam vni Græciæ fuisse concessum: quod vel hinc satis liquidò constat, quòd olim Assyrij, atque Ægyptij, mox Chaldæi, hinc Græci, deinde Latini, postea Arabes, tum inde rursus Itali, cognitione artium solertiaque ingeniorum antecelluerint . Qua quidem ratione literæ bonæque artes terram peragrarè , ac longè latèque peregrinari videntur ; tandem enim à nobis , vt ita dicam , transfugæ ad Gallos , Germanos, Batauos, immo ad Britannos, Cimbros aliosque populos , summæ quondam barbarici atque stupiditatis nota insignes , sunt profectæ . Postremò quod de mundi senio ex vulgi sententia dixisti, id totum est nugatorium; semper enim hæc rerum vniuersitas vniuersimodi, & sui similis extitit. At omnis de suo tempore ætas conquesta est: fueruntque semper vetera in laude, præsentia autem in fastidio . Verum, vnde Trusiane habes Graios aliasue gentes literarum studio deditas diuturniorem olim degisse ætatem , quàm nunc demum nostri sæculi homines transigant ? An non illos qui ad octogesimum, vel nonagesimum annum vitam perduxerunt, longæuos appellauit antiquitas ? Iam verò ne te ablegem ad remotissimas regiones , in quibus annosi homines viuere perhibentur, nonne tibi quotidie occurrunt senes, qui centesimum annum attingentes , dum de tussi, aut grauedine conqueruntur , cœli potiùs inclementiam , quàm ætatis vitium caussantur ? Quæ cùm ita fiat , quid obstat quo minus nos cum antiquioribus ingenio doctrinaque pares esse queamus , quando eisdem æquo iure in cœteris respondemus ? Sed quid ego te multis morer ; tua quidem argumenta, res ipsa confutat : quippe enim

Multa dies , variosque labor mutabilis æui

Rettulit in melius .

Nam quot quantas quàm admirabiles reconditarum , atque antehac inauditarum rerum notitias , iuniores seu consilio, & industria, seu etiam casu , atque felicitate sibi compararunt ?

Quàm

Quàm pulchra, quàm incredibilia, cùm in Mathematicis disciplinis, tum in Physiologia, & Medicina cæterisque artibus peruestigauit, atque in lucem veritatis protulit nostri sæculi diligentia? Quanta ex illis vtilitas, quanta voluptas! At verò in quali caligine, quantaue rerum ignoratione versabantur maiores nostri, quibus hæc erant incognita? Hæc quisquis secum agitauerit, facile intelliget naturæ rerumque cognitionem ex ipsis rebus assidua meditatione lōgaque obseruatione esse comparandam, & periculosissimum esse eandem ex libris lectitando colligere. Audendum igitur omnique conatu nobis enitendum, vt præter ea, quæ à maioribus nostris comperta, bonaque fide tradita accepimus, ad illa, quæ nondum explorata sunt, inuestiganda animum adiiciamus. Namque, vt monet Hippocrates, *inuenire aliquid ex his, quæ etiam nunc habentur incomperta, quod ipsum nosse magis, quàm ignorasse expediat, id quidem scientiæ institutum, ac opus esse videtur: quemadmodum etiam inchoata absoluere, & ad finem perducere.*

TR. Longum sanè foret Stelliola illa omnia persequi, in quibus tua peccat oratio: nam vel ea sumis, quæ non concedantur, vel ea, quæ etiam concessa tibi minimè suffragentur. Sed multa tibi nunc do; at illud tamen præterire non queo, quòd argumentorum meorum vim eluseris potius, quàm infirmaueris: etenim cùm te grauiter vrgeri sensisses, huc atque illuc tergiuersans, ad noua tandem inuenta confugisti, & maluisti gloriosa quadam verborum iactatione, studia conatusque iuniorum in rebus nouandis exaggerare, quam rationum mearum pondus fideliter expendere. Atqui ego constantissimè assero noua hæc inuenta imprudenter, & temerè commendari, vel ob hanc maximè causam, quia noua sunt: videlicet nec diuturnitate temporis confirmata, nec vnà cum sæculis ætatibusque hominum inueterata. Sed enim in his dumtaxat acquiescendum, quæ longa dies stabiliuit, & tempus certa ratæ effecit. Quippè videmus pleraque commenta fictasque opiniones diuturnitate extabescere. Nec verò te quicquam adiuuat exemplum Hippocratis; turpissimum enim censeo,

B

& ple.

& plenum temeritatis , eam ipsam inueniendi libertatem , quam diuinus ille veritatis inuentor , & incomparabilis Medicinæ architectus sibi conuenire putauit , nobis pariter arrogare . Nam quis est hodie qui de seipso tam magnificè sentiat , vt illius scientiam ausit æmulari ? Si quisquam verò est , qui cornicum oculos confixerit , hic saltem meminerit talem virum fuisse Hippocratem , qui illud meruerit elogium , *tam fallere , quam falli nescit* . Numquid de homine dici magnificentius potest ? At quis non miretur , atque etiam stomachetur id genus homines , qui cum nouissimè viferint luminis oras , sese cum sapientissimis priscae ætatis senibus nulla verendæ antiquitatis habita ratione exæquant : immo illorum quoque sententias nouis inuentis obscurare conantur ? Et quisnam ignorat veteres ad omnes disciplinas nobis duces esse , ac præmonstratores ? illos esse veluti gigantes , quorum humeris nos homunciones elati veritatem propius aspiciamus , quam humi hærentes minimè cerneremus . Quotusquisque nunc est , qui ad illorum doctrinam percipiendam , ne dicam amplificandam , sufficiat ? Ecquid tandem in disciplinis eximium habemus , quod ab eorum scriptis , & commentarijs non omninò sit erutum ?

ST. At mihi Dij dignum factis exitium diuint : quando hoc genus disputationis excitaui , in quo quæcunque rationes vtrunque promuntur ex coniectura , & opinione pendent , atque adeo huc & illuc disceptationibus trahuntur , nec vllam adhibent persuadendi necessitatem : quippè vbi momenta rationum desiderantur , ibi passim obrepunt verbosæ contentiones , quas sæpissimè consequuntur differentium inter se reprehensiones , & quandoque etiam maledicta contumeliæque , à quibus ego vehementer abhorreo . Nec me porro grauius iratum Trusiane putes , quòd abs te fuerim sub contumeliosè reprehensus . Do hoc ardori studioque tuo erga barbatos illos veteres , quorum tu nomina , memoriamque augustè , & sanctè veneraris . Sed vide interea ne nimium fallare , dum sapientiam illam auctoritatemque , quam in ætatibus habet senectus , antiquitati deferendam arbitraris . Num tibi illud excidit , quòd

paulò ante dixeras, consenuisse iam mundum, atque adeò ipsius grandævitate senectutemque nostro potius sæculo, quàm priscis temporibus esse tribuendam? At verò quemadmodum senes, & rerum cognitione, & maturitate iudicij, natu minoribus sapè numero præstant, quia nimirum plura illis experiri, & usu cognoscere meditarique licuit, ita nostra hæc ætas, utpotè antegressis grandior, & permulta experientiarum varietate cumulatio, plurima comperta habet, atque perspecta, quæ ab antiquioribus ignorabantur. Quocirca cum non paucos à veteribus vel literis consignata, vel per manus tradita, & hæreditario quasi iure transmissa acceperimus, rerum illam ampliorem notitiam, qua ætate proecliores minoribus plerumque præcellunt, nobis non iniuria vendicabimus. Ita profectò se res habet. Nihil planè inuentum simul, & perfectum est. Rudis quidem fuerat, ac penè dixerim puerilis Pythagoræ temporibus philosophia, quæ magnum deinde sæculis sequentibus nacta est incrementum; & medicina sub Hippocrate felicissima habuit incunabula, postea verò unà cum ætatibus etiam atque etiam adolevit.

TR. Ita sanè puerilis planè fuerat ante Aristotelem Philosophia, tandem verò tanti viri auspicijs ad summum est euecta fastigium, & Medicinam, cuius firmissima fundamenta olim iecerat Hippocrates, plenè, & cumulatè perfecit consummavitque Galenus. Videtur enim diuina quadam providentia factum, ut in quibuscumque artibus esset singulare aliquod exemplar, quod earumdem studiosi ad imitandum sibi proponerent; & sicuti in Philosophia Aristoteles, ita in Medicina fuere Hippocrates, & Galenus. Hinc optimo quidem iure Alexander Massarias Aristotelem, Galenumque eo ipso decoravit elogio, quo Macrobius Hippocratem cohonestauerat; quod nimirum nec falli possint nec fallere: si modò eorumdem sentia ritè percipiantur. Quocirca prudenter facit, dum monet Medicinæ studiosos, ut hisce tantum scriptoribus delectentur; horum volumina diuina versent nocturnaque manu; ac omnes præterea iuniorum lucubrationes negligant; sed noua-

torum potissimum libros vitent , & tanquam scientiæ pestem detestentur.

ST. Massarias tuus planè nugatur: nam si omnes iuniorum libros e studioforum Medicinæ manibus subducendos autumat, cur sua nobis obtrudit volumina? Num verò is

gallinæ filius albæ;

Nos viles pueri, nati infelicibus ouis;

Quis verò eiusdem peruiaciam non miretur? scilicet mauult absurdam quamlibet ineptamque opinionem tueri, quàm vel leuissimam erroris inconstantiaue labeculam Galeno aspergere: quin illum quandoque adeò frigide ieiunèque exculat, vt omninò risum moueat. Quid enim illo ineptius? Galeni inconstantiam in recensendis dolorum causis fateri coactus, ipsum inquit aliquando Medici, aliquando Philosophi personam induere; atque idcirco pugnantià consultò loqui. Sed nihil crebrius in libris Massariæ occurrit, quàm Galeni commendatio, & iuniorum despiciatus, imino etiam vituperatio. Quid multa? ab ipsis quoque medicamentis cibarijsque, quorum Galenus non meminit, abstinendum putauit: hinc lupulos, vt cætera prætermittam, sibi suspectos scribit, quòd nihil de ijs à Dioscoride, Galenoque memoriæ proditum inuenerit: Et ea tantùm sibi probanda censet, quorum vires veterum fide, atque authoritate testatas agnouerit.

BR. Hocine credibile est, vt tanta cuipiam innata sit vercordia, vt vel à cibis caueat, quos non prægustarit antiquitas? Quid si talis (quod omen Dei auertant) nobis vnquam contingat oblonator, nã ille pro suauissimis bellarijs cuped ijsque, quibus hodie velci consueuimus, incondita priscorum fercula, & tandem aliquando glandes nobis comedendas obtrudet.

ST. Vereor ne orio nimis valdè abuti videamur, si omnes eiusmodi ineptias percerere velimus. Vnum tanè scire velim Trusiane, qui fieri possit vt Aristoteles, Galenusque (vt de Hipocrate sileam) nunquam lapsi sint, nunquam opinati; si tanta est inter illos maximis de rebus dissensio? Non persequar quæstiones omnes, sed paucas tantùm ex multis proferam.

Homi-

Homines procreari Galenus censuit ex viri mulierisque seminibus inuicem permistis, quorum vtrumque tam materiæ, quàm effectiōis rationem habere credidit: at Aristoteles scripsit mares duntaxat effundere semen, in quo efficiendi vis inest, fœminam verò solam præbere materiam, quam putauit esse sanguinem. Ad hæc Aristoteli cor, tum sensus motusque, tum vitæ, & nutritionis principium visum est: sed Galenus tres constituit in homine principatus non potestate modo, sed locis etiam disiunctos; nempe sentiendi, mouendique vim in cerebro, vigendi in corde, & alendi in iecore. Præterea in diiudicanda animi vi, atque natura, quam longè ab Aristotelis sententia Galenus aberrat? Cum igitur plus vno verum esse non possit, alterum fieri profectò potest, vt vterque in errore versetur; alterum certè non potest, vt ambo fallere falliue nesciant. Sed quid ego in confutanda tam leui, ne dicam tam inepta sententia, tempus frustra contero? Miror sanè, immo etiam moleste fero (bona venia me audies Trusiane) inueniri homines, qui adeò præposterum absurdumque Massariæ iudicium adprobent, atque commendent.

TR. Tibi quidem ita videtur: atqui ego arbitror Aristotelem, & Galenum de verbis solùm diuisidere, de rebus verò mirifice semper congruere. Scio id vobis paradoxon videri: verum ego planè vellem me arbitrum inter egregios illos sapientiæ magistros datum: facillimum enim mihi foret discrepantes ipsorum sententias ad concordiam adducere. Verum hæc aliàs. Nunc fingite illos reapse, non tantùm verbis dissentire, quid tum inde? Nimirum non omnia nouimus omnes: satis autem est si in tua quisque professione præcellat. Aristoteles autem in philosophia, & Galenus in medicina diligentior fuit, & exercitior: vterque verò author est accuratissimus, & planè luculentissimus. Quocirca optimè studiorum commodo cautum videtur, vt in philosophicis rebus Aristotelis, in medicis verò Galeni doctrinam exponeremus. Qua quidem in re vtramque paginam (absit dicto inuidia) ego fecisse videor: quippè cum mihi philosophiam profitenti, iniunctum quoque

quoque sit onus medicinam interpretandi, siquando quaestiones occurrunt, in quibus Aristoteles, & Galenus inuicem dissentire videntur, vel inter illos pacem concilio, vel vtriusque dogmata singillatim interpretans pugnaciter illa acriterque defendo, & rationibus argumentisque usque adeo confirmo, ut auditoribus meis videar, non hominum sententias proponere, sed potius folium recitare sibyllæ, & quasi ex tripode vaticinari.

BR. Immo verò ex quadrupede: memini enim te mihi sæpè numero occurrisse ex mulo lacernato Auicennæ Rasis, & Galeni oracula circumstipantibus discipulis recitantem. Verum dic Trusiane num tibi philosophia dignum videtur, eadem de re in contrarias partes differendo, vtramque propugnare sententiam; & ad tutanda veterum placita, non delectu aliquo, aut veritatis studio, sed antiquitatis veneratione, & auctoritatis iure perducere?

TR. Age verò quàm voles Brune ioceri: nam profectò nihil ista me tangunt. Cæterum turpe arbitror, & planè indecorum ob inconstantiam mentis imbecillitatem in diuersas, aut etiam contrarias deduci sententias. Verum si de industria id fiat, seu ad ingenij magnitudinem ostendendam, seu ad dignitatem gloriamque veterum propugnandam, tantum abest ut sit indecorum, ut contra laude dignissimum censei debeat. At verò ego qui vni sapientiæ acceptum refero quicquid hætenus exultationis famæque, aut opum sum consequutus, plurimum sanè me debere fateor Hippocrati, Aristoteli, & Galeno, à quibus omnem meam hausi, atque arripui disciplinam. Quum autem studium voluntatemque meam erga spectatos illos philosophiæ, & medicinæ principes testari aliter nequeam, enitar certè ut ipsorum doctrinæ fidem robur, & firmitamentum adiungam, & quoquo modo eorumdem nomini gloriæque consulam, atque propiciam.

BR. Rectè dicis; & res sic se habet. Laudo autem te Trusiane, tum quòd grata animi beneuolentia hominum de literaria Republica benemeritorum memoriam prosequaris, tum quoque

quoque quòd optimam philosophandi rationem inieris . Sed enim non queo satis mirari Anaxagoræ Democriti, & aliorum eiusmodi philosophorum imprudentiam, qui vt sese in rerum cotererent, opus neglexerunt, immo etiam satis ampla patrimonium dissiparunt. At quanto tu illis præstantior, qui tibi ipsi in primis sapere didicisti, animumque tuum non ad inanem, illam inopemque philosophiam, sed ad solidam frugiferamque sapientiam contulisti.

ST. Ecquid verò de me vobis videtur? An non ego omnium stultissimè sum philosophatus, qui dum rerum occultarum, & ab ipsa natura inuolutarum, cognitionem impensius affecto, ætatem pecuniam, & valetudinem nequicquam contului.

TR. Mirabar certè quæ causa foret, quare tu cum plurimum operæ Philosophiæ, & Medicinæ studio adhibuisses, minimum tamen inter æquales, fortuna, & opibus polleres. At mirari nunc desino, postquam intellexi nouandi studium tibi maximopere probari. Compertum enim habeo hanc sepius nouatores peccati sui pœnam luere, vt nimirum nulla ipsis fides habeatur. Porro cum in omnibus humanis rebus, tum potissimum in medicina periculosissima censeretur in nouatio: vnde nemo prudens vitam valetudinemque suam nouatoribus Medicis audet vnquam concedere: & meritò, nam quid Dei munere concessum mortalibus vel vita charius, vel prospera valetudine optabilius?

ST. At per fortunas Trusiane tuas mihi viam rationemque indica, qua locum qualemcumque aucupari inter medicos possim. Enimuero tametsi ego non quidem vt Sophistes, aut ostentationis, aut quæstus causa philosophor, tamen neque plane vt Cynicus, opes famamque vsque adeo aspernor, vt æquo animo feram me nulla hæcenus laborum meorum emolumenta percepisse.

TR. Quamquam consilio non eges, immo abundas potius, patere tamen vt aures tuæ nostris præceptis monitisque pateant aliquando. Primum putato leuitatem, ne dicam temeritatem,

tem, esse maximam ab antiquorum ratione desciscere, & ea, quæ à iunioribus nouata sunt adprobare; perinde ac inusitatas inexploratasque vias ingredi, tritas relinquere. Ad hæc illud tibi plerique exprobrant, nec mehercule iniuria, obijciunt, quòd nunquam in disputationibus consultationibusque latine loquaris, nec vlla tibi vnquam excidat Hippocratis, Galeni, aut Auicennæ sententia latinis verbis expressa: at equidem vix aliter astantes de sapientia nostra certiores facere possumus, quàm si crebrò inter disserendum effundamus veterum enuntiata, seu potiùs oracula latine prolata, quibus tanquam sale nostra perispermatur oratio. Hinc non immeritò venit in consuetudinem, vt Medico latinitatis ignaro nequaquam credatur.

ST. Dic sodes Trusiane, num Hippocrati, Galeno, & Auicennæ vitio culpæque dandum, quòd & verbis non latinis fecerint medicinam, & fortasse etiam latine nescierint? Abnuis? Cur igitur quod istos decuit, mihi vt probum obijcitur? Numne putas aliam fuisse causam, quare medicinam plerique verbis ignotis facere consueuerint, quàm vt fucum facerent imperito popello? Sed enim hic est mos patrius nostratium medicorum, vt ad captandum plausum adprobationemque muliercularum, & ineruditæ plebeculæ, latina verba sine vilo delectu passim effuriant, & quocumque in loco, quoscumque inter homines, de rebus non necessarijs disserentes Galeni, Auicennæ, & Hippocratis nomina temerè inculcent.

BR. Ita profectò res est, vt dixisti, Stelliola. Nimirum veteratores isti, quoniam quidem nullum aliud sapientiæ specimen dare possunt, laureolam, vt dicitur, in mustaceo quarunt: in quo tamen mirari licet hominum solertiam, qui nugis inanisque ostentatione eam sibi authoritatem facile comparant, quam nonnullis vix aut rarò etiam per summos labores singularemque rerum naturæ cognitionem consequi datum est. At illud sanè mihi stomachum mouere solet, quod quidam, cum verecundiæ fines semel transilierint, eouique imprudentiæ sint progressi, vt communem vsum cultumque corporis deuirantes semetipsos ita deformant, vt non homines, sed
potius

potius hominum monstra videantur.

TR. Quorsus hæc pertinent? Nunquid monstruosum tibi Brune videtur quòd nos Medici honesto simplici que corporis cultu contenti, ornatum atque elegantiam negligamus? Atqui ita mandat summus Medicinæ dictator Hippocrates: nec immerito: æquum enim est ut illis, qui & vitæ valetudinisque suæ imperatores nos statuunt, & vxoribus liberisque ac vniuersæ familiæ præficiunt, debitum honorem habeamus. At quis ignorat elegantiorum vestium apparatus, cultum, nitorem, aliaque corporis lenocinia esse instrumenta ad mulierum pudicitiam subuertendam?

BR. Iam olim acceperam illud vulgi sermone iactari de Medicis, quòd præcipue eorum partes essent honestè vestiri, gloriøsè mentiri, & hominum vitas negotiari. Mirumni hæc vobis Archiattrorum senatusconsulta præcipiant. At hunc mihi Trusiane scrupulum ex animo euellere: Numne præscripsit Hippocrates ut Medici comam abraderent, sapientem verò barbam pascere luculenter?

TR. Garriant utique more suo improbi, & quibuscumque velint conuicijs patientiam nostram exagitent: satis namque nos commendant egregia benefacta, & præclara in vniuersum genus humanum facinora. Atqui si tecum Brune reputasses ad fidem authoritatemque comparandam opus esse quadam oris grauitate: nec sine modestia ad virgines pudicasque matronas, quarum valetudini præsumus, facilem patere aditum, certe mihi (nam me potissimum hoc aculeo pupugisti) promissam barbam, detonsosque capillos minimè exprobrasses.

BR. Ego verò in Medico deligendo scientiæ ac fidelitatis magis, quàm barbæ comæue rationem habere soleo: nam, equidem nec magnificatio istos barba tenus Æsculapios, nec mihi familiæque meæ à capillis quicquam metuo. Persuasum autem habeo libidines cupiditatesque non fronte orisque habitu, sed temperantia, & moderatione naturæ reprimi atque coerceri: enimvero

Frontis nulla fides; quis enim non vices abundat

C

Tristibus

ST. Vide quæso ac considera quid Brune loquaris, nec aliquando tandem pigeat irritasse crabrones. An verò nescis quàm sit periculosum simultates exercere cum Medicis, qui hominem impune possunt occidere; *imò hoc ipsum (vtar enim verbis M. Catonis) mercede faciunt, vt fides ipsa sit, & facile disperdant.* Caue autem existimes me tibi subiratum, quòd Medicos licentioribus verbis perstrinxeris: nam profectò nihil ista me mouent, sed enim nec medius fidius attingunt.

BR. Meritò te plurimi facio Stelliola: nam mihi tum doctrina, tum etiam fidelitate beneuolentiaque mirifice semper satisfecisti: tibi tamen, quàm iam est, vellem melius eîser: molestè enim fero quòd ad deuitanda nouercantis fortunæ incommoda, medicinam Mecœnatis cuiusdam loco, tibi delegeris. Verum enimuero hæc ars tametsi e cœlo sibi arroget originem, inuentoresque suos Dijs assignet, cœpit tamen ita in dies magis atque magis apud optimates euilescere, vt tandem non nisi à fraterculis gigantum, & proletaria turba factitari consueuerit. Quotus enim quisque ex his qui hodie medicina operam nauant, potest prompte dicere quis sibi quartus sit pater? Quid quod rectè notauit quisquis ille fuit, hoc hominum ordine nullum, præter vnum quem pietas hîc nominare non patitur, turpiorem esse vel indigniorem. Sed quid ego ita ætatis nostræ Medicos proscindo, ceu verò id hominum genus non fuisset omni æuo nequissimum! Penè mihi exciderant expostulationes deprecationesque, quibus grauissimi authores nunquam non sunt illos execrati. *Solam hanc artium, Plinio memorante, designata est Romana grauitas: in maximo fructu paucissimè Quiritum attingere.*

ST. Piger sanè immo etiam pudet me fortis meæ, quod egestatem medicina cogar sustentare. Noli autem Brune putare me artem hanc detestari, quæ si perinde ac res postulat, exerceretur omnium tum præstantissima foret, tum utilissima. Quid enim maius, quidue conducibilius præstari potest ab homine, quàm morbos propulzare, valetudinem tueri, & vitam
morta-

mortalium prorogare? At indoleo humani generis vicem, quod res eas, quibus hominum vita salutque continetur, viro ingenuo liberaliterque educato, indignas reputet, ijsque tractandas relinquat, quibus id potissimum propositum est, ut ex alieno incommodo quæstum faciant, & mortalium vitam ad lucrum mercaturamque reuocent. O miseram rerum conditionem; o cæcas hominum mentes! Ecquis non videret ex artis huius contemprione, maximam in vniuersa naturæ humanæ societatem, manare perniciem? cum sæpissimè opus sit ab his vitæ spem pretio emere, à quorum inciticia nequitiaque plus est, quàm à morbo periculi.

TR. Itane verò charitatis obtentu linguam in Medicos acuis; nec vereris importuna ista tua querimonia ansam dare, obrectatoribus nostris ad vniuersam nostram familiam licentius incessendam? Et audes tamen fructum ex Medicina deponere, aut Medicos tibi sperare propitios?

ST. Scilicet ignota est populo Medicorum conditio, vel occultari ea possunt, quæ in omnium oculos quotidie incurrunt. Quasi verò non sit in more nostrorum hominum positum, ut ij duntaxat ad medendi artem se applicent, qui ex infimo genere fortunæ uel gradu progeniti, non tam honoris existimationisque, quàm lucri, & commodi rationem ducunt. Atque utinam ego falsa loquerer, certè memet mei non pœniteret, neque puderet in ea arte versari, cuius mihi æquè est iucunda cognitio, atque odiosa tractatio: ob illorum flagitia, qui eandem turpiter exercent. Quippe hinc factum est ut frequentissimè in Medicos criminationes reprehensionesque exaudiantur, nec iniurià: nam quis non inuehantur in illos, qui frontem perfricuerunt, omnemque absterferunt pudorem, nec sibi quicquam non licere arbitrantur, modò ingentem pecuniæ summam vndecunque corradant? Qui inusitato quodam ois habitu inter homines deformitate iam conspicui cachinos irridentium commouere, digitoque monstrari gaudent, & ferio triumphant? qui vel temeritate, & impudentia, vel diuturna feruitute, nimiaque assentatione in diuitum familiaritates sese

insinuant? qui quasi personam sumentes vultum modò ad nugas modò ad seueritatem componunt, & semetiplos ad omnem fabulæ partem parant, vt magnatum gratiam aucupentur? qui tandem posthabita rerum naturæque inquisitione, nihil addiscunt præter technas doloſque, quibus imperitæ multitudini illudant? Non sunt mehercule artis ista, sed hominum flagitia. Ecceur verò.

Hæc ego non credam venusina digna lucerna;

Hæc ego non agitem?

etſi capiundos mihi ſciam eſſe inimicos omnes id genus Medicos.

TR. Quis eſt porrò aut quotuſque, qui reprehensionem tuam poſſit effugere? An non vides Stelliola ad rectè beateque viuendum exacuendam eſſe ingenij aciem, non modò ad naturæ contemplationem, ſed etiam ad rerum expetendarum fugiendarumque delectum; atque adeo sæpe vtilitati commodoque conſulendum; interdum verò etiam populo, & ſcenæ, vt dicitur, eſſe ſeruiendum; & temporibus magis, quam moribus parendum. Hinc enim pendet prudentia, ſeu ars illa viuendi, qua quicunque caret, miſerrimam proſectò degit vitam.

BR. Aliam tibi quære artem Stelliola: nam in medicina viſderis proſus indiligens, ne dicam ineptus. Quid enim temeritatem, impudentiam, aſtus, & vaſtamenta, ſolemnia iſtius artis munera, Medicis ceu crimina obiectas: artificibuſque vitio vertiſ ea, ſine quibus ars ipſa conſtare non poteſt? Medicinam Truſianus exerceat, qui quam perſonam ſulceperit optimè nouit, ſuaſque partes ſemper eſt ſuſtinere paratus.

TR. Eia. Brune poſtquam ſatiſ es in Medicos debacchatus, nunc in artem maledicta conijcito, & omne tandem iniquitatis tuæ virus euomito. Illuceſcet tamen aliquando ille dies, (neque enim perperuum cum ſanitate foedus icifti) cum tu medicæ artis ope implorata, in noſtram fidem conſugies. Tum verò honorificentius noſ tractabis, noſtroque conſilio ac voluntati etiam atque etiam obtemperare ſtudebis.

BR. At

BR. At ego maximas Dijs immortalibus gr̃atias habeo , quòd in vestras manus nunquam inciderim : haud enim scio an disceptationem hanc vobiscum hodie mihi licuisset habere , si forte aliquando Medicorum consilia fuissent expertus . Cœterum cum semper mihi scire libuerit quid saluti meę opus sit , diuturna corporis notatione , atque obseruatione rerum , quę prodesse , aut obesse solent , medicinam quandam mihi comparauī , (quippe non rem odi , sed artem hominum vitas immani quæstu cauponantem) qua quoad possem meam valetudinem regerem ; vitam tandem commissurus fortunę , ubi mea me ratio ipseque destituerit . Medicis autem nullam propemodum fidem habeo ; non his modo , qui cum nunquam literas didicerint , satis habent vltro citroque in prætextatis mulis inequitantes per urbem indefinenter cursare , sed nec etiam magnis illis medendi magistris , qui vniuersam Galeni medicinam se tenere profitentur : persuasum enim habeo nihil ipsos habere cogniti nihil comperti , sed periculosas , & ancipites curationes instituire , & remedia penè omnia temere adhibere : tum experimenta per mortes agere ; vniuersamque eorum artem in eo positam esse , vt vel ex falsis hypothesebus inaniter coniectando ariolentur , vel ex consuetudine quadam , vulgarique vsu ducantur ; vel tandem casu & fortuito , nostris periculis fortiantur : hoc tamen ipso securi atque felices , quòd nulla sit lex , quę puniat incitiam capitalem : immo verò cum mercede gratia referatur , eorumque prosperos successus sol aspiciat , aduersos operiat tellus . Verum ne isthęc à me inconsiderate dicta putetis , ostendam quibus argumentis ea mihi comperire licuerit . Itaque cum primùm de Medicorum scientia dubitare cœpissē , animaduerti illos , quotiescunque in morbos incidunt , veluti implicatos teneri , & hæsitare ; nec sibi bimer posse remedium inuenire : sed vel e verularum præstigijs , & circumforaneorum fallacijs sibi opem deposcere : plerumque vero insperata , nec opinata morte occumbere . Ad hæc obseruaui infirmam semper esse eorum valetudinem , qui Medicorum decretis fidentes , eisdem facile obsequuntur . Præterea

animum

animum retuli ad multas illas magnasque, circa ægros sententiarum concertationes, cunctis ferme inter se dissidentibus, ac discordantibus. His igitur obseruatione diuturna notatis, de Medicorum impericia certior sum factus. Nondum tamen mihi satis constabat artine isthæc, an verò personis essent imputanda; donec consultis scriptorum voluminibus, comperi artem hanc vt periculossissimam, ita quoque inconstantissimam semper fuisse, & etiamnum quotidie immutari; autoribus firmiora fundamenta quærentibus, aut certè famam nouitate aliqua aucupantibus. Primus Hippocrates medendi præcepta conscripsisse, & clinicem seu medicinam, quæ victu & pharmacis in lecto decumbentes medetur, instituisse traditur. Herodicus verò ex Selymbria Hippocratis discipulus Iatralapricen induxit, quæ vnguentis, & frictionibus hominum salutis subueniret. At Petron deinde suam quoque contulit medicinam, quæ in eo præcipue vertebatur, vt ægros vestimentis obrueret, sudoresque omni modo ciceret. Philistio, item Pausanias, & Empedocles in diuersas curandi vias processerunt. Hinc illa rationalis, Empyricæque sectæ discrimina: quippe Acron Agrigenrinus neglecta rerum latentium coniectura ab experimentorum obseruatione medendi leges deduxit. Eandem quoque viam inijt Serapion, qui nullam prorsus habendam causarum rationum in medicina censuit, habuitque sectatores Apollonium, Glauciam, Heraclidem Tarentinum, aliosque innumeros, quorum fama in obscuro est. Sed Herophilus omnem curandi rationem ab inuestigatione causarum eliciendam voluit: quocirca Scholis omnibus damnatis, nouam argutioremque condidit sectam, quæ deinde nimiam propter subtilitatem est deserta. Chrisippus item, qui in captiosis argutijs industriam terere consueuerat, acutulis sophismatis maiorum placita turbauit. Mox à Chrisippo præceptore disciscens Erasistratus noua meditatus est dogmata. Asclepiades autem in studio dicendi, quam in arte medendi exercitior, eloquentia vicit ceteros Medicos; vtrumque medicamentorum, quem is qui iam aliud egerat, non satis norat, magna ex parte sustulit; &

tum.

tum illecebris , tum etiam meditata quotidie oratione blandiens , tantam sibi auctoritatem comparauit , vt omnem mendendi rationem per id temporis vsurpatam , labefactare potuerit . Asclepiadis præcepta mutauit Themison eius auditor : atqui huius decreta abdicauit Antonius Musa Augusti Medicus . Nec verò diu fatis inconcussa steterunt Musæ dogmata ; vt enim complures alios nouæ medicinæ conditores missos faciam , sequutus est Thessalus , qui omnia maiorum præcepta funditus euertens , gloriabatur à se veram solidamque sectam fuisse institutam : nihil præterea ab alijs traditum , quod vel ad valetudinem tuendam , vel ad profligandos morbos quicquam conferret . Vicit vero Thessali ingenium Crinæ massiliensis calliditas , qui ex ephemeride astrologica siderum motus excipiebat , horasque obseruabat , quæ cibos , & medicamenta permitterent , vt geminata arte accuratior videretur . Tandem Galenus (longum est enim singulas medicinæ mutationes percurrere) omnes prioris æui medicos exercuit , peculiaribusque ductus coniecturis , nouam eamque maximè sanguinariam sectam instituit , quæ quasi herba irrigua succreuit vberimè , magna medius fidiis mortalium perniciæ : Sed enim quamplurimas hæc animas ad Orcum demittit quotidie . Sed quid ego hæc commemorem in arte , cuius mutationi modum finemque facere res ipsa non patitur ? Iam celeberrima illa Galeni Schola , cuius nomen penè inuictum ad hæc vsque tempora permansit , cœpit tandem aliquando deficere : serpit enim , plurimumque in dies percrebrescit fama chymiatricorum , qui magna ex parte à Galeno desciscientes , inaudita Paracelsi dogmata sectantur . Immo verò nescio quid noui hæc ætas protulit , vade actum iam esse de vniuersa veterum medicina monemur . Quis igitur in tanta sectarum diuersitate , opinionum rationumque confusione , medicinæ inconstantiam leuitatemque non agnoscat ? Quis cum hæc aliquando animaduenerit , vitam ausit illis concedere , qui artem ad casum reuocantes , ne nihil agere videantur , ægrotos nunc importuna inedia , nunc iniucundioribus cibis violenter ingestis affligunt , & ferro , igne ,
phar-

pharmacis que ipso morbo molestioribus ac nocentioribus, excruciant: tandem verò acerbissimè vexatos spiritus ante, quàm doloris ex hæc redēs faciunt.

TR. Eò tandem Brune processit sermonis tui licentia, vt non iam disputandi, sed altercandi, immo vero obtrectandi studio ardere videaris: quippe nos penè e frugi hominum choro sustulisti, artemque tot sæculis exultantem, tot ingenijs, tantisque studijs quæsitam, funditus euertisti. Verum perge nos, quantum potes, maledico dente carpere: nam certè conatus hoscetuos irritos facit singularis omnium erga nos beneuolentia, & summa nostræ artis vtilitas. Quid autem medicinæ inconstantiam, & mutabilitatem exprobras, sectarumque varietatem tot verbis exaggeras? Scilicet commune id illa vitium habet cum Philosophia, quæ semper magnis doctissimorum contentionibus dissensionibusque viguit. Sed vbi sunt istæ medicorum hæreses post Galenum (nam ante illum medicinam mutasse non diffiteor) vbinam discrepantes sectæ? Num verò Galenicæ doctrinæ lucem eripiet, caliginemque tandem Chymitarum fumus offundet? Et mendacissimus ille tenebrius Paracellus, cuius deliramenta iam dudum exhibilauit Erasius, de Galeno deque sapientissima eius familia triumphabit?

BR. De medicina id ipsum me animo sentire profiteor, quod lingua apertè, nullaque circuitione vsus expressi. Quare deprecor ne putetis, me contentionis potius, quàm veritatis cupiditate, vel priuata aliqua offensione, ita loquutum: quam vitari in disputando vix potest, ne concitatiorē impetu, animique ardore rapiamur interdum. Vos interea si vera dixi agnoscite, si falsa ignoscite. Quod autem de philosophia Trutiane dixisti, illam videlicet æquè atque medicinam leuitatis, inconstantiaue culpa non vacare, omnino verissimum est. Equidem in eodem vtraque peccat; sed non æqua discriminis ratione; quippe incertitia in rebus philosophicis aut nihil, aut certè parum Reipublicæ officit; cum tamen error in medicina hominum vitas depopuletur; nec profectò sit periculum in vllò mendacio maius. De medicina Chymicorum nihil attinet

ad me

ad me pronunciare: qualiscunque verò illa sit, sua quoque iactat miracula, compluresque habet sectatores, qui non leuem planè Galenicæ factioni cladem inflixerunt. Vaticinor tandem (& hoc Apollinis Pythij oraculo dictum puta) non longè tempus abfore, cum illi, qui medendi rationem à contemplatione caussarum deducere student, nouas indagaturi sint vias; quia nimirum ea nuper ipsa phænomena animaduersa sunt in animalium œconomia, quæ omnino videntur euertere fundamenta, super quibus hypotheses coniecturæque medicinæ rationalis fuerunt hætenus superstructæ.

TR. Quæ tandem sunt nouæ istæ obseruationes, aut quisnam est hodie vsque adeo oculatus, vt ea perspicere potuerit, quæ Hippocratem, Galenum, aliosque egregios Medicinæ principes, latuerunt?

BR. Tua nunc Stelliola mihi opus est ad hanc rem exprompta memoria: nam eorum, quæ ego olim te monstrante, obseruaui, non rectè commemorari: neque etiam edocere ea facile possem, quorum explicatio per propria, & certa anatomes vocabula, mihi non satis dum perspecta, debet institui.

ST. En fato tandem factum videtur, vt ad disceptationem, quam principio susceperamus nostra reuolueretur oratio. Sed præstabit fortasse huc declinare, quàm diutius morari in odio illa, inuidiæque plena contentione, quæ de medicinæ natura, medicorumque conditione paulò ante inter nos fuit. Vtinam verò nunc possem ea tibi Trusiane ob oculos ponere, quæ in Zootomia non semel mihi licuit animaduerrere; certè quidem confiderem te ipso quoque iudice adprobanda fore noua nostri sæculi inuenta, quæ vulgaris medicinæ dogmata manifestæ falsitatis futilitatisque conuincunt.

TR. Ego verò ad interruptam disputationem non inuitus reuertor. Valde enim auco audire, quid inueniri tandem potuerit, post accuratissimam antiquorum diligentiam: mihi enim nihil in mentem venire potest, quod illis fuerit intentatum. Quapropter ediffere, si ita placet, Stelliola inuenta ista, quæ tantopere probatis. Meæ quidem partes erunt pro veteri-

bus stare, & quæcunque aduersus eorum dogmata afferentur, refellere.

ST. Haud scio an in tanta disputantium dissensione controversia dirimi vnquam queat, sed hoc sermone certè non potest: iam enim in vesperam inclinat dies, monetque vt de domitione tandem cogitemus. At verò vsque dum nobis detur opportunitas iterum congregiendi, perlege quæso Trusiane volumen istud, quod satis commodè, vt spero, desiderium tuum explebit: hinc enim faciliè intelliges plurimum luminis, ac ornamenti ad physiologiam ea contulisse, quæ à nostris authoribus animaduersa nuper ac notata fuere. Porro autem non dubito, quin multa tibi inter legendum occurrant noua, & prorsus inopinata, quæ quidem ab his, quæ vulgo docentur, vniuersa re, & tota sententia dissentiunt.

TR. Oho. Hæcine sunt Progymnasmata illa physica, in quibus (vt ab amicis accepi) absurda quædam, & penè portentosa doctrina præter veterem, communemque philosophandi rationem traditur? At ego peream, ni quam primùm illa funditus euertero. Opportune igitur hoc exemplar mihi Stellio-la commodasti. Id ego festinanter legendo percurram, ac interea errores falsasque opiniones, si vobis ita placet, annotabo.

ST. Id quidem nobis pergratum perque iucundum erit. Sed illud velim tibi persuadeas Trusiane, multò difficilius esse verum inuenire, quàm falsum conuincere: quanquam laudanda omnino est illorum industria, qui falsas fictasque opiniones conuellunt, nostrasque mentes ab errore vindicant. Verum de hoc satis: nam tempus iam est domum concedere.



TH. CORNELIVS

Iohanni Caramueli Campaniæ
Veteris Episcopo S.

Progymnasma meum de Ratione Philosophandi eo
lubentius in lucem exire patior, quod abs te Vir
Clarissime nuper lectum, commendatumque stu-
diosius fuerit. Et verò de honore famaue mea
minimè pertimescam, neque verebor reprehensionem Docto-
rum atque prudentium, si ea diuulgauero, quæ magni Cara-
muelis iudicio fuerint approbata. Porro autem quid mihi in ani-
mo fuerit hac dissertatione decernere, tibi arbitror esse planè per-
spectum. Nihil enim profecto malui, quam ut obscuritatem
naturæ significarem, et causas corruptæ peruersæque sapientia
nostrorum philosophorum aperirem. Ne quis putet me hac mente
fuisse, ut voluerim philosophandi firma præcepta tradere, seu cer-
tas leges præscribere. Ceterum rationibus ego meis optime prospex-
isse videor, quod tibi hoc progymnasma dicauerim: illud enim
pro certo mihi polliceor, plurimum claritatis huic volumini, ex
splendore tui nominis, accessurum. Neapoli MDCLXI.

DE RATIONE PHILOSOPHANDI.

Progymnasma I.



Mirari vehementer soleo, quæ causâ sit, cur Physiologia tot sæculis, summis viris, maximisque studijs exulta, non ita multum adoleuerit; cum ceteroqui mecum ipse considerans disciplinarum subtilitatem, multiplicemque artium varietatem, quam hoc interim spatium humani ingenij acies est affecuta, incredibiliter obstupescam: & meritò. Quis enim non admiretur automata, versatilesque machinas, quæ siderum cursum cum cœli ratione congruentem indicant, temporum interualla designant, & omnia cœli phænomena velut ignara causâ representant? Quis item non suspiciat præclara Architectonices machinamenta, & Chymicæ miracula, in quibus gloriari nostra ætas iure optimo potest?

Verum enimvero cum multæ res sunt, in quibus elucet humanæ vis intelligentiæ, tum maximè in mathematicis disciplinis hæc ipsa videtur excellere: Quanta Deus bone in illis subtilitas! quam multiplex quamue artificiolorum inextricabilium nodorum explicatio! Equidem mirari satis Geometriam non possum, quæ ex paucis ad nodum peruulgatisque notionibus seu axiomatis, ad acutissimarum conclusionum apodixes rationem nostram adducit. Hinc multæ illæ difficultatum propositionum demonstrationes, quæ Archimedis, Apollonij, Pappi, Vietæ, aliorumque voluminibus continentur. Hinc illius diuinæ propemodum artis quam Analysin, seu Algebram vocant mirabilis ortus, quæ nihil acutius fingi, aut excogitari potest.

Quamuis autem tanta sit mathematicarum demonstratio-
num

num subtilitas, tanta artificiosarum machinationum varietas, ut in ea gloriari nobis quodammodo liceat, summa tamen rerum naturæ ignoratio, in qua versamur, res est digna profecto in qua erubescamus. Scilicet nihil penè in Physiologia tot ingenijs, tantisque studijs adnitentibus potuit hactenus explicari. *Sed enim latent omnia (ut enim verbis Tullij) crassis occultata, & circumfusa tenebris; ut nulla avies humani ingenij tanta sit, quæ penetrare in cælum, terram intrare possit. Corpora nostra non novimus, qui sint situs partium, quam vim quæque pars habeat, ignoramus. Nimirum res ita se habet: quæcumque de natura rerum quærentur, disputationibus huc & illuc trahi possunt, & in contrarias partes diduci: nec dictum quicquam est à philolophorum quoquam, de quo plerique non ambigant: quin potissima eorum, qui hodie Philolophi videri volunt, cura versatur in confutandis aliorum sententijs. Quanquam sæpe contingit, ut hi cum aliena errata lynceis oculis peruelegant, in proprijs coniecturis oscitantes conniveant.*

Neque verò quis putet paucitatem illorum, qui physiologiæ operam navant, esse causam, quare levis tenuisque eidem facta sit accessio: quippe longè minor est eorum numerus, qui studium suum in mathematicis disciplinis collocant. Id autem vel ex eo confirmari luculenter potest, quòd cum innumeri quotidie prodeant physicarum disquisitionum libri, pauca interea de rebus mathematicis volumina conscribantur.

Philolophorum quotquot ubique sunt Scholæ magna plerunque auditorum frequentia celebrantur. Nemo ad Theologiæ, vel medicinæ lauream admittitur, nisi confecto philolophici cursus triennio: quanquam plerique, cum naturæ rationem ne primoribus quidem labris attigerint, in philolophorum collegium cooprantur. Sed hi verbotenus saltem in physiologiæ studio versantur; at verò in tanta discipulorum multitudine, vix unus aut alter ad mathematicas disciplinas animum, vel leniter consuevit adiungere.

Quisquis hæc secum reputaverit, facile intelliget naturæ rationem plurima involutam esse obscuritate, & eius indaginem multo

multo abstrusiores, quàm mathematicarum contemplationum apodixes.

Aristoteles scriptum reliquit pueros facile posse mathematicos euadere, difficile physicos, & difficilime politicos. Hinc nonnulli in eiusdem verba iurare soliti, intulerunt mathematicas disciplinas in perfacili, & penè puerili cognitione versari: studia verò physiologiæ, atque politices esse exercitationes adultiorum, & omnino præstantis ingenij.

Ego sane ut Aristoteles sententiæ veritatem agnosco, ita interpretationem hanc probare non queo. Enimvero si qua est disciplina, cuius cognitio summam ingenij aciem desideret, hæc quidem in mathematicarum artium numero est exquirenda; ut propterea non immeritò quidam Archimedes, qui longè omnes quotquot vnquam fuere, mathematicos superauit, ingenij doctrinæque principem constituerint. Ciuilis quidem prudentia multarum rerum vsum requirit, plurimamque experientiam, quæ non tam ex libris aut meditatione, quam ex memoria multijugi, & frequenti negotiorum tractatione potest haberi: hæc autem nisi ætate prouectioribus, & iudicij maturitatem quamdam adepris, non datum est consequi. Porro ad physiologiam opus est effectuum, & phænomenon naturalium cognitione, quæ ex notatione, & animaduersione naturæ accersenda potissimum videtur. Sed mathematicæ disciplinæ, cum in sola magnitudinum analogia contemplanda versentur, nullam rei cuiusvis cognitionem desiderant, præter simplices quasdam notiones, ac intelligentias, quas naturæ mentibus hominum, tanquam scientiæ fundamenta, inseruit. Quamobrem puer, qui nec multorum mores nouerit, nec naturæ phænomena obseruarit, siquidem ingenij acumine polleat, in mathematicis proficere multum poterit.

Verum si mihi detur conijcere quæ causa sit, cur in tanta rerum naturæ ignoratione versemur, ad duo potissimum capita confugiam, quorum alterum imputandum naturæ, quæ cum veritatem in profundo (ut ait Democritus) penitus abstruserit, imbecillas dedit intelligentiæ nostræ vires ad illam eruendam;

dam; alterum verò philosophantibus, qui naturæ contemplationem præpostero consilio plerumque aggrediuntur. Quænam autem ex vtraque parte contingant impedimenta, deinceps est videndum.

Principio quidem constat omnia, quæ sub intelligentiam nostram cadunt, ad tria genera reuocari, nempe ad abstracta, concreta, & analogias. Hinc triplex existit doctrinarum differentia: prima quæ res incorporeas æternasque, & à sensu abstractas contemplatur, Theologia aut prima Philosophia seu metaphysicè dicta; altera quæ in rebus corporeis concretisque versatur Physiologia vel Physice appellata; tertia tandem, quæ magnitudinis quæ figuræ aut numero subiicitur, analogias scrutatur, & Geometriam Arithmeticemque cæterarum omnium artium mathematicarum fundamenta complectitur. Verumtamen id omne quod in eiusmodi disciplinis nobis assequi datum est, refertur semper ad rationem nostræ intelligentiæ, atque adeo nequaquam ipsis rebus absolute respondet.

Verum enimvero (ut missas faciamus Theologorum, & mathematicorum contemplationes) omnes naturalium rerum imagines extrinsecus per organa sensuum in animos nostros irrumpunt. Hoc enim est, quod vulgò dici solet: Ea tantum nos mente concipere, quæ à sensibus tanquam interpretibus ac nuncijs hausimus: atqui omnis fere illa cognitio, quam humana ratio à sensu traditam impressamque depromit, manca quodammodo est & imperfecta: sed enim ea sensuum vis est, ut indicet quonam modo ab his, quæ sentimus afficiamur, neutiquam verò naturas rerum, quales in seipsis existunt, nobis percipiendas exhibeat. Ex quo fit, ut persæpe de rebus, quas sensu accepimus, perperam iudicemus. Nam quia vnusquisque nostrum existimat talia prorsus esse singula, qualia sibi videntur, perinde ac si ipse rerum omnium esset mensura, compluries accidit, ut eadem de re iudicantes, magnopere dissentiamus; quotiescunque videlicet non attendimus ad ea omnia, quæ motus sensiferi affectiones variare possunt: Sic vnum idemque balneum alteri calidum videri solet, alteri

alteri frigidum, cum nimirum hic æstuans, ille verò algens ad thermas accesserit. Et cryptæ æstate rigere, at hyeme calere plerunque nobis videntur; cum tamen hæc caloris frigorisque vicissitudo, non tam criptis, quæ vix immutantur, quam nostro corpori sit adscribenda.

Ad hæc præiudicata plerunque opinione tenemur, putantes ea tantum in rerum natura existere, quæ sensibus percipere possumus: nec interea animaduertimus nobis fortasse non fuisse à natura tributos omnes illos sensus, qui satis sunt ad ea omnia, quæ sub sensum cadere possunt, percipienda.

Fac vniuersum genus humanum ita fuisse à natura institutum, vt oculorum sensu omnino careret; numne aliquis potuisset aliquando æstiuæ ardoris, aut hybernæ frigoris causam ad similitudinem veri explicare, vel diurnæ nocturnæque vicissitudinis rationes aperire? Ecquid de inæquabili climatum temperie, ac de innumera effectuum à Solis lumine pendentium multitudine, coniecturum fuisse censeamus illum, qui Solem nunquam potuisset adspicere?

Quis item certiores nos facit attributos nobis fuisse omnes quoscunque sensus natura concessit multiplici animantium, quæ in vniuersitate existunt, varietati? Equidem in animalibus quandoque obseruamus miram quamdam ad indagandum sagacitatem, & veluti reconditas rerum perceptiones, quas cum nos attingere nequeamus, perperam illis acutiorem videndi, aut olfaciendi, auscultandiue sensum adscribimus: cum fortassis eiusmodi notiones referendæ sint ad peculiarem quemdam eorumdem sensum, nobis incognitum.

Pingamus cogitatione apem odorandi sensu carere: at seruata tamen ea, quæ illi à natura tributa est, corporis forma, rationis, ac intelligentiæ participem esse. Equidem si hæc hominem adspexerit rosas, aut lilia ad nares admoventem, existimabit illum ceram, aut mellaginem inde decerpturum. Enimvero præsumpta opinione tenebitur, putans id facturum hominem, quod & ipsa solet efficere, quæ cum nulla odoris indicia tulerit, vix vnquam cogitare poterit inesse homini olfactum,

Etum, quo varias odororum differentias percipere possit. Quem admodum eum, qui ab ortu surdus est, atque adeo vocum varietates, & modos noscere non quit, sermonis etiam linguæque vñ carere necesse est.

Ex his conijcere licet nos in errorem sæpissime rapi, & interdum etiam frustra torqueri in exquirenda eorum ratione, quorum causa est in rebus, quæ sub sensum nostrum minimè cadunt. Quid? quod fieri potest vt illa vis, quam in herculeo lapideo admirari solemus, à simili quapiam causa proficiscatur, quæ tamen si nostrum obtutum effugiat, facile tamen percipi à nobis posset, si certo quodam sensu, ad eiuldem perceptionem necessario, minimè careremus.

Eiusmodi erroribus subiectæ nequaquam sunt mathematicæ contemplationes, vtpote quæ versantur in rebus, quarum imagines in animum per sensus minimè insinuantur: figuras enim, & numeros, quorum proprietates, & analogias mathematici scrutantur, mens per seipsam concipere, sine sensus adminiculo, satis commodè potest.

Hæ præter cæteras sunt causæ, ob quas non difficilis modò, sed penè iam desperanda videtur absoluta naturæ cognitio: at non ideò tamen negligenda eius inuestigatio: quippe in tanta obscuritate datum est nobis nonnulla leuiter attingere, quorum scientia non minus vtilitatis, quàm voluptatis potest asferre. *Præstat autem (vt de rerum cœlestium contemplatione traditum est ab Aristotele) qualemcunque huius disciplinæ peritiā habere, quàm plerasque alias artes perfectè callere: quemadmodum amatoribus suauis est amicæ suæ, vel partem oculo delibare, quàm aliarum tota membra corpusque inspicere.*

Sed cæteris tamen impeditis semotis, nequit Physiologia, nisi vnà cum ætatibus, sensim adolefcere. Quemadmodum enim multæ sunt artes, & complura naturæ phænomena, atque experimenta nobis etiamnum incognita, quæ tandem aliquando, seu casu, seu hominum consilio atque industria, proferentur in lucem, ita etiam Physiologia, quæ in explicanda ratione naturæ, ytitur argumentis ex analogia rerum artificum

cialium atque experientia depromptis, nec ab vno ingenio, nec vna ætate potest absolui. Inexplicabile olim vel summis authoribus visum est, quomodo Struthiocamelus deuoratum ferrum conficiat: id autem nobis hodie non magis occultum est, quam cætera naturæ opera: quandoquidem (vt missum faciamus attritum, collisumque durorum corporum in auium ventriculis excitatum) videmus inter chymica experimenta durissimos lapides atque metalla, ab acrioribus quibusdam succis halitibusque comminui, atque dissolui. Iam verò fulgetra, tonitrua, fulminumque iactus, & alia quæ in aere fiunt naturæ portenta, non tam cognoscere, & intelligere, quàm imitari posse, nos tandem docuit Chymia. Ad hæc qua ratione visio fiat, non ante innotuit, quàm fuerit obseruatum à lumine per paruum foramen in obscurum conclaue intrante, pingi in obiecta superficie rerum foris illuminatarum imagines. Præterea multa ex his, quæ de natura cœlestium corporum nouimus, incomperta iam fuerant, aut dubia priusquam prodisset in lucem dioptricus tubus, cuius contemplatio animam dedit Iohanni Keplero, & Renato des Cartes, vt patefacta ratione infractionis luminis, perspicuum facerent quam vim quæque pars oculi habeat, quod quidem maiores nostros omninò latuerat.

Parum verò fuerat quòd naturæ ratio tot tantisque difficultatibus ex se ipsa esset inuoluta, ni quoque illius incremento obstitisset eorum, qui quocunque ferè tempore sunt philosophati, flagitia. Primum enim nonnulli ætatem inter experimenta consumunt, & sola effectuum inspectione contenti, ad causarum inuestigationem nunquam conferunt ingenium. Contra verò alij posthabita rerum, quæ in natura sunt, contemplatione, ea tantùm animo persequuntur, quæ nusquam sanè, nisi in ipsorum cerebro, existunt. Rursus alij contentionis cupidiores quàm veritatis, curam omnem in confutandis authorum sententijs collocant, & cum semper destruant, nunquam, vt construant, enituntur. Ad hæc plerique cuiuspiam auctoritati temerè addicti, & quasi mancipio dediti, eiusdem doctrinam sequun-

sequuntur, & id raturum habent, quod ab eo, quem sibi ducem præmonstratoremque delegerunt, iudicatum vident. Quidam præterea non tam rerum, quàm verborum captatores, de his, quæ nihil attinent, intempestiuo garritu disceptant, maluntque inepta loquacitate inanem quemdam plausum confectari, quàm in veritatis inuestigatione ætatem conterere. Alij denum obrutius ingenio donati, cum nequeant laudem fructumque ex veris, & solidis disciplinis acquirere, ad vanas fallacesque artes confugiunt; de quibus ementita miracula prædicant impudenter ij, vt est apud Ennium, *qui sui quæstus causa fittas suscitant sententias*. Hinc factum est vt apud complures iam hodie Physiologia, & Mathematicæ disciplinæ tanquam vulgares doctrinæ pro nihilo habeantur: nam nescio quid maius sibi pollicentur à Cabala, Alchymia, Astrologia, Magia, alijsque præstigijs, quas hominum fraus, seu superstitio commentata est.

At certè liberum nobis erit hæc impedimenta deuigare, & naturæ contemplationem saniori consilio aggredi, vtilitatemque non mediocrem inde percipere. In rem autem erit ea in primis ad hoc studium ingenia comparare, quibus ingenerata est cupiditas cognitionis, atque scientiæ. Eiusmodi potissimum sunt quæ quicquid in natura seu insolens, seu reconditum viderint, sedulo obseruant, notant, & admirantur, eiusque causam pro viribus peruestigant. Enimuero *valde Philosophi, vt præclare ait Plato, illa affectio est admirari: neque verò est alia philosophiæ origo, quàm ista*.

Quicumque verò cupit in Physiologiæ studio cum fructu versari, debet ante mathematicis artibus, aut saltem Geometria, ex Platonis præcepto, animum imbueri: nam præterquam quod mathematicarum proprium est, vt ingenium exacuant, & rationem ita dirigunt, vt nisi ex euidenti necessitate argumentationes, non concludat; permagno præterea vsui sunt in rebus naturæ inuestigandis; quemadmodum satis luculenter indicauit Galilæus, qui Geometriæ adminiculo complures abstrusas, reconditasque rerum naturæ intelligentias,

in veritatis lucem extrahit .

Naturæ autem consideratio à notatione , & animaduersione eorum , quæ in vniuersitate sunt , vel fiunt , est ordiendæ . Quocirca initio enitendum , vt quantam possumus naturalis historiæ cognitionem habeamus : neque ea modo teneamus , quæ nobis animaduerrere licuit , sed quæcunque etiam à probatis authoribus tradita sunt , addiscamus . Nec verò nos pigeat vel à rusticis , atque idiotis perquirere si quid ipsi obseruauerint , quod nobis vsui possit esse aliquando . At illud tamen Epicharmi memoratum à Q. Cicerone tenendum , *Nervos atque artus esse sapientiæ non temere credere* . Permagnum quidem interest naturæ phænomena perspicere , & eorum quæ narrantur , fidem vsu ac periclitatione , si liceat , experiri ; ne in errorem illorum rapiamur , qui tempus frustra conterunt in exquirenda ratione eorum , quæ non sunt . Cur alium obster quominus magnes ferrum ad se trahat . Quare hircinus sanguis adamantem frangat , atque comminuat . Quomodo echeneis paruus pisciculus magnarum nauium cursum remoretur . Quamobrem occisi sanguis ad interfectoris præsentiam e vulnere foris erumpat . Quid sit cur Paracelsi vnguentum saucios procul absentes ad sanitatem reducat . Multa istiusmodi commenta disputantur in Scholis , quæ cum plena sint futilitatis summæque leuitatis , tamen quò longius remouentur à vero , eò creduntur libentius , & iucundiore pruritu titillant aures auscultantium .

Magnopere etiam prodest philosophantibus vsus , atque cognitio eorum , quæ in Chymia obseruantur ; in hac enim artis naturæ sue prodigia mirificè elucent . Quicunque verò animalium naturam nosse expetit , debet impentiùs in Zootomia versari , quam præstat ex ipsa dissectione , quàm ex libris colligere .

Tandem quicquid vel arte , vel natura fit , animaduerrere diligenter oportet : nam nulla propemodum est vllius rei notitia , quæ naturæ rationem inuestigantibus non vluueniat aliquando . Quocirca non licet nisi maturis ingenijs , & multa rerum obseruatione experientiaque instructis , ad physiologiæ adyta penetrare .

Ceterum de methodo, atque ordiue, quo naturæ contemplationem aggredi deceat, nihil præterea dicam, quàm quod à summis authoribus obseruatum video: nec enim mihi tantum fumo, vt consilium meum illorum iudicio ausim præferre.

Primò quidem quærenda sunt rerum principia; hæc enim sunt fundamenta scientiæ, quæ est de natura. Arduum sanè opus, & quod physiologiæ mysterijs initiandos meritò absterreat. Iuuat hic præterea, quæ propria meditatione concepimus, exquirere quæcunque hæctenus à præstantissimis ingenijs excogitata fuere. Verumtamen magna illa opinionum varietate, quæ in hac quæstione statim occurrit, prudenter est vitendum. Nec verò ad vllam sectam animus adhærescat, aut sine ratione admittatur autoritas, sed expendantur singula, & qui quid rectè omnes edisserunt Stoici, Platonici, Aristotelici, Epicurei, in vsum naturalis scientiæ recipiatur.

Equidem vera, atque germana rerum naturalium primordia abstrusiora esse arbitror, quàm vt ab humana intelligentia in apertum produci, explicariue satis commodè queant: sed tamen id vnum in tanta difficultate sperare audeo, quòd scilicet quemadmodum in Astronomia ex fictis falsisque hypothësis, atque interdum etiam dissentaneis, & absurdis, siderum motus, positique, & omnia cœli phænomena, vti nobis e terra spectantibus apparent, quocunque tempore vestigantur; ita similiter in Physiologia fieri possit, vt excogitentur hypothëses, quæ tamen non omnino cohæreant, omnium tamen rerum naturalium euenta demonstrent. At verò sicuti solent Astronomi ex diuersis hypothësis inter se maxime dissentientibus cœli rationem cursusque stellarum agnoscere, ita pariter Physici diuersam philosophandi rationem ineuntes, poterunt aliquando eundem scopum prorsus attingere: quamquam interdum faciliore, interdum verò difficiliore via ad idem licet peruenire. Hanc autem rationem in philosophando sequutus vir incomparabilis Renatus des Cartes, caput supra omnes superioris memoriæ philosophos extulisse videtur,

in explicanda ratione eorum, quæ in natura obseruantur.

Etsi autem longè facilius sit eiusmodi hypothesen præstruere, quàm veras rerum naturæ causas inuestigare, non est tamen mediocris ingenij eas ita constituere, vt & omnibus naturæ phænomenis apprime respondeant, & repugnantes, atque absurdæ non sint. At enim Astronomis maior est concessa libertas, quippe quibus simplicissima quædam cognitio proposita est, ad quam pluribus vijs potest perueniri. Verum Physiici in varia multiplicique consideratione versantur, vt propterea ijs opus sit hypothesen excogitare, quæ ad verum ipsum, vel ad similitudinem veri quàm proximè accedant.

Post hypothesium determinationem, considerare oportet, An ne aliqua constitui possint axiomata, quæ ita vnicuique sint manifesta, vt nemo vnquam de illis ausit dubitare: Nam demum ex his, accurata ratiocinatione elici poterunt eorum, quæ inquiruntur, demonstrationes. Quod ex sententia fiet, si ea tantum, quæ explorata iam sunt, atque comperta, pro veris admittantur; & sensuum fides ratione, ratio verò ipsa sensibus, si fieri possit, comprobetur.





TH. CORNELIVS

Simoni Rao Pactensi Episcopo S.

Superiore annocum Neapoli nobiscum esses, sermo-
que inter nos de lucubrationibus meis incidisset ef-
flagitasti vir eruditissime, ut istius progymnas-
matis, quod est de rerum initijs, legendi potesta-
tem tibi facerem. Tum ego præme tuli, atque professus sum,
me in hoc scripto minus quam in cæteris, mihi placere: qua-
propter facile, ut meminisse potes, patiebar quædam tibi non
probari, quæ ne mihi quidem satisfacere videbantur. Quo-
niam autem ipsa cognitio contemplatioque principiorum magna
est, & multis obstructa difficultatibus, aliqua, ut spero, mi-
hi venia dabitur excusationis, quod quibusdam in rebus vi-
dear conuiuere. Nunc quando commentationes meas publica-
re, easque hominibus mihi amicissimis dicare constitui, hoc ip-
sum progymnasma tibi iam pridem desponsum, ac destinatum,
tibi dono, vel potius bona fide persoluo.

Neapoli MDCLXI.

40
D E I N I T I I S
R E R V M N A T V R A L I V M .

Progymnasma II.



Vum multæ res in Physiologia latent summis inuolutæ difficultatibus, tum perobscura videtur quaestio de rerum naturæ principijs. Omnes quidem sapientes vna mente consentiunt naturæ contemplationem ordiendam esse ab inquisitione primordiorum, e quibus omnia sunt orta, generata, atque concreta. Verum in definiendis eiusmodi principijs semper fuit inter authores summa dissensio. Quippe nonnulli vnum, quidam verò innumerabilia, itemque alij plura, alij pauciora constituerunt naturalium rerum initia. Adhuc autem dum scrutantur quænam illa sint, non leuiter inter se dissidere videntur.

Xenophanes vnum censuit esse omnia; neque id esse mutabile, nec genitum, nec interiturum vnquam.

Parmenides vnum atque immobile posuit vniuersum; principia verò duo, nempe ignem, & terram, vel calidum, & frigidum, seu lumen, & tenebras: & illud quidem efficiendi vim habere, hoc verò accipiendi, & quasi patiendi. In eadem quoque fuisse sententia perhibetur Melissus Parmenidis auditor.

At Leucippus rerum initia posuit plenum, & inane, & illud quidem in atomos, seu corpuscula indiuidua diuersarum formarum dispersitum hac illac ferri; hoc verò locum præstare, per quem ipsæ atomi ferantur. Omnes autem res naturales coagmentari ex corporum, & inanis admistione.

Democritus Leucippo in hoc similis ex atomis, atque inani con crescere omnia, & generari voluit. Cum verò rem omnem vberius esset persequutus, atomorum naturam subtiliter expressit;

pressit; tradidit enim illas tum numero, tum etiam figurarum varietate infinitas esse; ac iuxta earumdem figuras, numerū, ordinem, dispositionemque rerum omnium concreciones fieri.

Epicurus à Democrito pleraque omnia accipiens docuit vniuersitatem duabus ab initio rebus constare, corporibus nimirum, & inani. Corpora autem ex quibus concreciones fiunt, & in quæ dissoluuntur, indiuidua esse, & immutabilia, ac figurarum diuersitate incomprehensibilia.

Et hæc quidem sunt de rerum initijs placita, quæ ex Italica Pythagoræorum Schola certa quadam serie emanarunt. Atqui non minus illustria fuere dogmata, quæ ex Ionica Schola à Thalete Milesio per Anaximandrum, & Anaximenem, Anaxagoræque aliosque celeberrimos philosophos continuata, successione effluerunt.

Thales vnus ex septem, cui sex reliquos consensisse ferunt, aquam censuit esse rerum naturalium principium; vnde orta sint omnia: propterea quod humido connectantur omnia, & humida sint rerum semina; quæque interitura, ac dissolutura sunt, sicca, & arida prius fiant, nec sine humido quicquam progignatur. Deum verò dixit esse mentem, quæ cuncta fingat ex aqua.

Heraclitus ex igne omnia nasci credidit, & rursus in ignem dissolui omnia.

Anaximenes existimauit omnia fieri ex aere, qui pro ratione densitatis, & raritatis modò in ignem abeat, modò in nubem concreseat, & adhuc in aquam cogatur, immo etiam in terram & durissima corpora densetur.

Anaximander autem eorum, quæ in vniuersitate sunt, principium esse censuit infinitatem quamdam, ex qua quicquid vbique est generetur. Rerum verò concreciones fieri per dissimilium segregationem à motu sempiterno.

Anaxagoras initium vnde omnia profiscantur, materiam infinitam constituit, eamque diuisa in particulas inter se similes; & primùm confusas, postea distinctas, & in ordinem digestas à mente diuina. Eiusmodi autem particulas neque ge-

nitas esse, neque interituras vnquam. Earum verò congressu, ac segregatione res naturales concrefcere, dissoluique. Porro singularum rerum particulas inueniri in quauis re; sed esse hoc potius quam illud, quoniam plurimas huius rei continet particulas: nimirum videri hoc aurum, quia plurimæ sunt in eo auri particule; quanquam & aliarum omnium rerum particule eidem insunt. Initium verò motus cuncta in ordinem redigentis, fuisse mentem diuinam.

Empedocles ex peruulgatis, & notis quatuor igne, aere, aqua, & terra generari omnia, & concrefcere voluit, per congregationem ab amiciria, segregationemque à lite excitatam. Et vnum quidem è pluribus fieri, nouasque rerum species progigni ab amiciria, contra verò plura ex vno prodire, relque dissipari à discordia.

Stoici dicunt duo esse in rerum natura, ex quibus omnia fiant, alterum quod faciendi vim habeat, alterum quod accipiat, & patiatur: illud aiunt esse causam, seu rationem facientem, idest Deum; hoc verò materiam, quæ se ad faciendum tractabilem præstet: cæterum materiam iacere inertem, neque ex seipsa coherere posse, rem planè ad omnia paratam, sed cessaturam, si nulla vi contineretur. Causam verò suam vim exercere in materiam, eandemque formare, & ex illa quicquid vbique est producere.

Platoni similiter visum est duas esse naturas, per quas cuncta gignantur, Deum, & materiam: hanc verò informem ex seipsa, atque ineonditam esse, sed pulchritudinem, & formam, figurarumque modificationem indipisci à mente, idest, Deo.

Aristoteles cum veterum sententias elset inlectatus, conclusit, atque definiuit nec vnum, nec innumerabilia esse rerum principia, sed tria: duo contraria, formam, & priuationem; tertium materiam contrarijs his subiectam. Quamobrem verò priuatio, idest non ens, in rerum naturæ principia inducenda fuerit, hæc Aristoteli visa est causa, quod vix aliter dissolui possent ea, quæ afferebantur à quibusdam philosophis, qui rerum ortum, atque interitum è natura sustulerunt, propterea quod

quod necesse sit id omne quod gignitur, aut ex eo quod est gigni, aut ex eo quod non est: at neutrum fieri posse videtur: etenim id quod est, fieri amplius nequit, cum iam sit: at ex eo quod non est nihil fieri posse, inter omnes philosophos constat. Verum Aristoteles priuationem cum principijs numerans, facilem sibi aditum comparasse visus est ad infirmandam eiusmodi argumenta: inquit enim ex eo quod non est, nempe ex ipsa priuatione, non quidem velut insita rei, quæ sit, sed ex euentu, fieri id quod sit; idest ex materia fieri res, non quatenus materia ipsa res est, sed potius quia materia haudquaquam est illa res, quæ sit.

Sed cum multis ab hinc sæculis deserta esset consideratio, contemplatioque naturæ; & philosophi nomen ob inanem potius gloriolam, quam ob sapientiæ studium expereretur, factum est ut naturæ mysteria vix alibi quærentur, quam in libris, qui ab Aristotele conscripti putantur. Quocirca nulla Democriti, Empedoclis, Platonis, & Epicuri habita ratione (nam & illorum volumina pleraque interciderant, & in his, quæ iam superfuerant, obscurior doctrina continebatur) vno omnium ore prædicabatur Aristoteles, & laudibus vsque eò efferebatur, ut non defuerint, qui perhiberent vni huic ex omnibus mortalibus concessam Dei munere intelligentiam, quæ norma, & regula, & præscriptio esset humanæ sapientiæ: nec vnquam fore, ut inueniretur quisquam, qui cum illo posset æquari. Hinc pretium operæ se facturos rebantur, si philosophantes studium omne, atque ingenium conferrent ad peruolutandos, ac interpretandos Aristotelis libros; atque in illis locos quosdam notarent, quos ceu philosophiæ thesauros assidue exercitatione, & commentatione, paratos haberent.

Verum exortus est patrum nostrorum memoria Bernardinus Telesius conterraneus noiter acerrius vir ingenio, qui philosophica fretus libertate veteres philosophos, vnumque omnium sermone celebratissimum Aristotelem, vehementer exercuit: ac agrè ferens naturæ rationem non iam ex ipsa vniuersitate, sed ex Aristotelicis voluminibus accersiri solitam, ad

impugnanda illius placita paulò seuerior, ne dicam iniquior, est aggressus. Interea dum aliorum sanè lamenta euertisse sibi vilus est, noua induxit rerum principia; duo quidem efficiencia calorem, & frigus, tertium verò patiens nempe molem corpoream.

Conatus est olim vniuersam veterum Physiologiam, Medicinamque inuertere Theophrastus Paracellus, qui res omnes ex sale sulfere, & Mercurio, generatas, atque concretas esse tradidit; principiorumque, & elementorum naturas, atque conditiones longè aliter quam prisca consueuerant, exposuit. Cæterum quia Paracellus præter rerum nouitatem, adhibuit etiam latebram obscuritatis, factum est, vt eiusdem doctrina à plerisque vel negligeretur, vel vt absurda, & portentosa exploderetur.

Nostri demum tempestate descitum est à tyrannide, cui iam pridem scholæ mancipatæ seruierant, & soluta atque in libertatem vindicata est philosophia à viris præclarissimis Gilberto, Stelliola, Campanella, Galilæo, Baconè, Gassendo, Cartesio, Digbæo, Hobbes alijsque quamplurimis ingenio pariter, atque exercitatione præstantibus viris; quorum opera, atque studio iam nunc Physiologia non minus quàm prisca temporibus, cœpit efflorescere. Sed tamen in definiendis rerum principijs, videntur omnes cum antiquis, & cum Democrito potissimum, conspirare.

Vnus verò longè omnium ingeniosissimus Renatus Des Cartes integrum syntagma physicum e proprijs principijs ita concinnauit, vt ausim dicere neminem antea in describenda naturæ ratione, ad similitudinem veri propius accessisse. Is ergo cum nouam dirigendæ rationis methodum tradidisset, atque inculcasset nihil in philosophia temere admittendum, docuit rerum naturalium vires, ac effectus, ex artificialium analogias iuxta mechanicæ leges definiendas esse. Nam quemadmodum ex eodem ferro artificis opera elaborantur cultri ad res incidendas, horologia ad inrerualla temporis designanda, vomeres ad terram perstringendam, catenæ, sagittæ, & alia

ferè

ferè innumerabilia instrumenta , quorum varia est utilitas , ac diuersa operatio pro ratione situs , magnitudinis , figuræ , motus , ac numeri partium ipsius fori : ita pariter verosimillimum censet ex eadem vniuersi materia effingi constarique res omnes naturales inter se dissimiles , propter diuersam particularum materiæ dispositionem , motum , magnitudinem , numerum , atque figuram .

Facilis mehercule , atque expedita est hæc philosophandi ratio Cartesiana , quæ ad interiora Physiologiæ penetralia , non quidem per salebras , sed per planam patentemque viam , nos dirigit , & clariora iu dies naturæ indicia depromit .

Verumtamen ne Cartesio plus tribuere videar , quàm res , & veritas ipsa concedat , non diffitebor desiderari quippiam in eiusdem philosophia , nec per illius principia explicari satis commodè posse omnia naturæ phænomena . Fac enim omnes inanimorum corporum functiones , motusque pendere à diuersa materiæ modificatione , & omnino iuxta leges mechanicæ fieri , quis tamen nobis persuaferit ipsas etiam animantes instar automatæ fieri ; cum pleræque earum actiones maxime quæ ad sensum appetitumque attinent , ita mechanicis legibus non sint obstrictæ , vt potius ab actione corporis seiunctæ quodammodo videantur . Ad hæc Renatus quanquam expressit accuratè materiam , ostenditque qua ratione ex illa varijs conformata modis , possint diuersæ rerum naturæ proficisci , vim tamen efficientem nequaquam pro dignitate satis explicasse videtur .

Sed e re tandem futurum arbitror , si in tant multa opinionum vaietate , meam expromptero sententiam . Ego sanè haud scio an in tanta dissensione conquerat humanæ mentis imbecillitatem , an potius admiretur consensum , conspirationemque ingeniorum in excogitandis dogmatibus , quæ cum primo aspectu discordantia appareant , post autem accuratius perpensa videntur quoquo pacto conuenire . Verum vt vt hæc philosophorum placita sagaci ratione adinuenta profitear , nunquā tamen ita ea probabo , vt de firmiore doctrina non sim sollicitus .

Prin-

Principio consentanea mihi visa est illorum sententia, qui dixerunt naturam diuidi in res duas, vt altera esset materia, ex qua quæque res efficiatur, altera autem efficiens, seu vis quæ quicque efficiat. Materiam in principiorum numerum omnes ferme philosophi receperunt; eius autem naturam pauci admodum videntur attigisse. Mihi præ cæteris probantur, quæ de illa scripta sunt in Timæo, vbi materia vocatur receptaculum, seu locus in se omnia recipiens.

Stoici materiam Corpus esse volunt: hanc autem sententiam reclamantibus cæteris iunioribus peripateticis acerrimè tuetur Andreas Cæsalpinus; qui quidem cur sic opinetur rationem subiicit. Enimuero ea, quæ in rerum naturæ vicissitudine intereunt gignunturque, ita quandoque mutantur, vt cæteris omnibus pereuntibus, nunquam tamen corpore vacent. Porro corporis natura non aliunde videtur definienda, quàm à trina dimensione, quæ loco etiam conuenit: quippe eadem omnino est magnitudo loci, atque corporis locati. Hæc autem veritati naturæque magis consentanea videntur, quàm quæ de loco ad mentem Aristotelis disputantur in Scholis. Profectò enim quò fieri possit vt locus sit prima superficies corporis continentis, si locato æqualis debeat esse? Numquid superficies cum corpore solido potest æquari? Neque verò omnia, quæ æqualibus superficiebus continentur corpora, inter se sunt æqualia; sed sphaeram isoperimetrarum figurarum maximam esse demonstrant Geometræ. Quid quod ex Aristotele loci definitione sequitur fieri posse, vt vnum idemque corpus sibi met semper æquale persistens, modò maiorem, modò minorem locum obideat; si nimirum modò in globi formam conflatur, modò autem in tenuissimam lamiam ducatur. Nam quânto maior erit lamellæ, quàm globi superficies? Rectius ergo locum ponamus esse interuallum, seu spatium, quod à corpore obideatur, id est ipsam rei materiam. Quare sicuti corpus intelligi sine loco non potest, ita nequit sine corpore locus consistere; ac proinde nullum inane esse potest.

Verum de principio efficiente maior est dubitatio. Stoici dum

dum omnem faciendi vim Deo tribuunt, vera prædicant; at-
qui dum naturæ vniuersæ authorem, ceu partem eorum, quæ
in natura sunt, vnum ex principijs faciunt, in summo errore
versantur. Ad hæc dum fatentur initia esse corpora, sed infor-
mia, Deumque ignem esse artificiosum ad gignendum pro-
gredientem via, non indoctè solum, verum etiam impie lo-
quuti videntur. Paulo minus est inconsiderata illorum opi-
nio, qui Deum esse dixerunt spiritum igneum, per omnem
naturam pertinentem; seu potius animum per naturam rerum
omnem intentum, & commeantem; quam sententiam ijs ver-
sibus expressit Virgilius:

*Principio cælum, & terram, camposque liquentes,
Lucentemque globum Lunæ, titaniaque æstra
Spiritus intus alit: totamque infusa per artus
Mens agitat molem: & magno se corpore miscet.*

Sed quid opus clarissimis rebustenebras obducere? Profectò
quemadmodum materia ex qua, & in qua omnia fiunt, est ip-
sa natura corporea mobilis; ita vis, seu efficiens causa est mo-
tus. Motus autem, & materia à Deo sunt. Verum age nostri
dogmatis veritas aliorum collatione tandem illustretur.

Et vt à Xenophane ordiamur, eius sententiam ad Theolo-
giam potius, quàm ad naturalem scientiam plerique referen-
dam arbitrantur: quasi vnum, seu vniuersum, omneque quod
esset infinitum, Deum esse voluerit Xenophanes.

Similiter Parmenidem Melisumque de Deo loquutos scri-
bunt Simplicius, & Philoponus ex Theophrasti testimonio: at
nihil tamen obstat, quin horum philosophorum decreta de
mundo corporeo possint explicari, vt in sequenti progymna-
smate ostendemus. Quanquam me non fugit extitisse celeberrimos
philosophos, qui mundum ipsum Deum crederent esse:
qua etiam in sententia fuisse Aristotelem Cicero scribit.

Denique Parmenides cum duo statuit rerum initia ignem,
qui moueat, & terram, quæ ab eo formetur, sententiæ nostræ
faucere videtur: per terram enim intelligitur ipsa corporea na-
tura, idest materia: ignis verò (vt præclare Plato in Theæteto)
calorque

calorque qui omnia regit, gignit, & moderatur ex latione, attritioneque efficitur: hic autem motus est.

Leucippi, Democriti, & Epicuri atomi, atque inane denotant ipsam materiam in duas partes distributam, quarum altera liquidissima, ac tenuissima, nullo planè sensu percipitur, altera verò durior, atque solidior in minimas diuisa particulas, constituit atomos, idest corpuscula indiuidua, quæ pro varietate figurarum, motus, situs, numeri, & magnitudinis diuersas corporum concretiones progignant. Porro cum atomos, seu solidam materiæ partem pleni nomine designassent, reliquam quæ liquidissima est, vacui, seu inanis vocabulo significarunt; rationem discriminis à tactu desumentes: quoniam enim nihil tangi potest, quod careat solido; id omne, quod tactum mouere aptum est, solidum, seu corpus nuncuparunt; inane verò quod tactum haudquaquam solet afficere. Lucretius autem, vt multa egregiè, sic hoc breuiter,

Tactus corporibus cunctis, intactus inani.

atomos autem vocabant minima corpuscula, quæ cum secari, & diuidi præterea non possint, nequaquam tamen magnitudine prorsus carent: quippe atomi magnitudine, & figura inter se differre ponuntur: Quo autem pacto magnitudine differre possent, si magnitudinis essent expertes? Quomodo item atomi figuris prædictæ queant intelligi, si dimensione careant, cum figura vno, vel pluribus terminis circumscribatur? Ex his constare iam potest quanti facienda sint argumenta, quæ nonnulli ad oppugnandas Democriteas atomos, atque inane excogitarunt.


Miror interea Galilæum solidioris philosophiæ principem, atque inuentorem, de atomis, atque inani aliter sensisse: is enim inane non ceu rem quamdam, sed potius tanquam capacitatem corporeæ naturæ prorsus expertem, ad rerum naturalium concretiones assumit. De atomis verò ex quibus corporum coagmentationes fieri censeret, ita disputat, vt si illæ instar puncti mathematici nullam planè magnitudinem haberent. Nec veretur affirmare corpora fluida, & metalla liqua-

ta in

ta in eiusmodi atomos esse diuisa.

At verò multa passim occurrunt in Physiologia, quorum contemplationem oportet à Metaphysica altiùs ordiri, atque repetere. Nimirum ij omnes, qui non animaduertunt corporis generatim accepti naturam in sola dimensionum ratione consistere, in magna rerum ignoratione sunt versati. Quocirca falsas opiniones, erroresque plurimos induxerunt. Hinc emanauit illud vacui commentum, quod multorum exercuit ingenia. Sed in quot, quantas, quàm inuolutas difficultates Galilæus libens delabitur, vt ostendat naturæ corpora coagmentari ex minimis, seu punctis nullam habentibus magnitudinem? Multa quidem protulit ex Geometria, quæ vtili subtilitate non carent, ita instituto suo minus conuenientia videntur. Neque enim proprietates omnes, quæ de figuris geometricis demonstrantur, aptè semper ad physica corpora referuntur. Complura occurrunt in mathematicis paradoxa, quæ quidem aliena sunt à physica ratione.

In circulo $A B C$ sit diameter $A C$, & ex eius puncto D excitetur perpendicularis $D B$,



pertingens peripheriam: erit iam quadratum rectæ $D B$ æquale rectangulo, quod diametri segmentis $A D$, $D C$ continetur. Similiter & quadratum rectæ $G E$ æquale erit rectangulo, quod continetur segmentis $A G$, $G C$; & sic de cæteris. Quare quadratum extremi puncti C ipsius diametri $A C$, erit æquale

rectangulo, quod tota diametro $A C$, & puncto C continetur: atqui puncti C quadratum est punctum; rectangulum verò contentum recta $A C$, & puncto C , est ipsa diameter $A C$; punctum itaque C æquale erit diametro $A C$.

Hyperbole tamen si ad rectam ita semper accedat, vt minuatür vsque interuallum, nunquam tamen cum illa concurrit.

Prolatum nuper est ab Euangelista Torricellio solidum, quoddam hyperbolicum, longitudinis quidem infinitæ, sed tantæ subtilitatis, vt licet in infinitum protendatur, perexigui tandem cylindri molem haudquaquam exuperet. Sed longum est, & non necessarium commemorare admirabilia, quæ contra omnium opinionem ostenduntur in geometria.

Num igitur & hæc similiter se habere in physicis censebimus? Nequaquam sanè: nam particulæ ex quibus res naturales coagmentari intelliguntur, magnitudinis non sunt prorsus expertes, quemadmodum mathematica signa ponuntur. Quocirca in multis non licet à mathematicis ad physica argumentari.

Quandoquidem verò fluida corpora à Galilæo ponuntur in suas atomos vsquequaque diuisa, scire velim quidnam discriminis intersit inter hoc, & illud fluidum corpus? Quamobrem auri natura non sit eadem ac natura argenti liquati? Profectò enim si atomi argenteæ, atque aureæ, nec figura, nec magnitudine differant, erunt omnes eiusdem omnino naturæ.

Sed iam reliquas philosophorum sententias repetamus. Thales, Heraclitus, & quicumque Aquam, vel Aerem, vel Ignem, vel quid inter hæc medium rerum naturæ principium fecerunt, materiam respexisse videntur. Aer enim ex vehementi motu, atque agitatione rarefcens in ignem verti, frigore autem concretus cogi in aquam videtur.

Accuratiùs sanè Anaximander, cum aquæ, aut igni principij rationem denegandam censeret, quòd illa inuicem conuertantur, statuit esse in rerum natura materiam quamdam infinitam, rebus omnibus subiectam; ex qua tum ea, quæ vocantur elementa, tum alia corpora progignerentur, per contrariorum secretionem à motu factam: atque adeo non alia rerum primordia ab Anaximandro videntur inducta, quàm motus, atque materia.

Anaxagoræ sententia nullo ferè negotio nostræ potest aptari. Quis enim non videt eius homæomoriā nil esse aliud, quàm

quàm materiam rerum omnium particulas comprehendentem? At verò vim, quæ particulas inter se similes in ordinem adduxerit, Anaxagoras voluit esse motum à diuina mente profectum.

Empedocles omnem vniuersi materiam, quatuor elementis comprehensam, cum discordia, & amicitia, idest calore, & frigore, seu potius motu, & quiete, rerum initia facit. Nam si plures corporum particule in vnum aptè conuenientes coagmententur, nouæ rerum species in natura constantur. Quod si aliæ alijs repugnent, & aduersentur, vel nunquam cocunt, vel nexu rupto facile dissoluuntur.

Stoici planius, & apertius primordia rerum expressisse videntur, per Deum atque materiam. Deum verò adiecere, vt vim seu motionis principium designarent.

Plato item, dum materiam, & mentem rerum initia ponit, materiam indicat à motu in diuersas rerum species effectam.

Quæ Aristoteli tribuuntur principia, neque cum nostris planè conueniunt, neque cum cæteris quibuscunque: at verò illa nec magis consentanea sunt, nec in nostram intelligentiam aptius cadunt. Nam quis adduci potest, vt credat priuationem, in cuius commento tantopere gloriatur Aristoteles, vnum esse ex principijs rerum naturæ? nimirum non ens, entibus causam esse, vt sint. Quis vnquam aristoteleam formam complexus est animo? Profecto complures Peripatetici formarum originem, ceu magnum naturæ miraculum, quod humanæ sapientiæ vires transcendat, seriò admirantur. Sed quicumque ille fuit, qui libros de Physica auscultatione condidit (visum enim est multis eos non fuisse ab Aristotele conscriptos) hic certè perplexa inuolutaque oratione vtitur, ad defendendam sententiam suam, & ad aliorum placita refellenda. Scilicet omnia sibi tenebrarum caliginisque ingenia offundit; & vt scitè Atticus notat, quemadmodum sepiæ effuso sub piscatorum oculos arramento elabitur; ita ille deprehendi metuens, sententias insulat obscuritate, & semet cæcis ambagum nubibus obregit. Illud sanè perridiculè dictum, rerum

primordia ponenda esse finita; nam si essent infinita, nulla foret de natura scientia. Quasi verò id fuerit naturæ consilium in vniuersitate fabricanda; vt scientiæ cognitionisque nostræ ratio haberetur. Sed cum naturales formæ totidem statuendæ sint, quot extant rerum species, idest innumerabiles, cur Anaxagoras reprehenditur, quòd induxerit homæomorias infinitas?

Teleseus molem corpoream, idest materiam posuit, e qua expressa, atque efficta sunt omnia: calorem verò, & frigus, quibus efficiendi vim tribuit, à motu, & quiete proficisci per spicuum est.

Paracellus, seu quicumque ille fuit, qui chymistarum principia excogitauit (constat enim exstitisse sæculis aliquot antenatum Paracellum scriptores, qui huiusmodi principia vsurparant) cum agnosceret ex artificiosa corporum secretionem, hæc tria prodire aqueum nempe mercurij liquorem, oleosam sulfuris substantiam, & concretum salis corpus, ex illis omnia constare credidit. Consentaneum enim est ex iisdem rebus vnumquodque mistum coagmentari, in quas tandem illud dissoluitur. Verumtamen eiusmodi corpora elementi potius, quàm principij rationem, habere videntur: quippe ea secundum Chymicos constituunt materiam, ex qua omnia efficiuntur. Vim autem efficiendi omnem Paracellus tribuit arcano cuidam spiritui, quem modò astrum, modò vulcanum, modò etiam archæum nuncupat. Hic verò spiritus per naturam rerum omnem commens cuncta moderatur, regit, & sempiterna agitatione perpetuat.

Ceterum tamersi ad rerum naturas effingendas debeant partes materiæ, ex quibus illæ coagmentantur, certa magnitudine, dispositione, figura, & numero modificari, vt rectè docet Cartesius, non tamen necesse est præter materiam motumque plura rerum primordia comminisci. Si quidem vniuersi materia, quanquam vniusmodi sit, nullaque certa figura circumscribarur, à motu tamen scinditur in particulas innumerabiles dispositione, figura, motu, & magnitudine discrepantes.

Demum

Demum nec illud quidem præteribo, quòd nonnulli sacram literarum auctoritate ducti, rerum naturæ primordia faciunt Cœlum, & terram. Cœlum verò igneum censent, ac idcirco mouendi vim habere, atque efficiendi: terram autem accipiendi, & quasi patiendi. Et hanc quidem sententiam explicauit Augustinus Donius popularis noster in libris de Natura Hominis; vbi inquisiturus initia, ex quibus humanum corpus constituitur, duo inquit esse prima corpora, vnde omnia sunt orta, atque concreta, alterum terram, alterum verò ætherem, qui tenero terram circumiectu amplectitur.





TH. CORNELIVS

Iacobo Ruffo, & Iohanni Vintimillio. S.



I quis instituti mei nescius, Progymnasmatism huius titulum legerit, maius quiddam, quam quod ego susceperim, atque professus fuerim, expectabit: nam sibi facile persuadebit id mihi propositum fuisse, ut rerum Vniuersitatem tribus explicarem chartis. Ego vero nihil. videor commisisse, quamobrem me vobis, qui consilij mei participes estis, excusem: scitis enim me cum isthac scriberem, nihil minus, quam tractatus integros, condere voluisse; sed satis habuisse nouum aliquod cogitatum describere, quo sex aut certe septem amicorum, qui nobiscum ad audiendum conuenerant, aures detinerem. Quid? quod ipsum Progymnasmatism nomen facile, ut ego arbitror, me omnibus excusabit. Iam vero cum lucubrationes meas in vulgus edere constituerim, consentaneum mihi visum est eas, quandoquidem amicorum gratia fuerant exarata, amicis dicare. Vobis igitur, qui & me certatim amatis, & ingenij doctrinaeque laude praeclatis, tertium hoc, ut sors tulit, Progymnasma, vestro merito libentissime dono.

Neapoli MDCLXI.

DE VNIVERSITATE⁵⁵

Progymnasma III.



Erum hanc Vniuersitatem, qua omnia continetur, immensam planè, nulloque ambitu circumscriptam credere par est, aut certè fatendum amplio-rem eam, magnificentioremque esse, quàm vt capiat humanæ mentis intelligentia : nec vllò nos argumento possecertos eidem fines, terminosque constituere. Quænam enim illi extremitas inesse concipietur, vltra quam nullus sit locus, nullum spatium, nulla capacitas?

Rectè verò Xenophanes, & qui eiusdem sectam institutionemque sunt profèquuti Parmenides, atque Melissus dixerunt τὸν, seu τὸ πᾶν, idest omne quod est, vnum esse, indiuiduum, atque immobile. Nam vnum esse omnia quis inficiabitur, qui secum animo agitauerit, nihil omnino esse extra rerum summam? Ad hæc diuiduum haudquaquam potest esse id, cuius partes nequeunt inuicem diuelli, atque distrahi : atqui omne quod est, ita sibi simile continuatumque est, vt omnino cohareat; scindique nullo modo possit. Quid enim, si diuidatur, interualla partium obsidebit : quidpiam ne quod est, an vero nihil? si quicquam est, quod partes separatas connectit, coherescet iam id omne quod est, & continuabitur : at si nihil, quidnam igitur partes interrompet, atque dissoluet? Denique ipsam rerum summam immobilem esse facile intelliget is, qui animaduernerit ea omnia, quæ mouentur, mutata vicinitate aliò commigrare. Sed quis vsquam est locus, quem non occupet id quod est? Valeat autem illorum præiudicata opinio, qui censent esse in rerum natura locum inanem, omnisque prorsus substantiæ corporeæ expertem, in quem scilicet se recipiat id quod mouetur. Nec enim eorum quæ sunt, quidpiam est inane; cum inane nihil sit, nec vsquam esse possit. Omne igitur plenum

plenum est; atque adco in se rursus recipere minimè potest id quod est; nisi hoc ipsum contrahi, vel distrahi ponatur: quod vtiq; fieri nequit.

Hanc autem fuisse principibus illis Philosophis mentem, perspicuum esse potest ex carminibus Parmenidis apud Simpliciu; vt propterea nihil opus sit ad metonymiam confugere; Deumque per rerum vniuersitatem, idest opificem per ipsum opus designare. Enimuerò vnum simul & continuatum esse, nec tamen diuiduum, propterea quòd vniuisinodi, sibi que omni ex parte simile, ac omnino plenum sit, de corporeo potiùs vniuerso, quàm de Deo intelligendum videtur.

Cæterum vniuersum hoc, quò æther, altra, & omnia, quæ sub aspectum cadunt, comprehenduntur, Mundi nomine libuit appellare. Nec tamen sum nescius totius, seu vniuersi vocabulum maius quiddam sonare, & latiùs patere quam mundum. Scilicet ipsa rerum natura, seu id omne quod est, vniuersum dici solitum: at verò naturæ opus, quod multa rerum varietate distinctum, ornatumque *κόσμος* Græci nominauerunt, id latinis ab absoluta elegantia mundum nuncupare placuit.

Sed cum multa sint, quæ disputari de Mundo solent, nos ea tantum in disceptationem quæstionemque vocabimus, quæ intelligentiæ nostræ vim, notionemque non omnino fugere videantur. Primùm autem de mundi magnitudine perobscura est quæstio: quis enim terminos eius ausit definire? Inuenti sunt tamen subtilissimi quidam metatores, qui eiusdem mensuram prodere, partesque certis interuallis, ita distinguere sunt ausi, tanquam si omnia mensi essent decempeda. Cartesius quidem dum indefinitam magnitudinem mundo tribuit, humanæ potius intelligentiæ, quàm mundi terminos definiisse videtur.

Quoniam autem figura est corporis quædam determinatio, quæ ab eius extrema ora definitur, liquet quàm leui coniectura nitantur illi, qui globosam, vel aliam quamcumque formam mundo assignauerunt.

Existit præterea hoc loco perdifficilis, & inuoluta quæstio. Num vnus sit Mundus, an innumerabiles. Fuerat olim Anaxi-

mandri,

mandri, Metrodori, aliorumque opinio innumeros esse mundos. In eandem autem sententiam Brunus conscripsit libros de Immenso, & Innumerabilibus: vbi conatur ostendere stellas fixas innumeras esse, easque tum natura, tum quoque magnitudine Soli simillimas. Videlicet esse in rerum vniuersitate innumerabiles Soles, circa quos totidem Lunæ, tellures, & cætera perenni conuersione torqueantur, & omnino innumera esse mundorum Systemata nostra huic similia, & eiusdem prorsus naturæ.

Verum quisquis cælum suspexerit, stellarumque fixarum conspectum fuerit contemplatus, facile agnosceret quàm longè à re, & veritate remota sint illa Bruni Systemata, magnitudine æqualia, & paribus distincta interuallis. Etenim si eiusmodi esset stellarum fixarum ordo, atque dispositio, vt æquale spatium singulis fuerit assignatum, profectò in quamcunque cœli partem acies dirigeretur, vniulmodi facies, & omnino similis stellarum prospectus cerneretur: (nihil autem, aut certe parum ad hanc rem interest in terra, an in Sole constituatur spectatoris oculus) atqui longè dissimilis ordo, ac dispar stellarum collocatio in diuersis cœli plagis obseruatur: quantum enim à reliquis cœli partibus, differt circulus lacteus, cuius conspectum magno minutarum stellarum agmine elucen-tem videmus? scilicet hic locus innumeris stellis confertus, ille verò penè vacuus cernitur. Quid quod in stellis nequaquam notantur illa magnitudinum discrimina, quæ apparere quidem deberent, si talis foret earumdem dispositio, qualis à Bruno fuit conficta.

In easdem fere difficultates delabitur Cartesius, nam innumerabiles illi vortices, ex quibus mundum coagmentari voluit, Bruni Systematibus respondere videntur. Verumtamen ille suis hypothesebus solertiùs cauit, quandoquidem nec æquales, nec omnino similes, constituit vortices; nouamque commentus est luminis infractionem, cuius vi idem astrum in pluribus locis possit apparere.

Sed quis non videret hæc, & similia opinionum commenta-

ab hariolantibus potius quàm certa coniectura iudicantibus ingenijs esse profecta? Ego sanè immensum naturæ omnium artificis opus in vno duntaxat mundo facilius intelligo. Verùm tanti operis fabricam, supra hominis intelligentiam esse arbitror.

Astrologi, quorum omnis cura in describenda cœli ratione, stellarumque cursibus notandis versatur, mundi opificium accuratiùs inspexisse videntur. Sed cùm id potissimum ijs propositum esset, vt astrorum loca, motusque quemadmodum nobis ex terra intuentibus apparent ad quodcunque tempus definire possent, hypothèses excogitarunt, quæ vt vt phænomenis respondeant, certè à ratione naturæ plerumque defleunt. De hoc genere sunt Eccentri, Eccentrepicycli, & concentrepicycli, alijque eiusmodi commentitij orbes, quibus inæqualitatem apparentium cœli motuum, ad constantem æquabilitatem reuocare conantur. Quippe ita statutum habent, astrorum conuersionem statim temporibus ad initia recurrere; motuumque periodos perenni æqualitate restitui: quod quidem non tam ex euentu concludunt (siquidem facile ex longa obseruationum serie detegitur anomalia) quàm ex præiudicata quadam opinione; nam hanc motus constantiam, æquabilemque tenorem cœlestium corporum perfectioni conducere arbitrantur.

Quòd verò ad situm ordinemque mundi corporum attinet, magna est inter authores dissensio. Nam quisquis Astrologiæ laude præcelluit, suo sibi arbitrato mundi ideam extruxit: vel quia tale ratus est esse ingens naturæ opus, quale suo concepit ingenio, vel certè quia rerum nouitate famam quæsiuit. At verò inter multas, variasque de Systemate mundi sententias, tres in primis sapientium plausum, approbationemque inuenere.

Prima, quæ peruulgata est, & quasi communiter olim recepta sententia, terram in medio, seu infimo mundi loco, ceu centrum quoddam mundanæ spheræ, immobilem constituit; circa quam singuli planetæ, singulis spheris, seu orbibus
alligati

alligati ferantur; ita ut prima omnium, & citima terris sit Luna, deinde Mercurius, postea Venus, dehinc Sol in omnium medio, & supra hunc Mars, Iuppiter, arque Saturnus, & tandem omnium extrema, atque altissima stellarum inerrantium sphaera, quæ mundum omnem suo complexu coerceat.

Secunda verò longè alium ordinem statuit: quippè Solem in centro mundi collocat, quem disparibus interuallis circumcant primùm Mercurius, dehinc Venus, tertio tellus, circa quam breviori ambitu Luna feratur, quarto Mars, quinto Iuppiter, sexto Saturnus, postremo autem stellarum, quæ cœlo infixæ putantur, sphaera, seu extrema ora, & determinatio mundi omnia cingat, & circumplectatur. Hæc sententia apud Pythagoreos incolas nostros primùm nata, atque alta, multis ferme sæculis oblitterata, & ex hominum memoria penè deleta iacuerat; donec illam ab obliuione, atque silentio vindicauit Nicolaus Copernicus Borussus, qui cum omnem disciplinam institutionemque, tum hypotheseos huius absolutam cognitionem vni debet Italiae. Nam fama est Hieronymum Tallauiam Rheginum plurima secum animo agitasse circa Mundi structuram: & nonnulla quoque de mobilitate Terræ scripsisse; atque illius tandem fato prærepti Aduersaria in manus Copernici Romæ tum degentis peruenisse.

Tertia tandem authorem habuit Tychonem Braheum, virum in rebus Astronomicis exercitatissimum, qui cum videret, primum illud Systema phaenomenis haudquaquam congruere; nec tamen assentiretur Copernico, aut quia motum Terræ rebatur absurdum, aut quia alterius sectæ accedere dedignabatur, nouam commentus est hypotheseos: Terram enim immobilem in media mundi vniuersi sede, quasi centrum locatam circumiri voluit à Lunæ Solisque orbitis, & Cœlo stellifero; reliquos verò planetas circa Solem, proprijs conuersionibus torqueri.

Verum tamen si omnes istæ hypotheseos in eo conspirant, ut tales exhibeant siderum motus, quales ex observationibusprehenduntur: tamen nec omnibus cœli phaenomenis appri-

me respondent, nec naturæ rationique omnino consentiunt. Nam prima illa hypothesi, quæ planetis singulis orbes impenetrabiles, terræque homocentros tribuit, facile eueritur à Veneris Mercurijque phasibus, Solarium macularum discursu, Iouis satellitum conuersionibus, Martis vaga mutabilique altitudine, (modò enim supra Solem sublimè ferri, modò infra descendere, & ad terram propiùs accedere viderur,) & Cometarum denique traiectionibus, alijsque etiam phænomenis, quæ naturam cœli tenuem, peruiamque esse demonstrant. Copernici autem Systema, præterquam quòd sacris literis aduersatur, orbes quoque commentitios, & physicæ rationi repugnantes adsciscit ad explicandas inæquabiles Solis Luneque celeritates, altitudinesque: & de stellarum inerrantium loco, ac dispositione nihil certò decernit. Nec minus absurda est Tychoonica hypothesi: etenim (vt multa præteream) qui fieri possit, vt Sol annuo motu, quinque erroneos rapiat, circumducaturque; Terra autem, & Luna, quæ intra Martis, Iouis, & Saturni orbitas continentur, Solis, vim, raptumque prorsus effugiant.

Eiusmodi igitur hypothesi, quanquam ad explicandos stellarum motus accommodatæ videantur, à physica tamen ratione magis minusue deflectunt. Quamobrem fatendum est incomprehensam adhuc esse mundi structuram, & fortassis fore, vt semper in tenebris illa versetur. Nam profectò tale opificium maius est, admirabiliusque, quàm vt nos animo illud complecti queamus.

Sed iam mundi corpora persequamur. Quoniam autem multa sunt in tanta, tamque immensâ vniuersi amplitudine, quæ nostram aciem effugiunt, propositum quidem nobis est, non de omnibus, sed de aspectabilibus tantùm eiusdem partibus sermonem facere. Hæc vero sub triplici potissimum differentia continentur: Vna ignea est, & lucida; altera ætherea, ac perlucida; tertia terrea, atque opaca. Primi generis est Sol cum inerrantibus stellis, secundi æther vndique circumfusus, postremi terra cum planetis. De Sole, Terra, & Planetis alibi disseremus:

feremus: nunc pauca de natura, & proprietatibus ætheris subiiciemus.

Immenſa hæc natura Soli, Lunæ, Sideribus, & Terræ ſuffuſa Græcis æther eſt nominata, ſeu quia rapido motu cieri, ſiue quia igneo ardore ſagrarẽ cenſeretur. Quanquam non me latet hoc vno verbo ſignificari res duas, nempe ignem, ſeu vnum ex quatuor illis corporibus, ſeu elementis ex quibus res omnes naturales coagmentari ponuntur, & Cœlum in quo aſtra pendunt, itque voluuntur. Sed cum conſtet Cœlum liquidum eſſe, & diffuſile, nihil opus eſt aliam comminiſci naturam, quæ aerem amplectatur, præter hunc ipſum ætherem per omne vniuerſi ſpatium pertinentem.

Eſt autem ætheris natura ſummè perlucida, levis, & liquida: quanquam alicubi ob vaporum halituumque permiſſionem minus translucet, & grauitatem craſſitiemque aliquam habet. Quod quidem haud difficile erit argumentis rationibusque oſtendere. Etenim ſi æther luminĩ non omnino peruius eſſet, ſtellarum omnium, & præſertim inerrantium, quæ in altifſimo, & à domicilijs noſtris remotiſſimo cœli compæxu continentur, conſpectum nobis planè adimeret; necnon vniuerſa eius regio à Sole illuſtrata noctu crepera quadam luce ſplenderet: non ſecus atque ab aere terræ circumfuſo, ſtellarum, quæ prope Horizontem verſantur, fulgor hebetatur; & matutina veſpertinaque crepuſcula ſiunt: quia ſcilicet inſunt in illo corpuſcula, quæ Solis ſtellarumque lumen infringunt, reſpercutiuntque.

Præterea cum æther non luminĩ modò, ſed quibuſcunque etiam corporibus peruius ſit, vt patet ex vaporibus expirationibusue per ipſum liberè diſcurrentibus, iure optimo à veteribus tenuiſſimus, atque liquidifſimus habitus eſt. Porro tanta eſt ætheris tenuitas, vt de illis natura meritò fuerit dubitatum. Nam viſum eſt nonnullis immentam hanc regionem, quam nos ætheri tribuimus, corporeæ naturæ nequaquam eſſe participem, ſed eſſe potiùs ſpatium, ſeu capacitatem continendis corporibus aptam. Verum cuiusmodi inane, quod omnino nihil eſt,

hil est, præterquam quod abhorret à physica ratione, ad propagandum lumen omnino videtur ineptum. Alij verò cum corpus definiissent esse id, quod tangitur, & occurrentibus rebus obstat officitque, ætherem dixerunt vacuum esse, & inanem; propterea quòd nec tactum afficiat, nec discurrentibus corporibus renitatur.

Sed vocari in disceptationem solet vtrum stellæ proprijs motibus incitatae voluantur, an potius ætherea versatione ferantur. *Non est* (ait philosophus quidam Tullio memorante) *ætheris ea natura, ut vi sua stellas complexa contorqueat: nam tenuis, ac perlucens, & æquabili calore suffusus æther, non satis aptus ad continendas stellas videtur. Quamobrem inerrantes stellæ, quarum est quotidiana conueniens, constanque conuersio, habent suam spheram ab æthere coniuñctione secretam, & liberam.* Quicumque verò copernicissant, de diurno stellarum inenarrantiũ circuitu nihil laborant, sed vrgentur tamen Lunæ cursu, quæ à terra circa Solem circumduci ponitur. At verò maius negotium Tychoni faceffunt errantes stellæ, quas ipse ad Solis motum circa terram circumferri voluit. Sed omnium tandem interest explicare, quomodo quatuor medicæ stellæ deferantur à Ioue, dum circa illum circulos suos orbefque conficiunt.

Minimè verò audiendi sunt illi, qui diffitentur plauetarum densa concretaque corpora à liquidissimo æthere posse circumuectari, assumentes in exemplum lapides, qui ad motum aeris vix arripiuntur. Nam non est eadem ratio lapidum, atque stellarum per ætherea discurrentium; quippe lapides, & graui corpora, quoniam proprio pondere verius terræ medium propendent, non rapiuntur ab aere, nisi in hoc tanta sit vis, quæ superare valeat momentum grauitatis eorum; Sed alia, quæ in circumfuso æthere librantur, quoniam aliò nequaquam propendent, facile ad ætheris cursum circumferuntur: quemadmodum naues, quæ in aquis stagnantibus immobiles hærent, nullo ferè negotio dimouentur, & vel lenissimo flatu impelluntur. Fac autem in aere corpus aliquod libratum pendere, tanè illud ad quemlibet circumiecti aeris motum versari obseruabis.

Ex his,

Ex his autem illud perspicuum est, posse planetas duobus, & interdum etiam pluribus motibus cieri. Nam præter æthereum cursum, quo multifariam circumducuntur, peculiari-
bus quoque conuersionibus torquentur.

Cæterum æther, qui nobis circumfuditur, haudquaquam purus est, & tenuis, sed crassus, atque concretus: nam aquæ vaporibus, & expirationibus terræ temperatus, constituit hanc spirabilem naturam, cui nomen est aer. Qualis autem quantusque rerum prope omnium prouentus accedat iugiter aeri, facile intelliget, qui animaduernerit ea omnia, quæ ardore Solis, vel ignis dissipantur, absumunturque, in aerem abire: maximamque eorum, quibus alimur, partem extenuatam, atque in spiritum versam euanescere.



TH. CORNELIVS

Danieli Spinulæ S.



Am tempus appetit, Daniel humanissime, ut ingenij mei factura ex elephantino (quod dicere solitus es) semine concepta proferatur in lucem. Nihil autem est quod tibi excusam tarditatem, procrastinationemque meam in promulgandis lucubrationibus, quas septem continuis annis amici conuicio ne dum precibus efflagitarunt; nosti enim fortunam meam; nosti nostrorum hominum mores. Scilicet omnes latebras peruestigat malignitas, & ingeniosa est ad fingendum crimen. Mihi verò nostrates Medici, cum aliquam ingenij laudem (quæ eorum est humanitas) tribuant, illud tamen officiose, & peramanter obijciunt, quod cum sim nouitatis paulo studiosior, soleam sæpiuscule periculosas ancipitesque valetudinis curationes præscribere. Quare non ausus sum nouas observationes, nouaque inuenta in lucem ante proferre, quàm ciuibus nostris re exituque monstrauerim, me in curandis morbis salutare plerumque operam præstare solitum esse. Sic enim fore sum ratus, ut obrectatoribus meis præcideretur occasio me liberiùs incessendi. Sed cum nullum sit aduersus Sycophantæ morsum (ut in prouerbio est) remedium, despero plane me posse inuidiæ calumnieque vim effugere. Verumtamen utcumque erit, certè susceptum munus expleuisse videbor, si tibi cæterisque amicis, qui mecum sæpenumero egistis, ut lucubrationes meas publicarem, obtemperauero. Tibi autem vir Clarissime quam sors obtulit dissertationem de Sole, obsidem mei erga te animi, dicatam volui. Neapoli MDCLXI.

DE

DE SOLE.

Progymnasma IV.



Olis incomparabilem naturam meritò admiramur: tanto enim splendore fulget, tanta pulchritudine contemplantes oblectat, tanque multam virtutis suæ vbertatem mundo largitur, ut iure optimo Siderum princeps, mundi lampas, mens, & vita nuncupetur. Quemadmodum verò ad immensum Solis fulgorem deficiunt oculi, ita in percipienda singulari eius natura caligat intellectus.

Innata quidem, & insita est nobis via, quæ ex rebus cognitis, atque perspectis, ad ignotas, obscurasque animum traducit. Notiora verò plerumque sunt, quæ propius ad mota cernere, & contrectare datum est nobis: at profectò nihil unquam assimile Soli, seu oculis, seu alio sensu interris percepimus: nam licet animalia quædam, stirpes, lapidesque ingenito fulgore colluceant; eorum tamen tantulam lucem cum immenso Solis splendore conferre ridiculum est.

Verumtamen si quicquam ex nostratibus cum Sole libeat comparare, nihil planè assumendum potius, quàm ignis, seu flamma. Quin similis apparet Solis per telescopium visi species, atque æris in fornacibus liquati, fusique: in utroque enim cernere est coruscantem quemdam fulgorem, & multiformes vinbrarum, luminisque vicissitudines.

At vero Solem igneum esse magnis olim philosophis placuit: atque id quidem duorum sensuum testimonio confirmari Cleanthes apud Tullium putat, tactus, & oculorum. Nam Solis candor illustrior est, quàm ullus ignis; quippe qui immenso Mundo tam longè, latèque colluceat; & is eius tactus est, non ut tepefaciat solum, sed etiam sæpe comburat; quorum neutrum faceret nisi esset igneus.

Fortassis autem videbitur absurda hæc Solis cum flamma

comparatio. Primum enim flamma sine pastu permanere non potest: nam sic illa, iugiterque fluit instar aquæ fluuiorum; atque adeo perennis esse debet prouentus eius materiæ, quæ inflammatur, & in decedentis locum sufficitur. Atqui Sol nec alimenta deliderat, nec instauratione defectus absumitur: nam secus tot sæculis, vel omnino consumptus, vel certè notabiliter imminutus foret. Deinde ea est flammæ natura, vt fastigietur in conum, cuius vertex semper est in sublimi, basis autem in ipsa, quæ incenditur, materia: at Solem esse globosum probant rationes ex oculorum sensu, opticeque fundamentis depromptæ.

Verum dispar est Solis, & nostratis flammæ conditio: flamma enim cum à grauiori aere vndequaque sit circumfusa, ad superiora semper enititur: atque adeo nisi recens materia iugiter incendatur, protinus flamma deficit; atqui Solis particulae nusquam aliò extra proprium globum auolant; idcirco nec reparationis indigent. Sic annis, qui continenter labitur euanesceret, nisi perennis vnda succederet; sed stagnum sine noui humoris prouentus perdurat. At quia flamma à grauitate ambientis aeris propulsa fertur in sublime, necesse est medias eiusdem partes, vtpote vehementius incitatas supra cæteras assurgere. Quamobrem flamma metæ formam, figuramque semper effingit; sed solare corpus in conii figura haudquaquam formatur, quia nunquam eiusdem partes extra proprios limites mutabili successione vagantur.

Sed verus tamen est opinio à Stoicis maxime peruulgata, passci Solem, & Sidera, ac terræ, oceanique humoribus renouari: illa quoque ipsa conii specie figurata placet esse Cleanthi. Nec verò me latet inueniri nonnullos, qui hanc de pastu stellarum sententiam comprobari posse autumant macularum Solarium testimonio: obseruatum enim est illas disci Solaris partes, quæ ex macularum obiectu obscuræ, & tenebricosæ apparent, postmodum splendescere, cæterisque lucidiores fieri; tamquam si ipsa macularum substantia incensa altæ, instaurationeque viuiscerent.

Quam-

Quamuis autem tanta sit, tamque immensa stellarum inerrantium altitudo, ut illarum formam contemplari, & oculorum sensu definire non liceat (nam per telescopium spectatæ informes, & nulla certa figura terminatæ videntur) Solis tamen formam globosam esse, non conicam, liquet ex eo, quod eiusdem discus rotundo semper ambitu circumscriprus cernatur. Nisi quis ad tuendam Cleanthis opinionem contendat Solem in metæ formam figuratum esse, at eiusdem semper basim nostris oculis obuerrari. Quod autem Solis Lunæque figura globosa cum sit, nihilominus plana videatur, fit propter magnam eorundem à nobis distantiam, quæ quidem tanta est, ut imperceptas reddat semidiametros, quæ in rectis lineis ex oculo ad utriuslibet centra ductis, intercipiuntur.

Sed cum ea sit Solis natura, ut calorem longè, latèque diffundat, & cuncta etiam sua luce lustret, & compleat, inquirendum quomodo hanc ille vim, & efficientiam habeat. Nam visum est nonnullis Cœlestia corpora supra elementorum vires agere, & præstantiore quadam virtute pollere, atque adeo cum minimè ignea sint, calefacere nos, atque illuminare. Multa præterea in hanc sententiam disputant illi, qui censent Cœli naturam immutabilem esse, & diuinioris cuiusdam conditionis participem, quam ea, quæ ex elementis constituta ponuntur. Tandem verò cum compertum iam sit, & ratione à sensibus deducta comprobatum Solem, & stellas haudquaquam esse immutabiles, expertesque earum affectionum, quæ tribuuntur elementis, quid obstat quin dicamus lumen caloremque à Sole profectum eiusdem esse naturæ cum illo, qui ab igne producit? Profectò enim Solares radij in angustum spatium infractione, vel repercussu coacti incendium excitant, & igneo calore temperato stirpes viuunt, & vigent. At de hoc minimè ambiget is, qui lucis calorisque ortum, & causas fuerit affectus.

Cæterum vim naturamque caloris haudquaquam percepisse videntur, qui ex Aristotele dixerunt illum esse qualitatem, quamdam congregantem ea, quæ similis naturæ sunt corpora,

diffimilia vero segregantem : Quippe ea potius vis est caloris, ut corporum particulas agitet, versetque, atque adeo sapenu-mero dissoluat, & liquefaciat : at liquatorum corporum partes in sedem sibi gravitatis, aut leuitatis ratione debitam, singulæ feruntur : unde fit ut corpuscula dissimilis naturæ, quæ impari gravitate sunt prædita, dum soluta, & libera sunt, diuersum nacta locum segregentur. Verum accidit aliquando, ut res dissimilis naturæ, dum vi caloris liquantur in vnam simul massam permixtæ coalescant ; vel quia sunt æque graues, vel quia inuicem tenaciter hærent ; ut cernere est in pice, oleo, cera, & similibus, atque etiam in ære stannoque, quæ igne liquata in vnum corpus concrescunt. At verò omnia fere corpora caloris vi liquefcere est obseruatum : quædam enim cum ignita fuerint protinus funduntur ; cætera omnia, præter ea, quæ in vapores halitusque abeunt, in cineres resoluuntur : atqui cinis omnis diutino ignis ardore conflagrans, tandem liquatur in vitrum. Interdum autem ea, quæ dissimilis sunt naturæ non à calore modò, sed etiam à frigore segregantur : sic nonnunquam aqua vino permixta concrescit in glaciem, ac proinde frigoris vi à liquenti vino segregatur ; quin frigore etiam spissatum butyrum solet à reliquo lacte secerni.

Mira sunt, & prorsus incredibilia, quæ de calore scripta sunt ab Hippocrate. *Mibi, inquit ille, sanè videtur id quod calidum vocamus immortale esse, & cuncta intelligere, cernere, audire, & omnino scire omnia tum præsentia, tum futura. Eius autem plurima pars, cum turbata essent omnia in supernam circumferentiam secessit ; & videntur Veteres ipsum æthera nuncupasse.* Telesius quoque calori plus æquo tribuit ; nam lumen præter cætera, motumque à calore proficisci voluit.

Hæc autem, & alia eiusmodi, etsi explicari, & ad naturam reuocari quodammodo possint, ita tamen, ut sonant, à re, & physica ratione remota videntur, aut certe hyperbolicè dicta. Enimuero vis illa, in qua lucis calorisque actio consistit, à motu, & agitatione ætheris reuera pendet. Hinc autem sensus est omnis, animique intelligentia, ut suo loco perspicuū faciemus.

Nos

Nos autem ad explicandam caloris originem, ea omnino assumenda putamus, quæ sunt à Platone in Theæteto per Socratis personam disputata. Scilicet calorem (ut & pleraque eorum, quæ sensu percipiuntur) haudquaquam esse ex se tale quicquam, quale nobis videtur, neque etiam esse aliquid extra tangentis corpus, aut in ipso tangente, sed fieri ex appulsu eius rei, quæ calida dicitur ad manum aliudue membrum, in quo tangendi vis inest: rursus id omne, quod sensum afficit motum esse, & præter motum nihil; motum autem in eo quod sentitur, habere agentis rationem, at in eo quod sentit, patientis: denique agens, & patiens utraque mota calorem sensumque omnem mutuo congressu efficere.

Quibus rebus positis haud erit difficile vim naturamque caloris intelligere: quippe sensus is, quo calorem percipimus oritur ex motu, & agitatione subtilis cuiusdam materiæ membranis, nervis, alijsue tactus instrumentis circumfusæ, ad cuius agitationem cognatum quoque spiritum moveri necesse est; & hinc est sensus caloris.

Porro corpora omnia quæcumque vim caloris in se continent magis minusve participant ætherem, seu materiam illam, in cuius agitatione naturam sensumque caloris consistere diximus. Re autem vera nihil suapte naturam est, ne ipsa quidem flamma, vel ignis; sed ita nobis videtur quicquid motu eiusmodi cietur, ut spiritum per instrumenta tactus diffusum cognitione quadam exciter, & multifariam agitet. Vnde liquet causa cur tritu, collisuque durorum corporum calor, & sæpe etiam ignis eliciatur: æther enim, qui in ijs continetur frictione, atque conflictu concitatus, & multiformi motu celeriter agitato, calorem ignemque progignit. Quocirca mirum videri minime debet quod à calore omnia dissolvantur, atque liquecant.

Flammam verò, & omne quod calidum vocamus ignemque vario motu cieri, atque agitari, notum est, & ipsis plane oculis manifestum: quod fortasse respiciens Telestus motum à calore fieri putavit, contra atque nostri philosophi vulgò sentiunt,

tiunt, qui motum volunt esse causam caloris. Verumtamen bene veritatem intuentibus videbitur calor, neque à motu pendere, neque motum efficere, sed in ipso met motu consistere.

Frigus autem non aliter sentitur, quàm per caloris defectum. Enimvero quaecumque sunt eiusmodi, ut spirituum per instrumenta tactus discurrentium motum sistere, aut retardare possint, frigida videntur: cætera verò quæ spirituum agitationem augment, caloris sensum progignunt.

Sed cum nonnunquam ex duorum corporum confusione, novus motus, novaque particularum agitatio suscitetur, ut in permissione calcis, & aquæ contingit, liquet quid sit causæ cur quædam manibus contactata frigida videantur, mansa verò, atque deglutita calorem in ore, ac ventriculo excitent. Ex quo perspicua quoque fit ratio discriminis inter ea, quæ actu, atque potestate calida dicuntur.

Perperam autem vulgo statuunt à calore omnia rarefieri, & in maiorem molem distendi; frigore verò densari, & in minus spatium cogi. Profectò enim aqua multò maiorem locum obsidet, cum in glaciem concrevit, quàm cum feruet; nec non spissatum concretumque aurum fuso, atque liquenti supernat; quod in cæteris quoque metallis, alijsque rebus quamplurimis contingere observamus.

Quatenus igitur Sol calidus dicendus sit, vel quomodo calorem queat excitare, satis videor indicasse. Frustra verò nonnulli ut Solis stellarumque naturam extollerent, plauderentque rebus ignotis, calorem nescio quem in Cælo sunt commenti longè nobiliorem, quàm is, qui ab igne, nostrisque rebus proficiscitur. Neque enim ignis ille, quem Prometheus, seu cauo speculo, seu vitrea sphaera, similiue artificio subduxit e Sole, censendus est ei dissimilis, qui chalybis, silicumque attritu, atque conflictu excitatur.

Iam verò ad explicandam lucis naturam accedamus: longè autem opinione falluntur, qui censent lumen extra oculos existere, & quicquam tale esse, quale visu percipitur. Enimvero nusquam alibi lumen est, quàm in ipso met videntis oculo:

nam

nam gignitur illud ex motu appulsuque ætheris ad eam oculi partem, quæ reticulatam tunicam format; ubi spiritus externo, & aduentio pulsu agitato, luminis ideam menti percipiendam indipiscit.

Nonnunquam autem etsi nullum adsit lucidum corpus, quod circumfusus aerem afficiat, sed humor tamen, aut halitus oculi fundum peruadat, & reticulatæ tunice capillamenta pulset, statim lumen ante oculos obuersatur. Quin etiam oculo quantumuis clauso, si vel hircus, vel alia pars iuxta fundum posita extremo vngue fricetur, apparebit illico areola luminosa eò clarior, quò pars oculi vngue pulsata ad fundum propius accesserit.

Fit igitur lumen ex motu ætheris, seu subtilis materiae à lucido corpore per spatia diaphana oculis communicato. Ea enim est lucis natura, ut perenni pulsu, & veluti systole quadam, atque diastole circumiectum æthera propellat. Unde luminis actio non consistit in solo preſu, sed potius in iterato percussu: ut constat ex areolis luminosis, quæ oculis vngue compressis cernuntur: illæ enim statim obscurantur, euanescentque; nisi alterno preſu pulsus iteretur.

Ex his, quæ de natura lucis dicta sunt hæcenus, liquet lumen non esse in rebus, quæ luminosæ, aut lucidæ appellantur, sed fieri in ipso sentiente: quemadmodum dolor non est in gladio, sed fit in parte animalis, quæ vulneratur. Idem pariter de calore, & his omnibus, quæ sensu percipiuntur iudicandum: si figuram motum magnitudinem, & numerum, quæ philosophorum vulgus sensibilia communia vocat, exceperimus.

TH. CORNELIVS

Iohanni Baptistæ Capucio, & Leonardo
à Capua. S.



Letabar non ita pridem me hoc seculo natum, quo physiologia non sophisticis argutationibus, in quibus scholæ iam diu occupata fuere, sed accurata rerum naturæque obseruatione illustrari capta est à Galileo, Cartesio, alijsque compluribus præstantissimis viris. Neque verò mediocre mihi spem fecerant præclara Guilielmi Harueij inuenta: putabam enim fore ut ex his Medici saniora tandem medendi præcepta elicerent. Nunc autem me amici lectissimi, atque ornatissimi, nostræ sortis valde tædet, pigetque: quandoquidem extinctis nuper præclarissimis illis bonarum artium veritatisque cultoribus, subsequutum est pestilentissimum hoc tempus, quo magna terris, ac nostris potissimum oris barbaries repente incubuit. Exaruerunt protinus sapientiæ studia, malæque artes vberimè succreuerunt. Iam triumphat incititia, & virtuti veritatisque prope bellum indicitur. Vigent autem nonnulli ineptè eruditi, qui Sapientiæ principatum insolenter sibi arrogant, eosque omnes, qui reconditas, & exquisitas literas norunt, infenso, atque inimico animo persequuntur. Quale verò ego putem esse stomachi vestri in istorum nequitia fastidium? Ignoscite quæso Viri humanissimi, si consilij vestri rationem patefecero. Scilicet maluistis ab horum oculis remotis, otium in angulis consumere, & quicquid vita meliora parastis, deponere, quàm aduersus eorum cacotechnias pugnando, honori vestro velificari. At utinam ego in hac ipsa perstitissem sententia, nec passus vnquam forem me popularibus huius vrbis ciuibus innotescere; Non enim mihi eius gentis contigisset subire inuidiam, atque calumnias. Sed quando iam omnia pertuli, & sycophantijs adhuc non succubui, haudquaquam verebor mea hæc scripta hortatu consilioque vestro limata, atque congesta in vulgus emitte. Cæterum cum vos nunquam non animo meo infixos habeam, vigeatque semper apud me egregiæ vestræ virtutis recordatio, dissertationem hanc, quæ est de ortu hominis, non meo iudicio delectam, sed quam fors dedit, vobis dicare institui, ut & amoris erga vos meo, & vestris meritis aliqua ex parte satisfacisse viderer.

Neapoli MDCLXI.

73

DE GENERATIONE HOMINIS.

Progymnasma V.



Quod in physicis disquisitionibus sepe numero vsu-
uenit, vt videlicet disceptantes in varias discre-
pantesque sententias distrahantur, id maxime in
questione, quæ est de animalium procreatione
videmus contringere. De hac enim tanta opinio-
num dissensione certant Auctores, vt quò maiorem quis ope-
ram in perlegendis, & expendendis illorum monumentis col-
locauerit, eò tandem sese rei magis ignarum agnoscat, ac de
veritate planè desperet. Multa olim super hac re scripserat
Aristoteles, in quibus nec mediocrem in obseruando diligen-
tiam, nec contemnendam in iudicando prudentiam depre-
hendet is, qui naturæ mysteria penitus peruestigarit. Subit
autem mirari cur Medici, quorum hæc nosse maxime inter-
erat, repudiata Aristotelis doctrina, imò etiam neglecta sen-
suum fide, de ortu hominis ea sentiant, quæ & rationi, & au-
topsie plurimum aduersantur. Sed hic est hominum mos, vt
ad quamcunque sunt disciplinam (vtar enim verbis Tullij)
quali tempestate delati, ad eam tamquam ad saxum adhære-
ant. Scilicet Philosophiam quotquot omnes profitentur iu-
rant in verba Aristotelis. At Medici aduocatione mercenaria,
venalique sententia Galeno addicti, quasque mancipati, eius-
dem placita sine vlllo veritatis delectu temere conlectantur, &
tanquam pro aris focisque dimicaturi pugnacissime defendunt.
Guilielmus Harueius cum ex inuento, deprehensoque san-
guinis motu, gloriosissimum egisset triumphum, ad inuesti-
gandam animalium generationem animum adiunxit. Quam-
obrem adhibita frequenti Zootomia (nam ingens illi cuiusuis
K gene-

generis animantium copia , & dissecandi opportunitas abundè suppetijt) permulta in lucem protulit à se primum animaduersa , atque notata ; quæ mihi iam diu laxum hoc voluenti magno, fateor, adiumento fuere ; præsertim cum fortuna mihi inuiderit extispicinam exercere in animantibus maioribus , quæque non sine sumptu cōparantur .

Interea non dissimulabo Harueium in eiusmodi studio ita se præstitisse , vt cum summam in obseruando experiendoque diligentiam exhibuerit , in iudicando tamen per sæpe labatur : cūppe experimenta magno labore , atque industria conquistata ad præconceptas opiniones (quod dolenter potius , quàm contumeliose dictum velim) perperam traducit . Cæterùm quid Ego non Harueij modo aliorumque Autorum obseruationibus instructus , sed meis etiam peculiaribus fretus experimentis , de hominis generatione statuendum putem , in dissertationis huius decursu manifestum faciam .

Considerare autem primum oportet non vno eodemque modo viuentia omnia generari : Multæ enim , & animantes , & stirpes sunt , quæ cum nullo conspicuo semine procreatæ videantur , spontaneum ortum habere dicuntur : Sed plantæ pleræque ex seminibus oriuntur ; quemadmodum & maxima animalium pars ex ouis , quæ plantarum seminibus respondent , propagatur . Verum homines , & perfectorum animalium ingens multitudo ex parentum semine in matris uterum confluente progignuntur .

Hinc triplicem animalium procreationem distinxerūt Auctores , aliam quidem ex ouo , aliam ex semine , & aliam tandem ex putri ; vt propterea animal quoduis , vel *ωὸτόκον* , vel *ζωότοκον* , vel *αὐτόμυτον* ex Aristotele sit nuncupandum ; ac si dicamus vel ouiparum , vel viuiparum , vel sponte naturæ .

Facilis autem est nec ratione modò , sed sensibus quoque perspecta stirpium e semine propagatio . Videmus enim plerunque in plantarum semine germen quoddam aut absolutam formam , aut certè rude futuræ stirpis simulachrum representans . Huiusmodi autem germina satis conspicua de-

prehen-

prehendet, qui volet in nucibus quibuscumque præsertim verò pincis, itemque glandibus fabisque, quæ diffusæ, ac bipertitæ eo potissimum tempore, quo humoris plenæ turgescunt, produnt genuinos furculos, seu plantas.

Ad similitudinem verò stirpium ipsius quoque hominis generationem exprimi posse credideram. Etenim crassus ille, ac concretus humor, quem semen genituramue vocant, plantarum semini mihi videbatur analogus: censebamque latere in certa eius portione, quam videlicet vno congressu vir in mulieris uterum eiacularur, tenerum futuræ prolis germen, seu rudimentum, quod in concipientem comprehendentemque naturam incidens, nutritios succos à materno sanguine mutaretur.

Re tamen ad veritatis trutinam accuratius pensitata animaduerti magnam esse seminis stirpium, cum hominum genitura dissimilitudinem: illud enim veram seminis rationem habet, cum possit generare similia illis, à quibus secretum est: hominis verò genitura non item.

Si quis autem quærat cuiusmodi esse debeat animantium semen, quod stirpium semini sit analogum; Respondebo ex Aristotele id esse, quod ex ambobus coeuntibus originem trahit, & utriusque sexus vim continet; id est quod ex mare, & femina primum miscetur, quasi conceptus promiscuus. Eiusmodi in ouiparis est ouum fœcundum: hoc enim iam habet quod ex ambobus requiritur, & potens est gignere tale animal, qualia sunt illa à quibus discretum est. At in viuiparorum quoque utero, certo quodam post concubitum tempore, fieri conceptum ouiformem, seu massulam instar oui membrana obducti, cui detractum sit putamen, ab Aristotele moniti semel, atque iterum obseruauimus.

Hoc igitur inter genituram, & semen interesse docet Aristoteles, quod genitura sit humidum illud excrementum, quod suo sexus alteruter genitali subministrat: semen autem conceptus ex utroque parente procedens. Quam quidem diuersam nominum rationem, utpote nostro instituto conten-

taneam deinceps retinebimus.

Sed videamus iam quid genitura sit, unde prodeat, quidue ad hominis procreationem conferat. Illud autem in primis notandum genituram e duabus constitutam esse naturis, ex humido scilicet illo crassamento, quod sensibus est manifestum, & tenuissima quadam substantia, quæ sensum quidem effugiens sola rationeprehenditur: porro in hanc vim, atque energiam omnem inesse ostendemus; nam crassior illa substantia nil aliud est, quam quoddam huius, ut ita dicam, vas, seu conceptaculum, vel si mauis integumentum, atque inuolucrum; quod sanè Medicorum hæctenus delusit oculos, qui nucleum se nactos putantes, cortices, & siliquas obtinuerunt.

Vulgò opinantur genituræ crassamentum fieri ex superfluitate sanguinis magis, atque magis elaborati, & in albam crassio remque substantiam concreti: idque ex eo comprobant, quod genitura crudior emissa (cum videlicet re venerea ultra modum quis utitur) cruenta iam aliquibus prodire soleat.

Verum Ego certissimis fretus coniecturis constanter asseuerabo materiam, e qua genituræ crassamentum constituitur, albuminis instar, e peculiaribus vasis effluere, atque in sua deinde conceptacula recondi; unde concubitus tempore exiliat, nec vnquam purpurei sanguinis speciem exhibuisse. Nam quod nonnullis intemperatioribus sanguinolenta genitura effluerit aliquando, id ex venæ potius, arteriæue alicuius hiatu (si tamen vera narrantur) quam ex defectu genituræ provenisse putandum est: quippe ubi vniuersa genitura exilierit, cessat statim tentigo, languetque æstus cupidinis.

Vt tamen sententiæ nostræ fundamenta facile percipiantur, operæ pretium erit nonnulla ex Anatome repetere; ac primo certum ratumque velim esse apud eos, qui nostra hæc legerint, sanguinem aliosue humores à corde per arterias ad partes corporis permanare, per venas autem à partibus ad cor relabi: ad hæc comites arterijs fere semper venas esse, & cum illis per varias anatomofes connecti: præterea arterias plerunque coniugibus venis minores esse, interdum verò maiores. Sic arteriæ,

quæ

quæ in uterum prægnantis animalis pertinent venis frequentiores, amplioresque sunt, & maiores quò foetus grandior fuerit: Contra vena umbilicalis arterias magnitudine sua longe superat. Venæ mesaraicæ recens partæ animantis arterijs sunt multò maiores: spermaticæ verò arteriæ in foecundis animalibus ampliores, capacioresque sunt venis.

Age verò reconditum naturæ mysterium aperiamus. Arteriæ, quæ ad uterum gravidæ animantis protenduntur, succum quemdam foetui alendo idoneum afferunt, quo intra uterum deposito, refluit sanguis per venas: quamobrem maiorem esse oportet arteriarum, quàm venarum amplitudinem. Dispar autem est umbilicalium vasorum conditio; nam arterijs multò maiores sunt venæ, utpote quæ una cum refluyente ex arterijs sanguine, aduehant quoque arreptum ex uteri placenta nutrimentum succum, quo foetus alatur.

Iam verò ut ad propositum regrediamur, feminales arteriæ cum venis per innumeras anastomoses connectuntur, capreolorumque instar inuicem implicantur in vase illo pyramidalis, quod corpus varicosum, seu pampiniforme vocant Anatomici; in quo talis formatur vasorum contextus, ut vix vlla oculorum acies queat ab arteria venam internoscere. At ut perspectum habeo nusquam inueniri eiulmodi plexus, nisi ubi secretionem aliquam natura molitur, ut alias ostendam. Quamobrem genituræ crassamentum, dum unà cum sanguine per arterias spermaticas delabitur, in eo plexu secernitur; unde fit ut venæ remeantem sanguinem excipientes sint minores arterijs.

Nec id quidem mihi dubium est quin tale crassamentum quo tempore secretum à sanguine elabatur ex arterijs spermaticis, exalbescat, ouiue albuginem quodammodo representet. Quippe autopsia edoctus sum succum, quo foetus in utero alitur, simili etiam specie defluere; quemadmodum & albumen, quo ova in gallinæ utero coagmentantur. Eiisdem pariter generis substantiam secerni ex sanguine in plexibus cerebri suo loco demonstrabimus. Quocirca fatendum est genituræ materiam.

teriam statim vt ex arterijs excidit , nullo mutationis interuentu exalbescere .

Genituram in testibus peculiari quadam eorumdem vi cōfici omnes ferè Medici vnanimi consensu tradiderunt. Sed mirari satis non possum cur ita crediderint , cum nusquam non occurrant exsecti, qui libidinantes genituram largiter profundant . Tolerabilior sanè est illorum sententia , qui censent testes non conficere genituram , sed perficere potius eidemque fœcunditatem impertiri . Nam profectò magna vis est testium ; hi enim ad vniuersi corporis robur magnopere conferrunt . Quamobrem castrati virilem fortitudinem obliti, quasi in mulieres degenerant ; vultu enim , colore , imò etiam moribus effœminantur : læuia illis ora fulgent, hebescit acies mentis, vox virum non sonat, & vires omnino languescunt . Quid igitur mirum , si exsecti progenerandis fœtibus plerunque sint inhabiles ? Mihi verò experientia compertum est canem , cui testes fuerant abscissi , filios generasse ; quod de Tauris, Equisque nonnulli memorant : nec desunt qui narrent de mulieribus , quæ ex concubitu cum castratis viris aliquando conceperint , quod tamen non minùs difficile scitu , quam factu reor : Quippe non licet exsectis cōcumbere nisi cum impudicis mulieribus , à quibus vix vnquam extorseris veritatem : præterquamquod & ipsæ etiam præsumpta opinione falluntur .

Neque verò prætereundum complura vasa , quæ ad testes, & proxima loca pertinent, in exsectione discindi, viasque intercludi , per quas substantia aliqua ad generationem necessaria solet permeare : quod sanè notauit olim Hippocrates, seu quisquis alius libri de genitura Auctor .

Hactenus de corporea substantia , seu crassamento , quod quasi vas est , aut aliquod genituræ receptaculum : nam quidquid ad conceptionem genitura confert, id agitur ab illa parte, quæ oculorum effugit obtutum . Hæc autem multorum fatigauit ingenia, qui cum vim, & effectum agnoscerent, causam tamen obscuritate inuolutam naturæ ignorarunt .

Viget passim in ore nostrorum philosophorum celeberrimus

mus ille Aristotelis sermo: Inest in semine omnium quod facit ut fecunda sint semina, videlicet quod calor vocatur, idque non ignis, non talis facultas est, sed spiritus qui in semine spumosoque corpore continetur; & natura, quæ in eo spiritu est, proportionem respondens elemento stellarum. Quamobrem ignis nullum animal generat, neque constitui quicquam densis, vel humidis, vel siccis videtur. At verò Solis calor, & animalium non modò, qui semine continetur; verum etiam si quid excrementi sit, quanquam diuersum à natura; tamen id quoque principium habet vitale. Ceterum calorem in animalibus contentum nec ignem esse, neque ab igne originem ducere, manifestum ex his est.

Hæc verò quamquam magnificum nescio quid sonare videntur, retamen vera nihilo amplius præferunt, quàm speciosam exaggerationem, seu potius umbratilem quamdam ignotæ rei amplificationem. Quidnam enim illa significant, supra vires Elementorum agere; participare corpus inagis diuinum, quàm ea, quæ elementa appellantur; proportionem respondere elemento stellarum; & similia, quæ hic inculcat Aristoteles? scilicet rem inuolutam cum nulla posset ratione illustrare, ἀδύνατος potius obscurauit. Porro discrimen illud cœlestis elementarisque caloris, in quo omne ratiocinationis suæ fundamentum positum est, omnino commentitium esse iam demonstrauius.

Zeno Stoicorum princeps opinatus est id quod vni cum humido genituræ crassamento ex viro exilit, esse animæ partem, & auulsionem: nec aliter sensisse Epicurum constat; hic enim semen dixit esse corporis, & animæ detractam partem; ideoque venereorum vltum officere valetudinis com modo: quidni hoc ipsum, vt alia, mutuatus à Democrito, qui apud Plinium venerem damnauit, vt in qua homo alius exiliret ab homine. In hac etiam sententia pertinaciter obstinavit Tertullianus, qui traduces esse voluit animas, viuumque à primordio semen, quare in hunc aliquando locutus est modum. In illo ipso vltimo voluptatis actu, quo genitale virus expellitur, nonne aliquid quoque de anima videmus exire, atque adeo marcescimus, & deuigescimus cum lucis detrimento? Gregorius item Nyssæ antistes aperte prodidit inesse in hominis semine animam, omnesque animæ facultates in eo deli-

delitescere, suo tempore, atque ordine educendas; id autem ita concludit. Nihil ex inanimis vim in sese habet mouendi itemque crescendi; at perspectum est eos, qui in vtero aluntur, & incrementum capessere, & de loco ad locum moueri: igitur vnum, & idem esse debet tum animi, tum corporis constitutionis principium.

Verum tamen si hæc sententia ab egregijs profecta sit authoribus, nec sine aliqua probabili coniectura, & ratione prolata videatur; tamen haud scio an iure ab illis recipi possit, quorum animus veræ religionis pietate deuincitur. Profectò sanior sententia, cui adherere par est, negat à progenitoribus dari animas; sed illarum ferendarum rationem vni, ac soli Deo subiacere decernit. Si quis autem constituerit in semine ignobiliorum quamdam animam, qualis illa est, quam vegetatiuam iuniores, Plinius alentem appellat, cuius vi generationis materia erumpat in actum, donec foetus in vtero conformetur, aptumque immortalis animæ (quæ à Deo facta post conceptionem protinus insinuat in corpus) domicilium paretur, quid tum inde? Verum nobis non libet in ista velut adyta penetrare.

Paracelsistæ omnem procreandi vim positam rentur in mumia, vt vocant, seu vitali balsamo, & sulfure, quod per vniuersum animalis corpus dispergi, suoque fauore omnia complecti prædicant. Eius autem naturam penè incorpoream esse dicunt, conseruarique in humido genituræ crassamento, ceu in vase idoneo, donec in vterum coniecta vires suas possit exferere.

Quisquis autem accuratè fuerit contemplatus quomodo Gallina bis terue à Gallo compressa viginti, immo etiam plura parere soleat oua fecunda; quæue item ratione papiliones illi, qui ex erucis, atque bomicibus per metamorphosin quamdam oriuntur, magnam ouorum multitudinem, quam foemina vtero gestant, vnico initu compleant, atque fecundent, (cum tamen interea eiusmodi oua duriori testa obducantur) facile sibi persuadebit ingentem esse genituræ vim, quæ per occultum agat, & corpora quantumuis densa permeet: nullam verò in crassamento efficacitatem esse, cum illud oua, conceptusque

ptusque minimè ingreditur; sed conceptaculi tantum munus obeat, quo perfuncto vel ex vtero delabitur, vel in tenues halitus vaporesque dissipatur, vt mox videbimus.

An verò sicut genituræ crassamentum ab arterijs spermaticis secretum in peculiaria vasa reconditur, vnde concubitus tempore exiliat, ita etiam præstantior hæc natura, in qua generandi vis inest, crassamento permixta in eodem conceptaculo contineatur, res est digna, de qua quærat. Mihi sanè videtur eiusmodi substantiam non vni tantum loco affixam hæere, sed per vniuersum corpus permanere; inque ipso venerarum illecebrarum æstu efferuescere; ac demum vi imaginationis, cui potissimum hoc munus incumbit, detrudi, & ad exitum vna cum consentaneo crassamento stimulari.

Fœminas verò eiusmodi genitura carere nemo sana mente præditus opinabitur; cum eadem illis ex coitu contingant, quæ maribus accidunt; nec obscuros euentus ex feruore turgentis genituræ in mulieribus liceatprehendere.

Difficiliorem sanè determinationem habet quæstio, vtrum muliebris genitura vim aliquam ad procreationem conferat; an fomitem tantum incitamentumque præstet, & sit generationis quasi lenocinium. Scriptum est ab Hippocrate dementem eum esse, qui animam animæ, idest genituram genituræ admisceri non crediderit. Quippe hinc factum videtur, vt nati modò matrem, modò patrem mira similitudine exprimant; interdum verò vtriusque velut mixtam speciem referant: immo animalia à duobus diuersis generibus nata, vt muli, & hinni, tertij generis fiant, & neutri parentum sint similia. Huc autem spectare videtur illa observatio pastorum, qui equas post asini initum custodiunt, ne abortiant: aut cum equis maribus cocant, à quibus facilius implentur. Aiunt enim equam ex Asini coitu non mulum parere, sed equuleum; si postquam fuerit impleta, fatigetur: quippe fieri potest vt maris genitura ex nimio prægnantis motu disperdatur, ac propterea sola fœminæ genitura superstes formet fœtum matri omnino similem. Hæc argumenta nonnulli putant satis esse ad probandum

maris, foeminæque genituras inuicem misceri, ac in vtraque efficiendi vim inesse, seu æqualem, seu in alterutra maiorem: vnde similitudinis ratio pendeat.

Sed compertum est nobis natorum cum parentibus similitudinem non ab efficiente tantum vi, verum à materia quoque, & alimento alijsue causis provenire: sic peregrina semina, vt notauit Aristoteles, ad postremum pro terræ natura redduntur; hæc enim materiam corpusque feminibus præstat: & oves caprino lacte nutritæ, durius lanitium proferunt: atqui foemina materiam omnem segetemque foetui subministrat, immo eundem nonnunquam ita immutat imaginationis vi, vt idcirco monstrosa quædam in natura contingant. Quid? quod mulieres quædam adiurant se penumero se concepisse sine ea, quæ per coitum fit, voluptate. Numquid verò mulieres paulò hebetiores genituræ emissionem quandoque non sentiunt, quod notabili voluptate minimè perfundantur? An necesse non est vtriusque sexus genituras eodem vna tempore effundi? sed quid frustra torquemur in inquirenda eorum ratione, quæ mulieres dum continentes videri volunt, nobis fallaciter exponunt.

Operæ autem pretium erit in medium proferre rationes coniecturalque, quibus innixi decernimus genituram in procreatione animalium efficientis tantum causæ rationem habere, materiam verò omnem à sola foemina suppeditari. Scio hæc Medicos Galeni gregales molestè grauitèrque laturos? ruit enim decantata illa partium hominis diuisio in spermaticas, atque sanguineas; nam ossa, cartilagine, neruos, & eiusmodi albas partes à genituræ crassamento; rubras verò, vt cordis, iecorisque parenchymata, & carnes e materno sanguine concretas arbitrantur: nec aliunde id concludunt, quam ex similitudine; quam partes illæ cum genitura, hæc vero cum sanguine videntur habere.

Sed illos, qui ita sentiant ad experientiam inspectionemque prouoco. Primum igitur pulli gallinacei generationem ex ovo contemplemur; quam sic se habere docet autopsia. Corpora-

tur pullus ex oui albumine, in quo nulla profus ante incubationem apparet sanguinis nota. Prima autem pulli rudimenta formantur in orbiculo illo, seu circulari macula, quam vitellitunicæ adnatam, in media vtriusque cacuminis oui distantia consistere obleruamus. Nemo autem fuit vnquam vsque adeo lynceus vt galli genituram in ouo conspici potuerit: siquidem *χαλκοί*, idest grandines, quæ in vtroque oui vertice visuntur, & à mulierculis pro galli genitura ostentantur, longè absunt ab eo loco, in quo prima pulli primordia effingi diximus; & non modò in fœcundis, sed etiam in hypenemijs ouis inueniuntur. Cum igitur in ouo nullum ad spectabile genituræ vestigium deprehendatur (nam circularis macula, cuius modò meminimus, in ouis infœcundis æquè, atque fœcundis cernitur) ex quo ossa, cartilagine, nerui, aliæque partes seminales constituentur; neque sanguis exter, qui materiam præstet cordi, iecori, carnibus, alijsque sanguineis partibus effingendis; Sed omnia pulli membra, quamquam dissimilis naturæ, ex vno eodemque albumine corporentur, quid obstat quin hominis partes, quamquam dissimiles, ex eadem conflentur materia, quæ neque sanguis sit, nec genitura, sed altera natura ouorum albuminiana analogæ: qualem intra prægnantium uteros continenter defluere ex dissectione nouimus.

Præterea Harueio autpice deprehendimus fœminatæ uteros à maribus fœcundatos, nihil à coitu retinere, quod genituræ speciem referat, nec ante conceptum (qui pluribus post concubitum diebus corporari incipit) apparere aliquod vestigium feminis. Id plane paradoxum videri potest; sed accurata Harueij diligentia omnem sustulit dubitationem; quippe ita se rem habere ille comperit, ex dissectione damarum, ceruarumque sæpius iterata.

His rebus expositis, liquet genituram non esse partem, seu materiam constituendi conceptus, neque eius crassamentum ad generationem quicquam conferre; cum illud absumatur antequam fœtus incipiat coagmentari. Quare superest vt dicamus genituræ vim omnem positam esse in substantia qua-

dam prorsus insensili, quæ materiam à fœmina collatam subigens, generationis sit efficiens.

Materia autem ex qua fœtus conformatur vniuersimodî ferme est in omnibus animantibus, nempe crassus quidam lentusque humor albicans, qualis in vniuerso propemodum ouorum genere reperitur. Eiusmodi humorem sanguini permixtum læpissimè conspiciamus in menstruis fœcundarum mulierum, quem Medicorum vulgus pituitam, seu crudiores sanguinem arbitratur. Cæterum incipit hic humor in mulieris uterum profluere multis planè diebus à fœcundo coitu: tum verò in massam cogitur, membranaque obducitur: fitque quodammodo ouum molliori tunica septum. Sæpe autem albugin eius iste lentor, vel peritissimis viris imposuit: nam in abortu eiectus, habitus est pro genitura.

Ad hunc igitur modum obseruatum est in viuiparorum uteris coagmentari conceptus haud absimiles ouis. Hoc tantum inter conceptum verbi gratia humanum, & ouum gallinaceum interest, quòd hoc paratam habeat vniuersam illam materiam, quæ satis sit, donec pullus absolute conformatus excludatur; ac præter albumen complectatur item luteum, quo potissimum pullus iam exclusus, ceu lacte quodam alatur; cum eidem primis statim diebus non sufficiat alimentum ore ingestum: sed conceptus humanus non continet omnem materiam ad partum usque necessariam; hanc enim in dies singulos à vasis maternis mutuatur; nec præter lentorem albugineum alteram habet substantiam ouorum vitellis similem, quæ puerperio in alimentum cedere debeat. Quamobrem rectè notauit Harueius non ea modo animalia, quæ dicuntur ouipara, sed viuipara quoque, & ipsum genus humanum ex ovo progigni: ne putemus hanc fuisse propriam peculiaremque Tyndaridarum sortem. Porro ex his Mythologi rationem elicient, cur Ægyptiorum Theologia Deos omnes ouo editos esse, perhibuerit.

Hinc liquet futilitatis, summæque leuitatis plenam esse hominulorum procreationem à Paracello, & alijs propositam, qui

qui ex viri genitura, muliebrique sanguine in vitreo vase conclusis, temperatoque calore fotis, pusillos homines generari posse crediderunt. Nam, ut missa faciam incredibilia, atque absurda, quæ illi effutiant, certè in collectione humani seminis turpissimè labuntur; siquidem hoc frustra alibi quæritur, quàm in utero muliebri: neque enim genitura, sed conceptus ante descriptus veram feminis rationem habet.

Est autem ab Authoribus magna dissensione disceptatum de ordine, quo fœtus membra formantur, ac de parte eiusdem primigenia. Hippocrates libro de Diæta scripsit distingui membra omnia simul & augeri; neque alterum prius altero, neque posterius; quæ verò maiora sunt natura, tamen non antefiant, prius tamen apparere. Galenus tradidit non omnes simul partes effingi, sed alias prius, alias verò postea; exemplo eorum, quæ arte fiunt: nam quemadmodum, inquit, Domus non tota simul extruitur, sed fundamenta primùm iaciuntur, inde parietes eriguntur, & tandem tectum superstruitur, sic & animantis fabricam natura molitur, primò effingens quod magis est necessarium, cæterorumque veluti fundamentum; id autem Galeno vilum est iecur, utpote sanguinis officina, ac nutrimenti totius promptuarium. Aristoteles Cor primùm conformari voluit, quod cæteris partibus motum, sensum, atque alimentum suppeditare debeat. Harueius opinatur ante membrorum omnium constitutionem sanguinem gigni, tum verò ipsius sanguinis conceptacula, nempe cor cum venis, & arterijs.

Sed tamen ego habeo quid præter omnium opinionem de hac re sentiam: nimirum antequam vel sanguis purpurescere, vel ullum ad spectabile membrum in conceptu corporari cœperit, præstruuntur occultæ quædam futura animantis lineamenta, ad hunc ferme modum.

Primò vis quæ in semine, hoc est in conceptu, viget spiritum in eo delitescentem excitat; hic autem convenientem natum fomitem turget, circumfuiumque humorem fermentat, tum bullula formatur, quæ vibrans reciproque motu saliens
conclu-

conclusum halitum comprimit, atque in angustias cogit; ut propterea facto impetu halitus erumpat, & ceu per fistulam tubulumque longius procurrat: hoc interim spatio materia, seu halitus intra bullulam fermentescens, dum ab iteratis eiusdem compressionibus propellitur, processu quodammodo in orbem sinuato, tandem ad ipsam bullulam reuoluitur, idque iugiter fit. Interea ex eodem ductu, tanquam ex trunco complures prorepunt rami, qui deinde in vnum concurrentes, halitum noua accessione auctum ad bullulam reuehunt.

Hæc autem dum fiunt, obscura sunt; nam tanta horum corporum est tenuitas, ut fugiat aciem: sed ea vis est istius halitus, ut circumiacentem lentorem sensim rarefaciat subigatque, & insigni rubore inficiat. Atque hinc est prima sanguinis origo.

Cæterum sanguis vnà cum halitu ad bullulam delatus à perenniæius motu in tubulum, seu arteriam protruditur; vbi primum in plures quasi riuulos dispergitur, postea verò in eundem locum, veluti fontem, vnà cum fœnore relabitur. Sic ergo fit ut bulla venulæque, quæ prius tenui spiritu pellucidolæque humore turgentes, oculorum effugiebant obtutum, mox imbutæ sanguine satis conspicuæ fiant.

Qui verò ante nos animalium generationem ex obseruationibus ediscere studuerunt, cum nullum in conceptu conspicuum futuri fœtus indicium prius animaduernerent, quàm sanguis rubescere, & supradicta bullula micare inciperet, crediderunt primigeniam animalis partem esse cor, nam illa micans bulla pro corde est habita. Vni tamen Harueio verisimile visum est sanguinem prius extare, quàm conceptacula.

Sed proferamus argumenta; quæ sententiæ nostræ fidem, & firmamentum adiungant. Persuasum est ijs, qui in peruestiganda animalium generatione industrij pauloque experientiores fuerunt, fœtus conformationem non aliunde promptius, atque facilius accersiri posse, quàm ex inspectione ouorum, hæc enim vbiuis opportunè semper occurrunt, leuique impendio comparantur. Quam quidem in rem non mediocrem operam diligentiamque contulisse videntur Aristoteles, Vlysses

Aldro.

Aldrouandus, Volcherus Coiter, Hieronymus Fabricius, & nouissime Guilielmus Harueius.

Obseruatum est autem ouorum vitellos, qui ante incubatum in circumfuso albumine librati pendent, imò subsidunt nonnihil, & ad inum fundum accedunt, mox ab incubantis gallinae alteriusue blandi caloris foru leuiores quodammodo factos sursum efferri, supraque albumen extare; & semper illam partem eminere, cui adnectitur orbiculus albicans; quia videlicet inibi erumpit bulla spiritus plena, quæ dum ad superiora fertur, adnexum oui luteum trahit rapitque. Vnde fit, vt quancumque in partem ouum conuertatur per id tempus, quo bullula fuerit genita (quod plerumque contingit altero, vel tertio die ab incubitu) semper ad supremum locum efferatur orbiculus. Rectè autem notauit Harueius falsò proditum ab Aristotele, vitellum, eo quo dictum est tempore versus acutum oui verticem efferri. Nectamen, si vera fateri velimus, Harueio assentiemur, qui ad obtusum duntaxat cacumen assurgere luteum dixit: si quidem non ad hunc, vel illum verticem vitellus attollitur, sed ab adnexa bullula in superam eminentemque oui partem attrahitur.

Sic igitur pulli corpus formari incipit, vt primùm obscura, quædam valorum lineamenta fingantur, quæ tum deinde conspicua fiant, cum rubore sanguinis fuerint infecta. Ante verò quàm vllum extet adspectabile membrum, formantur rudimenta cordis, idest valcula, quæ iugiter palpitantia sanguinem perenni concitatione propellunt.

In hac autem obseruatione notandum multò magis turgere venulas, quàm arteriolas: Quippe sanguis per arterias delatus lentorem nouiter subactum, colliquefactumque in venas adigit, vt proinde hæ plus humoris, quàm arteriæ contineant. Interea ex hoc humore animalis partes certo quodam ordine coagmentantur.

Primùm enim dorsum extruitur, cui adnectitur caput ex tribus, ceu vesiculis conflatum, quarum duæ oculos, tertia cerebrum refert. Apparet autem caput in prima conformatione magnum,

magnum, atque immane ratione reliqui corporis; deinde brachia manulque, necnon crura cum pedibus adiunguntur. Dum verò hæc formantur, vix licet vlla viscerum rudimenta discernere, præter vesicas, ex quibus cordis vasa effingi diximus.

Paucis verò diebus postquam punctum micans in conceptu apparuit, vniuersi corporis delineatio absolvitur; tum denique exta formantur, nempe aluus, & intestina, lien, renes, iecur, pulmo, & cordis complementa; quæ quidem primum in aperto sunt conspicua, dein verò reconduntur intra pectus, abdomenque; quæ ceu viscerum integumenta corpori postremo apponuntur. Mirari autem licet, quæ sit recens formati fœtus exiguitas, ille enim, vt animaduersum est ab Aristotele, maiusculæ formicæ magnitudinem vix superat, quo tempore membra iam sunt discreta, & tum cætera omnia, tum genitalia constant.

Interea dum hæc fiunt, producuntur ex vmbilico fœtus quatuor vasa, idest, duæ arteriæ, vnica vena, & vrachus, quæ comuni quadam membrana, seu, vt nonnulli vocant, intestinulo, vel funiculo inuoluta longius protenduntur, & vterino iecori inseruntur. Iecur vterinum, seu placenta vteri vocatur ab Anatomicis, carnea moles, seu fungosa quædam massa, quæ in placentæ formam prægnantis vtero adnascitur. Plurimus in eo scaturit albugineus lentor, qui ex arterijs maternis in vterum pertinentibus, eò vberius huc delabitur, quò fœtus grandior fuerit. Mirum autem quantum vterinæ arteriæ turgeant, cum partus appropinquauerit; Quippe magnam supradicti humoris copiam in vterum deponendam aduehunt.

Arteriæ vmbilicales à fœtus aorta propagantur sunt enim exigui rami, seu surculi iliacarum priusquam ad crura descendant: hæ verò per omnem funiculi longitudinem productæ, cum ad vteri placentam pertigerint, dirimuntur in ramos innumerabiles, qui venarum propaginibus per anastomoses continuati, atque iuncti, admirabilem quamdam vasorum implicationem constituunt.

Porrò innumeri per placentam repunt venarum ramuli, qui
in duos

in duos maiores truncos coeuntes per funiculum, vnà cum arterijs excurrunt; donec prope foetus vmbilicum coalescentes, forment venam vmbilicalem, quæ tandem in cauam iuxta cordis dexteram auriculam terminatur.

Est autem contemplatione digna venæ vmbilicalis magnitudo, quæ tanta est, vt consortium arteriarum amplitudinem longè multumque superet. Scilicet non modo vniuersus ille sanguis, qui per arterias in placentam influit ad cor foetus relabitur per vmbilicalem venam, sed etiam non exigua albuginei lentoris portio, quæ à iecore vterino secreta venarum oscula subit, vnà cum sanguine illo aduehitur. Hac igitur ratione arreptus ex vteri placenta crassus humor per vmbilicalem venam ad cor, ceu alimenti promum perlabitur, vnde in omnes corporis partes per arterias distribuitur. Quemadmodum autem foetus membra alantur, & crescant, haud sanè facile dictu est; Nam quæ de hac re ab Authoribus sunt prodita, mihi quidem non satis probantur. Sed hæc suo loco referuentur.

Nunc illa potius explicetur Hippocratis sententia, qui foetum ex vtero matris alimentum sugere in libro de carnibus scriptum reliquit; ad stipulatoresque habuit summos naturæ interpretes Democritum, & Epicurum. Si verò quis, ait Hippocrates, quærat vnde deprehendi possit foetum in vtero sugere, animum referat ad pueros infantes, brutosque animantes, qui simul ac nascuntur alui fœces egerunt. Atqui non haberent eiusmodi excrementa, nisi in vtero luxissent, immo nec mammam, statim vt in lucem prodeunt, sugere nossent, nisi id in vtero antea didicissent.

Excusari autem neutiquam potest illorum sententia, qui cum omnem Hippocratis doctrinam loco Oraculi haberent, suspicerentque, hanc tamen pulcherrimam coniecturam, ceu delirantis somnium reiecerunt, ne à vulgo præconcepta opinione decederent: Nam promptum quidem erat experimentum, quo illius fides confirmaretur. Scilicet inest semper in ventriculis foetuum, qui animalis vtero continentur, lentus quidam humor ei prorsus similis, in quo foetus ipse innatare

cernitur, quin etiam in ingluvie pulli gallinacei, aut columbini nondum exclusi eiusmodi humorem sæpenumero conspeximus, ut propterea fatendum sit foetum non omne alimentum per vmbilicalia vasa arripere, sed aliquid etiam decircumfuso liquore hianti ore (quod in Catellis compluries obseruavi) sorbere, & in aluum detrudere; ut coctum, atque confectum in reliquum corpus diuidatur. Huius autem reliquæ inutiles ad inferiora intestina depullæ efficiunt nigricantem illam massam, quam Meconium à similitudine appellatam scripsit Aristoteles, quamque recens nati pueruli antequam mammas appetant, solent excernere.

Superuacaneum esset eorum vanitatem coarguere, qui dicunt pellucidulum illum humorem, qui tenello embryoni circumfunditur, eiusdem esse sudorem, vrinæ etiam, ut nonnulli volunt, permistum: Nam certum est hunc ex albugineo lentore quodammodo colliquefacto effici, ac extare antequam foetus membra coagmententur. Quid? quod quàmprimùm pusillus embryo formatur, in magna eiusmodi humoris vberitate fluitat; ut minimè sit credibile e tantulo corpore tantam sudoris copiam effluxisse. Vrachus verò in humano foetu non est peruius, atque adeo nequit per illum excerni vrina: quin hæc toto grauiditatis tempore in vesica asseruatur, tandemque per verenda post partum educitur.

Vtinam verò aliquando eripiatur perniciosus illorum error, qui censent foetus in vtero hærentis vitam extrinsecus religatam à matre pendere; atque adeo extincta matre ipsum etiam conceptum perire; Nam certè sæpenumero accidit ut pueruli iam perfecti, & ad maturitatem perducti matrum funeribus superstites, earumdem vteris tumulati miserabiliter extinguantur; Enimvero sua foetui vitalitas propria inest, qua viget, alitur, & augefcit. Decipiuntur autem, qui credunt sanguinem, spiritumque e vasis maternis per venas, & arterias vmbilicales ad foetum deriuari: Nullæ enim sunt Anastomoses, quibus vteri vasa cum vmbilicalibus continuata connectantur. Neque verò materna vasa vltra vterum, vel vmbilicalia vltra placentam

ram producantur. Quocirca vmbilicalium arteriarum pulsatio à corde foetus pendet; quod autopsia euidenter demonstrat; ligatae enim arteriae pulsant intra vinculum foetumque; extra verò, qua videlicet vteri placentae alligantur, desinunt moueri.

Confirmari hæc possunt exemplo pulli, cuius procreatio ex ovo similis est conformationi foetus viuiparorū. Quemadmodum autem pullus dum gignitur, atque formatur, nullam cum Gallina, quæ ouum peperit, habet connexionem, sed propria cordis vi viget, & consentaneum sibi alimentum ex ovo prolicat; ita foetus humanus in obeundis vitæ manijs non dependet à matre, nisi quatenus ab ea calorem, nutrimentumque mutuatur. Quippe in hoc potissimum differt ortus viuiparorum ab ouiparis, quod horum conceptus (vt supra diximus) habeant omne illud alimentum, quo indigent vsque ad exclusionem; at verò conceptibus viuiparorum nutrimentum particularem subministratur in dies: Delabitur enim assidue ad vterum grauidæ animantis albugineus lentor, quem peculiaris quædam vis e corde foetus manans, in vënarum vmbilicalium oscula adigit, atque propellit.

De tempore quo foetus absoluitur, sic est ab Aristotele traditum: Cum cæteris animantibus certum pariendi tempus statutum sit, vnus tamen homo incerto gignitur spatio; nam & septimo mense nascitur & vndecimo, atque etiam inter hos interiectis mensibus, potissimum verò nono.

Quamuis autem persuasum habeam amplos temporis fines ad maturitatem humani foetus à natura fuisse præscriptos, adduci tamen nullo modo possum vt credam partus octauo mense editos minimè esse vitales; at vno mense minores posse viuere. Profectò conceptus initium plerumque mulieres ignorant: Sæpe enim à flatibus vterum infestantibus, vt notauit Aristoteles, alijue fallacibus indicijs deceptæ arbitrantur se concepisse. Interdum verò etiam cum conceperint non sentiunt protinus se grauidas esse factas. Nonnunquam item mulieres superfoetantes non perficiunt vtrumque conceptum, sed alteru-

tro pereunte superstitis tempus iusto longius, aut breuius numerant. Quid multa? incertissima quidem sunt conceptionis indicia; suspecta mulierum fides; sæpe enim illæ per imprudentiam decipiuntur; & aliquando etiam viros dolose frustrantur. Quamobrem controuersia de partus tempore magnarum nonnunquam litium causa fuit. Quandoquidem octauo mense, vel post vndecimum editi ad hæreditatem à iuriconsultis minime admittuntur.

Restat tandem, vt exponamus quemadmodum perfectus absolutusque foetus in luminis auras prodeat. Putant plerique sola matris facultate nixuque foetum ab utero excludi. Alij contra foetum propria vi sibi exitum parare arbitrantur, vt contingit in pullis, qui gallinæ incubantis, vel fimi clibanique calore excluduntur ex ouis. Mihi verò perspectum est ad partum proficere plurimum ipsius foetus conatum, sed auxiliarem quoque operam ab ipsa parente conferri.

Quantopere partum adiuuet foetus molimen, res ipsa satis superque testatur: Sæpè enim e matribus in feretro iacentibus vitales partus prodire; & in sepulturis nonnunquam inuenti sunt pueruli inter crura humatarum parentum.

Ipsium quoque vteri Matrisque conamen partui subministrare adiumentum, liquet ex eiectione foetus mortui, qui per sæpe sola vi expultrice parentis extruditur.

Quemadmodum igitur ex utero defunctæ Matris foetus difficiliter prodit, ita laboriosum est, periculi que plenū à viuâ matre extinctum foetum educere: facilis autem, ac expeditus fit partus quotiescūque foetus vegetus ad maturitatem perductus, membranas quibus inuoluitur, perrumpit; vterique ostio recluso procedit in caput; ac interea parens robusta, situ corporis ad foetus exclusionem appositum, nilque valido adiuuat partionem.

Cæterum infanti statim vt in lucem editus est, funiculus propter vmbilicum deligatus vinculo tenus ab obstetricibus amputatur: obserare enim oportet vmbilicalia vasa, & præsertim arterias: nam secus per illas, vna cum sanguine vita efflueret, vt aliquando euenisse proditum est.

TH. CORNELIVS

Dominico Catalano, & Iosepho Alaimo S.



Go vero, amici ornatissimi, subirasce studijs nostris interdum soleo, quod illa mihi ad vitæ animique tranquillitatem aspiranti, obesse potius, quam adiumento esse videantur. Sed enim bellum mihi quasi naturale est cum literatoribus, & sciolis, qui nunquam non student me in odium invidiamque apud ciues vocare. At persepe tamen mihi vigilijsque meis gratulor, maximèque cum mecum ipse reputo complures viros sapientia claros amicitiam meam non modò dedignari, sed appetere etiam atque deposcere: neque enim quicquam habui antiquius, quam ut mihi amicos studiorum cognatione mecum conspirantes adiungerem. Porro sic habetote viri doctissimi me incredibilem voluptatem ex vestro in me amore, & iudicio percepisse: Enimvero ut primum ab acerrimo illo Sapientiæ arbitro Simone Rao (ex cuius immatura nec opinata morte, mihi nuper à Ruffo nostro nunciata, inconsolabilem hausi dolorem) singulare de vestra virtute iudicium protatum audiui, ad amicitiae vestrae cupiditatem exarsi. Nunc autem cum hanc animi mei propensionem omnibus testatam esse velim, sextum hoc Progymnasma, quod varietate inuentorum doctrineque nouitate, ceteris præstare videtur, vobis libentissimè dono.

Neapoli MDCCLXX

DE NVTRICATIONE

Progymnasma VI.



Rimordia ortumque hominis, quantum ex propria alienaque obseruatione conijcere mihi licuit, progymnalmente superiori dilucide, vt videor, expressi: sequitur vt explicem quomodo infans in lucem editus alatur; augetur, atque pubescat.

Primum hominis nutrimentum lac est: fugit autem vbera infans; statim vt caput ex vtero matris exseruit, licet necdum totus fuerit egressus; vnde etiam intra vterum luxisse non inepte concludit Hippocrates. Nunquam vero illum respirare, antequam integer prodeat; etiam si caput interea diutius extet, argumento est quod vocem; vt notauit Aristoteles, nisi egrediatur; nunquam emittat.

In animantibus, quæ lacte aluntur, omnis fere cibus matrum protinus à partu lactescere incipit. Quæ verò specie lac ad mamas feratur; haud facile scitu est. Vetus est opinio sanguinem in mamillas puerperarum delatum ingenita naturæ virtute lactescere. Neoterici cum ab intestinis, & aluo per mesenterium venulas lacteo liquore turgentes fruticare animaduertissent, crediderunt chylum per proximam, & quasi compendiariam viam ad vbera perlabi. Huic autem sententiæ fauere videtur noua Iohannis Pécqueti obseruatio, qua compertum est chylum per lacteas venas ad conceptaculum quoddam inter lumbos positum confluere; vnde per peculiare tubulos intra thoracem quasi recta excurrentes ad venarum ramos subclauios, seu axillares feratur; vt vna cum refluio sanguine Cordis ventriculos ingrediatur. Videtur autem verisimile ex his chyli canaliculis deduci riuos ad vbera pertinentes, qui in puerperis lacteos laticeos vbertim profundant.

Sint autem hæc vera, quamquam mihi nondum explorata,

nec observatione perspecta, quid tamen obstat, quin aliæ admittantur viæ, per quas lacteus succus perducatur ad mammas? Scilicet quemadmodum pellucidus lentor, ex quo foetus corporatur aliturque ex arterijs in prægnantis uterum pertinentibus excidit; Ita pariter consentaneum est lac secerni à sanguine per arterias thoracicas mammariasque delato. Huc enim spectant innumera illæ vasorum implicationes, quæ circa glandulas papillis subiectas, præsertim in lactantibus observantur; Itemque mutæ epigastricorum vasorum, cum mammarijs anastomoses, quas præter cæteros accurate descripsit Highmorus. Accedit eo, quod arteriæ thoracicæ, atque mammariæ in animalibus quamdiu lactant, maiores amplioresque cernantur, quàm reliquo tempore: non secus, ac de arterijs gravidarum uteros attingentibus memoratum est supra. Quin etiam notauimus ex arteria mammaria lactantis animalis lactescentem rorem unà cum sanguine confusum effluxisse.

Quærentia autem, aut percuntanti vias, per quas lacteus humor ad cor arterialisque permanat, indicabit Pecquetus chylicos ductus à se primum notatos, qui ad subclauias venas pertinentes lacteum rorem breui tramite in dexterum cordis sinum traiciunt. An verò etiam portio quæpiam illius succi nutritij, quem copiosè per venas mesaraicas unà cum refluyente ex arterijs sanguine ad iecur, & inde ad cor tranare ostendemus, tandem lactescat in mammis, nondum planè compertum habeo. Verumtamen si mihi diuinare fas sit, dicam ex hoc quoque succo subministrari lacti materiam. Nec verò tortuola videri debet hæc via, per quam secretus ex intestinis, & aluo chylus permanat ad iecur, atque hinc in ventriculos cordis perlabitur; vnde demum deriuatur in mammas: Nam profectò non minus flexuosum est iter per lacteas Asellij venas, ductusque thoracicos Pecqueti.

His autem, ut par est concessis, haudquaquam difficiles videbuntur quæstiones illæ, quæ iam diu Physicorum torserunt ingenia. Quamobrem nutrices largiori cibo potuque ingesto statim sentiant lac ex dorso, & clauiculis ad mammas deflue-

re.

re. Item quare in lactantibus ex copiosa sanguinis detractio-
 ne lac imminuatur. Ad hæc cur medicamentorum vis post pau-
 cas horas ad vbera perducatur. Præterea unde fiat, vt in lon-
 gioribus inedijs, quando iam alimentum omne in ventriculo,
 & intestinis fuerit absumptum, non nihil adhuc lactis genere-
 tur in mammis, quemadmodum in diuturnis obsidionibus ali-
 quando contigisse compertum est. Tandem cur ex infantium
 recens natorum papillis aquosum lac sæpenumero extillet,
 quod in adultis quoque solet contingere: etenim obseruatum
 est aliquando ex virorum virginumque vberibus frequentiori
 suctu lac prodijisse; & interdum etiam sponte tanta copia efflu-
 xisse, vt eo infantes ali potuerint. Quin etiam de brutis ani-
 mantibus idem pariter narrant Authores. Matthiolus scribit
 inuentos in Bohemia tres hircos lac e mammis affatim pro-
 fundentes; & Aristoteles tradidit Pastores Octæ Montis vbera
 caprarum mares non admittentium vrtica perfricare, & inde
 copiosum lac emulgere. Quæ quidem omnia quomodo fieri
 possint, ex nostris hypothesibus est manifestum.

Sed progrediamur ad reliqua. Haustum ex vberibus Nutri-
 cis lac in ventriculo pueri cogitur, atque duratur à succis, hali-
 tibusque coagulandi vim habentibus: Porro densatum confi-
 citur exteriturque haud secus ac cibus, qui à natu maioribus
 manditur: at quemadmodum id fiat, deinceps est explican-
 dum.

Libet interea hic admirari columbarum ingenium, quæ
 pullos suos primis diebus lacte nutriunt. Nimirum si colum-
 bini pulli nuper in lucem editi ingluuies dissecetur, occurret
 statim massa ex pluribus candicantibus corpusculis coagmen-
 tata, quæ lactis in hædorum ventriculis coagulati, non cando-
 rem modò, sed odorem etiam, atque saporem maxima simi-
 litudine repræsentat. Præparatur hæc substantia in alumnorum
 ingluuie, quæ per id temporis crassior fit, & ampliora vasa ob-
 tinet, non secus ac vteris prægnantium contingit. Nec dubium
 quidem est, quin columbæ id habeant commune cum om-
 nibus auibus, quæ pullos cibo in ingluuie recondito educant.

Natu

Natu grandiores esculentis potulentisque sustentantur. Esculenta dentibus atteruntur, & salivæ ex proprijs ductibus, præsertim verò ex tonsillis linguæque glandulis in os extillantibus interuentu humescunt, crebraque ipsius linguæ agitatione sæpius deuoluta in molliorem massam subiguntur. Tandem verò sic præparata per gulam in ventriculum detruuntur.

Est autem ventriculus cibi, & potionis receptaculum, cuius magna profectò vis est in mutandis, & conficiendis omnibus, quæ accipit; siue arida illa sint, siue humida; vt cocta, atque confecta in corpus omne diducantur.

Concoctionem omnem vi caloris perfici, cibosque à calore animantis, & humida potione moliri, ac decoqui elixorum, instar tradidere Hippocrates, & Aristoteles, quos passim secuti sunt Medici.

Erasistratus verò cibos attritu, & pistura in ventre confici censuit. Id autem de pennatis saltem animalibus fatetur experientissimus, ac diligentissimus Harueius, qui ideo, inquit ab his deuorari lapillos, & prædura corpora, vt eorum vi confringere, & conterere queant cibaria, quæ, quoniam dentibus carent, integra ingurgitare coguntur. Quamobrem auium ventriculi, ex duobus crassis robustisque musculis constituti videntur, vt duriorē escam molere, & pinsere possint, calculis dentium vicem supplentibus. At nequis de coniecturæ huius veritate ambigat proferam obseruationem, quæ ipsi faciat fidem. Gallo Calicutano complura ærea, atque argentea numismata in canalis formam conuoluta ingessimus, quæ post decem dies in eiusdem ventriculo inuenta sunt singula duodena fere ponderis parte diminuta. Erat autem exterior, seu conuexa illorum superficies insignitè attrita; at interior tamen, seu concava, omnino integra permanerat. Vnde palàm est istiusmodi corpora in alium ventriculis non liquefcere, aut dissolui; sed collisu potius exteri, atque comminui.

Alepiades nihil in ventre concoqui voluit, sed escam crudam, vt assumpta est, in vniuersum corpus distribui.

Chymistæ cum animaduerrerent lapides, metalla, aliaue durissima corpora, certis quibusdam liquoribus immersa dissolui extenuarique statuerunt simili etiam ratione escam in ventriculo confici.

Magnum sanè, & mirabile videri debet quomodo cibi in ventriculis animalium, ita paucarum horarum spatio mutantur, ut pristinam naturam prorsus exuere videantur. Iam verò incredibile est, atque absurdum eiusmodi mutationes à solo calore proficisci; quippe nunquam cibi, extra animantium aluum æquè conteri mutarique possunt; etiamsi diutius in aquis feruentibus decoquantur, vel ignibus torreantur. Vitrum autè, & metalla, quæ in ventriculis pennatorum comminuantur, & atteruntur, vix aut ne vix quidem ab igne absumuntur.

Quantum verò ad ciborum confectionem calor conferat, is deprehendet, qui piscis alicuius etiamnum viuentis viscera attigerit, nullum enim in illis calorem percipiet; quamuis pisces ferè omnes sint voraces, escamque præduram, & interdum etiam lapillos, ac ossa facile concoquant.

Struthio camelum omnes inuocant, quotquot animalium concoquentem facultatem exaggerant. Nos mira notauimus in plerisque auiibus amphibijs, quæ omnia quæcunque passim occurrunt sine vlllo delectu ingurgitant, concoquuntque. Mirum quanta in eorum ventriculis rerum varietas, quanta durissimorum lapillorum copia reperitur.

Memini me olim amphibix cuiusdam volucris viuam anguillam capite tenus prehensam iam iamque ingurgitantis extra inspexisse, ac deprehendisse anguillæ portionem intra stomachum ingestam fluxam penè, atque attritam; cum tamen eiusdem cauda extra rostrum auis prominens adhuc moueretur. Afflabatur ex alitis ventriculo acerrimus odor, & aculeata mordacitas linguam feriebat: instillatum in eo putares quippiam aquæ, seu liquorum, quibus Chymici in dissoluendis metallis vtuntur.

Mordacitatem eiusmodi in omnium fere maiusculorum piscium ventriculis percipimus, in quibus escam, quæ alioqui ante
confe-

confectionem gustatui, & odoratui iucunda esse solet, putidam palatoque molestantem obseruamus.

Liquet igitur ex his ciborum concoctionem non esse vnius caloris opus; sed aliud quidam desiderari, quod esculenta, & potulenta in ventriculum ingesta vsque adeo immutare possit, vt breui temporis spatio natiui illorum sapores odoresque pereant, nec quicquam ingenitæ suauitatis eorumdem seruetur.

Quicumque verò ad occultas qualitates confugiunt, ij se profecto statim explicant; sed interea cuius rei scientiam pollicentur, eius ignorationem inuicti fatentur.

Quapropter ad similitudinem veri propius accedere videtur illorum sententia, qui censent ciborum concoctionem fieri à succis quibusdā mordacibus in animalium ventriculos distillantibus, qui instar menstrui (ita Chymici eiusmodi liquores appellant) escam comminuant dissoluantque, vt inde particula ad alendum idonea extrahi secernique possint.

Menstruorum, vt est diuersa natura, ita vis etiam dissimilis: aliud enim margaritas dissoluit, aliud ceram, aliud aurum, vel cætera metalla: neque puto esse vllum corpus concretum, quod non peculiaris aliquis liquor queat exterere; quamquam, quomodo in omnibus id fieri possit, nondum satis est exploratum.

Quamuis autem non dubitem quin corpora omnia à peculiaribus menstruis molliari, atque dissolui queant, vix tamen adducor, vt credam magnam illam ciborum varietatem, quæ homo, ius, gallina aliæque multiuoræ animantes ingurgitant, ab vno eodemque succo in ventriculum confluente liquari. Nec verò videtur consentaneum totidem liquores fingere, quot cibaria qualitate, & natura differentia ab animalibus deuorantur. Præterea si nihil aliud, nisi eiusmodi succus ad escæ comminutionem requiritur, quid est quod illa iam semicocta in alio mortuæ animantis non conficiatur amplius, etiamsi conuenienti calore interim foveatur? Alia igitur excogitanda est ratio, quæ possit explicare quomodo cibaria in animalium ventriculis concoquantur.

Ego verò, vt quid ipse sentiam exponam, arbitror in vnam

ciborum confectionem plures conuenire causas, nempe & ipsam escam fermentari debere, & calidorum spirituum, halituumque expiratione foueri, & rursus ventriculi motu pressu-
gue misceri, cogi, atque confundi, ac demum apto humore irrorari, atque dilui, vt hac ratione confecta per peculiare ductus distribuatur.

Sed antequam hæc omnia explicem operæ pretium erit nonnulla de ventriculi structura adnotare, quæ cum ad intelligendam huius visceris vtilitatem maximè conferant, à nemine tamen, quod sciam, animaduersa hæctenus fuere.

Inspicienda igitur primùm est interior ventriculi tunica, (nam hominis æquè ac plurimarum pecudum ventriculi ex duabus præcipuis membranis compacti sunt) quæ nequaquam est vniùsmodi, & sui vndequeque similis: nam circa supernam partem, quæ gulæ, & intestinis adnectitur, magis candicat, quàm reliqua parte, quæ fundum appellatur; hæc enim notabiliter purpurascit; imò si digito, vel vngue vehementius comprimatur sanguinem stillat; præsertim in animalibus strangu-
latis. Quod autem ad rem nostram maximè facit, est magna illa foraminum frequentia, qua hæc tunica terebrata quodammodo videtur. Quippe circa fundum, vbi eandem purpurascere diximus, velut aculeo multifariam compuncta obseruatur. Quæ verò rubra pars desinit, præcipuè prope gulam, maioribus, sed rarioribus tamen, acque transversis ostiis orbiculatim perforatur; quod si interior hæc ventriculi membrana à cæteris auellatur (id verò facile, & nullo penè negotio fieri potest) statim sese in conspectum dabit innuntera arteriolarum venarumque ad præfata foramina pertinentium multitudo. At verò in conuexa superficie, quo loco maioribus illis foraminibus membrana pertusa est, extant tanquam à latere lenticulares quædam glandulæ, quæ leniter compressæ candicantem humorem intra ventriculum fundunt.

Pennatorum ventriculi prædura callosaque tunica nullo penè foramine pertusa intus obducuntur. Oesophagus verò, qua parte stomacho alligatur valde crassus est, habetque intrinse-

cus emi-

cus eminula quædam tubercula, quæ dum mulgentur albidum succum effundunt. Interiore autem tunica diuulsa apparet glandulosa caro multis patula tubulis, in ea ipsa tubercula pertinentibus. Porro vbi dicta crassitudo desinit, ibi gula incipit plurimis quibusdam veluti punctiunculis intrinsecus perforari.

Notandus insuper est mirabilis ille totius penè alui motus, quippe aperto viuæ animantis abdomine videntur intestina, vndanti quodam motu hirudinum, aut lumbricorum instar cieri. Nec verò huiusmodi motu in viuo tantum animali obseruatur, sed nonnunquam ad aliquot post interuentionem horarum perdurat. Quin exempta quoque interanea, atque in frustra dissecta mirum in modum distorquentur, & modò contrahuntur, modò etiam dilatantur. Similem pariter motum deprehendere licet in vteris scrotisque viuorum animalium: sed nusquam fortasse magis, quam in ventriculo elucet hic motus, qui tametsi forinsecus aliquanto sit obscurior, at nihilominus in interiore parte non ratione tantum concipitur (tum enim adstringitur, tum relaxatur, atque adeo modò ampla, modò autem angusta eius capacitas animaduertitur) verum ipsis quoque oculis cernitur: nam dissecto confestim viui animalis ventriculo, percipitur crebra, ac multiformis motio in eiusdem interiori membrana, quæ dum contrahitur prægrandes sinus, rugæque, seu plicaturas format.

Nunc redeamus ad ciborum confectionem: Primum autem ventriculi concoquentis opus est elixæ digestio: nam non ita, quæcunque, vti in stomachum ingesta fuere, permanent vique ad concoctionem: sed quædam confunduntur, quædam etiam discernuntur, & in conuenientia loca, ventriculi motu digeruntur: nec verò sola grauitatis, & ponderis ratione mouentur: quippe coacta, & concreta corpora cuiusmodi cibaria esse solent, solutè moueri, & liberè nequeunt.

Ad hunc igitur modum digestus in ventriculo cibus fermentescere incipit, nimirum hæc vna est præcipua elixæ ad mutationem via, fermentatio. Neque id putemus esse humorum

tantum, & præsertim Chymistarum commentum: Cibos enim in ventriculo dum conficiuntur fermentari scriptum est in libro de prisca medicina, qui tribuitur Hippocrati. Equidem constat ea omnia, quibus animantes aluntur sua præ natura ad fermentescendum esse apta; quin illa in ventriculo facilius subigi, quæ promptius fermentantur.

De fermentationis natura causisque nihil hætenus ab Authoribus traditum memini, quo mihi ad veritatem persuaderi plane potuerim. Tetigit illam Plato in Timæo, dum saporis acidii originem percenteret. Hinc nacta occasione Bellichius, Conringius, & alij multa super hoc argumento scripsere, in quibus nec Platonis mentem, nec rem ipsam attigisse videntur. Scilicet hi omnem fermentandi vim calori tribuunt: Cum tamen calor plerumque fermentationem ipsam subsequatur; etenim in his omnibus, quæ fermentescunt particule æthereæ, in quarum motu caloris actionem consistere ostendimus, multifariam agitantur, atque adeo bullulæ spiritus, vel aeris plenæ, ut in Timæo scriptum est, excitantur. Ex hac porro actione acidus, ut plurimum sapor solet emergere.

Hinc liquet fermenti vim à calore suscitari; ac ea citius fermentescere, quæ quavis ratione incaluerint. Cibaria autem, quibus animalia vescuntur, omnia fere eiusmodi sunt, ut facile etiam sponte in ventriculo incalescant. sed calorem quoque quantum satis est, concipiunt tum à proximis visceribus, tum potissimum à Spiritibus halitibusque per gastricas, & splenicæ arterias in ventriculum influentibus.

Quanta verò sit eiusmodi halituum calidarumque expirationum vis in molliendis, & conficiendis cibariis, colligi potest ex plerisque oleis liquoribusque chymica arte distillatis, quæ exhalant sæpenumero spiritus, qui suberis corticem, ceram aliaque ampullarum obturamenta exterunt, atque comminuunt. Quin etiam notum est nostris Pharmacopolis ebur cornu cerui aliaque dura corpora halitibus vini, quod in cucurbita distillatur, exposita, in substantiam friabilem redigi, quod tamen vix à diuturno prunarum ardore posse effici.

Dissecuimus sæpenumero viuarum animantium ventriculos, quo tempore cibaria in eisdem vberius ingesta fermentabantur, vidimusque efflare confertim vapidos spiritus, quorum tanta nonnunquam erat acrimonia, vt oculos, naresque vehementer feriret. Tum verò escam gustatui iniucundam, & pristinæ suauitatis prorsus expertem sensimus; quod tum ex acriū succorum halituumque permistione, tum etiam ex ipsa fermenti natura proficisci putauimus. Hæc fortasse respicientes Empedocles, Plistonius, alijque veteres rerum naturæ consulti, escæ confectionem corruptioni adnumerandam censuerunt.

Cibus iam fermentatus, atque mollitus ventriculi tum adstringentis se, tum relaxantis motu cogitur exteriturque, ac in minimas particulas diuiditur, & apti liquoris interuentu in substantiam pultis, seu cremoris similem, plerumque vertitur.

Coctum confectumque cibum vulgo credunt semper albescere, sed falsò tamen, quia in eo sæpe natiuus color seruat: sic in ouium bouumque, qui sola viridanti herba pascuntur, aluis subactam massam virescere obseruamus. Homines verò cibarijs, vt plurimum vlescunt, quæ comminuta, & liquefacta solent candicare. Quamquam nonnihil etiam ad hunc candorem confert succus ille albidus, quem e vasis à nobis primum notatis intra ventriculum influere præmonuimus.

Eiusmodi humoris multiplex est commoditas; potissimus verò vñs est in colliquefaciendo, diluendoque alimento, vt illud minuta, & angusta vasorum oscilla subire queat: sæpe enim deficit potulentus humor, qui munus hoc possit explere: præfertim quando iam à cibarijs maior pars nutritij succi fuerit exhausta.

Quicumque humanas aluos dissecuerunt conspicati sunt magnam lenti humoris copiam, partim cibo permistam, partim etiam interiori tunica ventriculi adhaerentem. Sed de illius natura, atque vtilitate perperam iudicarunt; quippe non animaduertent lantorem illum, non nisi refrigerato, & extincto calore deprehendi: nam profectò in viuo animali succus is instar aquæ liquitur; quod vel in vomitione perspicuum est, etenim cum pri-

cum primum ille excernitur liquidissimus est, sed refrigeratus deinde in mucosam substantiam concrevit. Quid: quod ventriculi corpulentia, & crassitudo magnam partem ex eiusmodi succo componitur: quamobrem humore hoc absumpto, minima fit illius magnitudo.

Vt primum autem cibus in aluo confici liquarique cœpit, statim succus quidam à reliqua massa secretus, partim in foraminula, per interiorē ventriculi tunicam hiantia insinuat, partim quoque ad intestina detruditur: vtrinque verò per peculiaria vasa deriuatus ad eas partes perlabitur, in quibus & magis elaboratur, atque perficitur, & ad vniuersi corporis vtilitatem præparatur. Sed qua ratione id fiat facile indicabo, si nonnulla prius ex anatome exposuero.

Initio quidem notandus est sanguinis motus, necnon ortus, atque progressus venarum, & arteriarum, quorum omnium rationem maioribus nostris ignotam primus aperuit diligentissimus Harueius. Nihil hic moror lucifugos quosdam, & vt planius dicam, veritatis osores, qui præclarissima sæculi nostri inuenta, vel negligunt, vel indicta causa condemnant. Profectò nobis plane cognitum perspectumque est sanguinem à corde per arterias in omnes fere corporis partes propelli: hinc autem à venis exceptum continuata, & perenni motione ad cor refluerē. Idcirco arteriarum, venarumque vsum, & ductum sanguinis spectantes non inscitè pronuntiabimus ibi venas omnes incipere, vbi desinunt arteriæ (mitto venam à gibba iecoris parte egredientem, cuius aliquanto dissimilis est origo) Arteriarum autem longe diuersa, atque venarum videri potest distributio; illa enim ex vno veluti stipite in plurimos finduntur furculos: at venæ tanquam minutissimæ radicum fibræ hinc, & illinc prædeuntes in vnum tandem truncum coalescunt.

Verum hic contemplari potissimum oportet arterias venasque in ventriculum pertinentes. Enimuero non modo a cœliaca, quæ arteriæ descendens loboles est, complures furculi deriuantur in aluum, sed e ramo etiam splenico (quem Riolanus Lindenius, & alij ab Arantio moniti peculiari deriuatione

ex aorta

ex aorta deductum notarunt) insignes riuuli ad eiusdem imam partem propagantur. Hinc venarum inter vtramque ventriculi membranam fruticantium exortus, quarum quæ sanguinem ex furculis splenicæ arteriæ deriuatum excipiunt, cum foraminulis ad ventriculi fundum hiscentibus coeunt: vnde succum illum arripiunt, quem in ea ipsa foraminula insinuari diximus. Caterum hæ venulæ refluente ex arterijs sanguinem, vna cum nouo humore deferentes, dum inter vtramque alui tunicam perrepunt, in maiores ramulos corriuant, qui tandem iuxta imam ventriculi partem, quæ scilicet eidem alligatur omentum, egressi vas illud insigne constituunt, quod breue venosum appellatur. Tale autem vas in lienem inferitur; sed plerumque ante ingressum vnum, aut alterum furculum ad splenicam venam transmittit.

Haud scio an vlla questio in describenda animalium œconomia maioribus vnquam habita sit contentionibus, quam quæ est de vii lienis. Ego tanè persuasum habeo viscus hoc animalibus à natura donatum, tum fermentandæ esse gratia, tum quoque conficiendi sanguinis causa; vtrumque autem munus, non carne, seu, vt Medici dicunt, Parenchymate, sed vasis: hoc est venis, & arterijs conficere existimo. Quippe ad hoc facta videtur magna illa innumerabilium vasorum in liene implicatio; vt ibi secernantur calidæ expirationes, & acres succi, qui per peculiare ductus in ventriculum, ac iecur influentes, ciborum fermentationem, sanguinisque confectionem adiuuant.

Admiranda profectò est arteriolarum venarumque quauersum per omnem splenis substantiam dispersarum fruticatio, quam nemo satis animo percipiet, nisi qui macerato, colligatoque liene, membranacea vasa à reliquo Parenchymate exemerit. Nam tanta est vasorum in capillamenti penè modum repentium frequentia, vt credere par sit laxam fungosamque eius visceris carnem non nisi ad commendandam magnam illam vasorum implicationem esse factam.

Ad Lienem insignis arteria ab aorta, vt dixi, propagatur: huic autem vni, ait Arantius, accidit vt obliquo flexu quoque anguis

in modum ductu per pancreas progrediatur, ac sinibus hinc illinc sit prædita. Quisquis autem fluidorum corporum motus ex ipsis mechanicæ disciplinæ rationibus perceperit, facile intelliget nisi crassiorem sanguinem per eiusmodi tortuosam arteriam in lienem non posse deferri. Vena quoque conspiciendæ magnitudinis, arteriaque comite (quod maxime notandum est) multò amplior à splene ad iecur, quasi rectà protenditur. Huiusmodi vasorum innumerabiles surculi intra lienem perrepunt, & anastomosibus etiam crebris inuicem iunguntur: sed & extra illum valde conspicuæ sunt eorumdem anastomoses, quæ satis ostendunt, qua ratione obstructo liene, sanguis ex arteria splenica in venam, & inde in cor remeare possit.

Ad hæc à liene non modò arteriæ, sed alia quædam obscuriora vasa in alium deriuantur; & vicissim ab hac in illum venæ, vt diximus, progrediuntur; quæ ductuum connexio multo frequentior est in canibus, & alijs plerisque animantibus, quàm in homine. In pennatis autem vasa hæc à liene propagata non inferuntur in ventriculum, sed in proximam huic œlophagi partem, cuius interiorem tunicam crebris foraminibus pertusam esse diximus.

Illud etiam in liene notandum videtur, quod scilicet non modo complures venarum surculi ex superna splenici rami parte in ventriculum pertineant, sed ex eiusdem quoque inferiora parte producantur deorsum ad colon rectumque intestinum venæ hæmorrhoidalis riuuli, per quos crassior impuriorque succus ex cibi reliquijs nouissime secretus ad lienem cum refluxente sanguine perlabitur.

Hinc licet de lienis utilitate coniecturam facere: ex eo enim halitus succique in ventriculum ad excitandam ciborum fermentationem eo vberius permanant, quò maior ciborum copia fuerit ingesta: quippe ab hac distenta interior alui membrana magis magisque peruia discurrentibus corpusculis efficitur. Rursus admiranda illa arteriæ intra splenem fruticæ ad id potissimum videtur comparata, vt in ea acida quædam
substan.

substantia secernatur, quæ nouo humori nutritio adiecta eidem ruborem proprietatesque sanguinis largiatur, vt paulò post ostendemus.

Ad hunc igitur modum pars quædam alibilis succi à reliquo cibo seiuncta per oscilla vasorum intra ventriculum hiantium primo ad lienem per vas breue venosum, dein verò per venam splenicam ad iecur vna cum refluxo ex arterijs sanguine perlabitur. Restat modo, vt videamus quomodo reliqua, & maxima pars succi illius, quo alimur ad intestina deducatur, atque hinc deriuetur in ea loca, vbi perficitur, & ad totius corporis vsum accommodatur.

Vulgo putant cibum omnem in ventriculo asseruari donec rotus exteratur; quod tamen falsum esse deprehendimus: Nam simul vt aliqua ei videretur portio liquata, & in chylum, vt Medici vocant, conuersa fuerit, statim adstringentis se alui pressu, viscerumque eidem incubantium, præsertim verò iccoris vi, & alterno diaphragmatis motu pressuque, ceu prælo expressa protruditur in intestina; dumque per illorum sinuosos antractus perlabitur ab oscillis vasorum ibidem hiantibus sensim arripitur: inutilibus tandem reliquijs ad vltima intestina depulsis.

De vijs, quæ arreptum ex intestinis alibilem succum, seu ad iecur, seu alio transmittunt, magna est inter Neotericos, & veteres Authores dissensio: hi enim chylum omnem ex intestinis per mesenterij venas ad iccoris portas permanare crediderunt. Dum autem arbitrarentur per has ipsas venas sanguinem à iccore ad intestinorum nutritionem deferri, in magnas delapsi sunt difficultates. Nam qui fieri possit, vt per eadem vias duo succi contrarijs motibus ferantur? Fernelius præter ceteros nodum hunc non dissimulauit, sed ita fieri debere iudicauit, quia nullam aliam viam commodiorem agnouerat. Nam qui vnam sensum, ait ille, estimatorem, iudicemque adhibuerit, mesenterij venas, ventriculi, & intestinorum nutritioni, non autem succorum distributioni destinatas esse contendet, quod omnes semper rubro nunquam albo succo confectæ, videntur: quodque in ventriculi, & intestinorum substan-

tiam se figant , neque ad interiorem capacitatem apertæ sint . Verumtamen quoniam aliæ nusquam viæ ex intestinis in iecur directæ feruntur , per quas alimentum insuat , ratio magis quàm sensus convincit eas etiam ad distributionem accommodari .

Iuniores verò cum animadverterent , Gaspare Asellio præmonstrante , esse in Mesaræo præter vulgatas venas arteriasque alia quædam vasa , quæ quo tempore confectus in ventriculo cibus distribuitur , lacteo liquore turgescunt , existimarunt chylum omnem ex intestinis haustum per eiusmodi vasa , quæ ideo chylifera , seu lactea nuncuparunt , ad iecur tranare : quo inuento rati sunt se nondum planè explicuisse .

Iam verò in hoc commento doctissimus quisque acquieuerat : sed ecce Pecquetus inaudita obseruatione multorum animos turbauit ; quippe indicauit chylum per lacteas venas ad peculiare receptaculum supra lumbos confluere ; atque hinc deriuatum per ductus intra thoracem repentes ad cor permanere . Qua rei nouitate perculsi plerique à Galeni Schola , cui authoritati iam pridem fuerant , desciuere . Hinc enim concluderunt sanguinis conficiendi vim non iecori , sed cordi esse tribuendam . Quamobrem non defuere , qui iecur hoc munere defunctum iocosis monumentis prosequerentur ; quam ingeniorum otio abutentium festiuitatem mitam quàm grauius , & acerbè tulerint veterani quidam Galenicæ militiæ stipatores . Nam Deos hominesque obtestati sunt , vt iniuriam huic visceri illatam vlciscerentur . Quamquam minus cerè dolendum erat studiosis hepaticæ dignitatis , quòd iecur gignendi sanguinis potestare priuaretur , nam eadem quoque ratione à magnis criminationibus , & contumelijs vindicatur . Quotus enim quisque morbus non imputatur vitiosis humoribus , quos passim iecinoris culpa progenitos criminantur :

Multum profectò debemus Asellio , atque Pecqueto , qui primi omnium monstrarunt lacteas venas , earumque progressus . At perperam tamen plerique omnes cum illis sentiunt succum omnem , quo alimur per has tantummodo vias ex intestinis ad iecur , seu ad cor perlabi . Nam compertum quidem

est no-

est nobis vel omne alimentum, vel certè maximam eiusdem partem, per vulgares ventriculi, & mesenterij venas, ad iecur confluere.

Sunt quædam animantium species, vt vniuersum genus pennigerum, in quibus ne vestigium vllum est lactearum venarum. Quin etiã in hominibus pecudibusue obesis, atque adipatis, vique adeo rara, atque exilia sunt hæc vasa, vt sensum prorsus omnem sapenumero effugiant; non quia in adipe ea delitescunt, vt nonnullis visum est, sed potius quia propter pinguedinem obstitantur, atque adeo lacteo liquori, cuius ratione conspicua esse solent, imperuia fiunt.

Cæterum nunquam extra animalium inspeximus, quin sese in conspectum dederit magna vulgarium venarum frequentia, quæ ex aluo, & intestinis per lienem, ac mesaræon aliasque vias ad iecoris portas progreditur. Quicumque verò opinati sunt sanguinem e iecinore in omnes corporis partes permanere, crediderunt hæc venas ventriculi, & intestinorum alituras destinatas fuisse. Verum motu germanoque cursu sanguinis patefacto, omnes passim duxerunt per ea vasa remeare ad iecur sanguinem, qui per arterias gastricas, & mesaraicas ad ventriculũ, & intestina deriuatus, post eorundem nutritionem reliquus est.

Quamuis autem reciprocatio illa, seu potius confusio sanguinis chylique per eandem omnino vias meritò videri debeat absurda, tamen cognito arteriarum, venarumque viũ palàm fit posse irreptum ex intestinis chylum per mesaraicas venas vnã cum sanguine ex arterijs remeare ad hepar perducì, quemadmodum de vasis vmbilicalibus fateri necessarium est. Sed enim vt vmbilicales veng confortibus arterijs ampliores maioreque sunt; ita & mesaraicæ venæ coniuges arterias magnitudine sua longè multumque superant, præsertim quando coctus iam liquatusque cibus ab intestinis per illas ad iecur perlabitur.

Quilquis verò putat venas, vel arterias gastricas, & mesaraicas vni intestinorum, & alui alituræ attributas esse, magno quidem in errore versatur. Nam præterquam quòd anima-

lium partes aliter, ac vulgo creditur, nec fortassis sanguine aluntur, non videtur verisimile tantam arteriarum venarumque multitudinem ad priuatum interaneorum commodum fuisse comparatam. Nusquam enim similis valorum copia, atque frequentia occurrit, nisi vbi communis aliqua distributio peragitur. Ad hæc in animalibus, quæ lacteis venis carent, nullæ aliæ præter melaïcas excogitari possunt vix, quæ chylum deducant ex intestinis.

Verum quid opus est circuitione, & anfractu? Profectò vanas fictasque opiniones confutasse satis videbor, si quomodo se res habeat (id enim me iam comperisse pro certo dicere audeo) apertiùs explicauero.

Succus igitur alibilis vbi primùm, e ventriculo ad intestina perlabitur cum interfluentibus quibuscumque humoribus confunditur, ex quorum permistione vsque adeo liquidus, & penetrabilis euadit, vt & iugiter diffluere, & angustissima melaïcarum, lactearumque venarum oscilla in intestinis hiantia subire facile possit.

Duo autem præcipui sunt liquores, quibus delapsus ex ventriculo chylus diluitur, felleus alter, alter verò quodammodo aqueus: ille quidem à iecore, at hic à pancreate intra intestinorum capacitatem eo vberius influit, quò magis ex ingestis cibo, potuque turgescit aluus. Iam verò vtriusque naturam, & vires expendamus.

Prodeunt ab hominis, & animalium penè omnium iecinoribus insignes canaliculi ad intestina pertinentes, quos ductus cholidocos appellant, propterea quod bilem deriuant à iecore in intestina, quibus adhærent. Horum ductuum, nec idem numerus, nec eadem semper est positura in vnoquoque animali: homo enim, & pecudes pleræque, quibus inest peculiare conceptaculum, in quo bilis coaceruatur, geminos minimùm habent ductus cholidocos, quorum alterum vocant hepaticum, quod è caua iecoris parte egrediatur, alterum verò Cysticum, quod è fellis vesicula prodeat. Hi autem vel in vnum ambo coalescentes ad eandem intestini partem corriuant, vel leparatim

paratim paruo interiecto spatio diuersè progrediuntur. Nec verò semper eodem loci pertinent: Nam in suis, & alijs multis animalibus prope pyloron, seu infernum ventriculi orificium, qua scilicet cibo exitus est, subeunt intestina: at in hominibus plerumque pertingunt ad intestini duodeni extremum, quod à pyloro spirhamæ circiter longitudine protenditur.

Animantes quædam bilis folliculo carent, vt cernere est in ceruis damis, & columbis; his tamen semper inest felleus humor, quem peculiare tubuli e iecore ad intestina deriuant. Nunquam autem non extant in hepate manifestæ vig, per quas secreta à succo nutritio bilis, partim in ductum hepaticum, partim quoque in folliculum illabitur. Hæ verò quoniam crassiori tunica sunt obuolutæ, facile à venis per iecinoris parenchyma dispersis internoscuntur: quin etiam in ouibus agnisque magna sæpenumero multitudine vermium replentur; qua ratione à ductibus sanguineis distingui apertissimè possunt.

Quandoquidem verò in hanc vermium mentionem incidimus, libet ab instituto sermone parumper digredi, & nouas quasdam inauditasque obseruationes proferre. Scilicet non modò in sanguine, & plerisque animalium succis, seu nuda acie, seu instrumento illo, quod minimarum rerum simulachra mirificè amplificat, vidimus aliquando vermiculos, sed in iecinore, liene, pulmonibus, imò in cerebro etiam, & corde verme multiformes, & interdum non minùs copia, quam magnitudine mirandos inspeximus: vt propterea suspicari cœperimus illos nonnunquam esse causas latentium quorundam morborum, in quorum cognitione plerumque solemus hærare.

De vermibus in iecore progenitis, mentio facta est ab Albucasi, & Gaspare Bauhino: Vt verus quoque geminos vermes dodrantes in hepate puellæ aquà intercute laborantis, inuentos memorat. At verò frequens ouibus id obuenit vitium, vt earundem iecinora multa vermium colluie referta sint: præsertim quæ bili viæ, & conceptacula patent. Vermium species lata est in quadrati, seu potius rhombi figuram formata, color luridus

luridus magnitudo varia, quæ digiti amplitudinem nonnunquam exæquat; morus demum multiplex. Nam contrahuntur, & diducuntur, & sæpe etiam conuoluuntur. Eiusmodi item vermes in pulmonibus hædorum, agnorumque, & interdum etiam in liene deprehendimus, sed magnitudine, atque colore dissimiles. Tandem verò suillum quoque, ac bubulum iecur simili pollutum lue vidimus, vt propterea id ipsum etiam hominibus aliquando obtingere minime diffiteamur.

Sturnus domi altus, quem pueri exterriti sæpenumero insectabantur, & exagitabant, cœpit conuulsione tentari, & quasi comitialis esse. Eius autem morbi causa dissectione adhibita palam illico facta est; Nam cordis basim teretium quorundam vermiculorum amplexu circumplicatam inuenimus. Hac deinde obseruatione freti, cœpimus gallinas multifariam terere; nec nos coniectura fefellit: quippe in earumdem thoracibus longiusculi vermes inuenti nonnunquam fuere. Quid multa? Puellam nouimus, quæ insolitu metu exanimata cœpit subinde pallere, & dehinc molestis circum præcordia doloribus teneri, tum epilepsia frequenter affici; tandem verò post diros cruciatus extincta est: in hac non alia interitus causa comparuit, quàm quòd vermes lumbricis similes cordis vasa exedissent.

Eiusdem pariter generis vermes à se quandoque obseruatos scribit Volcherus Coiter non in corde tantum, sed in cerebro quoque eorum, qui suspendio multati periere. In extremis quoque suillorum pulmonum fibris teretes vermiculos in cincinni modum intortos sæpe vidimus. Eorum autem maxima plerumque inuenitur copia in ijs pulmonibus, in quibus crebræ aquæ bullæ turgent. Gulæ etiam adnatas glandulas maiusculis vermibus repletas in cane cæterum bene valenti conspicati sumus. Denique in vesica, & renibus multigenis vermes inuentos fuisse testantur Authores.

Sed reueitor ad propositum. Quæ cholidochi ductus in intestinum inferuntur, vel certe non valde procul hincit canalis quidam insignis à Viriungo primùm animaduertus, qui in
homine

homine plerumque per longitudinem pancreatis rectà progreditur, & vtrinque in plures furculos finditur; at in pennatis iuxta lactes perreptat; & interdum compluribus riuulis ad diuersas intestini partes pertingit. Rarò autem in hoc succus aliquis inuenitur: quippe in venis tantummodo, & arterijs perennem humorum fluxum animaduocetere licet. Nonnunquam tamen cum viuarum animantium exta, quo tempore coctus in his cibis distribuebatur, perscrutaremur, deprehendimus aqueum, & subamarum quemdam liquorem per hunc ductum ad intestina defluere.

Iam verò hisce liquoribus permixtus dilutusque chylus, & ab inutilibus reliquijs secerni, & in vtrasque mesenterij venas penetrare facile potest. Sed cum rubræ mesaræi venæ ad iecoris portas pertineant, quicquid easdem subit, id omne cum sanguine confusum ad iecur confluit. Lactearum autem venarum dissimilis est distributio; quedam enim dum per glandulas mesaræi perreptant, cum vulgaribus mesaraicis coniunguntur; aliæ in diuersas corporis partes deriuantur: verum maxima pars ad conceptacula Pecqueti iuxta renes corriuat. Hæc autem conceptacula non vniusi modi sunt in omnibus animalibus: plerumque vtriculi membranacei speciem gerunt; sed quia sub exitu vitæ contrahuntur, & corrugantur, glandularum similitudinem quamdam referre videntur.

Alimentum autem, quod per angustissimas mesaræi venas nisi vade' fufum extenuatumque permanere non potest, cum in maiora vasa delabitur, incipit liquores illos, quibus diluitur, ceu munere iam defunctos, sensim deponere. Et quidem ab eo secreta bilis in iecore, partim per ductum hepaticum ad intestina relabitur, partim quoque reconditur in folliculum; vt inde per ductum cysticum in capacitatem intestinorum eructet, tunc præsertim, cum aliis multo cibo repleta vesiculam ipsam vrget. Sed humor alter tum in iecinore, tum in glandulis mesenterij, tum quoque alibi circa renes secernitur; ab hepate autem, & adnibus mesaræi per canalem pancreatis ad intestina reuoluitur. Hac igitur ratione isti humores ab intestinis per

mesaræi venas ad glandulas, iecur, aliaue conceptacula vnâ cum succo alibili permanent; Hinc verò per tubulos cholidocos ductusque pancreatis ad intestina rursus, iterato sæpius circuitu, delabuntur.

Bilem vulgo putant esse iecoris excrementum, vtile tantummodo ad depellendas cibi reliquias; aiunt enim illius amarore intestina ad expulsionem excitari. Verùm si res ita se habeat, quo nam consilio natura cholidocos ductus ad intestinorum initium deriuauit; cum sic oporteat chylum statim omnem, e ventriculo lapsum bile infici; quemadmodum ex eiusdem sapore, atque colore satis est manifestum.

Nonnulli dicunt bilem sanguini datam pro sale, aut balsamo, ne putresceret. Sed hanc opinionem res ipsa confutat: quippe sanguis iuxta portas iecoris subamarus est: at vbi è gibba eiusdem parte egressus in venam cauiam influit, amaritiei prius est expers. Vnde constat nouum alimentum fellis amaritudine infectum in iecore perpurgari: quod à Iulio Polluce animaduersum videmus; scripsit enim *præcipuum iecoris opus esse discernere alimentum in sanguinem, & bilem, & hac quidem implere vasculum, quod incumbit maximo lobo.*

Cæterùm fel habet hanc vim, vt alimentum diluat fluxumque reddat: quem vsum præstat quoque Pictoribus in miscendis pigmentis. Mirum enim quàm latè colores adiecto felle diffuant: quod sanè non scruit illum, qui non ita pridem excogitauit artem tingendi versicolores chartas.

Sed cum satis ostenderit quantopere bilis ad alimenti distributionem sit utilis, & quibus vijs fluat refluatque, proximum est vt videamus originem ductusque aquei humoris, cui præcipua liquandi diluendique chyli vis inest. Huius autem materiam non aliunde, quam ab eisdem succo potionibus prouenire, perspectum est omnibus. Nemo tamen hætenus animaduertit liquorem hunc ab intestinis, & aluo vnâ cum succo alibili ad iecur aliaue partes lapsum, magnam partem ad intestina relabi, easdemque vias sæpius iterare, donec alimentum omne fuerit transumptum.

Vias,

Vias, quæ humorem hunc ab alimento secretum excipiunt, viderunt nonnulli, earum tamen usum progressionemque non sunt assequuti; Fallopius observauit in caua iecoris parte ductus, qui ad pancreas, & mesenterij glandulas pertingentes flauum quædam subamarumque succum in illas eructunt deponuntque; quos cum nonnulli post Asellium deprehendissent, lacteis venis (quas coniectura potius quam sensu ducti, ad iecur pertinere crediderant) adnumerandos censuerunt. Eisdem postea ductus maiori cura studioque perquisitos descripsit Nathanael Highmorus; ostenditque illos è pancreate prodeuntes iuxta portarum venam, quam hederæ instar quibuidam in locis circumplectuntur, serpere; & plurimis gyris cincinnorum capreolorumue modo intortos in cauam tandem iecoris partem inferi. Sed adhuc Highmorus in præsumpta de lacteis opinione perstitit. Tandem verò Thomas Bartholinus, cum hæc ipsa vasa diligentius contemplaretur, observauit in illis contineri aqueum liquorem, qui per pellucidulas tunicas satis commodè transpicitur: hunc autem principio rebatur esse crudiorum chylum, vel potius chyli penè euanescentis reliquias, multa aqua, seu feri copia dilutas, e pancreate ad iecur permanentes. Sed cum deinde repetita sæpius dissectione animaduerneret nil nisi aqueum humorem per ea vasa perlabi, ac eiusmodi quoque ductus in alias corporis partes pertinere, cœpit maius quiddam de his vasis, quàm quæ alij meditati fuerant suspicari: putauit enim esse in animalium corpore peculiare ductus per quos aqua, e singulis partibus derivata, in cor tamquam in Oceanum confluat.

Nusquam tamen hæc vasa patentiora sunt, quàm circa venam ad iecoris portas pertinentem: hæc enim illa compluries sese dissectoribus sponte obtulerunt. Atque hoc loco illud non est prætereundum, quod cum in viuo animali dicta vena, vnâ cum ductibus aqueis prope iecur vinculo constringitur, incipit statim ipsa vena circa hepar concidere, ac versus intestinum: contra verò aquea vasa ex parte iecoris turgescunt, sed quæ spectant intestina, exhauriuntur. Vnde pater sanguinem.

ex intestinis per mesaræi venas ad iecur tranare: aqueum autem humorem à iecinore, ad mesaræi glandulas deriuari, quod etiam à Bartholino obseruatum video.

At profectò nihil est negotij ex his obseruationibus colligere, quomodo aqueus humor ab alimento secretus ad intestina relabatur. Namque à iecore per vias hætenus descriptas in mesaræi glandulas, & hinc per canalem pancreatis in capacitatem intestinorum deriuatur. Similiter vbi lactææ venæ ad conceptaculum Pecqueti confluant, obseruantur alij ductus aquei, quorum plerique ad renes, nonnulli etiam ad glandulas mesenterij pertinent. Sed & in alijs quoque locis eiusdem generis aqueos ductus vnà cum venis serpere animaduertimus, qui vel ad renes, vel ad pancreas pertingunt; Interdum verò per diuersas vias ad intestina feruntur. Humor autem, qui per hæc vasa perlabitur nonnunquam limpida aquæ similitudinem refert: at circa hepar plerumque flauescit; & gustatu subamarus percipitur.

Porro quisquis nostras hæce disquisitiones perpenderit, cognoscet vias ductusque, per quos illuies humorumque recreamenta ex vniuerso corporis habitu in aluum deducuntur; quemadmodum contingit in expurgatione, quæ fit ex irritamento assumpti pharmaci, alteriusue stimuli; quod hætenus planè fuit incognitum.

Vtili autem succo ex intestinis propemodum exhausto, obseruamus dilutum quemdam humorem, & sero potiùs, quàm lacti similem per venas Asellij ductusque Pecqueti permanentem, qui tandem munere iam perfunctus deriuatur in renes, & inde in vesicam profunditur.

Multa hîc de renum proximarumque glandularum utilitate, necnon de insigni circumstantium valorum copia, & magnitudine dicenda forent; qua occasione febrium, quas vocant putridas, & aliorum etiam morborum causæ possent demonstrari. Verùm hæc, & complura alia huiusmodi in progymnasmatibus Medicis commodius explicabuntur.

His rebus expositis satis docuisse videor quomodo alibilis
succus

succus ad iecur, & conceptacula Pecqueri perlabatur. Quemadmodum autem inde in cor deriuetur, haud sanè difficile dictu est. Sanguis enim ab hepate per venam illam, quæ caua appellatur in dexterum cordis ventriculum influit, & obseruatæ sunt viæ satis manifestæ à dictis conceptaculis ad axillares venas pertinentes, per quas delapsum alimentum cum sanguine ad cor confluente, confunditur.

Sequitur ut sanguinis generationem persequar. Plerique putant alibilem succum ad iecur delatum ingenita illius visceris vi in sanguinem verti: nonnulli hæmatosin omnem cordi tribuunt: quidam etiam lienem huius operis participem, & adiutorem esse volunt. Sed perperam munus hoc conficiendi sanguinis vni alicui certo visceri adscribunt. Obseruatum enim est in conceptibus animalium sanguinem gigni, antequam vel membra conformari, vel viscera corporari cœperint. Quamuis autem vna ferè cum sanguine compareat punctum micans, cordis tamen parenchyma cum ventriculis, necnon iecur, & lien, nisi aliquot post dies non absoluantur. Quamobrem veritatem bene intuentibus videbitur sanguis non horum modò viscerum membrorumque author esse, sed ab illo totius planè corporis fundamenta constitui.

At verò cum sanguis nusquam alibi naturaliter reperiatur, quam in venis arterijsque, & vasculis cordis, frustra queritur alia eiusdem officina præter hæc ipsa conceptacula. Verum de illius opifice maior est difficultas. Equidem censeo vim illam, quæ cibum in sanguinem vertit haudquaquam esse conceptaculis tribuendam: Sed quemadmodum in chymicis sæpissime vsuuenit, ut candidi quidam, & lactescentes succi assulo sulfuris oleo, vel alio simili liquore rubescant, ita pariter consentaneum est chylum certi cuiusdam liquoris calidarumque expirationum interuentu, in purpureum sanguinem mutari. Nec aliter ratiocinari debemus de succo lacteo, qui per venas Acellij perlabitur: is enim tametsi ex virenti ciborum massa persæpe exprimatur, semper tamen lactis instar albescit, non secus ac aqua, vinum, aliufve humor lactescere solet, cum illi super-

fundun-

funduntur stillæ aliquot aceti, in quo lythargyros fuerit maceratus. Vnde patet quàm leui coniectura ducantur, qui sanguinem censent in iecinore confici, Propterea quòd similis vtriusque sit rubor. Quid? quod piscium gallinarumque adipatarum iecinora plerumque albicant, etsi sanguis in eorundem venis purpurascat, atque interdum etiam nigricet.

Videtur autem hæc sanguinis confectio à motu, & agitatione plurimum adiuuari: quippe dum sanguis vniuersus è corde in arterias, & hinc per venas in cor indefinenter recurrit, incallescit, extenuatur, & confunditur; atque adeo pars crudior cum reliqua, quæ iam cocta confecta que est, permiscetur, & eius vi magis atque magis perficitur. Ex quo intelligi potest, quæ sit causa cur ex incisa vena quandoque crudus quidam succus vnà cum sanguine effluat, quod ijs maxime solet contingere, qui paulò ante quàm vena pertundatur, se cibis ingurgitauerit. Nihil igitur est quamobrem miremur, quod aliquando in sanguine per sectionem venæeducto deprehensum fuerit lac ante aliquot horas e potum, & ex vulnere potiones, quas vocant vulnerarias, nonnunquam eruperint.

Persuasum quidem est nobis sanguinem non esse succum simplicem, & vniuersum, sed ex dissimilibus rebus misceri, & temperari. Verumtamen haud scio an in eo insint quatuor illi decantati humores, quibus ceu fundamentis vniuersa Medicorum disciplina nititur. Scilicet mos est hominum, vt res eas, quas nosse magnopere interest; leui ratiocinatione perpendant. Quàm verò aprè Medici ad ostendendam sanguinis, pituitæ, & vtriusque bilis naturam recinant cantilenam illam de principum qualitatum coniugatione, atque analogia quatuor elementorum, ipsi viderint. Profectò vt varia, & multiformis est natura sanguinis, ita multiplex est eiusdem utilitas, atque opportunitas.

Constat ferme inter omnes geminam potissimum vim inesse sanguini, nempe vt animalium partes nutriat, atque has ipsas vitali calore perfundat. Quocirca duas vulgò statuerunt sanguinis species, natura viribusque dissimiles, alteram tenuio-

rem,

rem, spiritusque plenam, quæ per arterias permanens vim caloris in se contineat, alteram crassiolem, quæ per venas lapsa, nutrimentum membris impertiat. Verum hoc sanguinis discrimen in distinctione locorum positum nullum omnino esse demonstrant argumenta à sensu, & ratione deprompta: quippe compertum est sanguinem omnem ex arterijs in venas perlabi. Nec tamen dissimulandum sanguinem in arterijs aliquanto magis feruere, quàm in venis, propter motum agitationemque eidem à corde proximè impertitam.

At verò quisquis sanguinem, seu in arterijs, seu in venis contentum contemplantur, facile sibi persuadebit illum ex duobus præcipuè succis esse permixtum, quorum alter candicat, & in lentorem refrigeratus concrefcit, alter verò magis rubeſcit, nec tamen facile cogitur; hunc vitalem, illum verò nutritium, seu auctificum nuncupare iure poterimus. Sanè autem hos confusos, non cogitatione modò distinguere, sed oculis quoque licet intenoſcere: quotiescumque enim incisa pedis vera ſanguis, vt mos eſt, in calentem aquam confunditur. Quamquam non me later hunc ipſum, de quo ſermo eſt, lentorem Ariſtoteſi, & Medicis innotuiſſe, qui illum fibrarum vocabulo nuncuparunt, ratiſque ſunt ab eo ſanguinem habere vim concreſcendi. Rectè autem à Fernelio ſcriptum eſt corpus omne quaſi atrophia extabefcere, ſanguine fibris deſtituto; & incrementum corpori non ex cuiuslibet ſanguinis copia accedere, ſed illius dumtaxat, qui fibris abundat. Ex quo fit, vt ſanguis fibrarum propemodum expers, qualis animalium ſenio, imacieque confectorum eſſe ſolet, vix concreſcat, & alendo corpori augendique partibus, parum ſit idoneus.

Quemadmodum verò ſanguis in vniuerſum corpus diffundatur (quod quidem in diuturna obſcuritate latuerat) ita aperuit Guiljelmus Harueius, vt nullus præterea dubitationi locus relinquatur. Videlicet ſanguis omnis à corde, ceu fonte quodam in totum corpus diſtribuitur, per arterias in omnes partes corporis pertinentes; inde verò per venas admodum multas relabitur in cor: cuius rei demonſtrationem, cum omnibus fere clara

clara sit, atque testata, & à summis nostræ ætatis Auctoribus iam peruulgata, prætermittendam duxi.

Ergo quoniam ita res est, liquet alimenti distributionem per arterias potius quàm per venas fieri oportere. Sed cum arteria non in omnes corporis particulas vique quaque pertineant (neque enim vllas venas, arteriasue ad ossa, nervos, & cartilagine animalium præsertim adutorum pertingere est obseruatum) fatendum est alias esse vias, per quas influat succus, quo cuiusmodi partes aluntur, auferuntque, & interdum etiam fractæ diruptæque reficiuntur, & coalescunt. Quamquam non est necesse amplos in his patentisque ductus perquirere: vt enim in stirpibus, arboribusque, ad quas alimentum largiter affluit, nusquam fere occurrunt manifesti canales, ita pariter consentaneum est alibilem succum in animalium partes per exiles, cœcosque ductus plurimum illabi; cum præsertim humilissimi humor caloris vi extenuatus, & in vaporem penè conuersus penetrare quacunque facillè queat. Sanguis autem, qui copiose per arterias in membra perenni cursu influit, vitalitatem magis, quam nutrimentum infert.

Iam verò quemadmodum nutritius, & auctificus sanguis à reliquo secernitur, operæ pretium est cognoscere. Extant in animalium corpore quædam glandulæ, quæ in iunioribus, pinguiusque animantibus, maiores, & frequentiores esse solent, quàm in senioribus, & macilentis. Nam illarum maxima, quæ sub iugulo parte summa pectoris collocatur, thymus appellata, prægrandis est in fœtu; decrescit autem in adolescentibus, & progrediente ætate ita exarescit, vt in adultis vix iam appareat. Similiter glandulæ illæ renibus adiacentes, quas renes succenturiatos nuncupauit Casserius, in fœtibus magnæ sunt, & renibus planè exæquantur, sed deinde sensim imminuuntur, & obscurantur. Medici verò cum complures venarum, arteriarumque riuulos per glandulas plerasque perreptare animaduertentes, crediderunt has pro firmamento vasorum, quasi puluinar substratas fuisse. Sed quænam maior necessitas fulciendi vasa in tenellis animantibus, quàm in adultis? Haud igi-

tur, vt opinor, errauero si ex vasis per glandulas implicatis multiplicique diremptu fruticantibus succum aliquem elabi credidero.

Glandularum varia est disparilisque conditio; quidam enim raræ sunt, & molles, nonnullæ verò densiores sunt, & concre-
tiores. At in omnibus tamen similis inest vis, quæ potissimum
consistit in secernendis percolandisque humoribus. Nam quæ
linguæ radicibus, & laryngi adiacent, saliuam madoremque,
quo lingua, & circumiectæ partes perfunduntur, eructant.
Mamillarum glandulæ lac secernunt, & continent. In adeni-
bus mesaræi succi ad cibum diluendum necessarij percolantur.
Demum in conario, & glandula pituitaria cerebri, necnon in
thymo, & alarum inguinumque adenibus alijsque plurimis,
quibus vasorum in brachijs, atque cruribus diductiones susti-
neri firmarique vulgò arbitrantur, secernitur alibilis auctifi-
cusque succus, à reliquo sanguine. Hinc verò per membra-
nas neruolque in plerasque corporis partes diffunditur; non se-
cus ac in arboribus maxima alimenti portio per librum corti-
cemque permanat.

*Tanta, inquit Fernelius, inest in corpore membranarum commoditas, tanta necessitas, vt nullam natura partem prætermiserit, quam membrana non integat, comprehendat, & fulciat. Siue enim os, siue cartilago, & vinculum, siue musculus atque tendo; adde neruos, venas, arterias, inte-
stina, viscera denique omnia proprijs quibusdam membranis conuestita, & ijs
veluti conclusa contineri cernuntur. Quamobrem ossa, vt ab Aristo-
tele notatum est, si membranis, quibus amiciuntur nudata fue-
rint, siderantur protinus, & contabescunt.*

Deprehensum quidem est circumfundi cartilaginibus, vin-
culis, membranis, & neruis lentorem quemdam muco assi-
mitem, qui in animalibus iunioribus copiosus est, & per car-
nium quoque fibras diffunditur: Hoc autem eas partes proxi-
mè ali consentaneum est, & iam vulgò testatum. Nimirum
hic est ille ros, quem Arabes ex extremis exilium venarum fo-
raminulis ad nutritionem partium excidere prodiderunt.

Minimè autem mirum videri debet, quod thymus, & ple-
ræque

ræque aliæ glandulæ, quæ in teneris animantibus magnæ sunt, in adultis tandem minuantur, vel prorsus extabescant: quippe animalia dum pubescunt vberiori egent alimento, atque adeo maiora ijs insunt, & frequentiora vasa, e quibus nutritius ros elabitur. Simili etiam ratione prægnantium vteri crassescunt, & arteriæ in illum pertinentes frequentiores amplioresque sunt; vt inde succus quantum ad alendum fœtum est satis, deriuetur.

Ac mihi videor satis indicasse quemadmodum cibus conficiatur, & ad totius corporis vtilitatem distribuatur. Quibus rebus expositis, docere possem quomodo animalium corpora ad certum vsque tempus augeantur pubescantque: quamobrem membra paralyti affecta tandem contabescant. Cur in puerulorum ossa arteriæ venæque interdum pertingant, quæ in adolescentibus oblitterantur, euanescentque. Quare glandulæ nonnunquam in strumas bubonesque concreuant; & multa eiusmodi. Sed cum ad reliqua festinet animus, nolo esse longus in explicanda eorum ratione, quæ ex dictis facile possunt percipi.





TH. CORNELIVS

Michaeli Angelo Riccio S.



*Q*uandoquidem institui prolusiones meas dicare hominibus tum studiosorum cognatione, tum quoque amicitiae necessitudine mecum coniunctis, iniquus planè possem videri, si te Vir eruditissime præterirem. Tu enim unus omnium, iam inde ab adolescentia mihi amicissimus, studiorum meorum adiutor authorque fuisti. Nam cum ego Romam venissem vulgari quadam imbutus literatura, tu me ad Geometriae, ac Physiologiae studia acrius incitasti, facemque mihi ad optimarum artium notitiam prætulisti. Cum igitur consentaneum esset unum aliquod nostrorum progymnasmatum tibi dicare, postremum hoc, quod est de Vita, non quidem ratione, aut consilio delectum, sed sorte potius destinatum, occurrit. Quare illud amoris in te mei pignus certissimum, nostraeque amicitiae monumentum, ut spero, sempiternum futurum, tibi libens atque ex animo dono. Cane itaque existimes, me quod postremum tibi progymnasma dicauerim, voluisse tuo erga me mutuo amoris, ingenioque primas concedere.

Neapoli. MDCLXI.

DE VITA.

Progymnasma VII.



Ribus rebus animantium vita sustinetur, cibo, potu, & respiratione. Quemadmodum verò ex cibo, atque potione utilis succus ad nutritionem corporis conficiatur, satis ni fallor, superiori progymnasmate est explicatum. Restat igitur ut videamus unde vitalitatem singulæ partes indispicant.

Nulla res est in corpore animalis sanguine vel utilior, vel admirabilior: eius autem reconditam vim subolfecisse videntur prisca illi Philosophi, qui non aliam in animantibus, præter sanguinem, animam constituerunt: sed enim tametsi hominis animus diuiniorem quamdam habeat originem à corporea mole secretam, nihil tamen obstat, quin bestiarum animæ, cum corporeæ sint interitusque participes, in sanguine statuuntur.

Plerique verò sanguinis naturam ex his dumtaxat, quæ sensu percipiuntur æstimantes, eiusdem præstantiam minimè sunt assecuti: nam potior illa pars, in qua vitalitas inest, omnino fugit obtutum, & simul ac è proprijs conceptaculis elabitur, evanescit.

Notum quidem est omnibus sanguinem in arterijs venisque viuarum animantium continenter fluere, & omnino liquidum esse, extra verò profusum plerumque in duriusculos grumos concrelescere. Falsum autem est, quod nonnulli opinantur, sanguinem intra venas vi caloris liquefcere: nam cum semel ille e venis eruperit, spissari statim incipit; etiamsi intra calentia viui animalis viscera excidat, vel in feruentem fideliā effundatur: quin sæpius à calore in durio rem massam cogitur. Minus fortasse peccant illi, qui sanguinem à motu liquefcere putant; & sanè qui sanguiculos conficiunt recens eductum sanguinem.

guinem bacillo agitant, ne concreſcat.

Verumtamen etſi motus, atque agitatio impediatur ne ſanguis facile coeat; ſæpetamen ille diutulè immotus intra venas haudquaquam concreſcit, quod experimur ligata viui animalis vena, ita vt ſanguis fluere, ac refluere nequeat.

Alia igitur inquirenda eſt cauſa, quamobrem ſanguis, donec in arterijs veniſque continetur, fluitet, & planè liquidus ſit. Scilicet ineſt in ſanguine tenuiſſimus quidam halitus omnium planè vitalium operum effector, & auctor, cuius vi ſanguinæ atomi incitatz ſolutè fluunt, ac liberè; atque adeo nequaquam inter ſe cohæreſcunt. At eiufmodi halitu expirante, ſtatim ſanguis concreſcere incipit: illius enim particulæ cum quieſcunt, mutuo nexu perfacile implicantur.

Vitalem hunc halitum non ſolum animo complecti, ſed etiam ſenſu quodammodo percipere licet. Videmus enim ſanguinem adhuc calentem, exhalare vaporem quemdam, qui linguam palatumque acri, ac prope ſalfa mordacitate perſtrinxit. Quin ſaſſilago hæc manifeſtò ſe prodit intra viui, & palpitantis etiam tum cordis conceptacula contento, quæ mox euaneſcens coneretur ſanguinem guſtatui dulciorem reddit.

Solent ij, qui ex ſanguine cibaria parant, recens effuſum cruorem ſale perſpergere, vt nimirum is liquens fluidusque poſſit ſeruari: ſal enim coire ſanguinem, denſareque non paritur. Videtur itaque ſimilis quædam in ſale, atque in vitali ſanguinis halitu vis eſſe. Quamobrem non ineptè quis præſtantiorem hanc ſanguinis partem vitæ baſſamum, ſiue ſalem appellandam cenſuerit: quippe, quæ vim in ſe habet vitalem, in omnes partes corporis pertinentem: qua pereunte non modò euanida ſit ſanguinis natura, frigentque effictæ in corpore vires, ſed iſ ſa etiam caro, omniaque animalis membra computreſcunt.

Nec verò ſum neſcius multa vulgò à Phyſiologis de vitali ſpiritu memorari, quæ in hunc ipſum de quo loquimur ſanguineum halitum quadrare aptè videntur. Quamobrem auguror non deſore, qui mea ſtudia conatuſque auſint improba-

re, quasi ego commentum planè vetustumque immutato nomine pro nouo obtruserim. Verumtamen non despero fore aliquem, cui pleraque ex his, quæ de natura sanguinis protulimus, non modò noua inauditaque, sed & valde similia vero videantur.

Iam verò de sanguinis motu differamus; neque enim ille grauitatis, aut ponderis ratione mouetur: quippe non modo deorsum, sed sursum etiam vltro cirroque in omne corpus diffunditur. Medici, atque Philosophi in peruestigando eius motionis principio parum solliciti fuisse videntur: forte quia quidquid in animali est, id motu interiore cieri crediderunt, vel etiam quia arbitrati sunt partes omnes peculiari quadam vi, quam vulgò attractionem vocant, sanguinem succosque nutritios ad se allicere, & trahere. Profectò difficile fuerat huius motus probabilem aliquam causam reddere, priusquam præclara Harueij reperta innotuissent. Nunc vero eius rei facilis videtur explicatio: Etenim cor iugi palpitatione sanguinem per arterias in vniuersum corpus propellit; hinc autem per anastomoses in venas protrusus continuò ad cordis sinus refluit; urgente nimirum venarum sponte concidentium, membrorumque circumiacentium pressu, vetitoque ob valvularum obstacula ad arterias regressu.

Difficiliorem autem explicatum habet motus cordis: hoc enim haudquaquam externo, & aduentitio impulsu cietur, sed in seipso agitur, & palpitat; neque motionis suæ principium habet à cerebro: quippe in prima animalis conformatione statim cor palpitare incipit, antequam vlla capitis cerebrique rudimenta cernantur. Quin etiam sæpe auulsum à reliquo corpore cor diutulè palpitat.

Cartesius palpitationem cordis excitari censet à seruire sanguinis: inquit enim sanguinem in ventriculos cordis illapsum, insito vel potius innato cordis calore efferuescere, & rarefieri: atque adeo in maiorem molem distendi; donec cordis cauerulae ab intumescente sanguine præter modum distractæ extensæque, dilatari amplius non queant, sed comprimantur

tandem; conclusumque sanguinem actutum propellant: Itaque alterno pulsu fieri systolem, atque diastolem. Hæc autem ad mentem Aristotelis dicta esse nonnulli reclamante Cartesio arbitrantur.

Sed nescio quomodo vir clarissimus contra autopsiam obstinatione quadam sententiæ pugnauerit; Enimvero seu vena caua ligetur vt nullus omnino sanguis permanare possit in cor; siue cor ipsum ita vulneretur, vt influens in eiusdem ventriculos sanguis totus penè effluat, videbimus quidem etiam tum cor, vt ante, mobiliter palpitare, alternèque astringi, atque laxari. Dissecti insuper cordis frustula identidem subsilire cernimus, vt neutiquam credibile sit huiusmodi motum esse à sanguine cordis ventriculos inflante, ac distendente. Adde quod auricula cordis dextra, quæ quidem ante alias partes in animalis conformatione videtur effingi, statim micare incipit iugique pulsu cieri, vix iam alio cordis apparente primordio, nedum eo absoluto, suisque extracto ventriculis. Quinimo pereunte animali, postquam cætera membra, & ipsum quoque cor motus defecit, palpitat adhuc memorata cordis auricula: hæc enim (si oculis habenda sit fides) partium omnium prima moueri incipit, postrema desinit.

Aliunde igitur existit ratio eius motionis, quæ in corde fit: illam verò ex analogia quodammodo perspici, & cognosci posse arbitror; quippe videmus enim fidium nervos, & nigricantes sylvestris auenæ aristas ab humidulis vaporibus halitibusque, huc & illuc distorqueri, ac veluti sponte animatorum more cieri. Quod si animalium figuras subtilemque partium descriptionem, & admirabilem membrorum fabricam nobis animo complecti liceret, profectò intelligeremus quomodo à calidis expirationibus varia in ipsis genera motuum excitentur: sic enim credibile est abscissas lacertarum caudas, & anguium testudinumque frusta, necnon artus recens mactatorum pecorum moueri, ac interdum etiam subsilire. Similis quoque ratio esse videtur de pulsu, ac palpitatione illa, quæ in partibus phlegmone laborantibus solet obseruari. Quapropter consentaneum

taneum est ab eiusmodi expirationibus halitibusque cordis pariter motum pendere. Hinc enim contingit, opinor, ut corda frigidiorum animalium, quæ motus paulo ante defecerit, instillata calidi alicuius humoris guttula, reuiuiscant, & palpitare rursus incipiant.

Verisimile autem est, ut vapores hic halitusue vna cum sanguine per surculos arteriæ coronariæ in cordis fibras influat: namque is arteriæ illius potissimus esse videtur.

Porro peripicuum est, constatque inter omnes, arteriarum pulsus à cordis motu pendere; quoniam æqualis quidem vis, atque rhythmus in vtrisque obseruatur: & palpitatione cordis cessante, omnino conquiescunt arteriæ. Verumtamen de ratione, qua pulsifica vis à corde in arterias permanat, magna est inter Authores dissensio.

Galenus censuit vim pulsificam à corde in membranulas arteriarum influere, idque experimento probare conatus est. Quoniam, inquit, si viuæ animantis arteria in longitudinem diffindatur, ut calamus excipere possit, qui & vulnus obstruat, & sanguinem exilire non sinat, tunc quidem donec sic se habuerit arteria tota micabit; sed cum primum illius tunica obducto filo constricta fuerit, iam non amplius ultra vinculum arteria ipsa micare videbitur.

Harueius autem cum multis, & grauibz argumentis docuisset arterias ab impulsu sanguinis distendi, ausus est Galeni experimentum in dubium vocare: Scripsit enim nec à se eius rei periculum factum esse, nec rectè in viuīs animantibus fieri posse ob vim sanguinis ex maioribus arterijs magno impetu erumpentis; nec sibi verisimile videri, ut vulnus calamo obduci sine ligamine possit. Atqui ego non omnem Galeno fidem in hac re derogandam velim; quippe mihi hæc aliquando licuit experiri: ligatà vtrinque hinc, & illinc arterià, spatioque inter vincula diffisso, fistulam per vulnus in arteriam inserui, ac discissam arteriæ partem prætenui, filo fistulæ alligauī; tum disruptis confestim prioribus vinculis, sanguis per fistulam permanabat in vltiorem arteriæ partem. At interea videre erat arteriam

arteriam ultra vinculum, sed paulo obscurius pulsantem. Quod autem eiusmodi motum Galenus non animaduernerit causam fuisse suspicor calami crassitudinem, qui quoniam exiguo pertusus erat foramine, traiectioni sanguinis officere potuit. Ad hæc accedit quod sanguis intra fistulam facile, coit, atque densatur: qua propter tale experimentum nauum industriumque postulat obseruatorem.

Arterias igitur ab impulsu sanguinis moueri, atque micare, palam fit ab ipso Galeni experimento. Sed quæret fortasse aliquis, quò fieri possit, ut à tantula sanguinis gutta, quanta vno quouis pulsu à corde in aortam propellitur, tantus in omnibus vniuersi corporis arterijs motus concitetur: quæue item ratione vno eodemque puncto temporis subsiliant arteriæ omnes, tum quæ cordi proximè adhærent, tum etiam quæ in extremis partibus longissimè à corde positiæ sunt; si non aliunde motionis suæ principium habeant, quàm à sanguine per ipsas discurrente. Verumtamen in hac quæstione minimè hærebit ille, qui animaduernerit viuarum animantium arterias ita sanguinis esse refertas, ut quotiescunque nouus sanguis à corde in aortam protruditur, necesse sit omnem in arterijs conclusum humorem momento eodem vrgeri, atque propelli.

Age nunc de vitali animalium calore differamus. Multi medici de calore innato disputant; sed quæ nec rationi, naturæque consentanea videntur, nec intelligentia comprehendi facile possunt. Plerique recitant illam Aristotelis cantilenam, qua vitalis calor cœlestis longeque præstantioris conditionis esse prædicatur, quàm quæ tribuitur rebus nostratibus ex mortali elementorum genere concretis. Fernelius vnus maximè omnium in exaggeranda huius caloris præstantia multus videtur: sed cum in eius argumentis eloquentia satis eluceat, rationum certè momenta desiderantur. Nos alibi caloris naturam altius repetentes, huius opinionis leuitatem confutauimus.

Minimè autem recipienda videtur distinctio illa innati, & influentis caloris, in cuius figmento præcipua vulgaris Medicinæ fundamenta sunt iacta. Quippe nullum alium in viuis ani-

mantibus calorem percipimus, præter eum qui pendet à sanguine per arterias influentæ. Enimuero quotiescunque ita motus cordis intercipitur, ut sanguis per arterias fluere nequeat (quemadmodum videre interdum est in syncope, Apoplexia, & similibus morbis) statim incipiunt membra frigescere, neque vlla apparent insiti caloris vestigia. Num igitur putabimus innatum calorem non posse sine influente consistere, an potius commentitiam censebimus insiti caloris fabulam?

Vnde autem sanguis calorem habeat, deinceps est videndum: nam profecto, qui censent sanguinem suapte vi calidum esse, vel potius incalescere à spiritu, cuius naturam igneam esse volunt, & plane feruidam, valde mihi videntur errare, omninoque in hoc omnis est error, quod arbitrantur calorem in rebus fixum, ac permanentem inesse; cum tamen ea sit caloris natura, ut à motu continenter, & iugi successione pendeat. Neque verò videtur aliunde contingere, ut cordis actione cessante statim animal inalgescat; nisi quia sanguis quotiescunque à perenni cordis impulsu non agitur, calore prorsus deficitur.

Cartesius Aristotelis placita sequutus, cor esse putat principium fontemque vitalis caloris: scribit enim in prima animalis conformatione excitari in corde calorem quemdam, seu potius ignem non lucidum, cuius vim ardoremque contrectantis manus ægre lustineat; sanguinem autem in cordis ventriculos influentem, eiusdem calore, quasi igne subdito efferuescere. Sed miror ingeniosissimum virum hoc sibi commento placuisse, quando eam professus est philosophandi rationem, quæ à rebus incertis assensionem cohibendo, ea tantum admittat, quæ cognita planè fuerint penitusque, perspecta: sed enim si tactus iudicium sequamur, vix maiorem in corde, quam in cæteris visceribus calorem esse testabimur; ut sæpe in viuarum, animantium dissectione notauimus. Nec verò intelligi facile potest quomodo calor in corculo pusilli embryonis semel excitatus incrementum capeffat, ac diutissimè per omnem vitæ cursum perduret, cum nonnunquam ex morbis ita deficiat, ut penè videatur extinctus.

Ego verò, vt videor ante dixisse, sic sentio, vitalem animalium calorem non aliunde, quàm à sanguine proficisci: at sanguinem tamen non suapte natura calidum esse, sed motu dumtaxat, atque agitatione incallescere. Hinc enim fieri videtur, vt tum maxime sanguis ferueat, cum à crebra celerique cordis palpitatione compulsi per arterias venasque incitatio fertur; quemadmodum in febribus, iracundia, ac vehementiore totius corporis agitatione solet contingere, contra verò frigeat in metu, lipothymia, & omnino in omni affectione, in qua cordis motus aut intercipitur, aut certè remittitur, atque languescit.

Nunc operæ pretium erit explicare quomodo ex motu, & agitatione calor excitetur in sanguine: quãdoquidem videmus dura corpora mutuo conflictu atque tritu incallescere, & ignem sæpe concipere: liquida verò, quoniam collidi atterique inuicem nequeunt nullum ex agitatione motuque calorem acquirere. Sed multos tamen habemus liquores, cum natura, tum arte prolatos, qui tenuissimi cum sint, & facillè mobiles, vim in se caloris habere putantur: hi verò tametsi manibus applicati nullum caloris sensum cieant, linguæ tamen, & palato admodum agitati que protinus incallescunt, & feruent. Si quis autem similem quamdam vim ponat in sanguine, non valde quidem coniectura aberrare videbitur: inest enim in sanguine halitus ille vitalis subtilissimus, ac nobilissimus, quem ex perenni motu agitationeque incallescere par est. Quid si calorem in sanguine excitari dixerim ab admistione vitalis halitus, seu spiritus acrioris in cordis ventriculos iugiter influentis, qui dum sanguini permiscetur eius particulas agitet, & in feruorem adigat: quemadmodum in compluribus chymicis liquoribus contingere videmus: sic aqua superfluo vini spiritu confestim incallescit, & feruet.

Ex his quæ de natura motuque sanguinis memorauimus, facillè intellectu est vitam in continuata, & perenni sanguinis motione consistere. Quippe tam diu viuimus, quam diu sanguis in corde calefcens vitalique halitu animatus per arterias in membra diffunditur: hinc autem partium omnium vis, & ta-

lutaris calor existit. Quapropter si membrum aliquod, vel corpus vniuersum huiusmodi influxu deficitur, protinus inalgescit, emoritur, ac demum putrescit.

Cæterum quoniam ad vitam conseruandam nihil est æquè necessarium atque respiratio (nam sine cibo, & potione diutulè possumus viuere; at sine aere illo, quem spiritu ducimus, vix ad pauca momenta vitam propagamus) in rem erit perquirere, quis aeris in respiratione sit vtilis. Est autem hæc questio perdifficilis, & nequaquam satis adhuc explicata. Medici cum pleraque temere credant, naturamque hominis leui coniectura perpendant, dicunt aerem ab animantibus spiritu hauriri, vt eius frigore æstus feruorque cordis temperetur. Sed opinionis huius falsitatem res ipsa conuincit. Nam in laconico, vel hypocaufto maximè feruido aliquandiu viuimus, licet multo calidior sit aer, quem inibi ducimus, atque concipimus, quàm ille halitus, quem interea à pulmonibus respiramus, ac reddimus: at vero in dolio conclusi celeriter suffocamur, antequam contentus in eo aer planè incalescat.

Causa verò quamobrem animalia pulmonibus instructa, nisi respirauerint, citissimè emoriuntur, manifesta illis erit, qui motum sanguinis minimè ignorauerint. Quippe sanguis ille, qui e dextero cordis ventriculo in pulmones per venam, vt vocant, arteriosam propellitur, nequit in sinistrum ventriculum permanare, nisi aer spiritu ductus arteriæ asperæ surculos inflet, atque distendat: Hinc enim fit, vt venæ arteriosæ ramuli comprimantur, atque adeo conclusus in his sanguis protrudatur in surculos arteriæ venosæ.

Ex quo existit & illud quod in animantibus, quæ intercluso spiritu moriuntur, dexter cordis ventriculos pulmonesque plurimo sanguine infarciuntur, sinister autem ventriculus exinanitur. Sanguis enim, donec cor palpirat, continenter e venæ caua in dexterum cordis sinum influit; hinc autem per venam arteriosam protrusus in pulmonibus subsidens restagnat: inest enim in ipsis pulmonibus raritas quædam, & mollitudo, quæ confluenti in ipsos sanguini locum dat, & facile cedit. Quapropter

pter solet interdum contingere vt in animalibus strangulatis, caua vena qua cordi alligatur, disrumpatur à copia sanguinis, quæ cum præterfluere non possit, ibidem affluentius restagnat.

Hic obiter notandum similem esse eorum, qui ex apoplexia pereunt, atque strangulatorum exitum: siquidem apoplexia correpti non ante moriuntur, quàm eos respiratio defecerit. Cor autem etiam intercepto spiritu aliquandiu palpitât, & proinde pulmones interea, ac dexter cordis ventriculus multo sanguine implentur.

Porro animantibus donec in vtero hærent peculiâres insunt ductus, per quos sanguis e vena caua in sinistrum cordis ventriculum, & ex dextero ventriculo in aortam, non trajecto pulmone perlabitur. Is igitur non secus ac animalibus pulmone carentibus datum est posse sine spiritu viuere: pulmones enim in non natis ab omni prorsus munere vacare videntur.

Eiusmodi ductus postquàm ex vtero prodierint animalia, incipiunt plerumque exarescere; at integri tamen seruantur, durâtque toto vitæ curriculo in Lutris, Castoribus, Phocis, Anatibus alijsque amphibijs animalibus, quæ proinde sub aquis diutulè sine spiritu viuunt, & collotenus prehensa difficile suffocantur.

Nonnunquam tamen etiam in quadrimulis, & quinquenni- bus, imò grandioribus natu pueris tales ductus integros incolu- melque obseruauerunt viri in dissectionibus exercitati. Quid quod aliquando fieri potest, vt adulti iam, atque ætati proue- cti homines istos ductus integros incorruptosque retineant, vt credere par est de Cola illo celeberrimo vrinatore, qui ob in- credibile natandi studium cognomento piscis nuncupabatur: is enim ab ineunte pueritia, cum pelagum innare, seque aquis immergere assuesceret, necesse habuit interdum, vel potius ni- mium sæpe spiritum continere: Quapropter sanguis, cum non posset pulmones trajcere, per memoratos ductus, qui in te- nello puero patentes etiam tum erant, permeabat; atque has interea vias creber earumdem vsus abolescere non patiebatur. Sic igitur factum est, vt Cola piscis casu magis, quàm consi- lio amphibius euaserit.

Ego verò non dubito quin studio, dataque opera effici possit, ut tales ductus in puerulis infantibus minimè aboleantur, sed vnà cum cæteris partibus progressu ætatis adolescant, & perficiantur; vnde adulti iam queant vitam amphibiorum instar perducere. Neque id difficile factu esse arbitror; videmus enim recens natos pueros posse aliquandiu sine vitæ valetudinisque incommodo respiratione priuari, quia scilicet in eisdem patent viæ ductusque, per quos præcluso pulmonum transitu, sanguis perlabitur. Quamobrem, si illorum ora nareque sæpius in die obturentur, & spiritus intercipiatur tamdiu, dum sanguinis aliqua portio per eos ductus in sinistrum cordis ventriculum, magnamque arteriam influat, nunquam sane eiusmodi ductus exarescent.

Tametsi verò perspicuum sit hæc ita se habere, adhuc tamen aeris illius, qui spiritu ducitur, vsus planè ignorari videtur. Nam si respiratio ad id solum comparata esset, ut eius vi sanguis e pulmonibus in sinistrum ventriculum impellatur, posset utique homo in dolio conclusus diutius vivere: atqui necesse est aerem ob respirationis vsum iugiter recentari. Neque verò quivis aer ad respirationem utilis salutarisque esse videtur: siquidem in quibusdam terræ cauernis puteisque homines statim spirandi difficultatem sentiunt, mox etiam animi defectionem patiuntur; ac demum nisi opportunè fuerint extracti, emoriuntur. Cuius rei frequens est observatio apud Britannos, dum carbones fossiles, quorum ingens est reditus, ex imis terræ visceribus eruunt. Quippe talis aer nonnunquam cauernas illas occupat, qui non modo homines suffocat, sed flammam quoque, candentesque carbones extinguit. Falsò autem à nonnullis proditum est hæc idcirco contingere, quod in ijs locis tetri pestiferique halitus subsistant. Fac enim eiusmodi halitus vitæ hominum infensos esse, sed vnde tamen illi habent, ut ignem etiam restinguant?

Hobbes ut horum effectuum causam redderet, statuit in cauernis illis contineri nouum quoddam corporis genus, quod neque aer sit, neque humor, sed media quædam inter vtrumque

que natura, quæ cum aeris pelluciditatem referat, animalia tamen, atque ignem aquæ instar extinguat. Sed quid opus est res nouas comminisci, quotiescunque ad ea possumus confugere, quæ nobis ubique sunt obuia. Scilicet omnia quæcumque in eiusmodi cauernis obseruantur, solent etiã in ijs locis contingere, quæ ab aere præter modum compressio distractioe obsidentur.

Multa olim de natura, & qualitatibus aeris commentatus sum, vt quæ illius in animalium respiratione sit utilitas, assequeretur: sed cum ea peculiari volumine explicare decreuerim, libet hoc loco pauca summam attingere. Mihi itaque persuasum in primis parem esse aeris necessitatem cum ad animalium vitam, tum ad ignem conseruandum: ad vtrumque verò utilis esse videtur aer ille, qui nec valde rarus sit, nec valde densus; item neque præter modum compressus, neque distractus. Quare si ignis in laterna conclusus ardeat, at e foramine quod in ipsius laternæ fundo est spiritus exugatur, statim flamma contrahi, ac languescere incipiet, & breui tandem extinguetur: idem prorsus continget, si per illud ipsum foramen in laternam aer copiosius inspiretur. Sed dispar tamen esse videtur natura illius flammæ, quæ fit ex puluere, quem pyrium vocant, accenso; tanta enim eius vis est, vt spiritum vehementer cieat, & circumiectum aerem magno conatu disijciat, ideoque non facile ob raritatem, vel densitatem ambeuntis aeris extinguatur. Ex quo fit vt in ijs cauernis, in quibus flamma carbonis, & extinguntur, pyrius puluis semel accensus, continenter donec totus conflagrauerit, ardeat. Cæteræ autem flammæ, quibus impar est vis, facile in aere nimis tenui, vel crasso dissipantur, aut obruuntur. Nec verò dissimilis in animalibus ratio esse videbitur, si pulmonis, & pedissequarum respirationis partium vis conatusque perpendatur.

Quemadmodum autem ad conseruationem flammæ, præter habitus illos, qui incenduntur, necessarius est continuatus aeris, qui in flammâ iugiter abit, prouetus; ita pariter hæc ipsa animabilis spirabilisq; natura ad conseruationem vite necessaria est: hinc enim vitalis, & salutaris animalium spiritus perenni successione viuiscit.



TH. CORNELIVS

Francisco, & Ianuario ab
Andrea S.



Anni sunt tredecim, amici suauissimi, cum dissertationem de Platonica ~~aperta~~ iuuenili quodam impetu studioque conscriptam, subdititio Timæi Locrensis nomine, diuulgani; vt quasi Apelles latens sub tabula, literatorum hominum de meis cogitatis iudicia liberius prolata attenderem. Tum verò multi sunt inuenti viri planè eruditi, qui nostrum libellum laudibus extulerunt. Non defuere tamen qui nouas commentationes ignoto auctore editas, & quasi tutore orbatas exciperent, sibi que fidentius adoptarent. Quod sanè grauiter molesteque tulissem, nisi in mentem mihi venisset, nunquam non extitisse plagarios, qui ex alieno labore sibi laudem quærerent. Varia semper fuisse hominum ingenia, ac nostros Italos plerumque in excogitandis rebus excelluisse; nonnullas autem nationes in illustrandis diuulgandisque aliorum inuentis diligentiores ac paratiores sese præstare felitas esse. Motum sanguinis ab Harueio descriptum iam pridem agnouerat, & amicis indicauerat Paulus Sarpa Venetus; quin etiam illum multò ante designauerat Andreas Cæsalpinus, qui cum pluribus locis, tum præcipuè libro V. questionum peripateticarum quæstione IV. scripsit Sanguinem ex dextero cordis ventriculo in sinistrum per pulmones trajci; atque huic sanguinis circulationi optime respondere ea, quæ in dissectione notantur. Opticus item tubus, quem primus omnium protulisse perhibetur Iacobus Metius batauus, multo ante fuerat indicatus à Ioanne Baptista Porta Neapolitano; neque verò ad eiusmodi artificium amplificandum profuisse parum videtur industria Galilæi, Fontanæ, Torricelli, aliorumque Italarum. Mitto sapientiam aristoteleo nomini, re autem vera sophistici tricis iamdiu mancipatam, Italiæ primum assertam fuisse ab illustribus illis philosophicæ libertatis vindicibus Telesio, Patritio, & Galilæo. Venio iam ad decantatum illud argenti cui experimentum, de quo tot
tanta-

santaque breui temporis spatio scripta sunt volumina , qua integram bibliothecam possint explere . Prælusisse olim videtur huic experimento Galilaus , qui aquam succu vel eiusmodi alia vi , quæ ob vacui fugam trahere vulgò cènsetur , non vltra decem , & octo vlnas attolli posse notauit . Qua obseruatione incitatus Gaspar Bertius mathematicarum artium in Academia Romana professor plumbeum tubum longitudine viginti vlnarum erexit , apicique inseruit vitream sphæram , vt animaduertèret aquam supra vlnas decem , & octo assurgentem , in subiectum vas continenter defluere . Tandem verò Euangelista Torricellius , vt prægrandis machine laboriosam structuram vitaret caput periculum in argento viuo facere , nec coniectura eum fefellit , qui rei causas rationesque ex ipsis fundamentis ante deduxerat . Sed ecce interea perferuntur vndique scripta de nouo inauditoque experimento , quod multos induxit , vt à vulgari tritaque philosophandi ratione desciscerent , noua dogmata meditarentur . Quid autem ego de causa , quamobrem hæc ita eueniant , sentiam , partim hac dissertatione explicui , partim etiam cum amicis , & vobiscum præsertim , quorum ingenij primas iure defero , communicavi ; neque enim libuit omnia , quæ meditatus fueram , scriptis mandare . Cæterum vestro fretus iudicio commentariolum hoc , non ita prorsus vt olim Romæ editum fuerat , sed dictione alicubi mutata , progymnasmatibus nostris adnexi , vobisque dicavi , vt volumen hoc vestri nominis claritate illustratum prodiret .

Nepoli MDCLXI.





THOMÆ CORNELII CONSENTINI

A D

MARCELLVM CRESCENTIVM EPISTOLA.

Qua motuum illorum qui vulgo ob fugam vacui fieri
dicuntur, causa vera per circumpulsionem ad
mentem Platonis explicatur.

Et noua quadam experimenta proferuntur in lucem.



I Rasceris Vir Illustrissime obsecratoribus nostris,
quòd dicant me de naturæ ratione differentem
inaudita interdum opinionum commenta iacta-
re; vitioque item mihi verent, quod in Physicis
rebus explicandis, vtar nonnunquam Mathema-
ticarum artium adminiculo. Me verò nihil ista mouent; ne-
que enim hic mea tantum res agitur, sed communis omnium
quot sunt, quotque vniquam fuere præclarissimorum Philoso-
phorum. Nam profectò quis Philosophi nomen iure merea-
tur,

tur, qui vel nihil nouum suo moliatur ingenio, vel Philosophiæ ansis (vt est Xenocratis dictum) hoc est Mathematicis disciplinis deficiatur? Commenta opinionum qui oderit, naturam accuset, quæ veritatem in profundo (vt ait Democritus) penitus abstrusit. Præstat tamen nouas, atque inauditas opiniones comminisci, quam inuentas, vbi de illarum vanitate constitit, obstinatè defendere. Quamquam hodie plerique cum praua quadam consuetudine de via deflexerint, eo sensim deducti sunt, vt quancumque semel à Præceptoribus hauerunt disciplinam, eandem pugnacissime tueantur; nec ab illa seu rationum momentis, seu experiētijs possint abduci; imò verò ætate prouecti obstinatius obdurant: quippe, vt inquit Horatius,

..... Turpe putant parere minoribus; & quæ

Imberbes didicere, senes perdenda fateri.

Quid verò Geometriæ peritiam, vt vitium mihi audent obijcere? Fugit sanè detractores nostros illud vestibulo Academię inscriptum *εὐδαιμονία ἀγαθὴ μαθημάτων ἐστίν*. Quid utilitatem, ne dicam necessitatem artium Mathematicarum in Physicis cōtemplationibus exaggerare opus est? Nonne & ipse Aristoteles, cuius in verba obrectatores isti iurare solent, non modò exemplis, verum etiam fundamentis Mathematicis vtitur in libris de Physico auditu, & alijs ad naturalem scientiam pertinentibus? At non me latet vnde hic Matheseos contemptus. Scilicet ille mos est hominum, vt ea damnent, & pro nihilo ducant, quæ ipsi solent ignorare; nam hac arte propriam inscitiam tegere, atque excusare se posse arbitrantur. Sed valeant tandem isti Mathematicarum artium osiores Aristippi, siue Epicuri: Nunc ad te redeo doctissime Marcelle, qui dum peris, vt tecum communicem argumenta, quibus ego inductas opinor nullum esse in rerum natura conatum aduersus inane; motuumque illorum, qui ob fugam, seu metum, vt aiunt, vacui fieri putantur, causas esse aliunde exquirendas; rem quidem poscis, quam amicitia iura moribus negare non patiuntur: at dum mox subiungis proferenda esse in lucem ea, quæ hactenus in Physicis contra aliorum opiniones sum meditatus, vt tandem (quod ais)

S. 2. propul-

propulsa errorum caligine, veritas elucescat; opus (vt ingenue fatear) præcipis, non solum laboriosum, sed etiam ἀόουτον. Neque ego de me ipso tam magnificè sentio, vt hoc ausim polliceri; noui enim quàm sæpe in hoc doctrinarum genere labamur. Adde quod non sufficit falsitatem conuicisse, nisi & veritas quoque detegatur; *mihi autem* (vt inquit Orator) *non tam facile in mentem venire solet, quare verum sit aliquid, quàm quare falsum.* Sed fac veritatem iam esse repertam, putasne illam locum facile inuenturam in hominum mentibus, quæ aduersæ opinionis præiudicio tenentur? Profectò nequaquam: nam in physicis coniecturis desideratur illa demonstrationum euidentia, quæ necessarium assensum ab intellectu valeat impetrare. Huc accedit, quod vix vnquam controuersia soleat terminari, cum disceptantes in ipsis principijs non consentiunt. Ego autem, vt nosti, in plerisque soleo ab vsitata ratione philosophandi recedere: neque enim ita semper Aristoteli addictus sum, vt quandoque non probem etiam placita Democriti, aut Platonis; nec item solam veterum Philosophiam ita veneror, vt aliquando non secter Neotericorum dogmata; quippe placent mihi nonnulla ex Telesio, complura ex Galilæo arrident, plurima tandem mihi suppeditat Renatus des Cartes ad eam Philosophandi methodum, qua ego vtor: interdum etiam occurrunt disquisitiones, in quibus nec dicti Auctores, nec quisquam alius mihi planè satisfacit, quapropter proprias positiones sequutus, ea soleo decernere, quæ mihi rationum momenta suadere videntur. Cæterum quia morem tibi gerere cupio, libenter suscipiam onus abs te mihi demandatum enuntiandi rationes, quæ sententiam meam de motibus ad vacui fugam vulgò relatis, comprobare valeant. Tum adijciam nonnulla, quæ neque ab hoc argumento nimis abhorrent, neque etiam omnino iniucunda videntur. Ad rem igitur deniciens, totius disputationis meæ methodum ab ipso penè ortu incipiens, explicabo.

Superioribus igitur annis cum ad naturales viuentium functiones contemplandas aggredider, hæcere cœpi in disquisitione illius virtutis, qua viuentia succos, quibus aluntur augescunt que,

scuntque, trahere putantur, vulgò facultatem attractricem nuncupant. Arbitrabar enim nulla ratione fieri posse, vt trahens motum vllum rei attrahendæ imprimeret, nisi eidem foret alligatum, exemplo manus, vnci, aut alterius cuiusvis tractorij organi, quod quidem non trahit, nisi corpori trahendo fuerit affixum. Sed contrarium tamen mihi suadere videbantur vires magneticæ, electricæ, atque etiam motus illi, qui ob fugam vacui fieri dicuntur; in his enim, quæ trahuntur, nullo vinculo videntur alligata trahenti.

Tandem rem meliùs pensitata animaduerti nullam in memoratis motibus contingere attractionem: verum ea, quæ mouentur corpora à circumiectis propelli. Nec deerant rationes, atque experimenta ad hanc thesim confirmandam; sed illam interea nemini expromere audebam, verebar enim ne tamquam commentum *ὑποπόριον* ab Auditoribus exhibilaretur.

Verum cum deinde Platonis Timæum euoluerem, deprehendi in hac eadem illum fuisse sententia: nam dum animalium respirationem explicaret, suum dogma per circumpulsione in græcè *περίστροφην* appellatam expressit. *Omnibus iam*, inquit ille, *perspicuum est, quod spiritus, qui è nobis extra fertur, non in vacuum fertur; sed proximum sibi è sua sede pellit: idque quod pellitur, proximum etiam sibi extrudit; Atque secundum hanc necessitatem quicquid in sedem eam, vnde spiritus exiit circumtruditur, illuc ingrediens, ipsamque replens, spiritum comitatur. Totumque hoc instar rotæ, quæ circumagitur, sit; propterea quod vacuum nullum est. Et paucis quibusdam interpositis. Eadem inquit, est ratio de admirabili illo electri attractu, herculeorumque lapidum; horum enim omnium nulli sanè attractio vnquam est: sed cum vacuum nullum sit, & hæc sese mutuo circumpellant, concretaque, & discreta in suam sedem singula transiuntia migrant; diligenti harum rerum inuestigatori, ex mutuis adfectionibus complicatis omnia mirabiliter fabricata esse videbuntur.*

Hac Platonis autoritate, ceu Teucer Aiacis clypeo tectus, videbar aduersariorum tela, obrectationesque faciliùs vitare posse. Quamobrem non sum veritus deinde hanc sententiam inter colloquendum sæpius commemorare, & in libris de natura hominis, quos iamdudum meditor, vberius exponere, argumentisque à ratione, & experientia petitis, communicare.

Nec

Nec verò ab instituto me abduxit Galenus, qui in commentarijs, quos in Timæum composuit, *Haud scio*, inquit, *quid Platoni in mentem venerit, ut circumpulsionis opinionem potius, quam attractionem eligeret. Nam si quis fistulam, siue arundinem utrinque perforatam in aquam demittens, ore aerem attraxerit, aqua succedet, nulla alia causa actionem, quæ per attractionem fit, præcedente.*

Sanè vir egregius Medicorum antesignanus putauit Platonis doctrinam, leui concussam arundine pessundatum iri; sed omnino lapsus est, & à mente authoris, quem interpretandum suscepserat, longè deflexit; præsertim cum ad hunc modum scripsit: *Circumpulsionem fieri, ait Plato, ob plenam necessitatem, id est, ut nullus locus vacuus euadat; atque ob id, cum quidpiam vacuatur, sequitur quod continuum est, ipsius locum replens.* At verò hæc penitus aduersantur sententiæ Platonis, qui circumpulsionem ob pleni potius, quàm ob vacui necessitatem fieri dixit. Quia cum omnia spatia sint corporum plena, quidquid mouetur, continuum expellit, & hoc rursus proximum extrudit; donec id quod ultimò pellitur, subsequatur in locum illius, quod principio mouebatur. In suctu autem qui per arundinem fit, hæc ipsa circumpulsio videtur manifesta. Quippe in ipso haustu spiritus e faucibus in pulmones adigitur, unde fit, ut pectus dilatetur, circumiectumque aerem propellat, qui nullamquam locum inueniret, nisi aliud aliquod corpus intrausti spiritus locum succederet; ut ex dicendis liquebit.

Equidem Galeno arbitror inuidisse fata, dum veritatem, quam ipsis penè manibus, ut ita dicam, contrectabat, oscitanter abiecit, ut bonas horas in otio collocaret in propugnando tractricis facultatis commentis, quod nos melioribus ducti auspicijs, ex finibus Philosophiæ exterminandum putamus. Adiungit autem sententiæ nostræ fidem, atque firmamentum motus sanguinis ab ingeniosissimo Harueio nuper detectus, pro cuius explicatione nulla attractio videtur confingenda: siquidem sanguis à sinistro cordis ventriculo, iteratis eiusdem palpirationibus, propellitur in vniuersum corpus per arterias, & hinc migrat in venas per anastomoses, cæcosque ductus: quamobrem.

*Ut vnda impellitur vnda,
Vrgeturque eadem veniens, vrgetque priorem.*

Ita porro sanguis nuper à corde per aortam expulsus, antecedentem vrget, vt demum quodam circuitu facto dexterum cordis ventriculum ingrediatur; vnde mox per pulmones delatus, iterum in sinistrum suum redeat. Nullam verò hic actionem comminisci oportet; sufficit enim huic motui efficiendo valida illa cordis propulsio, quam quidem iuvat venarum sponte sua concidentium contractio, & valuularum frequentia. Neque verò mihi obijcias sanguinis humorumque affluxum, qui ex percussione, aut phlegmone in membris solet contingere: nam is non ideo fit, quia dolor trahit, vt vulgò dicitur, sed potius quia humores illuc delati, dum obstructa, confusaue oscula vasorum subire nequeunt, coguntur ibi affluencia restagnare.

Atque hæc quidem dictum sanguinis motum non ignorantibus manifesta esse reor. Videtur tamen aliqua subesse difficultas in motu, quo chylus per mesaræi venas defertur ad iecur lienemque, seu alia conceptacula: cum nulla in eiusmodi motu vis propellens appareat.

At verò si animus attendamus ad motum pressumque diaphragmatis; multatque cum abdominis, aliarumque partium, circumiacentium, quasi respiratio perenni motu premit vrgetque, facile intelligemus quomodo chylus ex aluo, & intestinis ad propria loca protrudatur, seu per lacteas, seu per vulgares mesenterici venas.

Quibus cognitis peripicuum esse potest cur ad aperto viarum animantis abdomine, lacteæ enæ repente obliterentur, atque dispereant: quippe aperto laxatoque abdomine, celsar plerumque vis illa, quæ nondum candicantem succum in lactes impellit. Porro liquor is, qui iam per illas permanat, statim à spontanea vasorum contractione propulsus aliò defertur: quod cum non animaduertisset Afellius, in perquirenda causa occultationis lacteatum, frustra laborauit.

Quemadmodum autem sine vlla vi attrahente animantes
ali,

ali, & augeſcere poſſunt, ita pariter & ſtirpes. Quippe ſuccus is, quo plantæ aluntur, à ſpiritu vrgetur: quandoquidem ſpiritus à diurno calore agitur, & rarefactus in radices erumpit, & circumfuſam materiam ſubigit, extenuatque, donec frigoris nocturni ſuperuentu coactus, luſum vna cum arrepto alibili ſucco propellatur.

Verùm inſtituti noſtri ratio non patitur, vt de huiusmodi alimentaria attractione plura diſſeramus. Explicandum eſt deinceps qua ratione motus ij, qui ad fugam vacui vulgò referuntur, à circumpulſione reuera pendeant, quod eſt præcipuum diſputationis noſtræ argumentum; cuius demonſtrationem aliquanto alciùs exordiemur.

Bernardinus Teleſius ſingulari vir ingenio, ratus eſt poſſe in rerum natura exiſtere ſpatium omnis corporeæ ſubſtantię expers, atque adeo proſus inane: quamquam id non ſine vi, conatuque aliquo fieri poſſe contendit; ait enim mundi corpora mutuo contactu gaudere, atque conſiti ne inuicem ſeparentur, ſeiunganturque, ac proinde quocunque corpus ceſſerit, aliud illico ſubſequi, ne ſcilicet contactu priuetur. Verum vbi vis, niſuſque validus contigua corpora ſeparat, nec interea aliud corpus ſuccedere datur, cedere quidem quamuis inuita, ſpatiumque interiectum inane relinquere. Adducit autem aſſer-tionis ſuæ teſtem experientiam; ſi quidem, e clepſydrarum foraminibus, e quibus aqua non deſluit, mel liquoresque alij grauiores decidunt, pondere videlicet deorſum magno niſu premente.

Eiuſmodi experimentum argento viuo vtpote inter corpora omnia fluida longè grauiſſimo, Florentiæ primum, quod ſciam, ante quatuor annos tentauit Euangelista Torricellius, remque per literas ſignificauit amicis, præſertim verò Michaeli Angelo Riccio viro in primis ſtudioſo, atque erudito, cuius humanitate mihi hæc primum noſſe licuit. Quoniam autem ſubinde obſeruata quædam ſunt, quæ fidem, atque intellectum vulgarium Philoſophorum merito debeant fatigare, idcirco expedit hic experimentum proponere, quæque in co
conſide

consideratione digna videntur breuiter indicare.

Sumatur itaque clepsydra, seu fistula vitrea duas circiter vlnas longa, hydrargyri plena, cuius orificium digito obturatum, subeat catillum, in quo sit tantum argenti viui, in eo clepsydræ ostium omnino mergatur. Tum clepsydra iuxta horizontis planitiem erecta manente, digitus amoueatur, continuoque videbimus argentum viuum ab illa in catillum defluere, ita vt superiori spatio exhausto, remaneat interim certa quædam fistulæ pars, nempe cubiti vnus cum quadrante ferè hydrargyri adhuc plena.

Hic autem primùm notabimus clepsydram eò magis inani-ri, quò rectius ad horizontis planitiem institerit; nam si paulatim inclinetur, continuo argentum viuum e catillo in illam adsurget, donec tandem tota rursus repleatur.

Præterea si clepsydra igne, aut alio calido admoto incal-escat, descendet vlteriùs argentum viuum: at contra si refrige-retur magis, atque magis assurget; non secus ac contingit aquæ in thermometra conclusæ.

Item si argento viuo in catino contento aqua superfundatur, & clepsydra sursum versus attollatur, vt eiùdem apertura ex hydrargyro egressa in aqua consistat, tunc reliquum argenti viui e fistula delabetur in catillum; & aqua magno impetu as-cendet, vt omnem prorsus clepsydræ capacitatem expleat. Ex quo manifestè apparet errare illos, qui putant spatium clepsy-dræ supernum post argenti viui defluxum repleti aere per vitri poros ingresso. Nam si aer vitrum subierit, cur tandem vasis cauum omne aqua repletur?

Rursus si clepsydra ad prædictam mensuram cubiti vnus cum quadrante nondum exhausta, eiùdem ostium digito clausum extra catinum deferamus, experiemur vim hydrar-gyri digitum prementis, quæ semper erit maior, quò excessus altitudinis supra memoratam mensuram fuerit maior. At ve-rò cum hydrargyrum ad statam altitudinem iam deuenerit, nullam omnino vim grauitatis digito percipimus. Quod si clepsydram ita diligenter agitemus, vt hydrargyrum infra

dictam mensuram descendat, nec interim aer, aut aliud corpus subeat (quod in ipsis argenti viui librationibus facile assequemur) obseruabimus digiti ostium claudentis carnem in clepsydram violenter intrudi.

Demum si clepsydram supra cubitos decem & octo longam, aqua repleamus, eamque orificio in catinum demerso ad perpendiculum erigamus, obseruabimus omne eiusdem spatium, quod supra aquæ in catino contentæ superficiem ultra decem & octo cubitos attollitur, exhauriri; aqua videlicet ex orificio deorsum erumpente: at si clepsydra illa liquenti melle fuerit plena, multò maius eiusdem spatium vacuabitur, & maxima sanè fiet vasis exinanitio, si argento viuo utamur. In summa clepsydra iuxta liquorum grauitatem magis, aut minùs exhaurietur, adeo ut altitudines liquorum in collo vasis remanentium earundem grauitatibus e contrario respondere videantur. Nec enim soli hydrargyro, sed cuius etiam liquorica, quæ diximus, eueniunt; sed præstat argentum viuum seligere, ne sit opus ingenti vasorum longitudine.

Et hæc quidem ita se habere comperiet is, qui periculum fecerit. Verùm qua de causa ista contingant, inquirere, fortasse non cuius promptum erit.

Possent autem quispiam ad mentem Telesij ex his inferre vacuum, etsi quodammodo naturæ aduersari videatur, induci tamen quandoque posse à vi satis valida. Nam quamuis corpora omnia mutuo nexu ita gaudeant, ut propterea ab inuicem diuelli ægrè sustineant: nihilominus argentum viuum, mel, aut alij liquores in clepsydra, dum proprio pondere deorsum magno nisu feruntur, diuelli potius à summa vasis superficie patientur, quàm e proprijs locis exulantes altiùs suspensi contra naturæ leges consistere. Præsertim quia, ut Galilæus animaduertit, idem fluidis contingere debet, quod & duris corporibus. At verò quemadmodum virga aliqua lignea, vel metallica, ex altero sui termino suspensa, si longiùs, atque longiùs protendatur, tandem proprii ponderis vi dirumpetur; ita pariter virga, seu cylindrus ex hydrargyro, melle, alioue liquore

in fi-

in fistula vitrea contento, si longius, quàm par fuerit, producat-
tur, demum nimio pondere impellente, à suprema vasis super-
ficie diuulsa, continuo ad inferiora defluet, donec deuenierit ad
statam altitudinem; ultra quam nequit consistere: atque inte-
rea superiora vasis inania relinquuntur.

Verum hæc opinio nobis reiicienda videtur, utpote quæ non
possit explicare causas omnium phænomenon, quæ in præfato
experimento obseruari diximus. Præterquam quod multa in
Philosophiam monstra inueheret vacuum illud triplici di-
mensione præditum, quacunque figura terminabile, de loco in
locum mobile, in partes diuiduum; decrementi, atque incre-
menti particeps, luminis item, caloris, soni, magneticarumque
operationum propagatiuum.

Sed audire mihi videor aliquem sic dubitantem: si clepsydræ
summa capacitas post hydrargyri defluxum, non est omnino
inanis, quidnam in ea continebitur? non quidem aer, exhalatio,
aut vapor ullus; ut quidam ineptè comminiscuntur: quam-
uis enim eiusmodi corpora rarefactionis, aut condensationis
vi in ingens spatium extendi, vel in minimum contrahi videan-
tur; neutiquam tamen potest insignis eorum moles, aut prorsus
in nihilum redigi, aut certè ita in angustum cogi, ut cerni
nequeat propter paruitatem. At verò nullum deinde in summo
clepsydræ obseruatur vel minimum interstitium, quod
aquis vacet, ut supra monuimus. Quid autem ad hæc respon-
debimus? num vacuum propterea propugnandum esse duce-
mus? nequaquam sane: persuasum enim est nobis spatium il-
lud repleti aliqua substantia.

Quæris tandem quamnam sit hæc substantia? ostendet Euripides
apud Ciceronem his verbis

Vides sublime, fissum, immoderatum æthera,

Qui tenera terram circumiectu amplectitur.

Et Ennius apud eundem,

Adspice hæc sublime candens,

Quem inuocant omnes Iouem.

Nimirum est illa pura, levis, ac tenuissima substantia, quæ

per sublimem fertur locum, siue ætheris, siue ignis, aut Cœli nomine appellare velis: Quæque, vt inquit Plato, minutissimis constat partibus; vnde per aquam, terram, & aerem, & quæ ex ijs constituuntur, permeat; ipsaque à nullo contineri potest. Scilicet æther non modò per omne vniuersi spatium longè latèque diffunditur, solidaque corpora, hoc est tellurem, & stellas suo sinu complectitur, sed cuncta subiens, omnibus penè corporibus permiscetur: vt propterea scitè Virgilius ex Arato dixerit esse.

Iouis omnia plena.

Nihil autem hic moror illos, qui cœlorum compagem ex durissima, ac adamantina penè materia constatam, in solidos Orbes distribuunt: Nam nemo est nisi vel rerum cœlestium, penitus ignarus, vel in propugnandis erroribus nimis pertinax, qui post vsum tubi dioptrici, hanc solidorum orbium distinctionem velit admittere; cum ea demum in corporibus cœlestibus deprehensa sint phænomena, quæ aliter explicari nequeunt, nisi posita Cœli materia fluida, qualis est hæc, quam veterum testimonio comprobata, ætheris nomine significamus.

Hinc vt dicam quod res est, æther mihi primùm innotuit: eius autem contemplatio perutilis mihi vix est ad complura naturæ phænomena explicanda: nam rarefactio, & condensatio, magnetis item effluuium quælibet corpora permeans, soni denique, caloris, & luminis operationes, & innumera alia naturæ phænomena, vix aliter, quàm per ætherem explicari posse mihi videntur; vt proinde animaduertent potiores nobiliorefque naturæ operationes pendere ab hac substantia, quæ non immeritò inter præcipua mundi elementa est adnumeranda.

Ætherea igitur substantia, cuius summa tenuitas, perspicuitasque sensus nostros implet, & effugit, replet spatium illud clepsydræ, quòd post hydrargyri defluxum inane videtur. Nec mirum videri debet, quòd huiusmodi materia vitri soliditatem penetrare possit: Nam sæpe ex ampulla vitrea, sigillo, vt loquuntur

quantur hermetico clausa, tenuissimi quidam liquores ad ignem exhalant, & nonnulli etiam Chymici sales egrediuntur. Quin videmus quoque hydrargyrum in aqua stygia, ut vocant, solutum per vitri poros exsudare. Quid plura? Aure nihil planè densius, attamen virga aurea, si altera sui extremitate in hydrargyrum mergatur, protinus iuxta totam longitudinem eodem inficitur; ita ut aurum suapte natura flavum, & ductile, argento deinde viuo imbutum candicer, & nullo penè negotio frangatur.

Hæc velim dicta in gratiam eorum, qui solis sensibus res temere lustrant; nam qui diligentius naturæ penetralia scrutantur, non ignorant plurima esse in vniuerso corpora, quorum noticiam nunquam sensus assequitur, nisi rectæ rationis ad miniculo adiutus.

Sed tempus est tandem, ut missis ambagibus, sententiam nostram exponamus. Præmittenda verò sunt aliqua ex his, quæ à nobis fusius explicata sunt alibi.

Et primò quidem statuimus vniuersum esse corporibus plenum, quod & omnes ferè Philosophi vnanimi consensu fatentur: videtur enim esse imbecillitas quædam intellectus veram, & genuinam corporis naturam ignorantis, fingere in vniuerso spatium omnis prorsus materiæ expers: nam quia tale spatium tres habet dimensiones, omnino corporeum censei debet. Quod si non ab extensione, à quonam denique corporis naturam decernendam esse iudicabimus? Num ut vulgus solet à densitate, opacitate, aut colore? At si hoc fiat oportebit substantias valde raras, ac pellucas, cuiusmodi in vniuerso plurimas esse constat, à corporum grege eliminare: quod utique est abiurdum. Rectè igitur Plato materiam, ex qua res corporeæ gignuntur, dixit eamdem esse cum loco, seu receptaculo: locus enim non est spatium à contentorum corporum mole diuersum, sed vna eademque reapse est extensio loci, & materiæ corporeæ locatæ; tamen si nos quandoque rei contentæ extensionem ab extensione loci, cogitatione fecernamus.

Porro quia vacuum Philosophico more sumptum denotat:
prius-

priuationem cuiuscunque corporeæ substantiæ, atque adeo omnis etiam extensionis, quæ loco cuius, seu spatio debetur, manifestum est nullum usquam esse spatium prorsus inane; Nisi quis interea confugiat ad Epicuri intermundia, seu spatia illa imaginaria, quæ ingeniorum temerè ineptientium vanitas est commenta.

Hæc cum ita se habeant, manifesta erit veritas illius effati Platonici, scilicet in omni motu fieri reciprocam corporum translationem; hoc est non posse corpus mobile ex vno in alium locum migrare; nisi interim ex loco nouissimè comparato, in locum pristinum aliud aliquod corpus transferatur. Vnde fit ut facilis sit motus per aerem, aquamque; & alia fluida corpora, quorum partes mobili occurrenti cedentes, in eiusdem locum continuo subsequantur.

Deinde ponimus terrestris systematis (hoc est globi, qui ex aqua, terra, & circumfuso aere componi intelligitur) partes continuo nisu ad ipsius centrum tenderetanta vi, quanta est ipsarum vnus cuiusque grauitas; ac proinde illas se inuicem premere, arcteque coherere, neque vnquam diuulsionem pati posse, nisi à vi superstantium corporum pondus exuperante.

Quibus positis facile erit explicare causas eorum, quæ in præfato experimento contingere obseruantur. Nam quotiescunque hydrargyri, aut alterius fluidi corporis in clepsydra contenti altitudo, ad superstantis aeris altitudinem maiorem habet rationem, quàm huius grauitas, ad grauitatem illius, tunc fluidum corpus à summa vasis superficie diuulsum effluit; quo usque eò deuenerit, ut eiusdem altitudo ad altitudinem aeris habeat euerfam rationem grauitatum: nam tunc demum ob æquale vtriusque pondus, velut in æquilibrio consistet, nec alterum ab altero vel deprimi, vel eleuari patietur.

At verò cum primum argentum viuum extra clepsydram defluere coeperit; quia non in vacuum fertur, proximum sibi e sua sede deturbat, idque quod pellitur, vicinum etiam extrudit, atque hoc deinde sibi contiguum aerem pellit, & hic successiue sibi continuum propulsat; donec tandem ab aere, qui in
clepsy-

clepsydræ extimam superficiem impingens, nequit vltius penetrare, exprimatur æther in locum ab hydrargyro derelictum successurus: vt hac demum ratione absolua- tur. circulus ille corporum mouendorum à Platone indigitatus.

Manente autem semper eadem hydrargyri altitudine, maior vtique eiusdem copia assurgit in fistulam, quo magis hæc ad horizontem inclinabitur.

Et quoniam circumiectus aer vi caloris rarefcit, ac proinde leuior euadit, nequit ad eandem, quam prius altitudinem hydrargyrum eleuare. Contrarium autem contingit ex frigore. Sed hic considerandi quoque sunt caloris, & frigoris effectus, in mutandis substantijs, ab ipsa clepsydra comprehensis.

Præterea clepsydra, quæ post hydrargyri effusionem, aliquanta sui parte inanis videbatur, deinceps repletur aqua; quia hæc ad maiorem altitudinem potest assurgere. Cuiuscunque enim fluidi corporis in clepsydra, ea qua dictum est ratione conclusa altitudo, altitudini aeris, conuersa grauitatum ratione respondet. Quocirca liquorum omnium altitudines inter se comparatæ erunt, vt eorundem grauitates permutatim sumptæ.


Denique si hydrargyri altitudo in fistula tanta fuerit, vt altitudini aeris conuersa grauitatum ratione respondeat, orificium digito obturantes, fistulamque ad perpendiculum erectam, extra catinum, si libuerit, asportantes, nullum sanè pondus digito sentiemus; conatus enim, quo argentum viuum eruptionem tentat, omnino æqualis est conatui, quo aer ingressum in fistulam molitur. Verum cum hydrargyri altitudo fuerit maior prædictæ mensuræ, sentitur pondus ob excessum, quo vis hydrargyri defluxum tentantis, superat vim aeris irruptionem molientis. Contrarium autem accidit si hydrargyri altitudo ad præfatam mensuram non accesserit; vel etiam si fistula notabiliter inclinetur; nam tunc ob maiorem aeris conatum digiti pulpa in fistulam intruditur.

Hactenus earum obseruationum, quas in proposito experimento considerauimus, causas exposuimus. Quod si quid obscurum

scutum adhuc videtur, insequentibus elucescet. Interea non dissimulabimus nostram hypothesein in explicanda ratione quorundam motuum, & aeris præsertim, quo caro in cucurbitulas medicas intruditur, mancam imperfectamque videri; nisi præterea cogitemus nostratē aerem vi superstantis compressum, stipatumque esse; atque adeo pressu illo cessante spon-
relaxari, atque rarefcere.

Ex his manifestum quoque videtur cur aqua siphonum fuctu, aut alia trahente vi nequeat supra cubitos decem & octo eleuari. Non enim ob id assurgit aqua, vt spatium, quod aliter post haustum aerem inane relinqueretur, expleat: quippe deberet aliquando eadem vacui necessitate urgente, ultra dictam mensuram attolli; sed potius quia superstantis aeris pondere, propulsa cogitur illac erumpere, vbi nullum est corpus, quod eidem obsistere valeat; quemadmodum intelligitur esse cauum siphonis spatium, post spiritus subductionem. Porro aeris comprimētis vim tantam esse concipiemus, quanta sufficit ad aquam iuxta dictam mensuram eleuandam: ita scilicet exposcente ratione tum altitudinis, tum grauitatis vtriusque.

Ad hanc eandem aeris pressionem videtur referenda vis illa, quam experimur in distrahendis ab inuicem duabus laminis lapideis, vel metallicis exquisitè complanatis; illæ enim dum mutuo contactu apprime cohærent, non patiuntur diuelli, nisi à conatu, qui valeat mouere totum illud aeris spatium, quod laminæ mouendæ tanquam basi insistit.



Sumatur vas ABC, sitque fundi BC superficies complanata; eique superincumbat circellus cartaceus, vel ligneus H, cuius ima superficies ita superficiei vasis cohæreat, vt mutuus earundem contactus omnino arceat, ne argentum viuum desuper effusum ED, inter circellum vasisque fundum subire queat. Tum verò circellum ex alligato funiculo HA attollentes, obseruabimus tantum requiri conatum, quantus sit

fit satis ad eleuandum hydrargyri cylindrum , cuius basis est circulus H, altitudo verò HE. Verum simul ac hydrargyrus inter circelli , & vasis superficiem subire cœperit , circellus à fundo vasis diuulsus, sursum enitetur, ac extra superficiem hydrargyri ED magno impetu subsiliet .

Eadem autem est ratio hydrargyri, ac aeris superincumbentis; quotiescumque inter duorum corporum superficies nequit penetrare .

Similiter quoque iuxta hanc hypothesim potest assignari causa eductionis aquarum per siphones retortos , item attractionis cucurbitularum medicarum, & omnium denique aliorum motuum , qui vulgò referri solent ad horrorem, atque renixum naturæ in admittendo vacuo . Siquidem aer circumiectus aequaliter vndique vrget corpora , quæ idcirco irrum-punt in ea loca, in quibus vel nulla, vel minima est vis resistens; cuiusmodi est pars illa siphonis, quæ ad terræ centrum propendens aquam iugi defluxu effundit ; & cucurbitulæ cauum post nouam aeris ante calefacti refrigerationem .

Si quis verò de hac aeris grauitate ambigat, consideret volatus auium, nubiumque, & aliorum corpulculorum in eodem pendantium libramenta . Vel si cupiat videri peripateticorum dogmatum constans assertor, consulat Aristotelem docentem elementa omnia in sua regione grauitatem habere , præter ignem , etiam aerem ipsum : signum est, inquit ille, quia vter inflatus grauior est , quàm compressus .

Equidem apud ingeniosiores nostri sæculi Philosophos non solum in confesso est aeris grauitas ; verum etiam artificiosissimis experimentis deprehensa est ad grauitatem aquæ communis esse fere vt vnum ad mille . Quamuis non omnino sibi constet hæc proportio propter inæqualem aeris statum ; quippe tum pro ratione loci , tum etiam pro ratione frigoris , & caloris , densior est , aut rarior .

Sed vt nihil hic desiderari videatur , notandum est aeris nomine à nobis intelligi omne illud ætheris interuallum, ad quod pertingunt vapores , atque halitus e terra vi caloris educti ; ita

ut nihil aliud sit aer, quàm æther impurus, huiusmodi vaporibus, expirationibusque permixtus. Nec verò id latuit veteres; nam ut est apud Tullium. *Aer, ut Stoici disputant; interiectus inter mare, & Cælum, Iunonis nomine consecratur, quæ est soror, & coniux Iouis; quod & similitudo est Aethoris, & cum eo summa coniunctio. Effeminant autem eum, Iunoni que tribuerunt, quod nihil est eo mollius. Ipse verò aer, ut idem notat, oritur ex respiratione aquarum; earum enim quasi vapor quidam aer habendus est.*

Æther igitur suapte natura tenuissimus, atque leuissimus, itemque omnino pellucidus, ob vaporum tamen e terra procedentium admixtionem, spissescit aliquantulum, ut proinde corporum per illum excurrentium motibus obstruatur, & stellarum lumen infringat; sitque præterea aliquantulum grauis; & demum opacitatem aliquam indispiscitur; ita ut lucis quamdam portionem retorqueat: quamobrem & cæruleo quodam colore pingitur, ut appareat ex viribus, seu montibus eminus conspectis: (quem quidem cæruleum colorem esse proprium aeris, non autem ætheris puri, liquet ex eo, quia is nequaquam cernitur nocturno tempore, cum scilicet vniuersa aeris regio nobis adspectabilis latet in cono umbræ terrenæ) atque etiam creperam illam lucem vespertinam, atque matutinam efficit: fiunt enim crepuscula ab aere illuminato circa orientalem; aut Occiduum cardinem.

Docet autem computatio à crepusculorum ratione desumpta, hanc ætheris impuritatem ad quadraginta fere milliaria supra terræ superficiem extendi; sed hac rament lege, ut aer telluri proximè adiacens multò magis inficitur, ac propterea granior quoque fiat. Atque hinc est quòd in excelsis montium quorundam iugis, ut de olympo narrant, vita prorogari nequeat, nisi per spongas humentas spiritus trahatur. Et in historijs scribitur homines quosdam per fumina aliquorum Americæ montium cacumina transeuntes, repente expirasse, simul cum ipsis equis, quibus infidebant: Pro respiratione enim requiritur aer notabiliter vaporosus, & veluti aqua quædam rara. At verò vel nulli, vel pauci omnino vapores ad illorum mon-

tium

tium vertices adfurgunt; quamuis exhalationes, aliæque leuiores substantiæ multò altius ferantur. Et quidem si vniuersa aeris regio, quæ ad quadraginta vsque milliaria protenditur, æquè grauis esset, atque pars illa, quæ nobis circumfunditur, deberet aquam eleuare ultra passus quadraginta; cum tamen experientia suadeat, hanc ab aeris impulsu turbatam, vix attingi ad decimum vsque passum.

Nunc autem opere præteritum erit explicare quomodo aer grauitate sua corpora subiecta comprimere valeat; nam sæpe in scholis audias prolata sententiam illam: Elementa in suis locis neque leuant, neque grauitant: nullamque nos videmur percipere superstantis aeris grauitatem, imò nec ipsius aquæ millies fere grauioris, pressum vllum, seu pondus vrinantes sentimus.

At reuera quæuis corpora alijs subsidentia, etiam dum grauiora minus grauibz substernuntur, impulsu aliquem iuxta insidentium pondus patiuntur; quod nos tum ratione, tum experientia ratum faciemus.

Præmonere autem oportet grauitatem nihil esse aliud, quàm facultatem quamdam, seu vim singulis partibus systematis terreni, (neque aliter de reliquis vniuersi systematibus pronuntiandum foret) inæqualiter pro ratione densitatis earundem distributam, qua videlicet illæ simul vna concurrunt; vt deinceps cunctis ad idem punctum conspirantibus, dum altera alteri incumbit, in vnâ eandemque sphaeram omnes simul coactæ conglobentur. Namque ad hoc potissimum conducit hæc vis, vt scilicet omnes cuiusque systematis partes ad idem centrum tendentes coeant, & se inuicem mutuo complexu conseruent. Ex quo fit vt omnes Mundi partes, cuiusmodi sunt Terra, Planetæ, stellæque fixæ; quantum in seipsis est, sphaericam vtique formam adfectant. Neque aliam videri habere causam constans illa, & perpetua terrestrium elementorum, hoc est partium nostri systematis dispositio, nisi quod grauiora corpora, dum maiori nisi ad centrum feruntur, in tantum adeptæ sunt locum; reliquis interea iuxta grauitatis

rationem propius accedentibus.

Quamobrem quotiescumque corpora minus graua, grauioribus subsidere contingit, tunc hæc per illa, nisi durities obster, irrumpunt; ipsæque extrusis, viam sibi aperiunt, donec ad medium, si fieri potest, deuenerint; vel corpus aliquod seipsis grauius, aut fundum durum, ac impenetrabile offenderint: quo casu inuita quodammodo consiliunt, proprioque pondere subiecta corpora vrgent. Corpora autem minus graua, & si grauioribus locum concedere cogantur, quia minorem vim habent, quam vt ipsi dem resistere queant, tamen proprium conatum propensionemque ad centrum semper retinent. Neque verò cessat vnquam vis illa grauitatis, nisi cum graue ad centrum delatum non habet quò concedat vltterius.

Ad hanc ipsam veritatem confirmandam innumera penè occurrunt experimenta; ex his nos vnum instituto nostro aptissimum proponemus.



Paretur vas vitreum cylindraceum AB, cuius altitudo cubitalis sit, diameter verò palmaris; at in eius fundo subsidat argentum viuum BC: deinde fistulam HBE vtrunque perforatam, (cuius amplitudo ad amplitudinem prædicti vasis minorem habeat proportionem, quam aquæ grauitas ad grauitatem hydrargyri) ita aptabimus, vt alterutrum eiusdem orificium B in hydrargyro mergatur. Tum aquam coloratam, seu vinum CD superfundemus; & denique reliquum vasis spatium DA oleo replebimus. Quibus ita paratis obseruabimus hydrargyrum ex superstantium liquorum pondere compulsum per fistulam attolli: verbi gratia vs-

que ad E; ita vt altitudo CE ad altitudinem CA, eandem habeat rationem, quam grauitas ex illorum humorum permissione prodiens, ad grauitatem hydrargyri. Rursus si fistula sursum versus attollatur, vt orificium B ex hydrargyro egressum in aquis CD mergatur, iam statim argento viuo defluente,

te, aqua per fistulam ascendet ad F iuxta expositam rationem.

Iam verò hoc experimentum prioris causas explicare videtur; si scilicet intelligamus oleum eodem hic fungi munere, atque in illo altero aerem: itemque aerem in præsentis organo per fistulæ ostium H liberè ingredientem egredientemque præstare vicem ætheris.

Fatendum est igitur à quovis corpore gravi, atque adeo ab ipso etiam aere subiecta corpora premi propellique ad ea loca, in quibus est minor renixus. Talis autem impulsus iuxta mechanicæ leges est metiendus, habita scilicet ratione ponderum tum corporis impellentis, tum etiam impulsæ. Quamobrem si quando impulsio hæc vnde quaque fuerit æqualis, nullus in subiecto corpore fiet motus. Vnde constare potest, quæ sit causa, cur neque aeris, neque aquarum pondus sub iisdem demersi sentiamus.

Sed ut hæc manifestiora fiant subiungemus regulas quasdam de fluidorum corporum pressu, quæ tametsi a nostro instituto videantur alienæ, multum tamen utilitatis præferunt. Inde enim innotescent causæ quorundam phænomenon, quæ physicæ rationis ignavis mira videri solent.

Sit igitur vna aquæ plena; dico vim ab aquæ gravitate pendentem iuxta has regulas esse metiendam. Primo vnaquæque fundi particula premitur à totidem guttis, quot illi tamquam basi à summo ad imum superimpendent: etenim cum primum gutta quævis ex his, quæ fundo inhærent exitum nacta delabitur, descendunt pariter & superiores, in quarum locum succedit aer à defluente aqua deturbatus. Hinc perspicuum est cur aliquando ob nimiam aquæ altitudinem, fundum vasis oneri sustinendo non sufficiens dirumpatur; & aqua e quovis vniæ foramine tanto impetu erumpat, quantum postulat pressus ponderis, & gravitatis eiusdem. Vnde inserto tubo, cuius orificium sursum vergat, aqua subfiliet usque ad supremam ferè aquæ in vniæ contentæ superficiem.

Secundò inferior aquæ gutta non premitur à superioribus: pressus enim fit propter motum; cum scilicet corpus aliquod

ita fertur ad alterum, vt nisi ab eodem præpediatur, debeat ulterius progredi; atqui dum nullum inest vasis foramen, nequit aquæ gutta superior ferri ad locum inferioris, nisi eodem tempore hæc aut alia similis in illius locum ascendat: id autem fieri nequit, quia aquæ guttæ sunt æquè graues, atque adeo vis illa, qua singulæ feruntur deorsum, æqualis est virtuti, qua eadem resistunt ne sursum impellantur. Nullus ergo interea sit motus, quia altera alteri locum non concedit, vt hæc descendente, illa possit ascendere.

Tertiò aqua premit interiorem vasis superficiem, non modo iuxta perpendiculares, sed iuxta inclinatas quoque lineas; imò non solum iuxta rectas; sed etiam iuxta flexuosas, quæ rectis æquiparantur. In omni tamen casu, tantus fit impulsus, quantus omnino fieret à perpendiculo aquæ altitudinem definiente. Eadem enim pressioni aquarum contingunt, quæ in motu grauium naturaliter descendentium obseruantur, cum pressus hic oriatur ex propensione, quam habet aqua ad motum deorsum. Quemadmodum verò pila plumbea per planum inclinatum, vel per tubum in helice formam reuolutum à summo ad imum repens, tantam denique acquirit velocitatem, quantam propemodum indepta fuisset, si per rectum perpendicularem expositæ altitudinis æqualem descendisset; ita ferme aqua in vase contenta, non modò subiectum fundum, sed & latera quoque vrgens, aperto foramine erumpit, tanto impetu, quantum postulare videretur eiusdem altitudo. Vbi similiter obseruandum aquam e foramine erumpentem, non iuxta vnā tantum situs determinationem ferri, sed susque deque, dextrorsum, ac sinistrorsum, & quocunque tandem foramen vergat prouere.

Hæc cum ita esse intelligenrem, sequens experimentum tetraui. Vitreum orbem exiguo pertulim foramine in profundiorē aquam mergebam, ostiolumque deorsum vergens, digito obturabam, vt mox orbis in auras euectus, indicaret semper maiorem, atque maiorem aquæ copiam in eundem ingestam, quò profundius ille penetrasset. Et res quidem ex sententia

ria successit. Nam aqua eò maiori nisu per orbis foramen intruditur, quò illa fuerit altior, atque interea aer in orbe contentus, in minus, atque minus spatium cogitur; donec impulsus à superstantis aquæ pondere proueniens sit æqualis conatui, quo aer resistit, ne violenter comprimatur; vnde aperto deinde foramine, ac deorsum spectante, aqua foras extruditur à vi aeris iuxta debitam mensuram sese iterum expandentis.

Hoc autem experimentum, sicuti positiones nostras mirè confirmat, ita destruit complura aliorum cogitata. Quidam enim cum eiusmodi vim, pressumque non intelligerent, studium operamque luserunt in fabricandis nauiculis, quæ sub aquis demeritæ sursum deorsum, vltro citroque ferri possent, eandem semper retinentes grauitatis rationem: nam machinas struxerunt ima parte patulas: sperantes fore, vt aer in illis contentus arceret aquam in easdem irrumpere conantem. Verum decepti sunt, quia huiusmodi machinæ semper grauiores fiunt, quò magis ad fundum accesserint.

Quæcunque autem hætenus de aquarum impulsu exposita sunt, conueniunt etiam aeris pressui; hic enim quotiescunque ab occurrentibus corporibus impeditur ne ad medium, ad quod grauitate sua propendet, deferri possit, nititur quaquaversum erumpere, dummodo nulla vis æqualis, aut maior obstat. Quamobrem si quando adfuerit spatium plenum substantiæ alicuius ipso aere tenuioris leuiorisque, & quæ inde facile possit exturbari, tunc in illud irrumpere nititur, & interiecta corpora pro ponderis sui modulo vrget;

Semper enim circumpositus res verberat aer.

Ex quo liquet causa cur in distrahendis laminis eadem vis requiratur, cum illarum altera rectè sursum attollitur, ac cum vel deorsum, vel ad latera fuerit deducenda.

Cæterum, vt hæc facilius percipiantur, notandum est impulsionem illam fluidorum, de qua impræsentiarum loquimur, tunc propriè fieri, cum corpus magis graue ita fertur ad leuius, vt hoc e suo loco possit exturbare: alioqui nullus foret motus, atque adeo nullus impulsus. Vis autem impulsionis

metien-

merienda est ab excessu, quo corporis grauioris conatus superat renixum leuioris. Hunc autem conatum nanciscitur corpus impellens, tum ex maiori proportionem grauitatis, tum etiam ex altitudine; quæ in hoc casu perinde se habet, ac motus acceleratio acquisita ex descensu naturali à loco æquæ alto. Ac propterea aer circumfusus irrumpit in loca, in quibus inest substantia aliqua seipso leuior (cuiusmodi est aer rarior, vel purus æther) tanta vi, quantam postulat excessus grauitatis eiusdem supra substantiam illam leuiorem. Sed hic habenda quoque est ratio altitudinis ipsius aeris. Quod si quando aer occurrentium corporum interpositione arceatur, ne in ea loca irrumpat, tunc iuxta conatus sui vim ipsa corpora interiecta protrudit in illa spatia. Atque ob id sæpe videmus grauiora corpora, quasi contra propensionis propriæ leges ascendere,

Quippe agitantur enim plagis aliunde; nec ipsa

Sponte sua sursum possent consurgere in auras.

Iamque ex his, quæ à nobis hucusque dicta sunt, perspicuum cuius esse potest solum superstantis aeris pondus posse subiecta corpora ita virgere, vt propterea ea omnia contingant, quæ vulgò ad decantatam vacui repugnantiam referri solent. Et sane quicumque in hac ipsa causa non acquiescentes ad vacuum confugiunt, frustra se excruciant, fallunturque more Æsopici canis, qui ossam, quam ore gerebat, demisit in flumen, vt vanum eiusdem simulachrum expiscaretur. Nam quomodo vacuum, quod ex ipsorum quidem sententia neque est, neque fuit, aut erit vnquam, corpora vel mouere, vel ne moueantur inhibere poterit? Cur natura tantopere abhorret, extimescitque id, quod nusquam est? num & illud eidem contingit, quod & pueris solet, qui exhorrescunt spectra, & lemures, aliaque vetularum terculamenta, quæ nusquam inueniuntur?

Diceret fortasse quispiam, posse quandoque dari vacuum, sed non sine renixu quodam naturæ, quæ illud tanquam sibi noxium vitare nititur. Verum ego interea quæram a quonam vis illa naturæ inferatur? Qui fieri possit, vt vacuum antequam extiterit, vires suas prodatur? & cur demum id quod aliquando potest

potest in rerum natura existere, ipsi naturæ aduersum debeat censerî?

Profectò Aristoteles vacuum confutaturus non profert in medium hæc experimenta, quæ nostri ab horrore vacui pendere falso arbitrantur. Nouerat enim non entis nullas esse operationes: Sed potissimum inuehitur in illos, qui inane assumebant tamquam necessarium ad motum (qua in sententia præter cæteros fuerat Democritus, quem sequuti sunt Epicurus, & Lucretius) nititurque ostendere vacuum non modo non requiri ad motum, sed etiam obstare quo minus in ipso motus fieri possit. Similiter alibi disputat aduersus eosdem asserentes minorem maioremque corporum grauitatem oriri ex maiori, minorique inanis admistione. Quamquam (vt hoc obiter moneam) argumenta quibus Aristoteles vitur, partim captiosa sunt, partim quoque innituntur fundamentis experientiæ aduersantibus; vt videre est apud Galilæum eorundem fallacias præclare detegentem.

At verò quidam Philosophi, qui nihil vltra corticem norunt, de natura, seu potius de rebus naturalibus non aliter loquuntur, quàm si illæ mentis, rationisque participes, ac propriarum functionum consciæ forent. Aiunt enim illas rebus amicis oblectari, & ad eas sponte accurrere; fugere verò inimicas, imò vires suas aduersus easdem intendere; & quod non sine risu excipere possum, interdum etiam contra proprias propensiones sponte moueri, ne vacuum progignatur, monstrum sanè formidabile, & ipsius naturæ terror. Hinc exorta inania illa inscitæque plena vocabula Sympathiæ, Antipathiæ, Antiperistasis, & similia, ad quæ tanquam ad sacram anchoram solent confugere Philosophi nostri, quotiescunque in arcanis cognoscendis caligat intellectus.

De hoc autem genere est attractio, verbum quidem inane, de Medicis tamen, atque Philosophis optimè meritum: hi enim circumpulsionis vim ignorantes, dum motuum ex illa penduntium causas efferre coguntur, hoc vno attractionis nomine obiecto statim sese expediunt.

At Plato sapienter, vt solet, reiecta attractione, motus illi vulgò adscriptos per circumpulsionem explicandos esse decreuit. Circumpellunt autem sese mutuo corpora, non quidem vt alterum alteri locum violenter eripiat, quemadmodum vox ipsa sonare videtur; sed vt singula in suam sedem transeuntia commigrent. Et quoniam vis illa, qua vnaquæque mundi pars ad proprium locum fertur, communiter grauitas, aut leuitas solet appellari; idcirco & nos ne à consueta loquendi forma recederemus, iisdem vocibus vsi sumus. Cum autem liberum nobis fuisset circumpulsionem, seu maius dispositionem illam, ordinemque corporum, cum per grauitatem descendentium, tum etiam per leuitatem ascendentium explicare (namque eodem semper redisset demonstratio) maluimus tamen grauitatem eligere, vtpote quæ iuxta vulgi sensum sit manifestior. Adde quod plerique solam grauitatem qualitatibus nomine dignantur; leuitas enim illis perinde est, ac minor grauitas; seu potius grauitatis priuatio: quæ quidem fuit sententia Democriti, Epicuri, aliorumque, qui, vt diximus, corporum leuitatem ab admistione vacui pendere arbitrantur.

Quamquam nos, qui vacuo e rerum natura ablegato in eiusdem locum ætherem subrogauimus, nihilo magis grauitatis, quam leuitatis vim, & efficacitatem agnoscimus: præsertim si principijs perspicacissimi, atque incomparabilis Philosophi Renati des Cartes insistentes, opinemur corpora grauiâ, non proprio liberoque, sed coacto potius, atque extrinsecus adueniente motu versus centrum propelli. Quidquid id sit, nulla quidem videtur esse causa, ob quam grauitas in rerum numerum sit cooptanda, leuitas verò non; cum vel vtraque, vel potius neutra inter entia videatur adnumeranda. Sed non est, vt in his te patiar vltro immorari Marcelle clarissime, præsertim cum iam aliquando tibi contigerit audire Iosephum Bonacursium, virum vndecunque doctissimum, de natura grauis, & leuis, tam scite, subtiliterque differentem, vt ego neque aliter sentire, neque omnino quicquam adijcere aut possim, aut debeam.

Tandem

Tandem ad nostræ theſis, ſeu mauis, Platonici dogmatis veritatem vndequaue firmandam, examinandæ forent magneticæ, atque electricæ attractiones, quæ quia longiori indigent diſputatione, quàm nunc ferat ſuſcepti muneris ratio, à nobis alibi diſcutiendæ ſeruantur. Interea notandum electricas coniunctiones eadem ferme ratione contingere, ac motus illos vulgò relatos ad metum vacui. A ſuccino enim, & ſimilibus corporibus emanat effluuium, quod vapores halitusque in orbem propellens, circumfuſum aerem puriorem, atque adeo leuiorem reddit: vnde mox illuc ab aere circumiecto grauiori, corpuscula adiguntur: namque vt iam fuſè oſtenſum eſt,

Continuo fit, vt qui poſt eſt, cunque locatus

Aer à tergo quaſi prouehat; atque propellat:

Semper enim circumpoſitus res verberat aer.

Atque hinc poteſt eſſe manifeſtum cur electrica tempore nubilo, aereque multis vaporibus referto, parum, vel nihil attrahant.

Neque verò mirum videri debet, quod electricum effluuium vapores, halitusque finitimos diſijciat, paleas autem, capillos, & ſimilia corpuscula non modo non abigat, ſed potius patiatur accedere: ſiquidem vapores, atque halitus, quoniam in minutiffimas particulas facilè ſcinduntur, poſſunt ab iteratis effluuij propulſionibus abigi: at non item paleæ, & capilli, corpora vaporum comparatione longè maxima: ſic exempli cauſa à leni ſpiritu triticum vix mouetur, at eius tamen farina facile diſijcitur.

Ex quo perſpicuum etiam eſt, cur ipſa effluuij propulſione adhuc durante poſſit aer à tergo paleas mouere. Enimvero hæc aeris circumpulſio eſt omnino maior, quàm propulſio ab effluuiio manans; quæ non vnico tantum, ſed iteratis motibus finitimum aerem ita diſponit, vt reſiſtere nequeat impulſui aeris, qui ponè paleam incumbens, nullam patitur ab effluuiio mutationem. Multa præterea mihi, cum primùm hæc meditari cœperam aduerſus hanc ſententiam occurrebant argumenta, quæ deinde accuratius penſitata, viſa ſunt eidem robari

potius, ac fidem adiungere posse: vt hæc diligentius inquirenti manifestum fore confido.

De magneticis autem coniunctionibus aliter est philosophandum. Perperam verò Lucretius in his explicandis ea usus est ratione, quam nos in electricis sequuti sumus: quippe vis illa magnetica penetrans densissima quæuis corpora, aliam omnino habere videtur causam; vt interim præter eam directionem, excitationemque, & quam nos paucis ab hinc annis obseruare cœpimus inflexionem linearum magneticarum à ferro, & similibus in alia corpora transeuntium: in quibus explicandis, ac demonstrandis claudicat omnes omnium quotquot adhuc mihi nosse licuit, Philosophorum hypotheses. Ego tamen in nouas incidi positiones, quæ non modò obseruationibus omnino respondent, sed rationi etiam, atque ipsi naturæ apprime consentire videntur. Quamquam has vt calumniæ vim effugiant, supprimendas potius, quam diuulgandas censeo: præsertim cum nulla vñueniat Platonis, Aristotelis, aut alterius magni nominis Philosophi autoritas, quam detractoribus possim opponere. Animaduerti enim, & longa obseruatione didici hoc hominum genus vix vlla ratione, argumentoue magis persuaderi, quàm testimonio ab antiquitate desumpto. Vnde quotiescunque cum istis mihi res est, veterum auctoritates studiosè conquirō. Quippe cum sciam nullum esse remedium aduersus lycophantæ morsum, malo quidem, vt mihi obijciant, quod ego inueniam iam inuenta, quàm quod nouitatis studio flagrans exprobanda loquar opinionum, monstra, atque portenta.

Habes iam, Eruditissime Marcelle, sententiam meam de causa illorum motuum, qui vulgo ad fugam vacui referuntur; rationesque item, atque experimenta, quibus ad circumpulsionis potius, quàm attractionis dogma approbandum adductus fuerim. Spero autem te nostris, hisce meditationibus, postquam earundem momenta rectè pensaueris; facile assensurum.

Verum enimvero sicut experientia quotidiana nos edocet
posse

posse vnum corpus ab altero deturbari, dum hoc seu motu naturali, seu etiam impulsu aliunde sibi delato, ad illius locum fertur; ita omnino insolens est, atque repugnat, vt corpus iam quiescens moueatur vnquam; nisi vel per subtractionem impedimentorum, quibus antea detinebatur, ne ad propriam sedem duci posset; vel per nouam motus impressionem concitata à corpore, quod ad illud accedat. Atqui dum vnum corpus ad alterum fertur, eidem motum suum impertit iuxta eandem determinationem, qua illud ferebatur: voco autem determinationem, mobilis versus certum terminum directionem. Igitur, vt manifesta est corporum propulsio, ita omnino absurda videtur attractio. Siquidem potest vnum corpus alterum abigere per translationem impulsus, nequaquam verò trahere, & ad se allicere, nisi ex euentu, & quasi aliud agens. Quemadmodum si gratia exempli decem globuli intra canalein in circuli formam excauatam ita collocentur, vt sibi mutuò elatere incumbentes, vniuersum canaliscuum compleant, non poterit illorum primus versus secundum moueri, nisi ipsum comitetur & decimus: non quidem quia primus decimum trahit, sed quia perpellit secundum, atque hic tertium, & sic deinceps, donec tandem à nono decimus protrudatur. Nam cum nullus in canali ponatur locus globulis vacuus, non potest quispian ex ijs per ipsum moueri, nisi & omnes pariter moueantur. Propterea si decimi globuli renixus exsuperet impulsum primi, nullus omnino fiet motus; quia cum nulla detur dimensionum penetratio, nequit alter alteri locum concedere, nisi & omnes eodem simultempore circumducantur. Sane verò quid simile contingit in omnibus motibus, qui ad tractionem, & potissimum ad fugam vacui vulgò referuntur: vt hæc diligentius consideranti perspicuum esse potest.

Videbatur mihi vir amplissime, eo demum perducta hæc dissertatio, vt petitioni tuæ quadantenus satisfacere posset; quamobrem calamum à papyro subduxissem, nisi interea meminissem exoluendum me adhuc esse promissis, quibus me tibi nuper deuinxeram; cum scilicet inter nos esset sermo de experi-

perimentis illis, quæ Florentiæ, vt audio, primùm inuenta ad nos dudum delata fuere. Pollicitus enim sum alia quædam eiuldem generis experimenta, quæ iam pridem animo concepta, & ab ipsis fundamentis deducta, tandem ante duos ferme menses ad opus reuocaui, & compluribus etiam philosophiæ, & Mathematices studiosis videnda exhibui. Vt autem hac de re certio rem te faciam, ostendam breuiter, qua occasione in hæc nugas ego inciderim.

Iam voluitur alter annus, ex quo Ludouicus Casalius vir, vt nosti, non minùs genere, clarus, quàm disciplinarum ornamentis conspicuus, nunciauit mihi inuentum fuisse Florentiæ experimentum huiusmodi. Duo globuli vitrei in cyathum aquæ plenum immissi, sic alternatim mouebantur, vt cum aqua frigidior esset, alter fundum peteret reliquo supernatante; at mox adiecta aqua calida, ille e fundo adurgeret, atque hic e summa aquæ superficie pessum iret.


Ego rei nouitate percutsus de artificij structura nonnulla quærebam, sed frustra, nam author rem hanc, ceu magnum arcanum occultabat. Tandem verò cum ad Physicam rationem inuestigandam contulissem animum, qua id fieri posset ratione cognoui. Scilicet orbiculorum alteruter pertusus est, aquisque innatat, foramine deorsum spectante; in hunc autem tantum humoris intruditur, quantum satis est, vt aquæ frigidiæ immeritus feratur ad fundum: postmodum enim adiecta calida aqua, eundem sursum assurgere obseruabimus. Quippe aer in orbiculo contentus vi caloris rarefcens, subiectam aquam extrudit, atque adeo orbiculus leuior factus ad superiora enititur. Sed orbiculus alter cum perforatus non sit, ita temperandus est, vt in aqua frigida supernatet, in calida verò mergatur.

Sed cum in eiulmodi ludicris inuentis occuparemur, rumor ad aures nostras perfertur, versari in manibus viri cuiusdam ingeniosi admirabile artificium, nempe vitreum tubum aquæ plenum, in quo plures orbiculi vitrei sursum, deorsumque ferebantur ad nutum eius qui tubi ostium digito obturabat. Tum eò cogitationem intendi, vt qua ratione id fieri posset assequeretur:

sequerer: neque diu hæsitaueram, cum intellexi orbiculos illos esse aliquantò leuiores aqua, & foramina habere, per quæ digiti pressu aqua intruderetur, ac re intus contento in minus spatium coacto; vt proinde orbiculi grauiores facti fundum peterent: at mox digito laxato, dum aer sese iterum ad debitam expansionem redigeret, aquam per foramen extrudi; atque idcirco orbiculos leuiores factos, iterum sursum ad surgere.

Quibus animaduersis memoria mihi suggessit ea, quæ aliàs meditatus eram de impulsu aquæ in cauum orbis infra illam demersi, cuius supra facta est mentio. Quamobrem existimaui posse orbiculos perforatos sursum, vel deorsum ferri, & in medio libratos derineri absque vlla caloris, aut frigoris vi; item sine vlllo digiti, manusue pressu; sed tantum impulsu ipsius aquæ, quæ modò maiorem, modò minorem altitudinem supra dictos orbiculos adipisceretur, hoc scilicet modo.

In tubum vitreum retortum ABCD aquæ plenum immittantur orbiculi vitrei perforati B, C, D, qui ita aquæ tubo inclusæ innatent, vt minimi ponderis accessione fundum petant; tum digito comprimente, vel spiritu adacto, cogantur dicti orbiculi ad fundum descendere, tubusque ita inuertatur, vt illi versus D ferantur. Quibus positis obseruabimus dictos orbiculos per tubulum BCD ascendere, & descendere pro ratione inclinationis ipsius tubi. Etenim cum recta AB horizonti perpendiculariter insistit, globuli ex D descendunt versus B; at contra cum tubus ita aptatur, vt recta AB ad horizontem inclinetur, tunc iidem orbiculi ex B ascendent versus D.



At verò positis globulis, vt fere semper contingit, aliquo grauitatis excessu sese superantibus, tunc poterimus multiformiter illos mouere: namque alter pessum ibit, dum reliqui sursum feruntur; item alius quouis in loco, quasi libratu pendebit; si scilicet organum tantundem inclinemus, quantum
ad

ad opus requiri experientia didicerimus.

Ratio cur hæc ita contingant manifesta est ex ijs, quæ iam exposuimus de aqua, quæ in orbiculos eo copiosius intruditur, quo fuerit altior, vt accidit cum tubus A B ad horizontis planum erectum fuerit; nam ex inclinatione ipsius tubi, aquæ altitudo decrescit, ac proinde eiusdem conatus fit minor.

Structuram vitrei tubi vsus docebit. Id curandum est potissimum, vt eiusdem crura A B, D B, quodammodo parallela sint; altitudo B A, altitudinis B D tripla, vel quadrupla. Tubus æqualem vbique habeat amplitudinem, vel in crure B A sit aliquantò amplior, quam in altero B D.

Orbiculi ea parte, quæ pertusa est præponderent, vt dum in aqua librantur, foramina deorsum vergant; facile verò id fiet, si illis paruulum collum affigatur: cauendum tamen ne vsque adeo leuiore sint aqua in tubo contenta, vt propterea vis ab ipsius aquæ impulsu manans nequeat illos ex D versus B protrudere; itemque ne nouo frigore, aut calore accedente, aer in globulis contentus notabiliter condensetur vel rarefiat, atque adeo maior, vel minor aquæ portio in globulos intrusa, eorundem grauitatem insigniter variet.

Hic autem animaduertere oportet quandoque globulum exempli causa B, qui ita grauis est, vt nisi summa tubi inclinatione vix adsurgat ad D, postmodo ad supremam aquæ superficiem A delatum, ibique diutius consistentem leuiorem fieri; contra verò grauiorem euadere, si in fundo B detineatur. Idem enim fere contingit aeri, ac lanæ, quæ iam diu compressa, nequit deinde ad pristinam amplitudinem sese expandere; quamuis tandem à compressione libera sese laxet aliquantulum. Cuius rei causa perspicua est ijs, qui naturam rari, & densi non ignorauerint.

Quemadmodum igitur aer aquæ subiectus ab eius pondere virgetur, atque adeo vel deturbatur, vel certè premitur, & in angustiùs spatium cogitur; sic aer aquis insidens ab earundem defluxu distrahitur, vt propterea vel nouus aer aliudue corpus subsequatur, vel ille ipse dilatetur, & in maius spatium extendatur.

datur. Ad hanc autem aeris distractionem attendentes excogitauimus artificium huiusmodi.

Vitreum tubum cylindraccum sesquipedem longum ita accommodauimus, ut alterum eius extremum patulum, alterum verò exiguo foramine pertusum esset (illud quidem vertex, hoc fundum distinctionis gratia vocetur.) At quarta fere longitudinis parte infra verticem collocauimus reticulum ex æneis filis contextum, quod transitum vitreis globulis inhiberet. Tum parauimus orbiculos perforatos aquæ innatantes, in quos tantumdem aquæ ingessimus, quantum satis foret, ut iidem aquis immerfi lentè pessum irent. Iustam verò aquæ portionem in orbiculos vi caloris conijcere possumus: quippe e foramine sursum spectante aliqua rarefacti aeris particula egreditur; vnde mox orbiculus aquæ immerfusus grauior redditur: at foramine deorsum vergente rarefactus aer aquam foras extrudit; atque adeo orbiculus leuior euadit.

Orbiculos hac arte paratos in cylindrum aquæ plenum inclusimus; demum patens in summitate ostium membrana diligenter obturauimus, ut aeri transitus omnino impediretur; membranam autem pertudimus acicula, qua quotiescunque liberet, foramen obseraremus.

Quibus ita dispositis cylindrum ad perpendicularum ereximus, apertoque foramine, quod fundo inest, effluxit aliquantulum aquæ, & continuò sphaerulæ ex reticulo ad supremam aquæ superficiem ferebantur. At verò inferno foramine obturato, dum alterum in summa cylindri parte extans pandebatur, confestim orbiculi descendebant. Item inclinato, quantum satis est cylindro, orbiculi in superficie aquæ innatantes deorsum feruntur: at mox illo iterum ad perpendicularum erecto, orbiculi sursum allabuntur, verumtamen in his cautione aliqua est opus.

Eadem igitur aquæ vis aerem in orbiculis contentum modò comprimit, ut in tubo retorto, modò autem distrahit, ut in hoc cylindro: quamobrem ibi orbiculi leuiiores aqua, quia noui humoris ingressu grauiiores efficiuntur, fundum petunt: at

in cylindro orbiculi aqua grauiores, dum ab iisdem ingesta aqua portio extruditur, leuiiores facti sursum feruntur.

Quicumque autem hæc experiri cupit, diligenter obseruet fundamenta à nobis hæcenus exposita, quibus cognitis facile erit instrumenta construere multo quidem artificiosiora, quæque spectantium animos in admirationem omnino rapere possint. Sed hæc demum ijs fabricanda relinquimus, qui ad popularem auram captandam insudant. Nobis sat est veritatem e puteo erutam experimentis stabilire, & ad abditiora naturæ arcana viam sternere.

Verùm nescio quis aurem mihi vellens, cum inquit aer possit aquam ad altitudinem decem & octo cubitorum attollere, quid est causæ cur aer in summa eius cylindri, de quo nuper loquuti sumus, parte positus distrahitur à pondere aquæ descensum tentantis; quamuis hæc vix ad vnum, vel alterum pedem confurgat?

Equidem hoc argumentum nostras positiones quodammodo infirmare videtur, non quia nos veram causam prædictorum motuum non simus assequuti, sed quia in ijs explicandis usurpauimus grauitatem, pulsionem, & similia vocabula, quæ vt omnibus passim sunt obuia, ita instituto nostro minus congrua videntur. Verùm cum nulla alia significantiora suppetrent, coacti sumus ijs vtî; donec aliquando rem accuratius per proprias loquendi formulas liceat explicare. Interea vt obiectioni aliqua ex parte satisfiat, notandum est ex his, quæ supra sunt demonstrata, nullum fieri posse impulsum inter corpora eiusdem naturæ, & grauitatis; sic neque aqua deturbatur ab aqua, neque aer ab aere; ac proinde cum nulla sit actio aeris circumiecti in aerem, qui ab orbiculis cylindro inclusis comprehenditur, sequitur vt vis ab aquarum pondere manans, aerem supra earundem superficiem constitutum ita distrahat, vt proinde hic aeri circumfuso collatus eò minorem renixum habeat, quò aquæ subiectæ altitudo ad mensuram cubitorum decem, & octo propius accesserit,

Caterùm hæc aeris distractio nequit explicari, nisi æther, idest

idest substantia quædam ipso aere tenuior, atque subtilior admittatur. Enimvero qui liberiore animo rerum contemplationes aggreditur, facile sibi persuadebit aerem distrahi, aut rarefieri non posse, nisi eiusdem particulæ ita inuicem dirimantur, ut propterea inter illas maiora, aut frequentiora fiant interstitia; quæ quoniam ex dictis, vacua esse non possunt necessarii replentur materia aliqua subtili, hoc est æthere. Similiter condensatio, aut compressio aeris, non potest intelligi, nisi per mutuum partium accessum: ita ut inter illas interualla fiant minora, & rariora. Quemadmodum spongia, aut lana distrahitur, dum eiusdem particulæ ab inuicem magis, & magis recedunt; atque relinquuntur interualla aeris, aquæ, aut alterius substantiæ plena: comprimitur verò dum illius partes magis inuicem hærent, ac interstitia minora fiant; ut propterea aer, vel aqua ex iisdem exprimatur. Quicunque verò aliter rarefactionem condensationemque aeris fieri posse arbitrantur, vel vacuum, vel dimensionum penetrationem tacite videntur admittere.

Sed & aduersus hos pugnat experimentum ab ipsa aeris distractione petitum. Si enim phiala aquæ plena præter vnum, aut alterum digitum infra eiusdem orificium, in cuius fundo iaceant orbiculi exiguo foramine pertusi, atque aeri pleni. Tum ex orificio phialæ spiritus exsugatur, & continuo aer in globulis contentus distrahetur; ut liquebit ex ampullis, quæ e foraminibus prodeuntes per aquas sursum feruntur. At vero vis illa, quæ aerem in globulis inclusum distrahit, nullum in aquis interiectis efficit motum: ut constare potest e corpusculis in ijs artificiosè collocatis: atque adeo nulla hic attractio videtur posse fingi. Causa igitur distractionis omnino petenda videtur ab æthere, qui in globulos ingreditur; dum aliquid ex ipsa phiala suctionis ope extrusum, continua corpora urget.

Hinc arrepta occasione videamus num aqua pressioni, & distractioni sit obnoxia, sicut est aer, necne? Enimvero sicut experientia manifestum est aquam à calore, & frigore rarefieri, & condensari posse; ita incertum est adhuc num eadem co-

naturaliquo distrahi possit, & comprimi.

Possset equidem aliquis Physicis innixus fundamentis sic ratiocinari. Cum aqua millies fere densior sit aere, minimum profecto continet materiæ illius subtilis, cuius expressione possit constipari; vt proinde idem conatus millies maiorem compressionem efficiat in aere, quàm in aquis. Quamobrem vix vlla vnquam vis erit, quæ aquam insigniter comprimere, aut distrahere valeat. Quamuis natura ope caloris, & frigoris facile id assequatur, quod nostris viribus est omnino impar. Scilicet vis illa, quæ per minimas particulas agit, superat omnem nostrum conatum.

Quod si periculum facere libeat comprimendæ aquæ, sumito cylindrum vitreum aquæ plenum, ac in eundem immergito quindecim, aut viginti globulos; qui sese inuicem minimo ponderis discrimine exsuperent; ita tamen vt ex his alij in fundo iaceant, alij verò sursum ferantur. Tunc obseruabis minima frigoris, vel caloris mutatione accedente, nonnullos ex illis sursum ferri, vel deorsum: cum tamen vix vlllo conatu aquam compellente efficere valeas, vt quisquam e globulis in fundo iacentibus adiurgat; quemadmodum fieri deberet si aqua comprimeretur.

Idem similiter tentare poteris per organa superius descripta. Nam si cylindri illius recti, vel potius clepsydræ bicubitalis partem dimidiam iuxta orificium hydrargyro, reliquam verò aqua repleas, & mox ostium infra argentum viuum in catino positum immergas, agnosces num aqua distractionem vllam passa sit, cum ex alijs, tum etiam ex globulo, qui vix aquis innatabat: nam hic deinde ad imum ferri deberet. Cauendum tamen ne hydrargyri altitudo tanta sit, vt superstantis aeris conatum exsuperans, effluat, ac proinde ætherem in cylindrum cogat intrudi. Quamobrem fortasse aptior huic experimento erit tubus retortus, cuius alterum crus sit duos, vel tres etiam cubitos longum, alterum verò longè breuius; & illud quidem hydrargyro repleatur, hoc autem aqua (industriū hic poscimus obseruatorem) nam aqua, si fieri potest, ab ingenti impulsu

pulsu argenti viui comprimeretur, quod constare poterit ex globulo in eadem demerso, qui vix descendat: hic enim post aquę compressionem deberet ascendere.

Libellus autem nuper excusus, qui omnimodum aquę renixum ad compressionem demonstrare conatur ex eo, quia globuli pertusi in cylindro aquę pleno, lentę descendentes, vel etiam e fundo sursum adsurgentes, deinceps minimo digiti pressu ad ostium cylindri factō, deorsum velocius feruntur, nihil fere aliud probat, quàm quod aer quoque in globulis contentus comprimatur, & forte promptius quam aqua, sicut ex frigore multo magis aer, quàm aqua condensatur.

Hęc ad te scripsi, vir Eruditissime, tumultuario stilo, & omnino nimis incondite. Excusabis præproperos ingenij motus, quos per festinantiam, atque occupationes, quibus ego distringor, maturare non licuit. Malui autem hęc qualiacumque ad te mittens inconsultus videri, quàm officium diutius procrastinare. Tu interea,

Vine vale: si quid nouisti rectius istis,

Candidus imperti: si non, his vtere mecum.

Romę Idibus Iunij MDCXLVIII.





TH CORNELIVS

Camillo Pellegrino S.



*D*issertationem hanc, quam olim Seuerino nostro efflagitante conscripseram, in lucem proferre constitui Camille non vulgaris amice: Confido enim non iniucundam fore rerum naturalium studiosis, lucubrationem illam, quæ Clarissimo viro, dum in viuis esset, usque eò placuit, ut digna visa sit, quæ eruditissimis suis de Respiratione Piscium commentarijs, insereretur. Nunc autem quando pestilentia omnium quotquot unquam fuisse funestissima, senem doctissimum nobis ademit, & cum multæ illius lucubrationes, tum præcipue operis de Respiratione Piscium complementa intercidere, non passus sum nostras de Aeris, & Aquæ cognatione meditationes perire: libuit enim illas ceteris commentariolis nostris adiungere, tibi que vir eruditissime dicere, qui & Seuerini amicitiam maxime coluisti, & ea instructus es literatura, quam docti omnes merito admirantur, atque suspiciunt.

Neapoli MDCLXI.

DE COGNATIONE AERIS. ET AQVÆ.

Ad M. Aurelium Seuerinum.

QUum olim in perspicienda cognoscendaque piscium respiratione occupatus esses, egisti mecum Vir Eruditissime, vt aliquid ego temporis huic pariter studio impertirem. Fore enim aiebas, vt mihi experimentis, atque obseruationibus instructo facilis pateret aditus ad solutionem illius problematis, subfit ne intra aquas aliquid aeris, qui spiritu ductus aquatiles alat animantes. Ego igitur, ne non in omnibus obsequerer tibi, coepi statim de natura, & qualitatibus aeris aliquid accuratiùs agitare. Tum verò inter complures nouas, atque omnino ante id temporis inauditas rerum notitias, quæ sese mihi passim obtulerant, ipsius aeris in animantium respiratione vsum attigisse videbar. Ergo quoniam hæc haudquaquam contemnenda censueram, libuit Amicis indicare, ac in primis Iosepho Bonaccursio acerrimo arcanorum naturæ perscrutatori. Arrisere viro optimo nouæ cogitationes, visæque sunt dignæ, quæ ad communem studiosorum vtilitatem literis mandarentur. Quapropter pretium operæ, me facturum duxi, si quæstionem de Respiratione Animalium à pluribus iam pridem exagitatam, iterum pertractandam aggrederer: sperabam enim fore, vt noua mea doctrina certissimis obseruationibus, coniecturisque firmiter stabilita, & Physiologiæ studiosis valde prodesset, & tibi Marce Aureli, quod à me exigebas, præstare posset abunde. Iamque hunc ego laborem susceperam, cum aduersantibus fati diu hæc illac mihi fuit pererrandum: interea neque studijs vacare, neque tuis votis licuit satisfacere. Tandem verò cum aliquando post vlyseos errores ad Musas redierim, & si
nondum

nondum satis pacatas, quoniam cœpti operis complementum maiorem postulat moram, quàm tua ferre possit expectatio, in rem fore putavi, si raptim congererem quidquid ad propositam controuersiam dirimendam mihi licuit comminisci. Cæterum an rei veritatem attigerim, tuum erit discernere. Equidem Ego si non rem ipsam, studium certè meum, voluntatemque tibi constanter probabo. Postremò superuacaneum reor meam in differendo libertatem tibi excusare, qui optimè nosti me in rebus Physicis non tam authoritatis, quàm rationis, & experientiæ momenta perquirere. Sed ad dissertationem ipsam, quæ iam sequitur, animum paulisper attende.

Principio conuenit inter Philosophos telluris globum circui ab orbe quodam opaco-pellucido, cuius crassitudinem e crepusculis triangulorum ratiocinio subductam statuunt Mathematici passuum circiter quadragies mille. Hunc vulgò aeris nomine nuncupamus: verùm de substantia, quæ ab hoc aeris complexu ad extimam Mundi superficiem protenditur, dissident Authores. Nam alij ingens hoc spatium, in quo astra ferri, tellusque ipsa, cum sua atmosphæra consistere creditur, prorsus inane constituunt. Quidam verò nostro huic aeri superstruunt puriorem alium, quem mox excipiat igneus orbis Sphæræ Lunaræ ambitu circumclusus. Nam superam cœli regionem ex pluribus planè solidis, & quouis adamante durioribus Sphæris fabricantur.

Sed vacui inane commentum, quod in scholas inuexit inscitia naturæ corporeæ, iam nos luculenter confutauimus in epistola, qua motus omnes ad fugam vacui vulgò relatos, mutua corporum circumpulsioni adscribendos esse ostendimus. Quatuor verò vulgarium elementorum ordinem, atque distinctionem euertit natura Cœli peruia, & æquè, ac sublunaris regio mutationibus obnoxia.

Quamobrem sapienter discernunt illi, qui considerantes phænomena nostro potissimum sæculo in Cœlo tubi dioptrici ope deprehensa, multiplices illos orbes, quos antiquiores Astrologi ad determinandos stellarum motus confinxerant, e rerum

e rerum natura eliminantes, in eorundem locum substituunt pellucidam, ac summè tenuem substantiam, ætheris nomine significatam: secus enim neque de vniuersi structura quicquam certi pronunciare licet, neque præcipuas naturæ operationes explicare. Nam, vt silentio præteream admirandos effectus magneticos; electricasque attractiones, & luminis item, sonique propagationem, quis vniquam de condensatione, & rarefactione aeris verosimilia dicturum se speret, nisi hac ætheris substantia admissa? Profectò enim si rarefactio, & condensatio ita fieret, vt vulgo ponitur, Mundus quandoque deficeret, quandoque verò redundaret, vel etiam nunc aliqua eiusdem pars efficeretur inanis; nunc autem penetratio dimensionum contingeret, quæ sanè sunt absurda.

At verò concessa, vt æquum est, huiusmodi substantia facilis erit aditus ad complura naturæ arcana pernoscentia, ac præsertim ad ea, quæ de Cognatione Aeris, & Aquæ, atque adeo de reciproca horum corporum mutatione, mihi edifferenda proposui.

Nam quod ad aquam pertinet, illam in triplici statu, quasi triformem experimur quotidie. Aliquando enim in glaciem concreta, duri corporis speciem repræsentat: plerunque autem liquentis humoris formam exhibet; & nonnunquam etiam soluitur in vapores, modò densiores opacosque, modò autem rariores, atque pellucidos.

Libet autem perquirere, quomodo vna eademque aquæ natura enumeratas, tres formas possit induere. At eius quidem rei facilis videbitur explicatio, si usurpemus hypotheses incomparabilis Philosophi Renati des Cartes: Etenim aquæ particulæ (quas atomos appellare licebit, non quidem geometrico rigore, hoc est omnino infecabiles, sed Physica ratione, vt sint prima aquæ componentia, seu corpuscula indiuidua, in quæ duntaxat ipsum aquæ corpus naturaliter diuidi vltimò possit) concipiendæ sunt oblongæ, ac teretes, quæ lentius agitatae solutæque, vt facile repere possint, humoris figuram subeunt: verum si implicatae rigeant, glaciem effingunt. Denique si celeriter,

leriter, ac in gyrum quodammodo actæ voluantur, ita vt aliæ ab alijs magis, ac magis recedant, vaporis speciem exhibent.

Hinc autem manifestum esse potest quomodo aer, & aqua rarefiant, atque densentur, vt proinde modò angustiores, modò verò ampliorem molem adipisci videantur: Æther enim, quia tenuissimus est, in cæterorum se corporum poros inlinuat, rebusque planè omnibus immiscet. Porro hanc ætheris admixtionem consequitur raritas ipsa, vel densitas. Quippe densa vocamus ea corpora, quorum particule inuicem quam maximè connectuntur, vt propterea pauca, itemque angusta in ijs relinquuntur interstitia ætheris plena. At rara corpora appellantur, quæ partes habent laxiores, nec ita inuicem coherentes, quin inter eas plura amplioraue interiaccant ætherea interualla.

Cæterum opportunum erit hæc omnia experimentis illustrare. Paretur itaque ampulla vitrea proceriore collo prædita, & crassa ne frangi facile possit; Hanc ad medium fere collum aquæ plenam, igni admovebimus: Nam simul ac calorem conceperit aqua, turgere sensim incipit, donec ad feruorem vsque adacta insigniter excreuisse videatur. Interim si eiusdem ostio velicam omnino inanem, hoc est compressam inferamus, obseruabimus hanc confestim intumescere à vaporibus aqueis sublimia perentibus. Sed ampulla ab igne detracta aqua subsidere, ac in minus spatium cogi incipit.

Demum si ampullam niuibus, nitroque circumsepientes aquam in glaciem concrelescere sinamus, videbimus hanc non modò iterum exundare, sed multò quoque maius spatium, quam antea feruens implebat, comprehendere. Hinc glacies aquæ innarat, & metalla concreta sub iisdem liquatis demersa sursum feruntur: vt propterea manifestum sit, non solum à calore, sed ab ipso etiam frigore ingenti aquam rarefieri, atque in maiorem molem distendi.

Fortassis verò quispiam negabit aquam in glaciem adstrictam raram dici debere, propterea quod appareant in ea conspicuæ bullæ aeris plenæ, cum præsertim rarefactio videatur intel-

intelligenda, cum nulla sensibilis substantia raro corpori admiscetur.

Verùm in his controversia tantum esset de nomine. Cœterùm quod ad rem attinet, conabor hic enarratas aquæ mutationes explicare, & admirandum naturæ opus exemplo, tamquam leui penicillo ruditer adumbrare.

Aquæ igitur particulas oblongas læuesque anguillulis viuis, vel recenter mortuis cum Cartesio comparabimus, vt intelligamus qua ratione moueri, ac inter se repere facile possint. At aquam in glaciem concretam conferemus cum eisdem anguillulis exsiccatas, vel gelu rigentibus, quæ quidem in semetipsas perplicatę impediunt quò minus fluere, ac repere queant: Quinimo cum altera alteri non valde cohæreat, fit vt interstitia relinquantur aeris, aut alterius substantiæ plena. Demum fac singulas anguillas à vi aliqua in gyrum rapi, iam illæ longiori intervallo inuicem diffusæ, valde maius spatium occupabunt. Simile quid atomis aqueis contingere arbitrabimur, dum in vapores illæ soluuntur. Quotiescunque verò vapores eiusmodi motu destituuntur in humorem iterum abeunt; præsertim si eorundem particulae inuicem proximè accedant. Talis autem mutatio manifesta est in vaporibus ab aqua feruida eductis, qui in læuigatam aliquam frigidiorēque superficiem incidentes rursus coguntur in aquam.

Iamque ex his, quæ hucusque memorauimus, perspicua esse potest aeris natura, eiusdemque generatio: *Quippe is, vt est apud Tullium, oritur ex respiratione aquarum: Earum enim quasi vapor quidam aer habens est.* Vnde constare etiam potest maiorem, portioēque aeræ molis partem esse substantiam ætheream; vt propterea nihil aliud sit aer, quàm æther impurus, hoc est vaporibus, atque halitibus e terra eductis inquinatus.

Hinc autem fit, vt aer contrahi possit, ac distrahi, itemque densari, ac rarefieri; & densitas quidem, atque raritas à frigore, & calore excitantur: Vapores enim cum incallescunt vehementius agitantur, ac proinde maius spatium obsident. Contra verò cum refrixerint, quiescunt, ideoque inuicem propius

accedunt. At compressio, & distractio ab externa vi proficiuntur, ut cum in scloppos illos pneumaticos paucis ab hinc annis inuentos, aeris ingentem molem adigimus, vel contra spiritum e vase aliquo ore exugimus. Quamobrem aer densior, aut compressior plurimum continet vaporum; sed rarus distractusue maiorem habet ætheris portionem. Quinimo aer diutius, ac vehementer compressus in scloppo illo pneumatico, cuius modò facta est mentio, in aquam vertitur: cuius causa ex dictis est manifesta.

Quoniam autem animantibus ad respirandum opus est aere multa vaporum copia referto, fit ut in valde excelsis quorundam montium iugis, ubi solet inueniri aer vaporum expers, hoc est puro ætheri affinis, homines haud aliter vitæ munia obire potuerint, quam per spongas humore imbutas, spiritum haurientes.

Nunc ad propositum deuenientes expendamus num aqua sit ex illarum numero rerum, quibus aer admiscetur.

Primum autem liquet non posse intra aquas diutius subesse portiones aereas magnitudinis conspicuæ, nisi interea hæ alicui duro corpori adhæserint, secus ob diuersitatem loci, quem sibi vindicant grauias, & leuias, sursum efferuntur in auras.

Item non posse aquis inesse notabilem aeris quantitatem ex eo licet conijcere, quod aer facile, ac valde comprimitur: aquam verò nullam sensibilem compressionem subire posse, vel hoc vno experimento fate euidenter aliàs ostendimus. Parentur ex vitro, aliaue dura materia, quindecim, aut viginti orbiculi, quorum grauitas grauitati aquæ, quantum fieri potest proximè respondeat, ita tamen, ut dum in aquis merguntur, ex ijs alij pessum eant, alij verò sursum ferantur. Tunc sane si vel minimum frigus aquæ accesserit, alij ex orbiculis, qui in fundo iacebant ad supernam aquæ superficiem enitentur. Nimirum minima noui frigoris accessione aquæ grauitas insigniter augetur, ut idcirco in uorem habeat ad globulorum pondus rationem. At verò nulla vnquam vi poterimus aquam ita compellere, ut propterea quicquam e globulis in imo iacentibus

tibus sursum adsurgat. Sed enim aqua & si frigore condensetur, non tamen externo etiam conatu perinde ac aer, comprimi & in minorem molem contrahi potest.

Non tamen sum necius esse nonnullos, qui aquam comprimi hoc experimento à Bacone Verulamio mutuato, conatur ostendere. Sumunt vas plumbeum orbiculare, quod aqua plenum (foramine per quod aquam intrudere oportuit, plumbo liquenti obferato) torculari comprimendum exponunt, ita ut quod ante sphericum erat, demum lenticularem formam nanciscatur; & quoniam figurarum isoperimetricarum sphaera capacissima est, ut demonstrant Geometrae, inferunt aquam, violenter comprimi, dum in angustiori spatio concluditur.

Sed ostendat quæso si potest Verulamius, aut quisvis alius supradicti experimenti admirator, interiorē vasis plumbei superficiem minime tunc deduci, cum à vi torcularis premente in lenticularem formam redigitur. Mihi enim planè persuadeo vas illud nequaquam posse comprimi, nisi interea eiusdem ambitus distendatur.

Instabit fortasse aliquis contendens aerem in minimas saltem particulas discessum, aquæ commisceri, nec interea in auras efferri: sicuti neque vinum, tametsi leuius aqua, dum eidem commiscetur, separari facile potest, sursumque adsurgere. Item non posse aerem dissectum in perexiguas atomos ab aquæ particulis vndequaue circumseptas, notabiliter comprimi: tunc enim corpora comprimuntur, cum ab illis exprimitur substantia aliqua in eorumdem interstitijs contenta. Sic in compressione spongiæ, aut lanæ exprimitur aqua, vel aer: verumtamen in exemplo supra posito nequit aqua aereis atomis interclusa vasis poros penetrare, igitur nec exprimi.

Verùm hæc ut à veritate, ita quoque à sententia nostra non longè deflectunt. Etenim aer, quem componi intelligimus ex vaporibus halitibusque ætheris admixtis, non dissidet ab aquis, nisi ratione motus, ac interualli partium. Quamobrem si aer in minimas scissus particulas aquæ commisceatur, non retinebit eas qualitates, quas sibi prius vendicabat; namque e halitus,
& va-

& vapores ab aqueis atomis circumsepti motu priuantur, ac in humorem plerumque abeunt.

Cum ea ita sint, tamen deinceps ostendam nunquam fere non gigni aerem ex aquis, non modò circa summam earumdem superficiem, sed & infra, atque etiam in profundo. Siquidem atomi aquæ, seu vi caloris, seu aliunde agitatæ soluuntur in vapores; at vix vnquam absunt causæ, quæ illas vel calefacere, vel aliter agitare valeant; sequitur ergo continuam fieri aeris ex aqua generationem.

Hoc autem vt rationi maximè congruit, ita etiam experimentis confirmari facile potest.

Primum enim si aqua ferueat, vel in eandem mergatur ferum candens, lapis ignitus, aut calx, obseruabimus plures aeris bullas per summam illius superficiem erumpere. Nec verò putes prædictum aerem aquæ prius inesse, sed mox vi caloris rarefactum, ac in maiorem molem expansum, sursum euehi. Quis enim credat tam ingentem aeris copiam in aquis delitescere. Adde quod si opus iteretur, tandem vniuersa aquæ substantia in huiusmodi bullas abibit.

Hoc item multò euidentius experimur in compluribus liquoribus, quibus Chymistæ vtuntur ad dura quædam corpora dissoluenda, cuiusmodi sunt aquæ fortes, quibus metalla comminuuntur, & liquores acidi, qui corallia, & margaritas atterunt dissoluuntque. Cum primum enim dictæ aquæ in exiguos aciemque planè omnem fugientes duorum corporum poros semet insinuare cœperint, protinus erumpunt aeræ bullæ, quæ sursum exilientes, sæpè ipsam cui hærent corpus, iugi motu exagitant.

Rursus. Si vitream ampullam aquæ plenam solaribus radijs exponamus, videbimus infra ipsam aquam passim gigni plurimas aeris bullas inargaritularum speciem gerentes quarum aliæ vitro adhærescunt, aliæ verò sursum in auras exsiliunt. Quod si in prædictum vas immergantur arborum folia, charta scriptoria, orbiculi vitrei, aliaue corpora aquis paulo præponderantia, hæc quamquam primò pessum eant, deinde tamen
foras

foras emergunt sursum delatam à quamplurimis aereis bullulis, quæ dum ad summum aquæ enituntur, ipsa etiam dura corpora, quibus adhærescunt, secum efferunt. Id autem æstare frequentius contingit, propterea quod calor aquam in vapores facile soluit, atque idcirco complures huiusmodi aeræ bullæ progignuntur.

Denum cadauera sub aquis demersa, cum putrescunt, turgent propter nouum aerem in eorundem sinibus genitum, vt proinde fundum deferentia, ad supremam aquæ superficiem emergant, exsiliantque.

Hinc patet non omnino opus esse piscibus alijsque aquatilibus ad summam aquæ superficiem eniti, vt inde hauriant aerem, qui passim inuenitur in eorundem vtriculis. Potest enim aer ille in ipsis piscium corporibus gigni; & exinde in præfatas vesiculas, tamquam in propria conceptacula deferri: si quidem facillimè humor, vt iam dictum est, vertitur in aerem.

Romæ MDCXLIX.





TH. CORNELIVS

Iohanni Alphonso Borrello . S.



Qua tempestate pestis seuissima Neapolim ciuibus orbauerat, angebat me nimis valde extinctorum amicorum tristissima recordatio: ac vnus præ cæteris animo meo obuersabatur M. Aurelius Seuerinus, cuius singularem eruditionem cum magna morum simplicitate coniunctam, admirari, atque suspicere solitus eram. Neque verò vigilanti tantum, sed in somnis etiam occurſabat doctissimi senis recordatio; quæ desiderium mæroremque meum maxime refricabat. Quare vt medicinam aliquam dolori meo facerem, institui nomen amicissimi viri scriptis recolere meis. Igitur epistolam hanc illius nomine conscripsi, ipsisque aliquantò liberius indulſi, vt ægritudinem mærentis animi quadantenus lenirem. Cæterum lusum hunc nostrum tibi Iohannes Alphonse dicatum volui, vt hoc extaret nostræ amicitiae meaeque erga te obseruantiae testimonium sempiternum.


Neapoli MDCLXI.

185

M O N I T V M.



CAue Lector ne te hæc offendat
Epistola, in qua omnia fabulo-
se, quædam verò etiam super-
stitiose ad priscum ethnicorum ritum,
narrantur. Libuit enim leporem, qua-
liscunque is est, figmentis, ac iocosa festi-
uitate consectari. Sapientium vmbras in
Beatorum insulis æuum degere, ea liber-
tate licentiaque protulimus, qua non-
nulli nostræ ætatis scriptores poeticos
Deos hominesque, cum viuos, tum mor-
tuos, in Parnasso ioca seriaque agentes,
confinxerunt. Si quis aliter opinatus fue-
rit, iniuriam faciet simplicitati meæ.



MARCVS AVRELIVS SEVERINVS

C R A T H I G E N A

TIMÆO LOCRENSI

Municipi suo S.



T primùm de vita decessi, cogitare mecum etiam atque etiam cœpi, qua ratione Sapientiæ studia, & literatorum hominum amicitias, quas dum vixeram sanctissimè colui, mortuus quoque prosequi possem. Putabam enim me infœlicissimum fore, si earum rerum, quibus in vita summopere delectabar, vsus mihi post obitum excidisset. Quapropter lethæum amnem traiiciens, etsi valde sitirem, quippe qui ex æstuosa febris perierim, ab undis ardentè expetitis abstinui. Acceperam enim omnes, quicunque huius fluij latices degustassent, rerum planè omnium obliuisci. Ergo sic habeto charissime Timæe me qui memorem esse, ac id vehementer concupiscere, vt vetus illa amicitia necessitudo, quæ mihi tecum intercessit, vigeat adhuc, æternumque perduret. Vtinam verò nobis liceret coram potius, vt olim, quàm per epistolas agere: at quando dispari locorum sorte disiungimur, vtremur bono literarum, ex quibus fructum certe aliquem nos percepturos confido. De voluntate autem tua, vel studio potius, & cupiditate, vt cogitationes nostras, sensusque animi mutuò conferamus, non dubito. Te igitur obsecro, vt quàm ocysimè ad me rescribas, rerumque tuarum statum mihi significes. Valde enim scire aueo
quid

quid tibi post funestam Ciuitatis cladem in magna illa confusione, & perturbatione rerum obtigerit. Quanquam autem persuasum habeo pestilentia non fauere nisi hominibus nequam & improbis, & horum duntaxat conditionem fortunamque extollere solitam esse, tibi tamen ea saltem ratione profuisse suspicor, quod in tanta popularium strage, magnam imperitorum turbam, quæ falsis criminationibus nomini tuo tenebras offundere conabatur, orco demiserit. Sed ut ut est, erit sanè mihi gratissimum, si me de his rebus feceris certior. Prompta tibi & parata semper erit opportunitas mittendi ad me literas: ingens enim multitudo ex omni Terrarum regione quotidie concurrit ad inferos; tametsi non omnibus datum est ad nos adire, & in Elysia valle degere (plerique enim in Tartarum præcipitant) quod sanè dictum oportuit, ut scires eas modò Epistolas mihi redditas iri, quæ traditæ fuerint viro pio, cui desponsus sit, & destinatus nobiscum in Elysio locus. Ego verò (quod me maxime angit, sollicitumque habet) nequeo crebras ad te literas dare: nam præterquam quod ad scribendum nobis instrumenta plerumque deficiunt, nemo præterea in hoc Populo extat, qui tabellarium agens, epistolas ad viuos perferat: Deorum enim Manium austerior est ne dicam iniquior natura, quàm ut hominibus gratificari, vel prodesse velit; ac nulli mortalium fas est hinc pedem referre, superasque euadere ad auras: Sed enim quæ memorantur de Orpheo, Alcesti, Protefilao, Theseo, Hercule, Vlysse, & Æneæ, quibus licuit ab inferis ad viuos redire, rara sunt & perpauca ex omni auo exempla, & munera præstantioris cuiusdam (ut temporibus illis) fortunæ, quæ quidem esse supra sortem nostrarum ætatum agnoscimus. Tandem verò in repenè iam desperata, egregiam operam mihi despondit Momus, qui cum nuper huc aduenisset in familiaritatem suam me amantèr recepit; & ultro pollicitus est se in suo ad superos reditu Epistolam hanc tibi certo redditurum. Neque verò id illi, ut arbitror, molestum erit; etenim ex inferis excedenti patet Auerulostium in vicinia nostræ Neapolis. Cæterum videte te vi-

deor hasce literas auidissimè perlegentem; præterquam enim ex ipsæ scribuntur à viro tui amantissimo, inde etiam veniunt, unde rarò, nec vnquam nisi grauissimis de causis nuncius afferri solet ad viuos. Sed age ad id audiendum te para, quod expectationem tuam facile expleat. Nimirum quid morte obita videre mihi contigerit, quidue hic apud inferos actum, dictum, cautumque sit, scripto prodere institui. Itaque vt primum fato concessi, me iam pallentibus vmbriis permistum Mercurius duxit ad ripam acherontis. Aderant ibi sexcenta millia mortuorum, qui dum traicerentur sollicitè expectabant. Plurima inter hos nostrorum ciuium multitudo, quæ simul ac me conspexit, ingentem edidit plangorem: plerique verò clamabant desperandam iam esse Patriæ salutem, quando vsque eò ferueret pestis immanitas, vt Medicum experientissimum, & morborum insanabilium propulsatorem, oppresserit. Stabat in vltiore paludis acherusæ ripa portitor in dinumerandis obolis ita occupatus, vt transeccionis mortuorum videretur oblitus; quare illum Mercurius his verbis compellauit. Heus Charon ita ne tandem de portitore factus es eruscator, dumque lucri & quæstus satagis, præ cupiditate officij tui rationem non habes? An te non miseret tot animarum procul à fede illis parata miserabiliter eiulantium? Tum Charon vides, inquit, quo loco sint res nostræ Mercuri? vetus est nobis, & penè putris Cymba, quæ cum rimis vndique fatiscat, & omnibus compagibus aquam accipiat, sanè mihi faceffit negotium; nam & magnum laborem tempusque ad exhauriendam sentinam impendo; & vehementer metuo, ne vmbriis confertim accurrentibus, tandem aliquando mergamur. Quamobrem cum ingentem obolorum summam dudum congesserim, & opportuna ista pestilitas maiorem in dies quæstum nobis suppeditet, velim cures vt noua nobis extruatur nauicula, & hæc item ipsa, qua modo vtimur, comparatis ad id opus rebus necessarijs, refarciatur: nam in tanta mortuorum frequentia commodissimum erit binis vti pontonibus, quorum alter alteri alligatus, remulco trahatur. Annuit Mercurius, laudauitque portit-

portitoris consilium, qui tot obolorum millia, non quidem priuato commodo, sed publicæ vtilitati destinauerat. Interea Charon ad nos remeauit, confestimque Mercurius me cymbam conscendere, sibi que in puppi iussit assidere: placuit enim hoc quidquid est honoris, eruditioni dare. Exin omnes acruatim in nauiculam irruere conabantur, sed repulit illos portitor, & paucos tantum, ne multitudo prægrauaret, exacto à singulis nauulo, admisit in cymbam: reliquos autem bene sperare iussit; nam se omnes, quicunque aduenerant, traiecturum promisit, dum modo nec obolis deficerentur, nec eorum corpora inhumata iacerent. Tum multi Neapolitanorum præsertim Ciuium pallida Orci loca eiulatu & plangore compleuerant, quippe qui à transuectione acheruntis arcebantur, quòd proiecti inhumati fuerant, vel adulterinos numos secum attulerant. Iam verò styga transgressus, in Beatorum oras veneram, cum primus omnium mihi obuiam processit Schipanus; postquam autem inter nos, ut mos est, amicissimè consalutauimus, Quid est hoc, inquam, amice, quòd tu mihi repente e vestigio occurristi: numquidnam de aduentu meo præsenferas? at ille, iamdudum te Seuerine opperior; nam cum hic nunciatum esset sequi pestem in Neapolitanos incolas, cepi statim de salute tua sollicitus esse: Sciebam enim certò futurum, ut ubi se quisq; morbo implicitum esse videret, ad te confugeret; teque dira pestilentis halitus contagione pollueret. Nunc quando mea non me fefellit opinio, noli amabò te, diuturni desiderij mei expectationem eludere: Nam quia iamdiu nihil noui ad nos e viuis allatum est, vix enarrare queo, quanta cum auiditate te sim auditurus. Tum percuntari ex me cepit quonam sumptu, atque apparatu hæredes funeri suo iusta soluissent; quæ bibliothecæ lectissimis libris instructæ cura; quis cultus fuisset hortuli, in quo raras exoticasque stirpes magno labore conquiritas, seuerat. Risi inane hominis sapientissimi studium, ac intellexi eisdem mortuos curis sollicitari, quibus detineri viuentes consueuerant. Porro me continere non potui, quin illi obijcerem indignam philosopho ambitionem, & prope nimiam bono-

bonorum cupiditatem: quandoquidem nominis sui memoriam sepulcri potius magnificentia, quam literarum monumentis immortalem reddere studuerat; & cum magnum incongerendis opibus laborem insumpsisset, nullum ingenij specimen, nullum opus ocij reliquerat. Ad hunc autem modum colloquentes peruenimus in ea loca, quæ à viris literatis, & studio doctrinæq; deditis incoluntur. Magna hic eruditorum frequentia. At ij plerumque solent vna congregari, & familiariter degere, quos vel studiorum similitudo, vel ætatis, nationis, lingueque societas coniunxit. Schipanus verò cum videret me efferrè studio visendi populares nostros, in illam me plagam adduxit, in qua Telesius, Campanella, Donius, alijq; viri sapientiæ studio clari spatiabantur. Agnouit me statim Campanella, ultroque accurrens, omnia, quæ præstare tunc poterat, amicitia officia mihi cumulatè reddidit. Postea mirari se dixit, quod ego; qui omne meum studium in doctrina & sapientia collocaueram, vitam in ea Ciuitate egerim, in qua nullus literis bonisque artibus habetur honos, nullum defertur præmium. Ad hæc per Ditem patrem, Deosque manes iurauit nullum ætatis suæ tempus sibi grauius, aut molestius visum, quam quod istuc degerat; vbi cum vix aut omnino non posset inuenire æquum ælimatorum studiorum suorum, coactus fuerat genthliacas vanitates, magicas præstigias, aliasque superstitiosas, & nugatorias artes profiteri, vt gentis imperitiæ gratiam aucuparetur. Telesius verò Campanellam hæc memorantem, inscitiamque leuis & otio marcescentis populi taxantem, repressit; monuitque vt linguam contineret, aut certè honorificentius de illa gente loqueretur, cuius tanta multitudo ad infernas sedes dudum confluxerat, vt facile, si libitum illi esset, nos potuisset obruere: Deinde in me conuersus, de Constantinis, inquit, nostris si quid habes noui, scire velim Seuerine: illi enim cum acumine & industria polleant, non mediocrem mihi spem afferunt, fore vt aliquando illustrent philosophiam, quam ego Aristoteli iampridem mancipatam, in libertatem primus vindicaui. Tum ego, erat olim Contentia

plena bonarum artium & disciplinarum: nunc verò, pace tua Teleſi dixerim, Ciues illi tuo ingenio ſolertiaque planè abutuntur: ſtudia enim doctrinæ, ſalutareſque artes auerſati, ca-
 meditantur, quæ hominum generi perniciem inferant. Quidam autem veteratores, cum mediocriter in literis profecerint, diuina quadam, ſi Dijs placet, arte (cabalam vocant) inſtructos ſe prædicant, cuius ope de re quauis ſciſcitanti reſponſum carmine expreſſum actutum exhibent. Quid valeat ad concilian-
 dam in amicis gratiam, quomodo erui poſſint Theſauri, quis furti, aut necis fuerit auctor, qualis cuiuſque rei ſit futurus euentus, quonam remedio valetudini ſuæ ſubuenire quis poſſit, & ne multis morer, quicquid eſt in rebus quantumuis obſcu-
 rum inuolutumque, ſe arte hac explicaturos profitentur; ac in-
 terea homines ſtupidos, & rationis rerum ignaros, expilant. Hic Donius me interpellans quærebat vtrum nouæ illæ cogi-
 tationes, quas in volumine de natura hominis exarauerat, à noſtris Philoſophis probarentur. Atqui ego in iſtis etiam libris fatum eſſe dictitabam, quando caſu neſcio quo factum ſit, vt
 commentariolum planè nouum, atque elegans, nec iſs quidem innotuerit, quorum omnis cura in peruolutandis phyſicorum
 monumentis inſumitur: at extare tamen (te vero his verbis deſignabam) qui obſcura, & ignota hæcenus commenta patefa-
 ciat, ac illuſtret aliquando. Hæc dum loqueremur, aduenere
 interea Stelliola, Brunus, & alij complures propinqua Patriæ
 cognatione, ſtudiorumque ſocietate nobiſcum coniuncti, qui
 me nouitium Elyſiæ vallis incolam omnibus officijs proſeque-
 bantur. Inde ego magno amicorum comitatu ſtipatus, ea lo-
 ca curioſè peragrabam, in quibus perpetuò nobis eſt habitan-
 dum. Incedentes autem proſpicie-
 mus Parmenidem, Zeno-
 nem, Leucippum, Philolaum, Timæum, alioſque Pythago-
 ræos incolas quondam noſtros, in quadam magni fluminis ri-
 pa inambulantes. Sed cum ego adire illos geſtirem, Stelliola
 quaſi diſſuaſor, conſilij mei, velim, inquit, Seuerine tibi ſua-
 deas barbatoſ illos veteres egregie nobis impoſuiſſe: Nam pro-
 fecto ſi iſtorum auctoritate remota, ea, quæ de natura decer-

nunt

nunt ad rem rationemque perpendamus, facile inueniemus pleraque ab ijs dici prorsus absurdè; Nonnulla verò de industria obscurari, vt interpretantium ingenio ad naturam aliquando reuocentur. Quid autem per Deos immortales ab Antiquis edocti sumus, quod cum his possit conferri, quæ de ratione naturæ accurata obseruatione, ac multa meditatione firmata tradidere Gilbertus, Harueius, Galilæus, Cartesius, Digbæus, Hobbes, alijque huius sæculi Scriptores? Equidem fateor excelluisse veteres in Mathematicis disciplinis; verumtamen & in his etiam docuere Vieta, atque Cartesius ætatem nostram nihil cedere vetustati; vt nihil interea de mea Encyclopædia dicam, in qua ita disciplinarum omnium syntaxim complexus sum, vt vnum hoc opus (absit dicto inuidia) sit instar omnium quæcunque de Theologia, Physiologia, & mathematicis artibus vulgata hætenus fuere. Tum ego subridens, Noui inquam Stelliola ingenium tuum multiplicemque disciplinam; sed vtinam illa vulgò innotuisset; certè enim nostra Neapolis maiori esset apud eruditos omnes gloria. Nunc verò Encyclopædia illa tua, in qua omne ocium tempusque contriueras, periit iam, ac vix tanti operis index, & lucubrationum argumenta supersunt. Sed quid? Næ tu famæ nominique tuo malè consulisti, qui nouitate verborum abstrusæ, & inauditæ doctrinæ caliginem offudisti; cumque multa præclare inchoasses, nullum tamen commentariolum perfectum planè, absolutumque reliquisti; sed genio indulgens subtilissimas cogitationes non sine magno rei literariæ damno passus es perire. In istum, autem sermonem delapsus, institueram etiam Brunum increpare, quod is cum bonarum artium gnarus esset, sua tamen volumina nugis, præstigijque, quàm solida doctrina implere maluisset: At verò Galilæi aduentu nostra interrupta est oratio; hic enim cum nos salutauisset, sciscitari statim cœpit quenam progressum habuisset hætenus Physiologia, quam ipse met omnium princeps ex obseruatione naturæ deductam, cum Geometria felici conatu iugauerat. Præterea numquid noui deprehensum esset in Cœlo vi illius instrumenti, quo acies ad re-

mota

mota cernenda mirificè intenditur; ac demum qualis quantae
 eiusmodi organis facta fuisset accessio. Tum ego rem om-
 nem enarrans dixi desertam ferè iam à nostris Italis veram il-
 lam germanamque philosophandi rationem, quam ipse ille
 à se primum excitatam compluribus editis voluminibus illu-
 strauerat; Sed eam tamen apud Populos externos nulla princi-
 pis, & inuentoris (quod sanè dolenter dixeram) mentione fa-
 cta reuirefcere. Fuisse nonnulla in Cœlo nuper animaduersa,
 quæ quidem minimè abhorrent ab his, quæ iam olim literis il-
 le mandauerat. Quædam porrò esse ab ijs impudenter confi-
 cta, qui vt viro clarissimo pares viderentur, laureolam in mu-
 stacco quæsiuere. Denique multa in vitris perpoliendis, siue
 vñ, ac obleruatione, siue etiam ratione notata esse, quæ ad
 acuendam oculorum vim summopere valent. Quin constare
 iam demum cuiusmodi forma, artificioque fabricanda sint vi-
 tra, in quibus ea lege lumen infringatur, vt quicumque ab vno
 eodemque puncto profilierint radij, ad vnum aliquod pun-
 ctum angustari conueniant: Ex quo mirabiles existunt instru-
 mentorum species, quæ visionem incredibiliter amplificant.
 Vix dum ego finem dicendi feceram, cum ecce magnus exteræ
 gentis concursus est ad nos factus. Primus autem Harueius,
 quem vnum in tanta illa multitudine agnoueram, affari me-
 comiter cœpit, veteremque amicitiam nouis officijs instaura-
 re. Postea verò licentioribus verbis in me iocatus, dixit nullam
 me laudem ex Zootomia promereri, quando in animalium
 extis inspiciendis vsque adco oscitauerim, vt verum sanguinis
 motum, à se olim præmonstratum, non potuerim animadu-
 uertere. At ego fatebar fuisse mihi non ratione modo, sed au-
 topsia quoque testatum sanguinis circuitum, sed nihil tamen
 me ausum in re satis manifesta decernere, vt vitarem nostro-
 rum Medicorum inuidiam, quorum factioni extremum pro-
 fectò fatum ex hoc inuento videbam instare. Tum Verula-
 mius, qui nobiscum aderat, clamabat Britannorum laudi, at-
 que gloriæ maximè inuideri, quòd eorum inuentis exteræ na-
 tiones minimè plauderent; semet opes ætatemque inter expe-

rimenta consumpsisse, nec aliud utique gratiæ consequutum, quam inuidiam. Gilberto pariter de natura magnetis præclare memorant eos in primis obstrepuisse, qui ex illius experimentis, & obseruationibus sibi laudem quæsiuere. Sed cum hæc, & eiusmodi alia complura iactaret Verulamius, Itali nostri inter se clam mustitantes innuerunt discedendum ab ea gente, quæ vi naturæ, atque ingenij elata, cum cæteris nationibus insolenter agere consueuerat. At Schipanus interea, vt Verulamij ardorem impetumque restingueret, fassus est Britannos multum operæ contulisse ad ornandas, & collocupletandas disciplinas, atque adeo de Republica literatorum optimè meritos esse: Sed eam esse Scriptorum fortunam, vt quò quisque foret præstantior, eo facilius obrectatores inueniret. Hæc cum dixisset Schipanus visi sunt sibi plaudere Britanni: At nos illos valere iubentes, in reliqua spatia sedesque literatorum Manibus assignatas ire perreximus. Cæterum quænam umbræ nobis hæc loca perambulantibus obuiam prodierint, & quale cum illis sermones habuerimus longum est persequi. Fortasse verò aliàs hæc ad te scribam subtilius; libet enim ea nunc memorare, quæ ab eruditorum Manibus de Pestecoram Mercurio fuerunt hodie disputata. Fore autem confido, vt præter voluptatem, nonnihil etiam vtilitatis tibi sit allatura hæc enarratio, quæ magnam partem in Sapientium dictis sermonibusque veritatur. At ne diutius morer expectationem tuam, ab initio, quemadmodum res sit gesta, perscribam.

Iam discussa noctis caligine, nouus dies cæperat illucescere, cum Mercurius mortuorum, quos compulerat, agmine iuxta Acherontis ripam dimisso, ad sedes, atque regiones nostras properabat. Nihil verò hic est Timæ, quod mireris, licuisse iam nobis infernas sine Sole domos incolentibus, diei noctisque vicissitudines obseruare: quippe non ita dimetiendi temporis curam abieciimus, vt clepsydri, automatisque machinulis carere velimus. Caue autem, si me amas existimes me quod liberiùs iocari tecum sim solitus, nunc fabulose quicquam tibi narrare. Sed reuertor ad rem. Vbi primum nunciatum est no-

bis aduentare Mercurium, confestim illi cateruatim perreximus obuiam. Tum Cyllenius peraso pinnulisque, & virgula instructus, dicebat se ab Apolline missum, ut cum Sapientium umbris de rebus ageret, quæ famam eius dignitatemque maxime videbantur attingere. Mercurio se socium ad ministrumque Momus præbuerat, qui cum conuocasset Astrologorum concilium, & suum cuique locum attribuisset ex ordine, silentium fieri iussit, efflagitauitque uti cuncti aures arrigerent, & Hermetem Apollinis mandata perferentem attenderent. At Mercurij, si rectè commemini, hæc fuit oratio. Prometheo quàm iam est, peius vellem, is enim hominem ex argilla lutoque finxit, ut esset, qui molestiam quotidie Dijs exhiberet. Et enim hoc vitium habet ipsa mortalitas: scilicet dum delicijs, & voluptatibus affluit, Deorum immortalium prorsus obliuiscitur, & vel fumo parit, atque nidori, quibus cum nostræ opis est indiga, prolectare nos solet: sed si miserijs ærumnilque prematur, statim Deorum aras exagitat, Cælumque omne importuna prece sollicitat. Atqui Apollo maxime vnus omnium videtur vrgeri nequissimæ gentis conuicio; nec porro quicquam illum iuuat, quod quadriugo Solis curru instructus, huc atque illuc totos dies circumuagus feratur, ut lumen cieat, & salutarem calorem, quo terrena omnia, quorum potissimus est in homine dominatus, procreantur, & vigent. Quin illi pro tanto munere rependuntur iniuriæ: Quot enim qualesue de nobis fabulas detrahendi causa narrant mortales? Equidem minime inficiabor dira Apollinem tulisse infortunia; cum & exilio ob interfectos Cyclopes mulctatus sit, & necessitate coactus Admetii iuencas pauerit, latereque apud Laomedontem mercede conductus finxerit; ut silentio præteream infelices amores, Daphnes fugam, atque Hyacinthi cædem. Verumtamen quid gens ingrata eorum, quæ Dij parum decore fecisse dicuntur, memoriam importunè refricat? Sed liceat vsque Poetis insanire, cur tamen Philosophi, quibus nihil videtur esse negotij, nisi ut curiosè res nostras exquirant, audent Soli nitidissimo maculas affingere? Haud impune id tulit lynceus ille Cœli Si-

derumque Speculator Galilæus, qui gloriabatur ea se in Sole Stellisque deprehendisse, quæ nulli mortalium videre ante licuerat; mox enim oculorum lumine captus, nec ipsum quidem Solem cernere potuit; & in tristi cecitatis caligine multam vitæ partem transegit. Sed ut ad id veniam aliquando, quamobrem nunc demum hæc loca mihi adeunda fuere: Notum vobis est Manes, quantam in Terris vastitatem effeceris Pestis illa, quæ nuper nouis incolis municipia vestra compleuit: At nunc scitote in summa Apollinem esse solitudine ob importunitatem mortalium, qui in eum culpam tantæ calamitatis transferunt, & Medicinam quoque proscindunt, quod nullum huic malo remedium inuenire potuerit. Illum verò piget pudetque isthæc audire, quippe ita semper se gessit, ut optimè de vniuersa Deorum Mortaliumque societate videatur meruisse; nec profectò quicquam carius, vel antiquius habuit, quàm ut hominum generi salutaris esset, meritoque posset opifer dici, vtilissimæque artis inuentor. At male sit tibi Homere, qui ad permulcendas otiosorum hominum aures, impias de Dijs fabellas confinxisti, & cum de nobis permulta esses mentitus, tum præterea illud ausus es impudenter effutire, quod olim Apollo ad vlciscendam iniuriam, quam Chryses ab Agamennone acceperat, atrocem pestilentiam in Graiorum classem immiserit, ac ne multis quidem canibusque pepercerit. Sed ut demus hanc impunitatem garriendi poetis, qui, nisi cum furunt, nunquam sapere putantur, quis tamen ferat illorum impudentiam, qui nouissimam hanc pestem ex defectione Solis exitisse prædicant. Quasi verò Lunæ umbra, quando Terras non valde nimis opacat, adeo ærumnosas ciere possit calamitates, cum tamen alterum telluris hemisphærium nunquam non terræ ipsius umbra, quæ noctem efficit, obscuretur. Est genus hominum, quorum ingenia ad nugas potius fallaciaeque, quàm ad bonas artes solidæque disciplinas sunt parata: Hi igitur cum eruditum illum Mathematicorum puluerem nequaquam attigerint, ac vix vnamquam in Cælum suspexerint, satis tamen habent notas, numerosque

rosque in mathematica ephemeride descriptos agnoscere, quo illi studio clari supera atque Cœlestia semper habent in ore, ac de humanarum rerum euentis non aliter pronunciant, quam si Cœli interpretes, summique Iouis essent internuncij. Ceterum omnia quaecunque sunt in Terris, vi siderum fieri contendunt, bella, excursiones, latrocinia, cædes, adulteria, & quicquid sibi ipsis mortales machinantur, Cœlo tribuunt, mox etiam quod bibant meiandque Stellis imputaturi. Sanè autem ista cum Cœlitum plerisque, tum præcipuè Apollinem non leuiter tangunt; is enim, ut nostis, astrorum principatum, luminumque reliquorum moderamen obtinuit. At quandoquidem pessimi lycophantæ, ut suis decretis fidem faciant, nullum aliud proferunt vanissimæ artis fundamentum, nisi auctoritatem eorum, qui præcepta olim Astrologiæ tradiderunt; Ea re vos omnes, qui in Astrologia excelluistis aduocatos volui: vestra enim hoc maximè interest, ut pro veritate, atq; adeo pro nostra dignitate testificemini ea, quæ de significatione atque euentis eclipsium à vobis mandata literis fuere, non aliquo afflatu diuino fusa, nec vlla physica, constantique ratione, aut certa obseruatione firmata esse: sed quod res est leui coniectura, vel potius vana superstitione fuisse conficta: ne deinceps mendacissimi nebulones, dum humanarum calamitatum causas in Solem, & alia referre conantur, ausunt ab auctoritate fideque vestra sumere testimonium. Vos itaque si sapitis, ne Deorum iussa negligite. Quæ cum Mercurius dixisset, statim Momus Thalen Milesium manu prehendit & heu tu, inquit, Græcorum sapientissime, qui in exquirendis astrorum cursibus vsque adeo curiosus fuisti, ut omnium primus defectionem Solis prædicere potueris, age nunc, effare quo sidere, quoue Cœli posita quæstiuola sit olearum mercatura? Est enim fama te olim siderali scientia adiutum plurimum ex hac negotiatione lucrifecisse. Tum Thales iocose, ut videbatur, respondens, lethæi, inquit, laticis potus rerum omnium, quas in vita cogitari, gessique memoriam mihi prorsus ademit. At mercurius interea Astrologos monuit, ut ne tempus in nugis tere-

rent, sed ad ea, quæ ipse præceperat actutum responderent. .
 Iam verò complures se ad dicendum parauerant, cum Petosiris audiri se ante alios postulauit, & contenta voce sic fatus est. .
 Ego quidem Mercuri geram tibi morem, nec verebor palam ferre sententiam de vanitate prædictionum, quæ capiuntur ex astris. Sed vide quæso ne periculosum sit huiusmodi diuinationes tollere, mortalesque monere, vt in posterum resipiscant, deque his rebus, quæ superstitiosa leuitate creduntur, addubitent. . Nam si semel illi animos ex superstitionum laqueis exuerint, vos profectò Dij omnes inhonorati elurietis. .
 Quis enim posthac aras vobis extruet, victimasque mactabit? Non passus est Momus Petosirim diutius proloqui; sed illum interpellans bone, inquit, Astrologe, tu quidem supra quàm oportet in nos officiosus videris; cum enim solam testificationem abs te expectaremus, tu præterea consilium salutare suggessisti. Nunc tibi pro talibus meritis silentium indicimus. .
 Tum Necepsò quanquam ad loquendum compositus videbatur, tamen veritus, vt opinor, Momi cauillationes, clam è confessu sese proripuit. Interea Firmicus ita incitatus clamabat sibi atque vniuerso Astrologorum ordini non parum iniuriæ fieri, quod ad palinodiam adigeretur: esse commune mortalitatis vitium fallere atque mentiri; ideoque vel omne genus humanum exagitandum, vel certè parcendum Astrolegis, quòd in vana fallacique arte versentur. Atqui Momus miror, inquit, quid sit Materne, quod tu, qui nunquam non es solitus assentari mortalibus, nunc tandem Deorum voluntati parere graueris. An verò, quoniam assueuisti mendacijs, piget te aliquando vera fateri? Verumtamen noli putare testimonium tuum alicuius esse momenti. Quis enim est, aut quotusquisque qui nesciat te nimis apertè mentiri, & multa sæpenumero etiam oscitanter hallucinari. Scribis Imperatoris vitam supra mortalitatis sortem esse, atque adeo Cælo, stellisque non subijci. O impudentissimam adulationem! Ad hæc decernis quid Mercurij stella significet, si summum Celi fastigium in genesi nocturna tenuerit: Atqui alterutrum fatearis oportet,

vel scilicet illud tibi excidisse, quod Stilbon à Sole nunquam signi vnus interuallo discedere possit, vel certè te eiusmodi præcepta hyperboreis tradidisse. Sed longum est de ijs omnibus dicere, quæ temerè, & inconsideratè abs te scripta fuere. Vix dum Momus hæc loqui desierat cum quidam de nobiliore familia Astrologi tumultuari, & impetum in Mercurium facere cœperunt, expostulantes, grauiusque quærentes ab illo Astrologiam indicta causâ damnari: Dicebant autem valdè iniquum esse pronunciare iudicium antequam sententiæ perrogentur. Audiendum in primis esse Claudium Ptolemæum, qui artem hanc à barbara superstitione vindicatam, in certas rationes, ac præcepta redegit, & philosophiæ trutina examinauit: Non esse arti imputandum, quod eam aliqui Authores fabulis, & mendacijs contaminauerint, vel quod nonnulli in describenda Cœli facie designandisque astrorum cursibus errauerint. At certè vnum Ptolemæum omni culpa vacare, vt qui & Cœli rationem optimè norit, & quatenus Astrologorum prædictiones progredi possint, physica ratione monstrauerit. Tum Hermes vultu seuerò, & ad maiestatem composito, Face ssite hic, inquit, vmbra procaces, quid obstrepitis, quid me lace ssitis? Eia Ptolemæus vester causam dicat: Vos interea sedete sultis, & quiescite. Absedere iam omnes, subitumque fuit silentium. Mox surrexit Ptolemæus, & sic cœpit effari. Tametsi non ignorem quantam mihi inuidiam paritura sit hæc oratio, malo tamen in odium offensionemque multorum incurrere, quàm vel mentiri, vel veritatem dissimulanter obruere: Omnia enim licere potius philosopho arbitror, quàm contra verum à mendacio stare. Ergo quoniam nunc mihi res est haud sanè cum indocta multitudine, sed cum Dijs sapientissimoque consensu, præ me feram, atque fatebor me nunquam ita desipuisse, vt Astrologorum prædictis fidem vllam adhibendam esse censuerim. Scripsi iam olim apotelesmata, vt obsequerer Syro alijsque nonnullis, quibus visum est superuacaneam fore subtiliorem illam motuum cœlestium doctrinam in libris magnæ constructionis explicatam, nisi etiam accederet vtilitas, quam sibi ex diui-

diuinatione pollicebantur. Hoc autem, quicquid est flagitij (nam me dedecus admisisse confiteor) mihi facile is condonabit, qui secum agitauerit eam viræ legem conditionemque constitutam esse mortalibus, vt populo nonnunquam, scenęque vt dicitur, sit seruiendum. Atqui nihilominus ita ego Astrologiæ decreta tradidi, vt quanta illis habenda sit fides minimè reticuerim: quippe satis superque testatus sum ea firmani parum habere, ac reprehendi non iniuria posse. Sed disciplinæ tamen ratio postulabat, vt quædam dissimularem, multa comminiscerer, ac identidem fictis atque eментitis rebus aliquem veritatis fucum illinirem. Quapropter ineptiores illas Chaldæorum superstitiones vitæui, omniaque (vt in tanta doctrinæ futilitate licuit) philosophicis pigmentis aspersi. At certè nescio quomodo humana credulitas plus auctoritatis, & fidei, quàm speraueram, præceptionibus nostris adiunxerit. Enimuero non veriora esse pythia oracula, quàm nostra apotelesmata censent Astrologi. Valde autem miror cur tantopere illa probentur, quæ quotidie vsus, & euenta refellunt, nec non grauiora rationum momenta deficiunt: Quanti enim argumenta illa æstimanda sunt! Luna vim habet ciendi humores, quia terræ proxima est; atque huius vapores combibit. Saturni stella refrigerat, quia valdè recedit à Sole. Media Martis incendit, quia supra Solem proximè fertur. Phosphoros propter corporis sui magnitudinem humidæ expirationes ex locis terræ vicinis ad se rapit, & alia id genus commenta, quibus tanquam principijs constituta est ars vniuersa. Ad hæc quàm temerè illud creditur, in quo fundamentum Astrologiæ positum est: Nimirum vim quamdam è Cælo sideribusque in Terram diffundi, quæ omnia quæcunque è terreno principiorum genere concreſcunt, moderetur, atque gubernet. At enim quamuis Solis efficientiam viresque res ac euenta demonstrant (quippe eius natura cum tota feruida sit, ceteris naturis calorem, quo illæ viuunt, vigentque iugiter impertit) quis tamen eiusdemmodi vim in reliquis stellis experiri, vel animaduerrere vnquam potuit? Nam quas Astris affingunt occultas vires,

nisi Deorum aliquis præmonstrauerit, mortalium nulli, ut ego arbitror, licitum erit perspicere. Quid verò memorem Astrologorum commenta, fallasque opiniones de Mundi structura? Nemo quidem est nescius me de situ, atque ordine planetarum secus atque se res habet, constituisse. Illud enim præter cætera me fugerat, quod perenni errantium stellarum conuersio sit circum Solem. Quænam igitur habenda fides est præceptionibus nostris, quæ planetarum vires ex situ decernunt? profectò enim si stella Martis propter Solis propinquitatem incendat, quanto magis exurant Venus, Stilbonque qui propioribus circum Solem orbitis se conuertunt? Atqui non ante finem dicendi faciam quàm ostendero perperam Astrologos nostra citare apotelesmata, ut probent pestilentia in ita- las gentes iam dudum sæuientis, nullam aliam fuisse causam, quàm Solis Eclipsim, quæ proximè præcessit. At mirari potissimum licet, quàm belle egregij isti vates de peste diuinauerint, simul ac omnia passim loca vialque mors complerat exanimis corporibus, acervatimque cadauera accumulauerat. Agite igitur expendamus quam aptè illa decreta, quæ ex nostris præceptis sumuntur, quadrent euentis. Scriptum quidem est in nostro tetrabiblo calamitates, & ea quæ prouincijs vrbibusque generatim eueniunt, ex Lunæ Solisue potissimum defectionibus existere, atqui in his consideranda esse tum loca, seu regiones ad quas pertinent effectus, tum etiam tempus, genus, & naturam euentuum. Hæc verò ita exposita sunt, ut latius patere videantur, ac in plures casus disparilesque exitus possint accommodari. Quæso enim à vobis, ut has præceptiones ad nouissimam Solis defectionem dirigatis. Primum autem existimandum ad ea loca attinere effectus, quæ leonis signo, in quo nimirum Luna cum Sole congressa est, eiusque trigono subijci putantur. At verò quam latè eiusmodi regiones recensentur? Scilicet Britannia, Belgium, Germania, Italia, Iberia, aliæque plures prouinciæ talem in numerum ascribuntur. Atqui pestilentia postquam Neapoli cepit, est grassari in eas duntaxat regiones est peruagata, quibus ob loci propinquitatem, aliamue

causam cum peste affectis commercium fuit, nec sibi satis à contagione cautum est. Rursus in quadrupedibus damnum minatur leonis signum, in quo Sol defecisse visus est: Verumtamen bipedum tantum, ni fallor, hæcenus clades fuit. Tandem verò eiusmodi fuit Martis, & Saturni, Lunam Solemque obsidentium in hac eclipsi constitutio, vt ex illa prædici potuerint bella, seditiones, vrbium excidia, depopulationes, Principum indignationes subitæ neces, rapinæ, latrocinia, Iuuenum, senumque interitus, frigus, & æstus, morbi diurni, & celeres, vastitas, caritas, & ne multis morer, nihil adeo ærumnosum calamitosumque hominum generi potest obtingere, quod ad istam Solis defectiouem iuxta apotelesmata nostra referri non queat. Possem alia multa de Astrologiæ vanitate dicere, sed nolo esse longus; concludam tamen ita omnia huius artis decreta futilitatis plena mihi videri, vt nihilo magis desipere eos putem, qui fidunt illis, quam qui multum operæ laborisque in iisdem refutandis infumunt. Dum hæc loqueretur Ptolemæus, fremebant Hali, Cardanus, Naiboda, Maginus, alijque Astrologi illius sectam disciplinamque prosequuti. Atqui Mercurius approbavit eximij mathematici sententiam, laudauitque ingenuam eiusdem confessionem. Momus autem Ptolemæi assentationem leuiter notans, commendabat Copernicum, Braheum, Keplerum, Lansbergium, & Galilæum, qui cum in cæteris Astrologiæ partibus excelluissent, hoc prædictionum genere minime vsi fuerant: mox ad Cornelium Agrippam conuersus ab eo postulauit vti more atque exemplo Ptolemæi Astrologiæ vanitatem fateretur: at ille aiebat se olim omnia, dum viueret, expleuisse; nec Astrologiam tantum, sed plurimas etiam artes confutasse, earumque futilitatem ac falsitatem editis iam voluminibus promulgasse. In eandem ferme sententiam loquuti sunt Sixtus Hemminganus, & Marsilius Ficinus. At nonnullis subturpicula videbatur palinodia: quapropter mussabat confessus, iamque dissonis vocibus subsellia perfonabant, cum Mercurius iniri cæterorum suffragia, ac numerari sententias iussit. Quanquam autem multi sunt inuenti, qui
in pro-

in propugnandis Astrologiæ decretis pertinaciter obstinarent, omnes tamen quicunque cogitationes suas ad rationem reuocare consueuerant, eius artis fallacias testabantur: hi autem & si minus numero, auctoritatis certè pondere præcellebant. Momus interea eorum, qui abnegauerant chirographa testificationesque excipiebat. Cæterum Mercurius cum satis superque ab Astrologis sibi factum esse videret, Medicos aduocauit, cum quibus longum sermonem habuit. Initio autem multa differuit de Medicinæ dignitate, deque summa difficultate, quam habet hæc ars: deinde memorauit honores penè diuinos, quos primis medendi artificibus decreuit antiquitas. Tum dolere se dixit Medicinæ vicem, grauiusque ferre, quod ars illa, cuius origo Cælo dicata, Dijsque fuerat adscripta, iam demum in hominibus vilissimis, atque nequissimis exordiret. Ad hæc detestari Medicorum flagitia cepit, atque in eos vehementer inuchi, qui naturæ contemplatione, bonisque artibus posthabitis, satis habent promissam barbam pascere, & obsolescentiori habitu, atque vestitu perridiculam quamdam grauitatem affectare. Præterea intolerandam aiebat sibi videri illorum impudentiam temeritatemque, qui cum tempus industriamque triuerint in his perdiscendis, quæ minus nihilo sunt, nec ad sanationes malorum quicquam attinent, omnibus tamen quicunque in humanum genus inuadunt morbis, salutarem medicinam pollicentur, audentque ipsi etiam pestilentia non suo minus, quam ægrotantium periculo inutiles curationes adhibere. Ad extremum summis medendi magistris, edixit, vt rationem inirent, quemadmodum labanti medicinæ sit occurrendum, consulendumque mortalibus, quos Medicorum inscitia ante diem exhæredes vitæ facere consuevit: itemque perpenderent vtum expediat pestes obfessos medicaminibus tentare, an verò nulla pestilentia sit medicina, respuatque id malum medicæ artis auxilia. Vix dum Mercurius finem orationi suæ fecerat, cum circumstantium turba quidam profilit, caperata fronte, oculis toruè tuentibus, hircina barba, ac omnino monstruosa deformitate ridiculus: Vnum aliquem ex

Caprigeno Satyrorum genere te intueri dixisses: Is autem ubi omnium ora, atque oculos in se vidit esse conuersos, frontem contraxit, & sapientem barbam manu permulsi: Deinde vero post longas excreationes, caput horrida voce profari. Primum autem multa de se ipso, deque suis studiis atque conatibus gloriosius prædicauit; mox rationem proposuit, qua instaurari medicina, atque in pristinum statum deculque posset restitui. Nimirum compescendum esse dixit ingeniorum æstus, præcidendamque Medicis libertatem nouandi, excutienda item de manibus discentium Chemicæ studia, submouendos Paracelsi, Helmoutij, Harueij, & aliorum Nouatorum libros ad vnius tantum Galeni lectionem adigendos omnes, quicumque Medicinam factitare voluerint; sic enim fore, ut ij certas medendi rationes, ac præcepta seruantes in morborum curationibus feliciter progredierentur; atque adeo ignominiam, calumniæque vim prorsus effugerent. Postremo de pestilentia ad hunc modum decreuit, necessum scilicet esse, conquisitis rationibus atque argumentis, de illius natura disceptare, ut constare tandem possit, utrum pestis intemperiei, an totius substantiæ sit morbus; hoc autem cognito, curationem quoque cognitam iri, & intemperiem quidem contrarij appositione depelli, totius autem substantiæ morbum alexipharmacorum usu sanari. Hæc ille & complura eiusmodi, quæ memorare piget, insulsa loquacitate iactauit: at omnia protinus magno astantium risu, atque cachinnis, ut par erat, accepta fuere. Sed cum interea ingens perturbatio, clamorque concitaretur, cauit Mercurius, ut ne quis iniussu ad dicendum suo, prodiret. Tum Hippocratem, cuius magna apud omnes esse videbatur exultimatio, primum eloqui iussit: itaque cæteris silentium fuit, ille vero sic inquit. Medicina artium omnium præstantissima Deorum munere beneficioque data mortalibus, deprauari iam tum cæpta est, atque euilescere, cum primum ab studio sapientiæ ad mercedem quæstumque fuit abducta; sed enim quicumque in quæstuosa arte versantur, omnem operam industriam cogitationem mentem denique omnem in-

pecunia figunt: præque argento famam gloriam doctrinæ studia, cæteraque mortalitatis decora atque ornamenta contem-
nunt. Quare sic mihi perspicere videor abiectiorem sordidio-
remque in dies fore medicinæ conditionem, vsque dum disci-
plinam suam Medici mercede locauerint, & præclarissimam
artem turpiter seruire coegerint. Ergo vt sua medicinæ laus di-
gnitasque reddatur, in rem, ni fallor, fuerit, vt ijs duntaxat me-
dendi facultas concedatur, qui non auditate numorum potius,
sed sapientiæ studio ad hanc artem feruntur. Sic enim medici-
næ tractatio ab illiberali, sordidoque quæstu soluta, & ab auar-
itiæ crimine liberata, hominum generi maximè salutaris esset,
ac optimo, & nobilissimo quoque dignissima. Quin etiam
abstrusa difficilisque disciplina quotidie illustraretur ab his,
qui vel occulto quodam naturæ iussu ad eam inflammati ra-
piuntur, vel laudis gloriæque percupidi in discendo, quàm in
adipiscendo malunt occupari. Cæterùm de pestilentia tantum
habeo dicere, me nunquam hoc morbo laborantibus medici-
nam fecisse, nec ullam in Templo Æsculapij schedam inspe-
xisse, quæ remedia pestis indicaret. Nam quod memoriæ pro-
ditum est Atticam olim mea cura ex imminentis pestilentiæ
impetu ereptam seruataque fuisse, ad præcepta potius ciuilis
prudentiæ, quàm medicæ professionis est referendum. Quid
quod multa mihi tribui video à nominis nostri studiosis, quæ
(vt verum loquar) vel omnino sunt commentitia, vel certe
mihi prorsus excidere. Incredibile est quantis plausibus, quan-
taque admurmuratione commendata fuerit Hippocratis ora-
tio. Ipse ille Deorum hominumque obiurgator Momus non
recusauit summam nobilitatis, doctrinæque laudem sapien-
tissimo Seni tribuere. At vnum tamen hoc haudquaquam ce-
lauit, multa de illo græcula vanitate, ac populari fide falso nar-
rari, quale illud est, quod e prolapia Deorum fuerit, itaque
naturæ rationem virtutesque omnes tenuerit, vt tam fal-
lere quàm falli nesciret. Nec id quidem reticuit, quod pleri-
que mortalium non reducti, sed opinione istius auctoris sen-
tentias cum diuinis oraculis auderent exæquare; quin multa

quoque essent multorum subinsulse absurdeque dicta, quæ quoniam ex eius disciplina effluxisse putantur, in omnium ore vigerent, & stultissimè crederentur. Tandem non veritus est dicere Hippocratem de ægrota ac prope corrupta medicina ita ratiocinatum fuisse, ut diligentior in aperienda morbi causa, quam in curatione præscribenda videretur. Hæc cum dixisset Momus, loquendi potestas facta est Herophilo. Ille verò aiebat medendi scientiam in recondita multiplicesque cognitione positam esse, quam nemo possit assequi, nisi qui ingenio valeat, omnemque laborem industriam, & rationem ad rerum naturæ contemplationem conferat: idcirco ab se conditam subtiliorem illam sectam, cui studium in primis fuerat scrutari hominum corpora, causasque valetudinum oculata fide recognoscere, & præterea herbarum, rerumque omnium, quarum in medicina usus esse potest, vires & effectus inquirere. Sed postea Medicorum inscita inertiaque factum esse, ut secta hæc atque institutio defereretur, ac in his medicinæ professores potissimum occuparentur, quæ garriendi magis, quam medendi rationem videntur attingere. Dandam igitur esse operam, ut Medici rectiorem illam viam à se olim monstratam denuo in-
eant, & adhibita frequenti dissectione perquirant qualis nam cordis, & venarum sit pulsus, per quas vias sanguis fluat refluatque; quonam motu alvus & intestina cieantur, & alia eiusmodi in viuis dumtaxat exploranda, ut constare iam demum possit quem usum, & quam vim quæque pars habeat. Herophilum plura loquuturum repressit Mercurius, qui detestatus est immanem illius carnificinam atque crudelitatem, quod vi-
uorum hominum aluos, & præcordia inciderat, artemque salutis humanæ præsidem atrocissimæ internecioni deuouerat; quum alioqui liceat pari sanè fructu, at sine scelere extispicere nam in brutis animalibus exercere. Tum Erasistratus, quoniam hoc sermone se quoque notari videbat, erubuit, at nescio quid cum Archigene secretò colloquutus se in mediam turbam, confertamque multitudinem abdidit. Interea ad dicendum surrexerat Asclepiades, qui ad rhetorum morem compos-
fitus,

situs, elegantem ornatamque habuit orationem. Totus autem in eo erat, ut ostenderet medendi rationem vulgò usurpatam, plus incommodi, quàm adiuventi afferre mortalibus; ut quæ periculosas ancipitesque in valetudinum curationes præscribat, & ferrum ignem atque pharmaca ipsis morbis nocentiora, & molestiora sæpissimè adhibeat. Multis præterea grauibque argumentis docebat medendi viam à se olim tritam ceteris anteferendam, quod omnium tutissima foret: quippe cum acriora medicamenta, & remedia vehementiora sustulerit, omnemque curam confixerit in victus ratione, frictione corporis, ambulatione, & gestatione; quæ quidem auxilia nec valde iniucunda sunt, nec hominum naturæ nimis infensa. Denique præ se tulit medicinam haudquaquam inutilem peste laborantibus fore, si ea potissimum adhibeantur, quæ manantibus corpusculis iter aperiant, expirationes cieant, & vitalem vim actutum promoueant. Finierat Asclepiades varia cum adclamatione. Sed Momus cum illius ingenium eloquentiamque magnis laudibus extulisset, non veritus est deinde nonnullam eidem labeculam aspergere: Subiecit enim morbos non facundia, sed remedijs curari; ac perperam eos facere, qui relictæ efficaci medicina, ægrotantibus blandimenta, illecebraque proponunt: denique omninò detestabilem esse illorum impudentiam, qui valentiora medicamina; quorum usum minimè norunt, audent procaciter improbare. Senferat Asclepiades se momi sermone perstringi, quare excusationem parabat. Sed Mercurius ne longius res procederet, statim Theſsalum monuit, ut loqueretur. Hic autem quanquam liberrimi oris, Deum metuebat, quoniam tamen, & ipsi dicendum aliquid fuit, sic inquit. Qualis ego quantusque fuerim medendi artifex, Dijs hominibusque arbitror esse notissimum; quippe vnus ex omnibus extiti, qui vera tuendæ valetudinis, curandorumque morborum decreta præscripserim; nouamque condiderim sectam, quæ omnium quot quot ante fuerant, medicorum placita delere potuerit. Sed ut primum inter viuos esse desij, medicinæ studia, quorum nullum apud Manes usum fore intel-

tellexeram, deferui, curamque ad ea retuli, quæ mihi cum vmbribus versanti in rem essent. Interea omnia quæcumque de medendi ratione meditatus ante fueram, mihi fateor excidere. Quamobrem vehementer doleo, quod ad ea, quæ à me postulastis, nihil planè queam vel meo ingenio, vel vestra expectatione dignum respondere. Gestiebat Momus aliquid eloqui, cum Mercurius Galenum iam iam surgentem, & ad dicendum paratum, protinus inuitavit. Mirum quàm studiose cunctus pene confelsus Galeni sermonem attenderet: itaque omnes propemodum aures erexerant; ille verò vberissimum fundens verborum flumen sententiam suam capit expromere. Initio autem se ipsum magnificè iactans memorabat vti iam inde ab adolescentia Nikonis parentis sui ductu atque institutione ingenuas artes, liberalesque disciplinas nauiter hauërat, donec somnijs ita monentibus animum ad medicinam transtulerat, cuius notitiam tanta felicitate fuerat asecutus, vt omnes quot sunt, quotque fuere Medicos, vel famæ celebritate, vel editorum voluminum copia superare potuerit. Præterea commendabat summopere methodum, qua ipse in inuenienda, tradendaque medendi scientia vsus fuerat: aiebat enim indefesso festudio cura, & peregrinationibus admiranda artis, naturæque opera vestigasse, & certas demonstrationum leges quasiuisse, quas e geometricis theorematibus magna industria ad medendi artem traduxerat. Quippe geometrarum more Medicinæ fundamenta locauerat, & axiomata suæ artis constituerat. Omnia ex peruulgatis quatuor elementis conuolucere, & rerum naturam ex principum qualitatum temperatione pendere quarum symmetria sanitatem, dissidium verò morbos, & mortem efficeret. Omnes præterea qualitates ex principibus oriri, rerumque omnium vires ex elementis prodire. Contraria contrarijs curari, calidum frigido, humidum sicco, & cœtera, quæ ex dictis nullo penè negotio deduci viderentur. Hanc verò ille viam facilem esse dicebat, aptamque ad disserendum de his omnibus, quæcumque in medicas disceptationes cadere possunt. Si quæ verò ex hisce fundamentis minus
aptè

aptè deriuarentur, occultis qualitatibus esse adscribenda. Hæc ille, & eius generis alia de ratione, qua suæ artis principia constituerat, pluribus verbis, & nimis, more suo, copiose disseruit. Mox etiam ausus est dicere Deos de ipsius salute mirificè fuisse sollicitos, quod ad illustrandam, perficiendamque medendi artem natus videbatur: ac proinde Antonino expeditionem in Germanos apparanti, eumque secum adducere cogitanti, Æsculapium præcepisse, vt ne ipsi libertatem viuendi præcideret, progressusque in doctrinis obturbaret. Multa item de consilio Deorum se fecisse prædicabat, ac interdum etiam insomniorum monitis ductum, præscripsisse valetudinis curationem. Præ se enim ferebat se manus arteriam semel, atque iterum incidisse, vix vlla impulsu ratione, sed ita quidem iubentibus somnijs. Iam verò Galenus dicendi studio incitatus, se ipsum, & sua studia impensius efferebat, cum Helmontius submissa voce agens, tantum vt proximi confessores audirent. Hui, inquit, Ecquando præclarus iste nugator finem garriendi faciet? Parum ne est quod perniciosam illam, & maxime sanguinariam sectam instituit, quæ plurimas omni tempore orbi abstulit illustres animas impunè, & vindice nullo? Etiam ne audet Manes tandem infestare, & insolenti ista loquacitate aures nostras obtundere? Audijs hæc Momus, plausitque homini ad loquendi licentiam libero; Tum demiror, inquit, Helmonti quid sit quod pestis, quam iugulatam, extinctamque iam pridem condideras tumulto, nunc denique reuixerit, ac in mortales, impendio magis grassetur. Atqui ille se excusans aiebat inuidisse suis conatibus fortunam, quandoquidem nec Alchaesti compositionem assequi, nec mirabile medicamentum ex bufonibus paratum, fata sibi dum viueret, experiri permiserant. Dum autem in eiusmodi sermonibus occupati Momus Helmontiusque pressis labijs commurmurarent, Galenus interea incitata, & quasi exaggerata altius oratione de pestilentia diserebat. Porro autem Paracelsus, Seuerinus Danus, Dornæus, Crollius, & alij complures fumi, carbonumque nigrore lquales, palam fremere, & obstrepere cœperunt. Qua-

propter Mercurius Galeni sermonem interrumpens, fatiſ, inquit, Medicorum diſertiffimè eleganti tua oratione noſtras aures detinuifti. Nunc quoniam Chymiſtæ dicere aliquid geſtiunt, patere quaſo, vt illos pauliſper audiamus. Tum Paracellus nihil cunctatus exiluit, cœpitque continuo omnes omnium ætatum Medicos licentioribus verbis incellere: ac in Galenum præſertim inſultans, præ ſe tulit, atque profeſſus eſt nullam vnquam in orbe terrarum extiſſe peſtilitatem, quæ mortalium generi cladem maiorem inſulſiſſet, quam iplius medicinam. Multa deinde de ſua doctrina induſtriaque prædicauit; nec verò cum dicere puduit ſe vnum extiſſe, qui Medicinæ inſtaurator reformatorque, ac artium planè omnium monarcha meritò ac iure poſſet nuncupari. Poſt hæc orſus eſt de peſtilentia dicere, ſed ſententiam ſuam inconditis verbis, & inaudito quodam dicendi genere obſcurabat. Aiebat enim peſtem ſecundum philoſophiæ techellicæ fundamenta eſſe Cometa Microcoſmi, cuius viſ in eo eſt poſita, quod arſenicalis aer in ſua regione concluduſ, ex primo corpore genitus, & ab yleido ſecretuſ ad tartarum ceſſit, quo circa per id temporis mors arſenicali lancea per firmamenti baſiliſcum corpus humanum tranſfigit: fieri autem peſtilentiam per proceſſum virtutiſ microcoſmici elementi aquæ, eodem planè modo, quo rana progignitur: quancuncque videlicet Mercuriuſ ex venefica vi à Soliſ eueſtro ſibi delata exaltatur, ac lethale virus concipit ex quincuplici ente diuino, aſtrali, pagoyco, venenato, & naturali. Plerumque verò excrementa ſtellarum peſtiſ eſſe prænuncia, & ab eorumdem forma, atque figura, futuri morbi genus poſſe prædici. Cœterum poſtquam de natura, differentiis, ac ſignis peſtium tali quodam modo diſſeruit, complura deinceps de earumdem curatione ſubiunxit, noua quædam, & inaudita, ſed pleraque etiam ridicula, & aniliſ cuiuſdam ſuperſtitioniſ plena. Quæ cum aſtantes audirent ridere protinuſ, & cachinnari cœperunt: at Eraſtuſ iracundia percituſ proclamabat puniendam eſſe effrenatam impudentiſſimi Circulatoriſ audaciam, vlcendiſſamque iniuriam,


riam, quam ille vniuersæ medicorum familiæ ausus erat inferre. Hic Momus leniter arridens, Nolite, inquit, Manes existimare Paracellsum nugari, aut certè desipere, quod nouam inusitatamque cum loquendi, tum philosophandi viam inierit: quippe solebat ille olim dum inter viuos degeret epoto assatim meraciori vino ad Epicuri intermundia diuertere, vnde & inauditam, vestroque orbi prorsus incognitam medendi rationem arripuit, & nouum etiam sermonis genus edidicit. Dehinc ad Mercurium se applicans, propiusque admouens: Næ nos, ait, planè ineptire videmur qui tantum temporis in auscultandis medicorum nugis insumpsimus? At quæso quousque nostras aures ab importuna istorum garrulitate patiemur exagitari? Ille autem subridens rectè, inquit, Mome loqueris: atqui nihil medici antiquius habent, quàm mutua inter se iactare conuicia, & intempestiua loquacitate garrire. Ecquis verò ausit nugandi veniam illis denegare, quibus concessa est impunitas occidendi? Sed heustu num tibi graue ac molestum est hic amplius immorari? At verò mihi certum est deliberatumque non ante hinc discedere, quàm Stelliolam disserentem audierim. Nam hic profectò mihi videtur singulare aliquid, nostraque dignum expectatione esse dicturus: quippe cum cæterorum medicorum dissimilis, indolem nescio quàm probitatis speciemque præ se boni viri ferat. Tum Stelliolam cunctabundus, & quasi verecundans huiusmodi quadam oratione exorsus est. Ego verò Dij immortales huc ignarus quid ageretur adueneram. Nam certè non ausus essem inter medicos considerare si fore putassem vt mihi non audiendi solam, sed dicendi etiam ratio esset habenda. Ecquid enim de his, quæ medendi scientiam attingunt vestris auribus dignum ego tandem expromserim, qui omnium minimè in medicina facienda laborarim. Verumtamen quoniam me quoque post celeberrimos viros effari iussistis, vos oro vt patienter bonaque cum venia mea verba veritatis studio licentiùs iactata, exaudiat. Principio quod attrinet ad medicinam videre mihi video r vix reparabilem esse illius casum, nisi Apollo artem inuentioni suæ con-


fecratam labantem, & propè cadentem fulserit, & tandem aliquando firmioribus præceptis certioribusque rationibus fundatam instaurarit. Etenim vero studia illa præceptioneque medendi, quas Græciæ monumentis tradita hausimus, nil fere aliud continent, quam inanes coniecturas, & absurda commenta, quæ ad sanitatis tutelam, & valetudinis curationem ineptissimè referuntur. Viguit iamdiù vigetque etiam celeberrima rationalium secta, quæ garrulis distenta disceptationibus ad loquendum est aptior, quàm ad medendum. Clamant utique atque testantur rationales medici nullam esse medendi scientiam, nisi corporum rerumque ratione comperta. Sed quis rerum initia nouit? Quis humani corporis structuram vsumque partium, & naturales actiones complexus est animo? Quis abditarum, & morbos continentium caussarum scientiam est assecutus? medici igitur, qui rationales videri volunt, quàm profitentur scientiam omnino ignorant. Ex quo fit ut ancipites periculosasque curationes morbis admouere cogantur. Vetus iam est, & maiorum exemplo cunctis ferè in morbis vsitatum sanguinem mittere, & corpora perpurgare. Sed quali, Dij immortales, ratione quæue coniectura hæc instituunt remedia? Scilicet vim naturamque sanguinis minimè norunt; Nam quod illum aiunt in iecinore gigni, atque inde per venas in omne corpus ad partium nutritionem diffundi, falsa potius ratiocinatione, quam certa argumentatione aut obseruatione concludunt. Tamen si audio recentiores quosdam præstantissimos artifices verum sanguinis motum vestigasse, eiusque originem vtilitatemque editis voluminibus aperuisse. Purgantium item pharmacorum, quorum vim, & effectum vident, caussas profectò ignorant. Nec verò quisquam hæcenus agnouit vias, per quas humorum illuies ex vniuerso corpore ad aluum deducatur. Sint autem hæc rationalis medicinæ flagitia; at certe culpa non vacat Empirice: quanquam enim ad curandi rationem plurimum conferat experientia, & salutaria quædam remedia mortales longinqui temporis vlu ac periclitatione perceperint; Sæpe tamen obseruationes ad exemplum inutiliter

tiliter reuocantur: Neque eadem omnibus etiam in similibus casibus opitulantur. Quid quod perpauca tot sæculis, tantisque ingenijs annitentibus animaduersa sunt medicamenta, quorum vñ morbi certò tutoque curentur. Quæ cum ita se habeant non iniuria reprehendetur ars illa, quæ ignotis rebus fallacibusque præceptionibus continetur. Porro autem quis ferat illorum impudentiam, qui dum in arte medendi præstantes videri volunt, ingenij exercitatione, doctrinæque studijs posthabitis, ad gloriam famamque popularem dolis atque astu contendunt, & quantum quidem disciplinis bonisque artibus deficiunt, tantum illecebris, & affectata grauitate supplere conantur. Ceu verò magnum opus sit obstipo capite incedere, capillos tondere, & luculentam pascere barbam, vultum inducere grauem atque feuerum, quascunque inter gentes, & in omnibus sermonibus colloctionibusque aphorismos, & sententiolas aliquot ingenti verborum volubilitate fundere, & alia eiusmodi, quæ mulierculis, & imperitæ plebeculæ magnam pollicentur sapientiam. Sed quid ego medicorum officinas technasque commemorem. Vox me tempusque deficiet, si quæ dici possunt de huius gentis improbitate coner exprimere. Ceterum de pestilentia sic equidem arbitror nihil hæctenus Medicorum studio conatuque fuisse conquisitum, quod funestissimi mali causas vel curationem attingat. Miror autem cur tot, & tanta quotidie de peste volumina exarentur, cum nemo non fateatur incomprehensam esse illius naturam, & omninò ab humana intelligentia remotam. Scilicet insitum est nonnullis quantò minus sciunt quæ scribunt, tantò plura conscribere. Neque verò tantum ego, mihi sumo vt quod alij ignorauerint, id scire me putem: quippè persuasissimum mihi est medicinam multum habere caliginis, nec pestilentiae modò, sed cæterorum etiam morborum causas esse inexploratas. Nec profectò diffiteor medendi artem quandoque in agendo feliciorẽ esse, quàm in contemplando. Videmus enim morbos plerumque non percepta causa curari, & vtiliora remedia consilio, vel certa ratione, verum casu periculosisque

experimentis esse comperta . At verò in exquirendis medica-
 mentis, quæ pestem abigant vsus ratioque mortales planè defe-
 cisse videtur . Sed cum mihi iam obrigerit aliquando; vt mor-
 tiferæ contagionis vim effectusque propria obseruatione per-
 ciperem, & multa cum in languentibus experiendo, tum in
 mortuis exta inspiciendo animaduertentem, teneor profectò
 aliquid ex his, quæ mecum ipse sum commentatus exprome-
 re . Visum itaque mihi in primis est pestilentia affectos haud
 aliter angimorūque, ac eos, qui ex febre, quam vocant mali-
 gnā, intereunt . Sanè autem nihil peculiare est quod mire-
 mur in peste præter contagium, cuius vi gliscit illa in dies ser-
 pitque, & vrbes importuna clade deuastat; cœtera enim mali-
 gnis plerumque febribus sunt communia . Immo verò disse-
 ctione compertum habemus iisdem prorsus signis notisque in-
 uista esse eorum viscera, quos seu pestilentia, seu maligna febris
 peremit; quippe vtrobique videre est aluum, intestina, præ-
 cordia, & omnia planè viscera purpureis, aut liuescentibus pu-
 stulis vndiquaque conspersa; sanguinemque in dextero præter-
 ritim cordis ventriculo concretum, atque in duriusculam nat-
 sam coactum . Quæ cum ego obseruassē cœpi mecum qua-
 rere num eiusmodi morborum causa statuenda sit in halitu
 spirituque illo, qui continetur in sanguine, & vitam salutarem-
 que calorem vniuerso corpori infert . Et verò suspicatus sum
 omne vitium in sanguine esse, mortemque ex illius corruptio-
 ne pendere . Corruptam autem sanguinem dico, non quod oculo-
 rum iudicio putris, & in alienam naturam versus mutatus-
 que videatur; sed quod vitali illo halitu pereunte euandus fiat,
 facileque concreseat in grumos, atque adeo nequeat e dextero
 cordis sinu in sinistrum trajci . Hinc verò liquet causa conta-
 gij; quippè halitus expirationesque à morbido corpore exha-
 lantes circumfuso aeri permiscuntur, eique lethale virus com-
 municant . Ex quo colligitur pestiferam contagionem facilius
 propagari in aere puro, ac tenui, quam in crasso, atque con-
 creto; haud aliter atque experimur in effluuio, seu vi illa quæ
 succinum pleraque corpuscula ad se conuertit, & rapit . Possē
 autem

autem hic ostendere qui fiat vt loca, & pleræque regiones certis quibusdam temporibus pestilentem contagionem suscipere, aut proferre non queant: Sed missa hæc faciam ne in otiosis disceptationibus nostra teratur oratio. Porro ne nihil videar de curatione pestis attingere, fateor satius esse languentes naturæ, quàm medicinæ concredere; quandoquidem Medici pernicioſa plerumque adhibent remedia, pestiferoque halitu polluti ipsos interdum sanos inficiunt. Huc accedit quod nonnulli medicorum industriæ fidentes incautius agunt, seque periculis committunt audacius: Cum tamen nullum sit præstantius aduersus diram pestilentia cladem præsidium, quàm cauere ab his omnibus, quæ lethali halitu fuerint inquinata. Cum dixisset Stelliola, facta est omnium admurmuratio. Sed Momus ad me conuersus multa percunctabatur de his, quæ ego in nouissima pestilitate obseruaueram. Tandem verò iubente Mercurio cœpit sapientium responsa perscribere, vt Apollinis mandatis satisfaceret. At ego interea epistolam hanc festinationis plenam ad te scripsi. Vale & amicis nostris Baptista Capucio, & Leonardo à Capua meo nomine salutem dicito.





TH. CORNELIVS

Francisco Glissonio , & Thomæ
Vvillis. S.



Peruenire nuper in manus meas perelegantes vestri Commentarij de Hepatis anatome , itemque de Fermentatione , atque de Febribus , quorum lectione mirificè sum delectatus: ex his enim perspicere mihi videor vigere in florentissimis vestris Academijs Scriptores , qui ad illustrandam illam Physiologiae partem , quæ ad Medicinam pertinere creditur , studium ingeniumque viriliter conferant . Neque verò id doleo , quod nonnulla ex his , quæ meditatus olim fueram , atque in Progymnasmatibus descripseram , à vobis prius fuerint euulgata : quin mihi maxime gratulor , quòd sentiam cogitationes meas cum vestris observationibus mirabiliter conspirare . Ego sanè ab hinc annos duodecim animaduertèram corpus non sanguine augescere , atque nutriri , sed alio quodam succo , qui secretus à sanguine per membranas , & nervos in partes diffunditur : huius autem coniecturæ argumenta non modò in Progymnasmatibus iam pridem sum persequutus , sed compluries etiam indicaui amicis cum nostratibus tum exteris ; præsertim verò Arnolde Huiberto Batauo , & Erasmo Bartholino , alijsque ex Dania doctissimis

viris,

viris, qui ea tempestate peregrinantes Neapolim aduenerant
 Verum præter animi sententiam euenit ut Progymnasmatum
 editio, quam aliquandiu consultò procrastinaueram, tandem in
 annum prope nonum dilata fuerit: quod quidem mihi graui-
 ter molesteque ferendum fuit ob eam præcipuè causam, quod
 interea plerique ex ijs, qui mihi ad hæc scribenda stimulos ad-
 mouere e viuis exceßerint: at enim nihil me mouet, quod vi-
 deam aliquam inuentionis laudem mihi præceptam; nec profe-
 ctò mea commenta mihi tanti sunt, ut iniquo animo patiar ea
 prius ab alijs, quàm à nobis promulgari. Cæterum vos ego non
 solum hortor Clarissimi viri, sed etiam obsecro ut quam insti-
 tuistis viam alacriter sequamini: nam quantum opinione au-
 guror, non despero fore, ut multa ex his, quæ obscuritate in-
 uoluta naturæ hæctenus latuerunt, tandem aliquando studio,
 atque labore vestro in veritatis lucem proferantur. Scilicet
 magnam mihi spem facit illa philosophandi ratio, quam à vo-
 bis susceptam video, expectationemque plurimam commouet
 multorum ad eadem fermè studia conspirantium consensus, at-
 que communio. Audio enim Georgium quoque Entium, atque
 Varthonum populares vestros non mediocrem in excolenda
 Physiologia operam consumpsisse. Ego verò, ut de me loquar,
 tanta olim industria, tantoque labore ad inuestigandam homi-
 nis naturam aggressus sum, ut ea re aliquam certè gratiam à
 viris in sapientiæ studio exercitatis me initum ire sperauerim:
 sed inuidit mihi fortuna otium vitæque tranquillitatem; nam
 Neapolim aduerso sidere aduectus necesse habui curas, & co-
 gitationes non tam in literas, quàm in salutem incolumita-
 temque meam intendere, atque omnino id agere ne Sycophan-
 tarum calumnijs aliquando succumberem. Dicitur autem vix po-
 test

test quantam mihi inuidiam medicorum turba conflare ex studio nouæ istius minimæque vulgaris doctrinæ, quam ego à præclarissimis nostræ ætatis Scriptoribus institutam, meisque peculiaribus inuentis aliqua ex parte illustratam in hanc urbem primus induxi. Nimirum hoc hominum genus, quoniam quidem literis disciplinisque haudquaquam excultum est, sed totum planè ex fraude, & mendacijs compositum, ab his sibi maxime metuit, qui veritatis cultores sunt, & fucum, ac fallacias insectantur. Sed quid ego vobiscum de nequissima gentis perversitate conqueror. Vos quæso viri ornatissimi aliquam dolori meo veniam tribuite, aut saltem concedite, ut meam in hoc volumine exarando negligentiam vobis excusem: nam quædam fateor paulò obscurius memoravi, & multa præterea, quæ longiori explicatione illustrari debuissent strictim, ac leuiter attigi. Integrum autem mihi fuerat enucleatè, & luculenter ea tradere, quæ breuiter summatimque perstrinxi; & hunc ipsum librum magna nouarum observationum, & disquisitionum accessione auctum ampliorem efficere: sed labori operæque parcendum duxi; persuasum enim habui plus inde mihi sollicitudinis inuidiæque quam voluptatis, aut fructus instare. Verumtamen si prolusiones hæc vobis, alijsque sanioris philosophiæ studiosis probare intellexero, enitar profectò ut cæteras meas cogitationes libris aliquando complectar. Valere.

F I N I S.